


Fr. Burgerlichi
Francis Petrus
INSTITUTIONUM
LOGICARUM

Libri duo.

Ad. Juventutem
CANTABRIGIENSEM.

Quod *Vetus* est, juvenes, in Relligione sequamur:
Quod placet in Logica, nil vetat esse *Novum*.



CANTABRIGIÆ:
Ex officina *Rogeri Daniel*, Academiæ
celeberrimæ Typographi. 1647.

~~III 2161~~

~~Phil 5041.25.2~~

~~TP 3120.3.30A~~

Illustrissimis ac Potentissimis Dominis
DD. ORDINIBUS
Hollandiæ & Westfrisiæ.

Itae res sunt, Illustrissimi ac Potentissimi Domini, quæ, præ cæteris, utilitatem maximam adferunt humano generi, & gloriam immortalem iis, qui earum peritiam adepti sunt; Arma videlicet & Literæ. Et armorum quidem usu facillè careremus, si homines ita viverent, ut suis rebus contenti, aliena neque invaderent, neque affectarent. Nunc verò quoniam ita comparatum est, ut multi principes felicitatem suam in imperii magnitudine & opulentia constituentes, aliorum limitibus imminuant, eosque sæpe levissima, sæpe etiam nulla de causa, pulso legitimo Magistratu, armatâ manu invadunt & occupant; armorum peritia & disciplina bellica jure optimo commendatur, tanquam res in omni Republica apprime necessaria, ad fines suos, arasque & focos, hoc est, religionem, libertatem, parentes, conjuges, & liberos, adversus vim externam defendendos. Neque ulla gloria aut præmia minùs esse judico indèbita, quàm quæ decernuntur iis, qui mortis pericula infrasto animo adeunt & sustinent, ut civium suorum capita periculis eripiant, & adversus hostium violentiam tueantur. Literarum scientiam, non hominum pravitas, sed propria præstantia necessariam fecit humano generi: & gloria, quæ hinc paratur, non minùs fortè laboriosa est, sed tamen innocentior, & magis tutata, quàm quæ nascitur ex armorum disciplina. Et quàmvis hæc duo studia admodum diversa sint, & rarò, ac non nisi in maximis hominibus, juxta reperiuntur: ambo tamen ad Reipublicæ felicitatem plurimum conferunt, alterumque alterius operam requirit. Nam literæ non facillè, nisi in otio florent, atque in rebus tranquillis. Otium autem & tranquillitas Reipublicæ conservari perpetuò non potest sine armorum præsidio. Jam, vice versâ, armorum incertus & sæpe infelix eventus fit, si absque consilio prudentiæque tractentur. Et

quam-

Dedicatio.

quamvis prudentiam usus ferè generet, & experientia, tamen plurimum à literis promovetur. Atque hanc ob causam judicavit Plato, beatas fore Respublicas, si aut Philosophi, hoc est, literati, iidemque rerum gerendarum periti, imperarent, aut qui imperant, ità rebus gerendis vacarent, ut etiam darent operam Philosophiæ. Nam profectò iniqua sunt eorum & indocta judicia, qui literatos ad nullam rem idoneos esse existimant, quàm ad erudicendam juventutem: cum magnum habituri sint à literis auxilium ad prudentiam, si animum ad Rempublicam, & ad res gerendas adjiciant. Habent hoc literæ prætereà, ut præstantissimorum hominum gloriam æternis monumentis, ad posteros transmittant. Quam rem Alexander Magnus tanti aestimabat, ut Achillem felicem prædicaret quòd natus esset Homerus, qui tam præstanti poemate illius facta descripsisset, & nomen æternitati consecrasset. Neque verò defunctis solum ad gloriam profuit literæ, sed & posteris ad usum. Quàm multa sunt à Græcis atque à Romanis præclare gesta, quæ feliciter imitamur! Quàm multæ leges ab iis latæ, atq; artes inventæ, humano generi utilissimæ! Quæ tamen omnia ignoraremus, si literarum præsidio non essent ad nos propagata. Utraque vos studia, Illustrissimi & Potentissimi Domini, in vestra Republica felicissimè conjunxistis. Nam & armorum gloriam, & militaris disciplinæ laudem, ità vestræ Reipublicæ fecistis propriam, ut omnes Principes, etiam hostes vestri, aut apertè profiteantur hæc parte se à vobis superari, aut saltem id tacitè significant, dum vestram disciplinam, ut exemplar, imitantur. Neque verò successus defuit tam præclaris institutis. Etenim provincias vestras, excusso intolerabili Hispanorum jugo, adversus potentissimum totius mundi Principem, non modò feliciter defendistis, sed & limites protulistis, & ad induciarum conditiones petendas eum compulistis. Literarum decus ex eo statim tempore, quo Reipublicæ forma constituta fuit, ità hinc emicuit, ut nullibi magis. In hac enim ipsa Academia, quæ Leidensibus indulta fuit, tanquam præmium durissimæ obsidionis fortissimè toleratæ, ab ipsis statim incunabulis, ità omnium laudabilium disciplinarum studia florere inceperunt; ut jam diu hæc una omnes alias Academias, incredibile dictu, quàm longè post se relinquat; ut ipsa Musæ domicilium hinc fixisse videantur

Dedicatio.

tur. Ex hac Bonæ mentis æde, quàm multi, quàmque præclari viri prodire, qui Reipublicæ atque Ecclesiæ Christi, quæ in ea colligitur, præclaram operam navaverunt, atque etiamnum fideliter navant! Plerique vestram confiteri non crubescetis, non multò minùs vos Academiæ debere, quàm Respublica debet prudentissimis vestris & saluberrimis consiliis. Et nè quid hac in parte deesset, cum intelligeretis plurimum nocere juventuti ad parandam eruditionem, Scholarum diversa instituta; laudatissimum profectò & saluberrimum decretum fecistis, ut omnes Scholæ vestræ provinciæ eodem modo regerentur, iidem linguarum & artium autores ubique legerentur; nè, si fortè necesse sit, pueros ad alias Scholas ablegari, institutorum & librorum diversitas, eorum profectum, quod hæcenus factum est, plurimum remoretur. Ordinem & instituta Scholarum, librorumque prælegendorum catalogum, hujus Academiæ Professores per Deputatos suos conscriptum, & omnium judicio examinatum vobis exhibuerunt. Et, quò minùs incommodi hæc reformatio secum traheret, Nobiliss. & Ampliss. D. D. Curatoribus Academiæ & Consulibus civitatis Leidensis, dedistis in mandatis, ut Deputatos utriusque Synodi, omnesque Hollandicarum Scholarum gymnasiarchas, Leidam evocarent, eorumque judicia unà cum Professoribus ad eam rem ab Academico Senatu designatis, audirent & examinarent, ut ex omnibus iis, quæ aut à delegatis Professoribus, aut à Deputatis Synodorum, aut à gymnasiarchis essent observata, generalis ordo conciperetur, quem omnes Scholæ deinceps in puerorum institutione sequerentur. Placuit tum fortè D. D. Curatoribus, Consulibus, & Professoribus deputatis, ut iudicium ego quoque dicerem de Logica quæ in omnibus Scholis doceri deinceps posset; cumque de Organo Aristotelis, deque Logica Rami, Crellii, Bertii, Hunnæi, Molinci, Keckermanni, aliorumque, pluribus dixissem, quid mihi videretur, & in singulis aliquid observassem, cur minùs idoneos judicarem, quæ in Scholis perlegerentur, injunctum mihi fuit, ut Logicam formarem ad eum modum, quem judicarem Scholis fore convenientissimum. Formavi igitur hos duos Institutionum Logicarum libros, in quibus omnia hujus disciplinæ præcepta, quæ quidem usum aliquem habent, ita sum complexus, ut profecti nihil ulterius videantur desi-

Dedicatio.

derare, præter exercitationem. Et ut etiam tyronibus consulerem, ex hisce Institutionibus Synopsin excerpti, quæ incipientibus tradenda sit. Hosce Logicarum Institutionum libros, Illustrissimi & Potentissimi Domini, vobis submisso animo offero, dedicoque: vosque obnixè rogo, ut hunc ingenii industriaeque meæ fœtum benignè suscipiatis, quem vestro decreto atque auctoritate conceptum atque efformatum, bono publico enitor, atq; edo in lucem. Et sanè, cùm multorum iniquis reprehensionibus, vel etiam calumniis hunc fœtum obnoxium fore præagrem, periculum esse judicabam, nè in ipsis incunabulis opprimeretur, nisi prodiret vestrà auctoritate munitus. Nec dubium mihi est, quin ob eas ipsas rationes, quibus permoti eandem disciplinam in omnibus Scholis observandam decrevistis, hæc meas Institutiones Logicas æqui bonique consuletis, vestroque patrocinio tutas esse benignè patiemini, quas ipsi Scholis & luci destinastis. Dum hæc fiduciâ me sustento, Deum Opt. Max. supplici mente precor, ut Vos, Rempublicamque vestram suis beneficiis cumulet, eamq; adversus hostium vim & insidias protegat, vestràque omnium consilia dirigat ad regni sui instaurationem, vestrumque omnium æternam salutem. Lugduni Batav. xv. Septemb. 1626.

Illust. & Potentiss. Dominationibus vestris

obsequio deditissimus

FRANCO BURGERSDICIUS.

Prefatio

Prefatio ad Lectorem.

ANxia, sollicitudo quæ vanitatis plenissima res est, benevole & docte lector, ingenii sui literata monumenta vulgantibus, posthabita publicâ utilitate, gloriam vulgi judicio temerè delatam, laboris sui industriæ quæ operæpretium existimare. Nam & gloria per se inanis est, si honestâ utilitate, quæ ex virtute & sapientia proficiscitur, non fuerit subnixa: & tam varia sunt atque incerta de scriptis, quæ quotidie eduntur, judicia, ut nihil sit tam miserè atque frigidè conceptum, quod non à multis celebretur; nihil contra tam doctum ac limatum, quod non inveniat reprehensores suos. Plerique enim omnes, qui de aliis judicium censorio supercilio ferunt, τὰς παλαιὰς μάχας ἢ τὰς λόγων μάχας ἔχοντες, nihil probant, nisi quod tritum est, quodque ipsi vel à præceptoribus suis hauserunt, vel suâ industriâ didicerunt. Quæ à recepta disciplina vel latum unguem recedunt, aut ab eo tramite quem in studiis suis secuti sunt, ea statim præjudicio damnant; non ratione, sed affectu in consilium adhibito. Cordati scriptores gloriam quidem non contemnunt (neque enim illis cornea fibra est) sed neque affectant, si à virtute & à publica utilitate sejuncta est. Quin gloriam non ducunt esse gloriam, nisi quæ à peritis æstimatoribus sibi ob virtutem tribuitur; cæterum securi de temerariis vulgi judiciis. Horum hominum morem secutus sum in adornandis hisce Logicarum Institutionum libris, dedique operam, ut ad legentium ac discientium utilitatem potius essent comparati, quàm ad ambitionem. Quod an consecutus sim, tibi, docte ac benigne lector, lubens judicandum relinquo. Quod tamen quò fiat à te tutius accuratiusque, paucis hæc tibi præfatione exponam, quæ fuerit ratio consilii mei in hisce Logicarum Institutionum libris formandis & edendis. Mirum enim haud dubiè tibi videbitur, in tanta doctorum virorum multitudine, Qui Logicas Institutiones reliquerunt, neminem idoneum repertum esse, qui in omnibus Scholis prælegeretur: mihi autem uni, homini novo, certè non celebri, hoc delatum esse, ut novam Logicam conderem, quæ, pulsus autoribus receptis, ubique deinceps obtineret. Cùm ab Illustr. ac Potentiss. Hollandiæ Westfrisiæque Ordinibus decretum esset factum de scholasticæ disciplinæ reformatione, & inter alia constitutum, ut iidem linguarum & artium autores ubique prælegerentur, cùmque non ejusdem autoris Logica (ut de cæteris libris nihil dicam) esset ubique recepta, sed alicubi doceretur Augustinus Hunnæus, aut Fortunatus Crellius; alibi Ramus, aut Bertius; non uno loco Molineus, aut etiam Keckermannus: deliberandum fuit, cujus Logica cæteris omnibus prælata ubique reciperetur. Et quamvis eorum, quos nominavi, autorum Institutiones haudquaquam contemnendæ sint, neminem tamen ita cuiquam eorum obnoxium fore confido, qui non judicet aliquid in eo esse, quod possit emendari. Etsi autem ab ingenio alienum sit, aliorum scripta carpendi animo examinare, & vitia potius aut hallucinationes, quàm virtutes & laudes commemorare; nunc tamen, cùm publica causa agitur, facilè me veniam impetraturum confido, si liberè & candidè exposuero, quænam in eorum Logicarum

Præfatio ad Lectorem.

gicorum Institutionibus, quas dixi prælegi in Scholis solitas, desiderari existimem. Quæ si efficiam, candide lector, ut & tibi videantur, haud invitus concedes, optimo consilio factum esse, ut nulla ex iis omnibus Scholis distineretur, nisi accuratè recensita. Singulas Logicas ad censuram revocare, non præfationis, sed commentarii opus est. Per classes eundum, quæ sine & scribendi instituto differunt. Omnes enim Logicarum autores ad tres ferè classes revocari possunt. Quidam enim Aristotelem sequuntur *et* *modis*, ejusque Organon contrahunt, & præcepta inde deprompta eadem methodo disponunt, idoneisque exemplis illustant. In hac classe numerari possunt Hunnæus Crellius, Berrius, Molinæus, alique quamplurimi. Quorum libri Logici accuratè potius Isagogæ sunt, eæque utilissimæ ad doctrinam Aristotelis compendiosè percipiendam, ejusque Organon facilius intelligendum; quàm integra systemata Logicarum Institutionum. Ego quidem singulos Aristotelis libros admirror: sed tamen universam Logicam libellis istis, quibus Organon constituitur, ut credam contineri, nemo faciliè à me impetrabit. Nam primò persuasissimum mihi est, libros Logicos, qui ad nos pervenerunt, non eo ordine conscriptos atque editos fuisse ab Aristotele, quo nunc sunt dispositi; neque etiam eo consilio, ut universam disciplinam Logicam absolverent. Nam quia posteriores libri in prioribus citantur, nullaque inter se connexionem cohererent, cuilibet attentius rem consideranti manifestum est, librum Categoriarum (si modò sit Aristotelis) & librum de interpretatione, item Analytica, Topica, & librum de Sophisticis elenchis, esse separata quædam opuscula, quæ diversâ occasione ac fine, diverso tempore sunt ab Aristotele in lucem emissa. Præsertim cum Aristoteli sit usitatissimum, libros suos, quos quidem ejusdem operis esse voluit, aptis transitionum formulis connectere. Interpretibus ergò debemus istam operam, qui omnes Aristotelis libros ad Logicam pertinentes collegerunt, unòque volumine ediderunt, idque eâ methodo, quæ non cum ordine editionis, sed cum Logicæ natura maxime congrueret. Huc accedit, quòd plurima in Organo desiderantur, quæ tamen ad plenam Logicæ constitutionem sunt necessaria. Nam cum quatuor sint instrumenta Logica, definitio, divisio, syllogismus, & methodus, Aristoteles tamen de uno tantùm agit syllogismo. De methodo nihil omnino præcipit; cum tamen ipse methodi leges servet accuratè. De definitione nonnihil quidem tradit, sed aliud agendo, ac quatenus sedes est argumenti topici, aut apodictici: non verò, quatenus solvit quæstionem, quâ quæritur, quid res sit. De divisione agit multò parcè, ut eamque nominat potius, quàm explicat. Hanc ob causam factum est, ut ii, qui Aristotelis vestigia præse sequuntur, Logicæ naturam & usum solius syllogismi doctrinâ circumscribant; ex syllogismi consideratione, Logicæ definitionem ac distributionem petant; quasi syllogismus ejusque fabricatio toti Logicæ, ut ad æquatum subjectum atque finis, responderet. Atque hoc quidem rectè, si cui propositum esset Organon Aristotelis interpretari, aut illius exhibere compendium: at qui Logicarum Institutionum plenum systema velit efformare, cum necesse est ab hoc instituto nonnihil recedere:

Prefatio ad Lectorem.

dere : quia non iidem limites sunt plenæ Logicæ, & Organi Aristotelici. Quin nec syllogismi doctrina plena est in Organo: Nihil enim ibi præceptum de syllogismis compositis, sive hypotheticis ac disjunctivis; nihil etiam de propositionibus compositis, ex quibus isti syllogismi formantur. Quæ cum videret Boethius, qui primus in Organon Aristotelis Latine commentatus est, tractatum conscripsit de syllogismis compositis, de quæ arte dividendi ac definiendi, Logicamq; hisce additamentis fecit pleniorẽ. Quid porro dicam de quamplurimis præceptis Organi Aristotelici, quæ quidem, ut non sint inutilia cognitu provectionibus, sunt tamen non necessaria incipientibus, in quorum gratiam Institutiones compendiosè scribendæ sunt; Quàm multa sunt in Analyticis prioribus ac posterioribus, quæ tutius utilisque præteruntur, quàm pueris inculcantur! Paucis capitibus comprehendipotest horum librorum substantia, ac necessaria præcepta. Libri Topici sunt quidem variâ eruditione, multisque utilissimis ac necessariis præceptionibus repleti: sed habent tamen plurima superflua. Et quæ in iis occurrunt utilia (quæ sunt sanè plurima) ea poterant compendiosiore magisque perspicuâ methodo tradi. Idem iudicium esto de libro Sophisticorum elenchorum. Nec tamen hæc Aristoteli imputanda sunt, sed tempori. Praxis enim Logica tum temporis potissimum consistebat in colloquiis ac dialogis (*κατὰ τὴν ἐκκλεσίαν* vocat Aristoteles) uli de variis rebus, ac potissimum de sectarum diversis hypothesebus in utramque partem probabilibus interrogatiunculis & responsiunculis disputabant, idque ad opinionem, imò ad pompam magis atque ostentationem, quàm ad sapientiam ac veritatem. Ad hunc finem libri Topici & Sophistici potissimum collineant. In Topicis enim traduntur præcepta disputandi ex iis quæ reverà sunt probabilia in Sophistico, ex iis quæ probabilitatem fucatâ fronte mentiuntur, In Analyticis traditur ratio disputandi seris, veramque scientiam adipiscendi. Hinc est, quòd sæpe Analyticum disputandi artificium Topico ad eum modum opponitur, quo accurata quælibet opponi solent iis, quæ tantum leviter adumbrata sunt. In libro de Interpretatione nihil ferè non est necessarium: in libro Categoriarum, pauca, quæ nempe existant cap. 14. & 15. cætera ad Logicam pertinent; sed tamen non eo ordine tradenda sunt, si systema Logica:um Institutionum formandum sit. Cum enim hic liber dividi soleat in protheoriam, theoriam, & hypotheoriam, (vulgò, in antepredicamenta, prædicamenta, & postpredicamenta) hæ partes tam diversam doctrinam continent, ut per leges methodi coherere non possint in legitimo systemate. Ex quibus omnibus luce meridiana clariùs liquet, non posse rectè Logicas Institutiones formari ab iis, qui Aristotelici Organi methodum & modum *κατὰ τὸν ὅρον* sequuntur. Et quanquam hæ incommoda ab eruditis viris, & præcipuè à clarissimo Molinæo emendata sunt, qui & superflua resecur, & omissa magnâ parte reposuit, & ordinem restituit; nihilominus tamen nondum videtur illud assecutus, in quo accurati hominis animus possit acquiescere. Nam ut præteream, quòd prædicabilia & categorias ad Logicam referat, non ut partem (quemadmodum fieri debebat) sed ut doctrinam Logico utilem, & introductionem

Prefatio ad Lectorem.

introductionis instar toti arti præmittendam; Logicam sic definit ac dividit, ac si in ea nihil aliud spectari deberet, quàm syllogismus. Unde fit, ut doctrinam de definitione divisione, ac methodo, ita syllogisticis præceptis intexat, aut in appendice annectat, ac si per se non mererentur locum: cum tamen hæc quatuor rationis nostræ instrumenta, quatuor debeant distinctas partes constituere. Præterea, in parte communi, ubi agit de syllogismo in genere, deque enunciatione, tanquam de communi materia syllogismi, ita brevis est, ut hæc pars alteri admodum sit dissimilis, in qua præcepta tradit de syllogismo in certis materiæ & conditionibus spectato, quæ in Topicam, Apodicticam, & Sophisticam dividitur. Transeo ad secundam classem Logicorum; in qua familiam ducit Petrus Ramus, homo eleganter quidem doctus, sed audax, temerarius, & in antiquitatem sanè quàm injurius. Hic cum receptam aliquot seculis philosophandi rationem meritiò improbareret, quàm non solum in Aristotelis verba, qui Philosophiam profitebantur, singuli jurabant; & errorem, imò crimen penè hæreseos judicabant, ab illius decretis vel latum unguem recedere; sed etiam Philosophiæ studium in acutas aliquot & spinosas quæstiones commutaverant, de quibus barbarè, maximèque animi contentione, non aliter, ac si de religionis summa ageretur, in Academiis disputabant, relicto interim multiplici usu, qui ex eo in humanam vitam emergere debebat: ut depravatum hunc morem emendaret, dum voluit vitare Scyllam, ut dici solet, incidit in Charybdim. Nam dum in eo est, ut licentiosam illam disputandi pruriginem coerceret, barbarièque Scholis atque Academiis, landabili sanè ausu atque incepto, eliminaret; disciplinas Philosophicas, & imprimis Logicam, nimis arctis finibus circumscripsit, ac penè corruptit. Nam dum brevis esse laborat, non solum fit obscurus, sed etiam (quod obscuritate deterius est) mutilus: atque insuper sæpe abijt à veritate. Nam non solum Aristotelem non nimis anxie religiosèque secutus est, quod tum ab aliis fiebat; sed etiam illius scripta, quæcumque pernit ratione infectatus, in contemptum odiùmque adducere conatus est; clamitans nihil esse in illo præter inanem garrulitatem, pauca præcepta genuina, nullam methodum. Hoc animo atque affectu Logicam concinnavit, (ut de cæteris disciplinis nihil hoc tempore dicam) non ex præceptis Aristotelis, sed ex Cicerone potissimùm, aliisque, qui Stoicos potius, quàm Peripateticos secuti sunt. Atque hac in parte quidem institit vestigiis Laurentii Vallæ, Rodolphi Agricolæ, Ludovici Vivis, aliorumque, qui Peripateticam doctrinam jam antè contempserant, aliòque modo ac methodo Logicam efformarant. Egit quidem illud Ramus majori animo atque audacia, sed successus defuit ausus. Duo autem sunt in Rami disciplinis, quibus maximè se jactat; methodus, & usus. Hoc enim præ cæteris videtur studuisse, ut omnia præcepta inter se cohererent, suisque locis singula ponerentur; & nihil in disciplinis collocaretur ejus usum apud cordatos scriptores non deprehendisset. Sed dum hisce rebus nimis anxie attendit, multa præterit, quæ tamen ad artis perfectionem necessariè requiruntur. Duo enim genera præceptorum in Logica tradenda sunt. Quædam per se usum habent in rebus cognoscendis, mentisque notionibus

Prefatio ad Lectorem.

bus vel voce vel scripto interpretandis talia sunt omnia, quæ de definitione, divisione, syllogismo & methodo præcipiuntur. Alia eò dantur, ut materia sint, è qua hæc rationis nostræ instrumenta confinguntur. Hæc in optimis quibusque scriptoribus frustra à quæruntur, ut qui non de arte scribunt, sed ex arte. Quæ autem in Rami Dialecticam desiderantur, ex plurimis hæc sunt præcipua: Primò, Dialecticam contexat ex nudis definitionibus & divisionibus. In quo profectò peccat admodum largiter. Nam sicut regulas supervacuas esse judico, quæ in definitionibus continentur; ita necessario definitionibus subnectendas esse censeo, quæ & usum artis continent, & tamen ex definitionibus à discipulis non possunt satis commodò colligi. Doctrinam de syllogismo apodictico unâ liturâ expungit, nullumque discrimen ponit in syllogismorum effectis: cum tamen alii firmiter animi assensum generent, alii infirmum, ac nihil ferè præter suspicionem. In doctrina Inventionis solos argumentorum titulos tradit, & obiter explicat: canones Judicii præterit, quibus argumentorum, quæ ex iis locis eruantur, consequentia firmatur, quibusque discrimen firmiter & infirmorum argumentorum explicatur. Nihil tradit de Sophisticis elenchis: quorum tamen doctrina, si non necessaria est peritissimis, saltem utilis est discipulis. Etsi enim illi solvere soleant sophismata haud infeliciter sine regulis Sophisticis; imperitiores tamen magnum adjumentum habent in ipsis sophismatum locis, quæ causas aperiunt fallaciarum. De categoriis aliisque minutis litteris non movero: illud gravius esse duco, quod duplicem definitionis usum non distinxerit. Nam cum definitio adhibetur propter se, solvit quæstionem, quâ quæritur, quid sit res: cum verò sumitur ut medium syllogismi, solvit quæstionem, quâ quæritur, an sit res, siye, an ita, aut talis sit. Quæ certè sunt effecta diversissima, & omnino distinguenda. Postremò, dum Ramus nimis anxie sectatur dichotomiam, discipulorum memoriam onerat magis quàm promoveret. Quantò satius fuerat trimembri aut quadrimembri divisione multarum subdivisionum necessitatem redimere. Ob has ergò rationes videbatur inconsultum, ut aut Ramus, aut quisquam alius ex ista disciplina, Scholis præficeretur. Superest tertia classis: in qua Keckermannum, aliosque colloco quamplurimos, qui doctrinam Aristotelis cum doctrina Rami commiscuerunt, & ex utriusque disciplinâ Logicam concinnarunt; Aristotelem materiam, Ramo methodum suppeditante: & quod in uno desiderabant, id ex altero supplebant. Hæc ratio Logicam scribendi, ut superioribus præstantior est, ita omnes ferè qui hoc institutum secuti sunt, diligentia & methodi *necessaria* superavit Keckermannus; idque consecutus est, ut multi ejus Logicam tanquam normam artis sine secuti. Nam & ordinatæ methodi præstantiâ, & præceptorum utilitate Ramum innotatus est, & quæ in Ramo desideravit, ex aliis mutuatus est, vel à se dedit. Sed tamen & hæc multa multi desiderant, qui tamen totum illius institutum ac consilium approbant ac commendant. Nam primò, ingens illa subdivisionum multitudo, ex qua laudem affectasse videtur, discipulis nimis quàm molesta, rerum intelligentiam plurimum impedit. Secundò, in definitionibus Logicis (nam cæ-

Prefatio ad Lectorem.

teras disciplinas non attingo) non raro nugatur: veluti cum causam definit, à qua causatum pendet; causatum, quod pendet à causa; totum, quod parte, habet: cum interim definitiones Aristotelis longè accuratissimas sæpe prætereat. Tertiò, nimis copiosus est in conqui-
rendis canonibus, in quibus Ramum diximus nimis esse parcum. Nam
legentis otio abuti videtur, qui eas regulas tradit, quæ in definitione
rei apertè continentur, aut certè debebant contineri; vel quæ ex gene-
ralioribus regulis ultro sequuntur. Et licet Keckermannus egregiam
operam navaverit in colligendis ac dirigendis affectionibus simplicium
thematum, easque animadverterit non eo solùm fine considerandas
esse in Logica, ut sint media syllogismorum, sicuti factum erat à Ramo,
sed etiam propter alios usus: eos tamen non satis accuratè tradidit.
At notiones sive affectiones thematum simplicium, inservire dirigen-
dæ primæ mentis operationi, quæ est nuda rerum apprehensio sine af-
firmatione aut negatione; quod quidem verissimum est: sed dum ex-
plicat, quomodo prima mentis operatio hisce notionibus dirigatur, in
eo decipitur. Res ita se habet meo quidem arbitrato; Cum mens
nostra duobus potissimum modis in rerum simplicium apprehensione
possit aberrare, nempe, ut aut non assequatur rei essentiam, sed exter-
nas tantùm rei notas; aut ut eam confusè concipiat, & veluti totum,
quæ debet concipi distinctè, ac per partes: duo etiam remedia debuit
Logica, quæ ars est mentem dirigendi, his duobus veluti morbis oppo-
nere; definitionem & divisionem. Nam cæteræ notiones Logicæ non
aliter dirigunt primam illam mentis operationem, quàm quatenus ad
hæc duo instrumenta revocari possunt, tanquam materia ex qua ea
conficiuntur. Etenim non video, quid cognitio generis, speciei, diffe-
rentiæ, totius ac partium, causarum & effectuum, subjecti, adjuncti,
consentaneorum, dissentaneorum, oppositorum, priorum, posteriorum,
& si qua sint alia, ampliùs prodesse possit menti ad res bene apprehen-
dendas, quàm ut intelligat definitionem earum, sive quid sint, & divi-
sionem. Definitionis appellatione etiam descriptionem, & definitio-
nem nominalem intelligo: & sub divisione etiam distinctionem com-
prehendo. Efficiunt quidem prædictæ notiones, nè aliud pro alio ap-
prehendatur: sed & illud definitionis est. Nam quæstiones de eodem
& diverso pertinent ad definitionem. Ex. gr. si quis notionem artis tri-
bueret scientiæ, nulla is in re hallucinaretur, nisi in artis, scientiæque
definitione. At si quis affirmatè statueret, artem esse scientiam, is non
esset error apprehensionis, sed iudicii, ad quem corrigendum inventus
est syllogismus. Longè igitur alia ratio definitionis ac divisionis esse
debet in Logica, quàm cæterarum notionum. Nam definitio & divisio
per se mentem dirigunt æquè ac syllogismus, & præcepta de methodo;
cæteræ notiones, non nisi quatenus ad definitionem, divisionem, syllo-
gismum aut methodum revocantur. Quæ distinctio maximi momenti
est ad usum præceptorum Logicorum intelligendum, & ad systema
Logicum secundùm artis naturam formandum. His postremo loco ad-
jicio, quòd dum Keckermannus syllogismum verum distinguit in topi-
cum, dicticum, & apodicticum, de quæ iis seorsum agit, præcepta au-
geat sine necessitate. Non est mihi dubium, quin loca topica nunc ar-
gumenta

gumenta firma suppeditent, quæ non quidem efficiunt scientiam, sed certam tamen cognitionem; nunc infirma admodum, & quæ vix sufficiunt ad generandam opinionem aut suspicionem: sed non erant tamen hæc sejungenda. Potest enim discrimen illud, aut ipsis inferi canonibus, aut exemplis idoneis, aliâve ratione explicari. Hæc sunt præcipua, benigne lector, quæ in Keckermanno notavi. Nam de singulis differere nimis operosum foret. Quæ postquam in confessu Nobiliss. & Ampliss. D D. Curatorum Academiæ, & Consulum civitatis Leiden- sis, qui de Scholarum disciplina atque ordine unâ cum quibusdam ex Professoribus à toto Senatu Academico ad eam rem deputatis delibe- rabant, sententiam rogatus, prolixè disservissem; injunctum mihi fuit, ut Logicam formarem, in qua ea omnia incommoda vitarem, quæ judicabant à me in aliis non perperam fuisse observata; quæque plena foret, & tamen non prolixa. Quod etsi difficillimum mihi fore judi- carem (nam multò facilius est in aliis notare, quæ requirunt emenda- tionem, quàm ita emendare alios, ut nulli te judicent erravisse) susce- pi tamen hanc provinciam; sed eâ lege suscepi, ut omnes ii, qui ex Pro- fessoribus ab Academia fuerant ad Scholasticum negotium deputati, unâ mecum congregati examinarent quæ scripsissem; & si quid non satis accuratè dissum judicarent, id continuò mutarem aut expunge- rem. Hoc ergò consilio hæc Institutiones formavi, in eòq; hanc rationem secutus sum; Præcepta potissimum hausi ex Aristotele, eaque (quantum fieri potuit) extuli ipsis verbis Aristotelis. Neque verò ea solùm ex Organo petivi, sed ex omnibus aliis libris, ubi aliquid oc- curreret quod esset Logicum. Quinetiam definitiones, aliâque quæ- dam necessaria, Græcè expressi: ut hac ratione & linguæ Græcæ as- suecant pueri, & præparentur ad legendum Aristotelem. Et nè quid deesset, præcipuos Logicos contuli, & cum iis, meditationes meas, ut indè suppeteret, quod in Aristotele desiderabatur. Dedi præterea ope- ram, ut omnia, quantum possem, perspicuè efferrem. Exempla usur- pavi obvia, eaque, vel conficta, vel ex bonis autoribus petita, cum in iis ratio præceptorum Logicorum manifestè conspiceretur. Quanquam enim omnium præceptorum usus ex bonis autoribus possit illustrari; tamen ad puerorum captum accommodatius est, nudis exemplis præ- cepta declarare, quàm testimoniis eorum autorum, in quibus maxima laus est, artificium celare. Dabimus tamèn aliquando commentarium, si Deusnaverit, in quo & Logicæ naturam præceptorumque veritatem altruemus, eorumque usum ex optimis quibusque scriptoribus, in gra- tiam provectorum, demonstrabimus. Methodum petii ex ipsa artis natura. In quo tamen ex parte secutus sum institutum clarissimi viri Marci Duncani, in Academia Salmurienti Professoris Philosophiæ præstantissimi, & olim collegæ mei conjunctissimi, cujus accuratæ In- stitutiones Logicæ majus auxilium mihi tulerunt in meis Institutio- nibus aptè ordinandis, quàm ullæ aliæ.

Hæc sunt, benigne lector, quæ te scire volui, priusquam ad harum Institutionum lectionem & examen te componeres. Quas si ad nor- mam rationis expendis, libens me tuo judicio subjicio. Et quicquid sit de successu, non dubito, quin consilium meum ac voluntatem de publico bene merendi sis probaturus. *V A L E.*

In viri clarissimi Fr. *Burgesdicii* *Logicam*.

*S*ic comparata fermè res mortalium est,
*S*ut qui laboris plurimum atque industria
*A*d promovenda seculi impendunt bona,
*D*octæque mentis grande & excellens opus
*C*hartis sacratum publico dant usui,
: *H*os à sepulcro consequatur sera laus,
*S*olisque capiant præmium à nepotibus :
*I*tà posterorum est sensus incorruptior,
*S*inceriusque judicat seculum sequens
*Q*uàm turba præsens, quæ per invidentiam
*I*nfensa magnis perpetim virtutibus,
*Q*uas colere non vult, odit. Hæc malignitas,
*L*oliginisque hîc succus excelsos petit
*V*irum, præmitq; spiritus summum ad diem.
*D*iversa *Burgesdicio* dcum meo,
*F*avore quodam cœlitum, sors obtigit ;
*D*ivina cujus scripta, quic par est nihil,
*E*t nil secundum, mox repentè ut prodeunt,
*C*onsensione inusitatâ comprobat
*Q*uicquid *Batavia* eruditorum tenet,
*T*enètque *Leida*. Quæ viritum suscipi,
*E*t ubique mandant omnium teri manu
*P*atriæ parentes, quos penes summa est rei.
*E*rgò hunc beatum jure quis non prædicet,
*Q*ui vivus illis interest nunc laudibus,
*Q*uas ferre paucis funus ac civis solet ?

Petrus Cunæus, F.C.

In *Logicam* clarissimi viri *F. Burgesdiickii* ex publica auctoritate in usum juventutis *Batavæ* conscriptam.

<i>S</i> ummi Ratio nata Parentis,	<i>E</i> t <i>Socraticæ</i> mella <i>senectæ</i> ,
<i>E</i> t, quam ratio peperit summa,	<i>S</i> ed plena tui, prima sub auras
<i>A</i> rs humanæ destina vitæ,	(<i>N</i> amq; immodico dedita ludo
<i>I</i> nconcussi regula veri,	<i>E</i> t sera suam <i>Porticus</i> istâ
<i>A</i> reos nullo mersa profundo,	<i>T</i> rahe firmavit fixitq; domum)
<i>Q</i> uam post <i>Samii</i> consulta senis,	<i>S</i> tagira tulit; Fax errantis

Unica

Unica mentis, pignus cæli,
Et depositum grande Deorum,
Armis quondã sceptrisq; comes,
Non Graiorum Regibus olim
Non Pellæo rerum domino
Ignota, cui domitus fasces
Prætulit orbis: rursusque diu
Labyrinthicis in via gyris
Rerum ignaræ tradita turbæ,
Et barbarie demersa gravi;
Rursus in auras, brevis, & veluti
Pars una tui, sed tota, venis;

Burgersdiickii cura laborsque;
Cui Lugdunum formosa suas
Credidit artes: quem Delphorū
Cortina tulit: cui nascenti
Patrius primum risit Apollo.
Ut post tenebras lata iuventus,
Nusquam ambiguis seducta viis
Nec sideribus distracta vagis,
Postquam reliquæ cessere uni
Noctis comites, comites Lunæ,
Totūmq; aperit lux nostra diem
Unum videat surgere solem.

Daniel Heinsius.

Clarissimo viro, collegæ conjunctissimo, Fr. Burgersdicio,
cū post dissertationes Physicas, & Ethicas, Com-
mentarios Logicos in lucem daret.

BRuta quidem tellus humanos destinet artus:
Materies quoniam corporis ipsa fuit.
Præpete sed penna Ratio se tollit in æthram:
Nimirum celso Spiritus axe venit.
Ergo animæ misera curent sua corpora: Franco,
Mens tua det, Ratio quod sciat esse suum.
Hoc placet: & ternam fundis per secula chartam,
De Sophia triplici quæ tibi scripta fuit.
Naturæ primum mysteria pandere juvit:
Ut doceas Mores, altera cura tua est:
Tertia nunc urget. Præstas, discamus ut omnes,
Quæ Ratio suadet, de Ratione loqui.
Cur metuas rhonchos? cælo labor iste beabit;
Ut qui cælestis sit Rationis opus.
Cui cælum sordet, Ratio cui vilis habetur,
De Ratione librum non amet ille tuum.

Gerardus Joannes Vossius.

Qualiter inſandum tenebris Chaos omnia complet,
 Nec firmata ſatis ponit nova ſemina rerum,
 Nec juſtis ſociata modis, verum undique bella,
 Undique dat ſtrages, cæcòque ſub ordine pergit
 Undique: ſic diſcors animum confuſio quaſſat,
 Qui quicquam didiciſſe vovet, niſi cuncta catenis,
 Dædala quas cudit Ratio, compoſta ligentur,
 Et lumen ſit mentis apex. Modò cognita neſcit,
 Quæ melius tenuiſſe valet, cui pagina ſordet
 Chryſippi, & tantum lallantibus apta Magiſtris
 Creditur, in triviis, atque inter compita parvæ
 Pulverulenta Scholæ. Videas pallere tribunal,
 Attonitâſque ſtupere togas, ſi pegma diſertus
 Verberet, & rabulis pudibunda ſilentia confert
 Harpocrates, digitoque jubet compeſcere labrum.
 Hæc Myſtis ſpinoſa Dei dedit ore rotundo
 Cura loqui, certòſque magis cata concio nexus
 Miratur, nullâ quàm verba ruentia lege
 Si crepet infulſo Rhetor donandus agello.
 Ille Pater veri, valido qui Περὶ αἱμάτων αἵματος
 Auxilio optatam delapſus ab axe ſalutem
 Attulit in Lethes ſqualenti carcere clauſis,
 Solerti ſermone domat laqueata doſoſi
 Diſta Phariſæi, non argumenta recuſat
 Ponderibus librata ſuis vibrare, ſtrophâſque
 Solvere, quas veterum contra præſagia Vatum
 Sibilat impietas. Sequitur veſtigia tanti
 Gens ſacris addiſta Ducis. Quin Coa medentium
 Progenies, mortis cauſas cum cernit, & artus
 Interna penitus putredine jam fætentes,
 Hæc face dante videt. Videt hæc inſpector aliptes.
 Quicquid agunt homines hujus ſine numine, flocci
 Penditur, atque æſtræa velut mox grando liqueſcit.
 Præmia, Burgerſdici, igitur ventura nepotum
 Quæ tibi ſæcla ferent? Toti namque utilis orbi
 Poſtera perpetuis illuſtras tempora chartis.

*Sic doctum docuisse decet. Vexillifer urges
 Adversas acies, sterilisque è vertice Ramos
 Decutis, & victor celsis in curribus exstas.
 Excipis hinc Sophiae caelos immobilis Atlas
 solus & Alcides nullus succedit anhelos,
 Qui pondus tam grande ferat. Date nota fatenti
 Diis geniti veniam: vos quæis occulta vetustas
 Panditur, & gemmae latitantes sub scrobe crebro
 Effodiuntur, ubi malè lecta notarius olim
 Descripsit fœdè, & vix ullum turpis hiatus
 Augurium patitur, quali nasutus Homerum
 Finxit Aristarchus: vos junctim mutua vobis
 Munia præstatis, nec ad unum cura laborque
 Omnis abit. Sed, summe virum, tua gloria sola est,
 Philosophum gessisse polos. Promethea vincis
 Robore, crudeles aquilæ nec pectora rodunt.*

Janus Bodecherus Benningius

Capitum ac titulorum qui utroque hoc libro
 continentur.

Libri Primi.

CAP.

- 1 **D**E Logices natura ac divisione.
- 2 De Themate simplici & complexo, singulari & universali.
- 3 De Categoriis in genere.
- 4 De Substantia.
- 5 De Quantitate.
- 6 De Qualitate.
- 7 De Relatis.
- 8 De Actione & Passione.
- 9 De quatuor postremis Categoriis.
- 10 De Prædicabilibus in genere.
- 11 De Genere & Specie.
- 12 De Differentia.
- 13 De Proprio & Accidente.
- 14 De Toto & Parte.
- 15 De Causa & Causato in genere.

- 16 De Materia & Forma.
- 17 De Causa Efficiente.
- 18 De Fine.
- 19 De Subiecto & Adjuncto.
- 20 De Convenientia rerum.
- 21 De Diversitate sive Distinctione rerum.
- 22 De Oppositione rerum.
- 23 De Ordine, deque eo, quod Prius, Posterius, aut Simul dicitur.
- 24 De Interpretatione in genere; deque Nomine & Verbo.
- 25 De Etymologia & Conjugationis.
- 26 De Homonymia, Synonymia, & variis vocabulorum acceptationibus.

- 27 De Enunciatione in genere, deque Enunciatione simplici & composita in specie.
- 28 De Enunciatione pura & modali.
- 29 De Enunciatione universali, particulari, singulari, & indefinita.
- 30 De Enunciatione affirmata

& negata, finita & infinita.

- 31 De Enunciatione vera, falsa, necessaria, contingente, & eorum gradibus.
- 32 De Enunciationum Conversione, Equipollentia, & Subalternatione.
- 33 De Enunciationum Oppositione.

Libri secundi.

CAP.

- 1 **D**E Definitione in genere, deque Definitione nominali.

- 2 De Definitione perfecta.
- 3 De Definitione imperfecta.
- 4 De modo investigandæ definitionis.
- 5 De Divisione, ejusque speciebus ac legibus.
- 6 De Syllogismi definitione & partibus.
- 7 De tribus Syllogismorum figuris, & eorum modis.
- 8 De regulis, legibus, ac proprietatibus Syllogismorum.
- 9 De declaratione secundæ ac tertie figuræ per Reductionem ad primam, & per Expositionem.
- 10 De inventione medii termini accommodata ad figuras & modos.
- 11 De Inductione, Enthymemate, & Exemplo.
- 12 De Syllogismo hypothetico, disjunctivo, & relativo.
- 13 De Dilemmate, Prosyllogismo, & Sorite.

- 14 De Syllogismo modali, & indirecto.

- 15 De Syllogismo Dialectico.

- 16 De Inventionem argumentorum Dialecticorum, sive de locis & regulis topicis.

- 17 De canonibus ad locos consentaneos pertinentibus.

- 18 De canonibus ad locos dissimilaneos, comparatos, & testimonia pertinentibus.

- 19 De canonibus comparatis:

- 20 De Demonstratione.

- 21 De Præcognitionibus.

- 22 De quæstione demonstrabili deque medio demonstrationis.

- 23 De conditionibus principiorum demonstrationis $\alpha\beta\delta\epsilon\zeta$.

- 24 De Demonstratione $\alpha\beta\gamma\delta\epsilon\zeta$, deque Regressu.

- 25 De Sophismate.

- 26 De Sophismatibus sive fallaciis in voce.

- 27 De Sophismatibus sive fallaciis in rebus.

- 28 De Methodo.

W. Mather's

I

~~Beaman~~

Institutionum Logicarum

Liber Primus.

C A P. I.

De Logices Natura, ac Divisione.

THEOREMA PRIMUM.



LOGICA est *Ars conficiens instrumenta, iisque intellectum dirigens in cognitione rerum.*

COMMENTARIUS.

1. §. **U**T Logices natura accuratiùs cognoscatur, nomina primùm quibus consuevit appellari, deinde partes definitionis expendendæ sunt. Logica (ut hinc exordiar) dicta est ἀπὸ τοῦ λόγου. Λόγος duplex est Aristoteli, ὁ ἔσω, καὶ ὁ ἔσω λόγος, id est, Sermo internus & externus. Sermonem internum vocat, τὸν ἐν τῇ ψυχῇ λόγον, id est, sermonem qui in anima est: Plutarchus, Damascenus, aliique, appellant λόγον ἐνδιάθετον, id est, sermonem intus-conceptum; & externum, λόγον προφορικόν, id est, sermonem foras-prolatum, five pronunciatum. Λόγος ἐνδιάθετος, five internus, nihil est aliud, quàm ratio five cogitatio, hoc est, actio mentis res objectas earumque nomina concipientis. Mens enim non solum res ipsas concipit atque intelligit, sed & idonea vocabula excogitat ad conceptus suos aliis indicandos atque explicandos: atque ita quodammodo in seipsa loquitur. Λόγος προφορικός atque externus, est sermonis interni cogitationumque interpres, atque (ut Damascenus loquitur lib. 2. de Orth. fid. cap. 21.) ἀγγελος τοῦ νοήματος, id est, nuncius cogitationis. Ab utroque sermone appellata est Logica; (utrumque enim regit ac format) sed ab interno, quem nihil aliud esse diximus, quàm mentis rationem five cogitationem, præcipuè nuncupatur; ab externo sermone, five ab oratione, tantum secundariò. Logica enim regit cogitationes animi nostri per se; orationem non

per se (hoc enim Grammaticæ convenit) sed eatenus tantum quatenus rationis nostræ sive cogitationum interpret est.

2. Logica dicitur alio nomine Dialectica, *ὑπο τοῦ διαλέγεσθαι*, hoc est, à *differendo*. Hæc duo vocabula plerunque sumuntur ab Aristotele pro Topica, quæ pars est hujus artis solummodò tradens præcepta de quolibet problemate ex communibus & probabilibus principiis in utramque partem disputandi: quâ notione ab Analytica distinguuntur, ut pars à parte, eique ex adverso opponuntur. Logica pro Topica sumitur, *lib. 1. Post. cap. 22. § 153. cap. 24. § 170. lib. 2. cap. 8. § 38. lib. 1. Top. cap. 14. lib. 3. Phys. cap. 3.* Dialectica, *lib. 1. Post. cap. 11. § 83. cap. 19. § 136. lib. 1. Top. cap. 1. 2. 10. 11. 18. Soph. elen. cap. 8. 9. 11. & sæpe aliàs.* Alicubi tamen hæ voces pro tota rationis arte usurpari videntur, præsertim Dialectica: ut *1. Rhet. cap. 2. lib. 14. Metaph. cap. 4.* & fortè alibi. Sed quicquid sit de Aristotele, jam usus obtinuit apud Peripateticos, ut Logica sumatur pro tota arte; Dialectica verò pro Topica. Et certè ea significatio cum etymologia meliùs convenire videtur. Vix enim est, ut *διαλέγεσθαι*, hoc est, *differere*, extendi possit ad omnes Logicæ partes. Qui enim definit, dividit, aut ordinar, propriè non differit; sed is tantum, qui *συλλογίζεσθαι*. Si quis tamen velit Dialecticæ nomen cum Logica confundere, & ad totam cogitandî artem extendere, non repugnabo.

3. Cæterum alia quædam homonymia latet in illis vocabulis. Nam vel pro naturali facultate differendi usurpantur; (veluti cum idiotæ, teste Aristotele, *lib. 1. Soph. elen. cap. 11.* Dialecticâ dicuntur uti, & quadantenus *ἐξιστάζον, & ὑπερκαίνον λόγον*, id est, *interrogare, & disputationem sustinere*, ut idem loquitur *lib. 1. Rhet. cap. 1.*) vel pro habitu præceptis & exercitatione crebrâ comparato; vel denique pro systemate Logico-
rum præceptorum, veluti cum dicimus, *Logicam Aristotelis, aut Rami*. In tradita definitione, nè quis erret, Logica pro habitu sumitur, qui veluti finis est, ad quem præcepta destinantur. Atque hæc de vocabulis.

4. Definitio Logices constat genere & differentiâ. Genus Logicæ statuimus esse *artem*. Cum enim quinque sint habitus intellectuales, teste Aristotele, *lib. 5. Eth. cap. 3.* ars, scientia, intelligentia, sapientia, & prudentia; ad unum istorum haud
dubiè

dubiè Logica referenda est. Atqui Logica non est scientia : quia scientia earum rerum est, quæ aliter se habere nequeunt, quemadmodum docetur *lib. 1. Post. cap. 8. & lib. 6. Eth. cap. 3.* quæque tales sunt, ut in earum cognitione mens acquiescat. At Logica versatur circa ea, quæ in nostra potestate sunt, quæq; hoc vel illo modo à nobis fieri, vel etiam non fieri possunt : quorum adeò cognitionem expetimus, non ut in ea mens acquiescat, sed ut eam transferat ad usum, & ad finem ulteriorem, ut colligitur ex *lib. 1. Top. cap. 11.* Et certè, cum Logica sit *τῆς πρὸς δεικνύμενης*, id est, *modus scientiæ*, non potest esse scientia; quia absurdum est, scientiam & modum scientiæ simul quærere, ut Philosophus testatur *lib. 1. Metaph. min. cap. 3.* Eadem ratiocinatione concludi potest, Logicam neque intelligentiam esse, neque sapientiam : nam intelligentia primorum principiorum esse dicitur, quæ inductione innotescunt, & ex quorum cognitione scientia fluit, *lib. 2. Post. cap. 19.* & sapientia definitur scientia rerum præstantissimarum, cum intelligentia conjuncta, *lib. 6. Eth. cap. 7.* Non potest etiam dici prudentia: quia prudentia ad mores pertinere, & cum virtute necessariò conjuncta esse dicitur, *lib. 6. Eth. cap. 14.* At Logica non est necessariò conjuncta cum virtute. Relinquitur ergò Logicam esse artem.

5. Quod quidam aiunt, solos habitus principales ab Aristotele dicto libro recenseri, ideòque Logicam, cum sit habitus organicus, sive instrumentalis, isto numero non contineri; id planè falsum est. Nam discrimen habituum principalium & organicorum isto loco non spectatur. Tum etiam *artis* appellatio istis etiam habitibus tribuitur, qui, ut instrumenta quædam, ad alios habitus principaliores referuntur. Nam quamvis ars frænaria & ephippiaria ad artem equestrem referantur, eique instrumenta subministrant; non tamen eò minùs *artes* appellantur ab Aristotele, *lib. 1. Eth. cap. 1.* Neque verò hæc *αἰσθητικαὶ* sunt, *artem esse*, & *esse habitum organicum*, ut multi judicant, sed subordinata. Nam *organicum esse*, est differentia, quâ ars in duas species dividitur.

6. Jam ars definitur, *lib. 6. Eth. cap. 5. ἔστι αὖ λόγος ἀληθὺς ποιητικὸς*, id est, *habitus cum vera ratione effectivus.* Quæ definitio Logicæ ad amussim convenit. Nam Logica

dicitur ποιῆν, id est, *facere*, sive *efficere* syllogismos, definitiones, &c. Neque enim verum est, quod quidam aiunt, ποιῆν, *semper* significare ejusmodi actionem, quâ ex palpabili materia opus aliquod efficitur, quod etiam post actionem permanet. Nam Poëtica dicta est ἀπὸ τῆς ποιῆν, quæ tamen palpabilem materiam non tractat, neque opus facit ipsâ Poëtæ fictione durabilius. Quod enim poemata supersint, id non est ab ea actione quâ efficiuntur, sed à scriptione. Atque hæc de genere.

7. Differentia Logicæ sumpta est à fine, officio, & materiâ sive objecto. Finis Logicæ principalis & ultimus, est cognitio rerum, sive cujuslibet rei, aut thematis propositi, cognitionem consequi. Cum hoc principali fine conjungi potest alter finis secundarius, nempe cognitionem, ac conceptus, sive cogitationes suas aliis aptâ oratione interpretari.

8. Officium Logicæ vel ratione doctrinæ, vel ratione πρᾶξιως, sive usûs, considerari debet. Hinc nata est distinctio Logices in *docentem*, & in *utentem*. Logica *docens* dicitur, quæ præcepta tradit; *utens* quæ præceptis utitur. Officium Logicæ *docentis*, est tradere præcepta & modum efficiendi instrumenta, quibus mens dirigitur in cognitione rerum, instrumentorumq; naturam describere. Instrumenta Logica sunt quatuor, Definitio, Divisio, Syllogismus, & Methodus. Horum instrumentorum materia, sunt varia themata, & affectiones, sive notiones secundæ, quæ ex thematum comparatione oriuntur. Ideoque ad officium Logicæ *docentis* hoc quoque pertinet, ut de thematibus ipsis agat, eorumque affectiones explicet, quantum id necesse est, ad modum instrumenta Logica conficiendi intelligendum. Et quanquam secundæ notiones, genus, species, causâ, &c. quas diximus esse Logicorum instrumentorum materiam, non parùm juvent mentem in aquirenda rerum cognitione; quia tamen dictis instrumentis, eorumque fabricationi inserviunt, & hoc fine in Logica traduntur, non erit absurdum, si ea sola quæ dixi (definitionem scilicet, divisionem, syllogismum & methodum) instrumenta vocemus; reliquas notiones secundas, thematum affectiones, & dictorum instrumentorum materiam dicamus. Officium Logicæ *utentis*, est instrumenta, cum opus est, conficere, iisque mentem dirigere, ne in quærenda rerum cognitione hallucinetur.

9. Ex hisce liquet, quid de materia sive objecto Logices statuendum sit. Nam ut officium, ita quoque objectum Logicæ, vel ratione doctrinæ, vel ratione *πραξιως*, sive usus considerari debet. Objectum Logicæ *docentis*, præcipuè quidem sunt instrumenta Logica, quæ superius recensui. Verum enimvero, quia Logica docere nequit, quomodo instrumenta illa conficienda sint, nisi prius varias rerum, sive thematum affectiones, ac notiones secundas explicet; & quia hæ notiones ex ipsa rerum sive thematum collatione oriuntur: omnino necesse est, ut Logica docens agat prius de ipsis thematibus, deque eorum affectionibus, ac notionibus secundis, antequàm accedere possit ad ipsa instrumenta. Objectum Logicæ *utentis*, sive objectum *πραξιως*, iterum geminum videtur; alterum proximum, alterum remotum. Objectum proximum est intellectus, sive operationes intellectûs, rerum propositarum cognitionem inquirentis. Objectum remotum, sunt omnes res, quæ intellectui cognoscendæ proponi possunt.

II. Logicæ partes duæ sunt, *Thematica & Organica*.

III. *Thematica dicitur, quæ agit de thematibus, eorûmq; variis affectionibus, & notionibus secundis, tanquam de materia instrumentorum Logicorum.*

IV. *Organica vocatur, quæ agit de ipsis organis sive instrumentis, quibus intellectus themata tractat, eorûmq; cognitionem, quoad fieri potest, adipiscitur.*

I. ¶ Divisio Logicæ non debet aliunde sumi, quàm ex natura, hoc est, ex officio & objecto Logicæ docentis. Nam praxis est ipsâ disciplinâ posterior. Itaque si quis attentè consideret, quæ paulò antè de officio & objecto Logicæ docentis diximus, is faciliè intelliget, planè necesse esse, ut sint duæ partes Logicæ, quarum prior agat, tum de thematibus, sive de rebus ipsis, deque earum dispositione atque classibus; tum de thematum affectionibus, sive notionibus secundis, quæ formantur ex varia rerum collatione inter se, atque ex modo conceptus suos interpretandi, tanquam de materia instrumentorum, quibus intellectus in rerum cognitione dirigitur: posterior tradat ipsa instrumenta, doceatque, quibus illa legibus debeant ex istis notionibus efformari.

Et licet artes multæ nihil præcipiant de materia circa quam

versantur, sed tantum tradant præcepta, & modum operandi; Logicæ tamen peculiaris natura postulat, ut de materia subjecta agatur, antequam operandi præcepta tradi possint. Propria enim Logices operatio est, instrumenta jam aliquoties commemorata, definitionem, divisionem, syllogismum & methodum conficere. At quomodo præcipiet definiendi modum, si antequam non fuerit explicatum quid sit genus, quid differentia, quid subiectum, quid causa, &c. ex quibus definitiones contexuntur? Aut quomodo docebit, quid, aut quotuplex sit divisio, si ignoretur, quid sit totum, quid pars, & quæ sint partium differentiarum? Et sic de Syllogismo & Methodo.

CAP. II.

De Themate simplici & complexo universalis & singulari.

THEOREMA I.

Thema est, quod intellectui cognoscendum proponi potest.

1. ¶ Cognoscere est conceptum, sive notionem de re proposita formare. Notio est *ἡ ἐκείνου τοῦ νοήτου*, hoc est, *representamen rei* in intellectu. Notio alia prima est, alia secunda. Notio prima est, quæ rem ita ut in se est, immediate repræsentat. Notio secunda est, quæ collatis notionibus primis, repræsentat modum, quo mens rem aliquam intelligit, aut intellectam aliis interpretatur. Formantur enim notionem secundæ, vel ex modo res ipsas intelligendi; ut, *genus, species, subiectum, prædicatum*, &c. vel ex modo conceptus suos de rebus alteri interpretandi; ut, *nomen, verbum, conjugata*, &c. Quæ voces in sermone communi aliud ferè significant, quàm in Scholis; quia excogitatæ sunt, ut earum adminiculo sermo communis, animique conceptus rectius formarentur.

2. Notiones secundæ formantur ex primis notionibus inter se collatis. Cum enim mens ope sensuum concipit rem aliquam, putà humanam naturam, format notionem primam, quam exprimit voce *hominis*. Cum deinde comparatis inter se hominibus, observat humanam naturam singulis hominibus inesse, format notionem secundam, quam exprimit voce *speciei*.

Atque

Atque hæc notio, non naturam humanam repræsentat, sed modum quo intellectus humanam naturam concipit, cum observat eam singulis hominibus convenire: qui modus omnibus rebus accommodari potest, quæ plura individua sub se continent. Ut enim homo *species* dicitur, quia significat naturam Socrati & Platoni, aliisque individuis communem: ita quoque equus dicitur *species*, quia significat naturam communem Bucephalo, Cyllaro, aliisque equis; & justitia, quia complectitur justitiam Aristidis, Socratis, aliorumque hominum. Præterea, cum mens observat, quid vox *hominis* in communi sermone significet, format notionem primam: cum porrò observat vocem istam significare sine tempore, format notionem secundam, dicitque hominem esse *nomen*.

II. *Themata vel simplicia sunt, vel complexa.*

III. *Themata simplicia sunt, quæ sine notionum complexione apprehenduntur: ut, homo currit.*

IV. *Themata complexa sunt, quæ apprehenduntur duabus, pluribusve notionibus affirmatione aut negatione copulatis: ut, homo currit.*

I. ¶ Aristoteles, cap. 2. de Categor. appellat themata simplicia, τὰ ἀνὰ συμπλοκῆς, id est, quæ sine complexione; complexa, τὰ κατὰ συμπλοκὴν λεγόμενα, hoc est, quæ secundum complexionem dicuntur. Notionum complexio nihil aliud est, quàm affirmatio & negatio in intellectu, aut in oratione. Hoc discrimine discernuntur themata complexa à simplicibus, non vocum multitudine, aut compositione. Nam simplex thema sæpe compositâ voce effertur; ut, *respublica*, *hircotervus*: sæpe etiam pluribus vocibus; ut, *amor parentum erga liberos*. Interdum unâ simplicique voce effertur thema complexum: veluti cum dico, *pluit, ningit, itur, statur*. Simili modo judicandum est de omnibus verbis impersonalibus; imò etiam de verbis personalibus primæ & secundæ personæ. In his enim omnibus certum ac definitum subjectū subintelligitur, de quo verba ista pronuncientur. Cum enim dicitur *pluit*, subintelligitur, *cælum*, *aër*, *nubes*, aut aliquid tale: & cum dicitur, *curro*, aut *curris*, subintelligitur *ego*, aut *tu*. At verba personalia tertiæ personæ censentur esse themata simplicia, quia nihil certi subintelligitur.

V. *Thema*

V. *Thema simplex vel est universale vel singulare.*

1. ¶ Aristoteles *lib. de Interpr. cap. 7.* hanc divisionem sic extulit; *Τῶν παρὰ τὸν τὰ ἁπλῶς καὶ τὰ ἑνὶ καὶ τῷ ἑνὶ*, id est, *Res aliæ sunt universales, aliæ singulares.* Cæterum universale quinque modis dicitur, quos Scholastici barbarè sic distinguunt. Primò, aiunt, dicitur quippiam *universale in essendo*: ut *idéæ* secundum sententiam Platonis. Secundò, *universale in causando*: ut, *Deus, cælum.* Tertiò, *in significando*: ut vocabula homonyma. Quartò, *in prædicando*: ut, *homo, animal.* Quintò, *in representando*: ut conceptus earum rerum, quæ universales sunt in prædicando. Distinguuntur etiam universalia, in universale *ante multa, post multa, & in multis.* Universale ante multa est idem ei quod vocant universale *in essendo*: universale post multa idem est ac universale *in representando*: universale in multis convenit cum universali *in prædicando.* De hoc universali hîc agendum est: idque sic ab Aristotele definitur, *cap. 7. de Interpr.*

V I. *Τὸ κατὰ λέξιν, ὃ ἐπὶ πλειόνων πρὸς καὶ ἀπὸ καὶ τῶν ἑνὶ καὶ τῷ ἑνὶ*, id est, *Universale appello, quod de pluribus suapte naturâ prædicari aptum est*: ut, *homo, equus, planta.*

1. ¶ Universale dicitur *de pluribus* prædicari, quæ vel actu existunt, vel si non existant, saltem existere possunt. Sic *homo* erat universale solo Adamo existente: quia non de solo Adamo, sed de omnibus hominibus nascituris, *homo* suapte naturâ aptus erat prædicari. Sic quamvis sol reverâ sit unicus, dici tamen potest universale, quia plures soles effici possunt, ejusdem cum hoc nostro sole essentia.

2. Dicitur universale *πρὸς λέξιν*, id est, *suapte naturâ aptum esse de pluribus* prædicari, nè quis putet vocabula homonyma pluribus singularibus ejusdem speciei imposita (veluti, cum plures homines appellantur Petrus) esse universalia. Homonyma enim, quatenus sunt homonyma, nomine tantum tenus, & non *suapte naturâ* de pluribus prædicantur.

3. Definitur etiam universale, *ὃ πλεόνων ὑπάρχειν πρὸς λέξιν*, id est, *quod suapte naturâ aptum est pluribus inesse*, *lib. 6. Metaph. cap. 13.* Hæc definitio verbis differt à priore, sensu cum ea convenit. Nam *prædicari de aliquo, & alicui inesse*, reipsâ idem sunt, ratione verò differunt; quia *esse in aliquo* nos concipi-

cipimus ut causam, ex qua tanquam effectum quoddam sequitur, posse de illo prædicari.

VII. *Singulare est, quod de uno tantum suapte naturâ prædicari aptum est: ut, Plato, Socrates.*

VIII. *Singularia dicuntur ἀτομα, id est, individua: quia non possunt dividi in plura ejusdem nominis ac naturæ.*

1. ¶ Sic Plato, ut dividi possit in corpus & in animam, vel etiam in caput, ventrem, pectus, brachia, pedes, & cæteros artus; non potest tamen dividi in plures Platones.

2. Porphyrius cap. 2. ait singularia ideò individua dici, ὅτι ἡ ἐξ ἰδιότητος συνέστηκεν, ὥν τὸ ἀθροισμα ἐκ ἀνέκ' ἄλλης πνός ποτε τὸ αὐτὸ τὸ ἴδιον, id est, quod constent ex proprietatibus, quarum collectio nunquam in alio eadem esse potest.

IX. *Individua vel determinata sunt, vel vaga.*

X. *Individua determinantur quadrifariam: 1, Nomine proprio: ut Alexander, Bucephalus. 2, Nomine communi, quod κατ' ἔξοχην sumitur pro proprio: ut, Philosophus pro Aristotele. 3, Pronomine demonstrativo: ut, hic homo. 4, Periphrasi: ut, Apostolus gentium, id est, Paulus.*

XI. *Individuum vagum est, quod effertur Pronomine particulari: ut, aliquis, quidam homo: Græcis ὁ δέ τις,*

C A P. III.

De Categoriis in genere.

T H E O R E M A I.

THematum simplicium considerandæ sunt, primum categoriæ & affectiones, quæ ex varia rerum in categoriis dispositarum habitudine ad se invicem, & ex modo quo mens eas concipit, oriuntur: deinde, interpretatio, & affectiones, quas mens vocabulis affingit, ex modo conceptus suos interpretandi.

1. ¶ Affectiones rerum sunt duorum generum: quædam conveniunt rebus per se ac naturâ suâ, veluti cum dicimus, hominem risibilem esse, habere vultum erectum, manus, &c. aliæ rebus conveniunt, quatenus intellectui nostro obijciuntur. Sic convenit homini speciem aut subiectum esse. Affectiones primi generis sunt veræ res, & (ut vulgò loquuntur) entia realia:

cæte-

cætetæ sunt res fictæ, sive entia rationis, hoc est, ejusmodi entia, quæ mentis nostræ fictione fiunt; quorum esse nihil aliud est, quàm intelligi. Affectiones primi generis pertinent ad Philosophiam, aliàsque disciplinas principales; ideòque in Logica spectari nequeunt, nisi ut themata: quæ verò secundi generis sunt, eæ pertinent ad Logicam, vel ad alias artes organicas, Grammaticam putà aut Rhetoricam, quæ suas etiam affectiones habent haud minùs quàm Logica, quas rebus aut vocibus attribuunt docendi causâ: ut, *declinatio, conjugatio, casus, tempora, modi, tropi, figuræ, &c.*

2. Cùm mens nostra themata intelligit, aut Philosophicas thematum affectiones, format notiones primas: cùm intelligit thematum affectiones Logicas (ut de Grammaticis & Rhetoricis nihil dicam) format notiones secundas. De utrisque in Logica agendum, sed de thematibus obiter tantum: idque eo fine, ut ex eorum varia comparatione entia rationis & secundæ notiones formentur. De thematibus & primis notionibus, quantum satis est, agitur in categoriis: de thematum affectionibus & notionibus secundis, in reliquis Logicæ partibus.

II. *Categoria est series rerum sub eodem summo genere gradatim dispositarum.*

I. ¶ Categoria dicitur *κατὰ τὸ κατηγορεῖσθαι*, hoc est, ab accusando. Est enim vocabulum forense: sed in Scholas à foro traductum, significat aliquid de aliquo dicere, sive affirmare: Scholastici dicunt *prædicare*. Cæterum categoria, vel pro ipsa affirmatione sumitur, vel pro serie ac dispositione earum rerum quæ sub eodem genere de aliis affirmari possunt. Ejusmodi seriem vocat Boëthius *prædicamentum*: nos Græcam vocem maluimus servare.

III. *Categoriæ sunt decem, Substantia, Quantitas, Qualitas, Relatio, Actio, Passio, Ubi, Quando, Situs & Habitus.*

IV. *Harum una substantiarum est, reliquæ sunt accidentium.*

I. ¶ Hic numerus sumptus est ex diversitate quæstionum, quæ fieri possunt de primis ac individuis substantiis. Quod liquet ex categoriarum appellationibus. Nam *quantum, quale, ad quid, ubi, quando*, quæstionum vocabula sunt. Quin ipsa sub-

substantia τὸ τι ἐστίν, hoc est, quid est, dicitur, lib. 1. Top. 9. Quæcunque enim de prima atque individua substantia, puta de Socrate, dici possunt, cùm quæritur, quid sit Socrates; ut, homo, animal, vivens, corpus, substantia, & quæcunque sub illis continentur; ut, bestia, planta, lapis, animal, cælum, angelus, &c. collocantur in categoria substantiæ. Quæcunque de primis substantiis dicuntur, cùm quæritur, quantæ, sive quàm magnæ, quamdiu, aut quot sint; ut, ulna, stadium, dies, annus, quatuor, decem, &c. pertinent ad categoriam quantitatis. Et sic de cæteris categoriis. Singularum categoriarum exempla exprimuntur hoc disticho:

*Arbor sex servos fervore refrigerat ustos,
Ruri cras stabo, nec tunicatus ero.*

2. Cæterùm considerandum est hoc loco, quoniam categoriarum doctrina à Pythagoricis excogitata est, an in hoc numero denario non sit aliquid Pythagoricæ superstitionis, quemadmodum & in decem principiorum οὐρανίας, quas recenset Aristoteles lib. 1. Metaph. cap. 5. Quicquid sit, numerum hunc in Logicis immutandum non censeo, tum quia antiquitate venerabilis est, tum etiam quia non contemnendis rationibus firmari posset, præsertim in Logica, quæ in categoriis non considerat modum πὸς τί, sed ὅτι καὶ κατὰ ποσὶν, ut loquitur Aristoteles lib. 4. Metaph. cap. 6. In Metaphysicis non est eadem ratio.

3. Quærat aliquis, cur non sit una omnium rerum categoria, cujus summum genus sit ens, res, aut aliquid tale. Hujus rei plures causæ commemorari possunt. Prima causa est, quod ens aut res nullam solvat quæstionem, præter quæstionem an sit. Siquis enim quærenti, Quid est Socrates? respondeat, Est ens, aut res; nihil aliud respondet, quàm Socratem esse, quod erat respondendum ad quæstionem an sit. Secunda causa est, quod ens inæqualiter prædicetur de substantia & accidente. Nam substantia est ens per se: at accidentia non sunt entia, nisi quatenus sunt aliquid τὸ ὄντως ὄν, hoc est, entis propriè dicti, id est, substantiæ, quemadmodum docet Aristoteles lib. 7. Metaph. cap. 1. Atque hanc ob causam ait lib. 5. cap. 2. ejusdem operis, accidentia esse ἑγγύς τι τὸ μὴ ὄντως, hoc est, tale quid, quod parùm distat à non ente. Tertia causa est,

est, quia ens non potest esse genus. Genus enim dividitur in species per differentias: at ens nullas habet differentias divivivas. Differentia enim non est particeps hujus generis, ut traditur *lib. 6. Top. cap. 2.* hoc est, genus non prædicatur de differentia, ut Philosophus seipsum interpretatur *lib. 6. cap. 6.* Non enim dicimus, *Rationalitas est animal.* Atqui nihil est de quo *ens* & *res* non possunt prædicari, ut per se manifestum est, & ab Aristotele docetur eodem opere, *lib. 4. cap. 1.* *Ens* ergò aut *res*, non possunt esse genus.

V. In hisce decem categoriis ponuntur omnia, quæ de aliquo prædicari possunt: sed alia directè, alia indirectè.

VI. Quod directè in categoriis ponitur has quinque condiciones requirit: 1, Debet esse ens finitum: 2, Verum, ac positivum: 3, Completum ac perfectum: 4, Unum per se: 5, Universale.

1. ¶ *Finitum*] Hâc conditione ex categoriis excluditur *Deus*. Etsi enim *Deus* sit substantia, non tamen ponitur in categoria substantiæ. Quæ enim in hac categoria directè collocantur, non solum per se subsistunt, sed substant etiam accidentibus, (ut postea dicemus) quod de *Deo* cogitare impium est. Præterea, idem debet esse genus propriè dictum eorum, quæ directè collocantur in eadem categoria: Atqui neque substantia, neque quicquam aliud potest esse genus propriè dictum rerum finitarum & infinitarum: *Deus* ergò, cum sit infinitus, genere finitarum substantiarum directè contineri nequit. Revocatur tamen ad hanc categoriam æquivocè, quia substantia est genus æquivocum *Dei* & substantiarum finitarum.

2. *Verum ac positivum.*] Enti vero opponitur primum ens *rationis*: ut, *genus*, *species*, &c. quæ nullo modo sunt in categoriis. 2, *Ens fictum*: ut, *chimæra*, *centaurus*, &c. quæ ex hypothese ad categorias referuntur: Si enim centaurus esset: id quod esse fingitur, reverâ poneretur in categoria substantiarum. 3, *Entia apparentia*, sive (ut vulgò loquuntur) intentionalia: ut, *iris*, *colores apparentes*, *species* & *spectra sensuum* & *intellectus*, aliâque quorum essentia in sola apparitione posita est. Hæc ad categorias spectant *καθ' ὁμοιότητα*; sunt enim *ὁμοιωµατα*, id est, simulacra verorum entium. Huc refer

fer etiam pietas verarum rerum imagines, prout sunt imagines. Enti *positivo* opponitur privatio: ut *cacitas*, *tenebrae*, &c. quæ ad categorias revocantur per oppositos habitus.

3. *Complectum ac perfectum*] Hâc conditione excluduntur, 1, principia rerum: ut, *unitas*, *momentum*, &c. 2, partes qualescunque. 3, entia imperfecta, & (ut vulgò loquuntur) in fieri: ut, *embryo*, *motus*, &c. 4, modi ac complementa aliorum entium. Hæc omnia ponuntur in categoriis concomitanter, exceptis differentiis, quæ, etsi sint partes specierum, dicuntur tamen in categoriis poni collateraliter, quia nempe speciebus hærent à latere.

4. *Unum per se.*] Hâc conditione removentur, primò, entia complexa; ut, *homo currit*: secundò, concreta; ut, *albus*, *justus*: tertio, aggregata; ut, *aceruus*, *exercitus*. Hæc omnia per accidens revocantur ad categorias earum rerum ex quibus coaluerunt.

5. *Universale.*] Hâc conditione rejiciuntur, primò, transcendencia, *ens*, *res*, *unum*, *verum*, *bonum*, quæ suâ communitate superant omnes categoriarum gradus: deinde singularia, quæ, quia naturaliter non prædicantur, sed tantùm subjiuntur, non sunt in categoriis, sed infra categorias, instar basis.

VII. *Categoriarum primus ac præcipuus usus est, ut rebus: quæ suapte naturâ infinitæ sunt, ad certas classes revocatis, mens nostra uno omnia intuitu perlustrare possit, & observare, quomodo quilibet cum quolibet conferri debeat.*

1. ¶ Hic usus non solum ad Logicæ, sed ad totius Philosophiæ, cæterarumque disciplinarum notitiam, plurimum confert.

VIII. *Ex hoc primo usu, tres alij nascuntur: Nam 1, dispositio rerum in categoriis multum confert ad tradendas thematicarum simplicium affectiones, & secundas notiones ex primis formandas.*

2. *Ex eadem dispositione liquet, quid suâ naturâ sit aptum subjiçi, quid prædicari.*

3. *Nullum majus ad bene definiendum, dividendum, disponendum, addo etiam, ad argumentandum, adjumentum est, quàm series categorica bene ordinata.*

1. ¶ Hi tres usus ad Logicam tantum spectant; primu-
perti

1. pertinet ad doctrinam de thematum simplicium affectionibus;
 2. bus; alter ad doctrinam de themate complexo, sive de enunciatione;
 3. tertius pertinet ad instrumenta, & ad usum sive praxin Logices. Ex quibus liquet graviter errare eos, qui Logicam hanc tam utili ac necessariâ parte mutilant. Aristoteles tanti fecit hanc doctrinam, ut eam singulari libro explicare (si modò is liber Aristotelis sit) & in Metaphysicis iterum inculcare non dubitaverit, atque insuper in præceptis Logicis ejus mentionem fecerit sæpissimè. Quin lib. 1. Top. cap. 9. non obscurè ejus utilitatem commendat. Quod & Porphyrius fecit in sua Isagoge.

C A P. IV.

De Substantia.

THEOREMA I.

Substantia est ens per se subsistens, & subsistans accidentibus.

1. ¶ Quod substantia Latinè, id Græcè *οὐσία* dicitur, *οὐσία* τὸ ὂν, id est, *ab esse*. Sumitur autem *οὐσία* vel pro cuiuslibet rei essentia; ut, cap. 1. lib. de Categ. & sæpe alibi: vel pro eo, quod Latinè substantiam dicimus, quodque accidentibus opponitur, *ibid.* cap. 5. lib. 1. Top. cap. 9. Nec mirum est substantias *οὐσίας* absolutè nuncupari. τὸ ὂν enim præcipue quodam jure iis convenit, ut docet Aristoteles lib. 7. Metaph. cap. 1. & 4.

2. *Per se subsistere* nihil aliud est, quàm non esse in aliquo, ut in subjecto. Ut ergò substantia dicatur per se subsistere, non est necesse, ut ab alio non pendeat: sed hoc tantùm requiritur, ut ab alio non pendeat, tanquam à subjecto. Per se subsistere convenit omnibus substantiis, etiam Deo; subsistere accidentibus, finitis tantùm; Deus enim non substat accidentibus, ut antè dixi.

II. *Substantia vel prima est, vel secunda.*

III. *Substantia prima est substantia singularis; sive substantia, quæ non dicitur de subjecto: ut, Alexander, Bucephalus.*

IV. *Substantia secunda est substantia universalis; sive substantia, quæ dicitur de subjecto; ut homo, equus. Nam homo dicitur*

1
oni
un
five
Lo
ele
(f
in
ju
non
fe

.
li
oro
ous
est
uo
ph

io,
on
ur,
ere
ti-
ur

un-
b-
no
ur

in
h
S
n
S
f
i

li
d
a
8
j
c
i
f
s
b
j
r
g
u
P

d
n
c
i
r
f
i
f
P
a

dicatur de Alexandro & Philippo, & equus de Bucephalo & Cyllaro.

1. ¶ Prima substantia interdum sumitur pro substantia immateriali, quam Aristoteles *lib. de Interp. cap. 13.* appellat ἐνέργεια ἢ εὖ δύναμις id est, *actum sine potestate.* Sed hoc loco significat substantiam singularem, ut dictum est. Scholastici vocant *suppositum*, & si sit ratione prædita, *personam*. Quia autem hac voce Theologi utuntur in explicanda S. Trinitate, factum est, ut a Boethio *lib. 2. de duab. in Christo nat. cap. 2.* persona plenius definita sit *substantia primâ intelligens, non pars alterius, nec ab alio sustentata.*

2. Ut autem substantiæ divisio diversitasque proposita melius intelligatur, notandum est quod Aristoteles docet *cap. 2. de Categ.* res quasdam de subjecto dici, & in subjecto non esse: alias in subjecto quidem esse, & de subjecto nullo dici: alias & de subjecto dici, & esse in subjecto: nonnullas nec de subjecto dici, nec esse in subjecto. Esse in subjecto dicuntur, quæ cum in aliquo sint non ut pars, non possunt sine eo existere in quo sunt. Atque hoc modo dicuntur accidentia esse in substantiis. Dicitur de subjecto nihil est aliud, quàm quoad nomen & quoad definitionem alicui attribui. Atque hoc modo tribuuntur universa individuis. Itaque de subjecto dici & in subjecto non esse, substantiis secundis sive universalibus tribuitur; esse in subjecto, & non dici de subjecto, accidentibus singularibus; de subjecto dici & esse in subjecto, accidentibus universis; non dici de subjecto nec esse in subjecto, substantiis primis atque individuis.

3. Secundæ ergo substantiæ dicuntur de primis tanquam de subjecto; quoniam, cum primis attribuuntur, non solum nomen primis substantiis tribuitur, sed etiam definitio. Nam cum Alexander homo dicitur, non solum nomen *hominis*, sed ipsa etiam definitio Alexandro convenit. Primæ sive singulares substantiæ non dicuntur de subjecto, quoniam nulli possunt attribui. Alexander enim de nullo dici potest, nisi de se ipso. Accidentia quoque non dicuntur de substantiis ut de subjecto: quia, licet accidentium nomen substantiis tribui possit quibus insunt, cum suppetunt iis vocabula paronyma; at ut iis tribuatur definitio, fieri non potest. Etiam aliorum cum

fit in corpore, nomine quidem tenus corpori tribuitur (nam aliquod corpus dicitur album) sed definitio alboris corpori tribui non potest. Quin nè nomen quidem accidentis substantiis tribuitur, cum defunt vocabula paronyma. Sic ab ἀρετῇ dicuntur ἀρεταῖοι à virtute, probi: non virtuosus barbarum est. Hinc sequitur, primis substantiis sublatis, nihil rerum posse esse reliquum. Nam sublatis primis substantiis, tolluntur etiam secundæ substantiæ, quæ illis attribuntur: & sublatis tam primis, quàm secundis substantiis, tolluntur etiam accidentia, quæ in iis sunt, ut in subiecto.

V. *Primæ substantiæ sunt maximè substantiæ: & inter secundas substantias, unaquæque eò magis est substantia, quò propior est primis.*

1. ¶ Hæc primarum substantiarum prærogativa, non est intelligenda de ipsa definitione substantiæ, (ea enim omnibus substantiis, cujuscunque sunt ordinis, convenit æqualiter) sed de ordine subsistendi. Omnibus enim substantiis convenit *per se subsistere*, hoc est, non esse in subiecto: sed secundæ substantiæ subsistunt per se, beneficio primarum in quibus sunt, non ut accidentia in subiecto, sed ut partes essentiae in toto. Ob hanc causam factum est, ut singulares substantiæ dicantur *primæ substantiæ*. Nam si consideretur ordo naturæ, universales substantiæ singularibus priores sunt.

VI. *Notæ substantiarum sunt sex: 1. Substantia non est in subiecto.*

VII. 2, *Substantiæ dicuntur de aliis synonymas.*

1. ¶ Prima nota convenit omnibus & solis substantiis. De ea satis dictum est in definitione substantiæ. Secunda nota convenit tantum substantiis secundis. Primæ enim non dicuntur de subiecto: secundæ dicuntur de primis synonymas, id est, quoad nomen, & quoad definitionem. Hæc nota etiam differentiis substantiarum convenit. Nam sunt partes specierum, deque iis & nomine & definitione dicuntur. Ex quo sequitur, differentias substantiarum non pertinere ad categoriam qualitatis, sed ad substantiam, saltem reductivè.

VIII. 3, *Substantia significat τὸ ὂν, sive hoc aliquid.*

1. ¶ Hoc aliquid significare, nihil aliud est, quàm esse singulare quid, quod digito demonstrari possit. Hæc nota convenit

Venit primis tantum substantiis. Nam etsi secundæ substantiæ τὸ ὅσον τῆς κατηγελας, hoc est, figurâ prædicationis, videantur hoc aliquid significare, reverâ tamen significant πῶς ἢ sive quale quid; non quidem per se primò, sed merito differentiarum quibus constituuntur. Secundæ enim substantiæ significant naturam affectam differentiâ, quæ nihil aliud est quàm essentialis quædam qualitas.

IX. 4, *Substantia non habet contrarium.*

I. ¶. Hoc est, substantia substantiæ non est contraria: nemper per se, atque ratione substantiæ. Nam ut substantia substantiæ qualitatibus contraria sit, nihil vetat. Sic contraria sunt aqua & ignis, non ratione substantiæ, sed qualitatibus, calore scilicet & frigore, siccitate & humiditate, gravitate & levitate, &c.

X. 5, *Substantia non recipit magis & minus.*

I. ¶. Hoc est, non intenditur & remittitur. Hæc nota de una eadémque substantia intelligitur, quæ successione temporis non potest fieri magis substantia, neque in genere, neque in specie, quàm erat antea. Sic homo, & lapis, non possunt fieri magis substantia, aut magis homo, vel lapis, quàm sunt.

2. Potest etiam hæc nota tribui diversis substantiis, modò sint ejusdem ordinis. Sic una prima substantia non est magis substantia, quàm alia; neque una species magis quàm alia. Quomodo primæ substantiæ sint magis substantiæ quàm secundæ, & species magis quàm genera, suprà dictum est.

XI. 6, *Una eadémque numero substantia suscipit contraria.*

I. ¶. Hic canon Heraclito videtur oppositus. Illius enim hoc erat dogma, πάντα περὶ καὶ ἐν μέρει, id est, omnia fluunt, & nihil manet: quibus verbis innuebat, cum substantia contraria suscipit, aliam eam substantiam fieri, nec eandem numero manere. Aristoteles contrà statuit, licet substantia contraria suscipiat, esse tamen eandem numero substantiam. Sic aqua frigida, cum mutatione sui fit calida, non fit alia, sed manet eadem omnino substantia, nec à natura sua recedit.

CAP. V.

De quantitate.

THEOREMA I.

Accidens est ens substantiæ inhærens.

1. ¶. Inhærerere substantiæ est esse in substantia, ut in sub-
jecto. In subjecto esse dico, ait Aristoteles, cap. 2. de Categ.
ὅ ἐν τινι μὴ ὡς μέρος ἀπὸ τοῦ ὅλου ἀλλὰ ὡς τὸ ἐν τῷ ὅλῳ. id est, quod cum in aliquo sit, non ut pars, non potest tamen
esse sine eo in quo est. Sic albor est in nive, lacte, cerussa. ut in
subjecto, quia non est pars istarum rerum, & non potest ex-
sistere si ab istis rebus separetur : Hinc sequitur,

1. Accidens non posse exsistere sine subjecto.
2. Non posse migrare de subjecto in subjectum.
3. Non posse inhærerere alteri accidenti. De quibus plenius
in Metaphysicis philosophandum.

II. *Quantitas est accidens, quod per se partem habet extra partem.*

1. ¶. Quantitas (Aristoteli τὸ ποσόν) primum locum te-
net inter accidentia : 1, Quia immediatè fluit à materia, cum
cætera accidentia vel à forma fluant, vel a materia formata :
2, Quia accidentia materialia substantiæ corporeæ mediante
quantitate inhærent.

2. In tradita definitione tria quantitati tribuuntur : 1, ha-
bere partes : Itaque Deus, Angeli, animæ humanæ, puncta,
unitas, &c. neque quantitas sunt, neque quanta : quia non
habent partes : 2, habere partem extra partem, id est, habere
partes, non essentiâ solùm, sed etiam situ, & spatio differentes.
Sunt enim duorum generum partes ; quædam simul sunt, ac
se mutuò penetrant ; ut materia & forma : aliæ non sunt si-
mul, sed situ differunt ; ut, caput, pectus, venter, artus. Hu-
jusmodi partes requiruntur in quantitate. Dixi partem extra
partem potiùs quàm extra partes : quia quantitas potest tan-
tùm duas partes habere ; ut in numero binario. 3, habere
partem extra partem per se. Nam substantia corporea, &
quodlibet accidens substantiæ corporeæ inhærens, habet par-
tem

tem extra partem, sed per quantitatem, non per se: ar quantitas (ut, magnitudo, numerus, tempus) habet per se partem extra partem.

3. Aristoteles lib.4. Metaph. cap. 13. definit quantitatem hoc modo, τὸ ποσὸν λέγεται, τὸ διαπετὸν εἰς ἀόριστον. Ἐν ἑκάστῃ ἢ ἑκάστῳ ἐν τῇ καὶ τὸ δὲ τῇ μένουσιν ἢ id est, Quantum dicitur, quod divisibile est (scilicet per se) in ea, quæ insunt (hoc est, in partes quorum utrumque, (si duæ tantum partes sint) vel unumquoque, (si sint plures partes duabus) unum quid, & hoc aliquid aptum est esse : (hoc est, designari potest in toto extra quamlibet aliam partem constitutum.) Hæc definitio sensu quidem cum nostra coincidit, verbis tamen obscurior est.

III. *Quantitas alia continua est, alia discreta.*

IV. *Quantitas continua est, cujus partes communi termino copulantur.*

V. *Discreta est, cujus partes communi termino non copulantur. Estque nihil aliud quàm numerus.*

I. §. Terminus ut terminus, est indivisibilis. Itaque neque quantitas est, neque pars quantitatis. Dixi, ut terminus: nam linea & superficies sunt termini, & tamen sunt species quantitatis, sed alio respectu. Nam linea & superficies aliquatenus divisibiles sunt, aliquatenus indivisibiles: quatenus sunt divisibiles, sunt species; quatenus indivisibiles, termini quantitatis. Cum autem puncta & momenta sint undiquaque indivisibilia, termini tantum sunt, non etiam partes quantitatis. Non componitur ergò quantitas continua ex terminis, sed ex partibus: linea ex lineis, superficies ex superficiebus, corpus ex corporibus.

2. Terminus duo facit, claudit quantitatem continuam, & copulat illius partes. Copulare partes dicitur, quod principium unius partis est, & finis alterius. Quantitas discreta, sive numerus, non habet communem terminum, quia ex unitatibus componitur. Unitas autem non est numerus, sed principium & pars numeri, & ut loquitur Psellus, ἀνεξάντητος καὶ ἀείδιτος, id est, innumerabilis fons numerorum. Nulla ergò unitas potest esse in numero, quæ duas partes conjungat. Quod enim partes conjungit, id pars esse non potest.

3. Numerus dividitur in numerantem & numeratum. Numerus numerans nihil aliud est quàm numerus in abstracto, sive ipsa unitatum collectio ; ut *duo, tria*. Numerus numeratus est numerus in concreto, sive res quæ numerantur ; ut, *duo homines, tres equi*.

VI. *Quantitas continua vel est magnitudo, vel tempus.*

VII. *Magnitudo est quantitas ^{continua} permanens.*

VIII. *Tempus est quantitas fluens.*

IX. *Ejus terminus est ^{ad unum} sive momentum.*

I. ¶ Quantitas permanens dicitur, quæ constat partibus positionem inter se habentibus, sive cujus partes simul existunt, & quarum unaquæque ostendi potest, ubi sita sit, & cui reliquarum partium cohæreat. Atqui partes magnitudinis simul existunt, & unaquæque ostendi potest, ubi sita sit, & cui reliquarum partium cohæreat. At partes temporis non habent *titum*, quia consistunt in perpetuo fluxu. Sed neque numeri partes positionem habent, quia neque sitæ sunt alicubi, neque cohærent. Habent tamen & temporis & numeri partes ordinem inter sese, quo aliæ aliis priores sunt.

2. Tempus definitur ab Aristotele, *lib. 4. Phys. cap. 12. numerus motus secundum prius & posterius*. In qua definitioni dicitur tempus esse *numerus* ; non quia est discretum quid, sed quia partes habet, quibus motus partes numeramus. Sic dies constat 24 horis, annus 12 mensibus.

X. *Magnitudo vel est linea, vel superficies, vel corpus.*

XI. *Linea est magnitudo uno modo divisibilis.*

XII. *Ejus terminus est punctum.*

XIII. *Superficies est magnitudo duobus modis divisibilis.*

XIV. *Ejus terminus est linea.*

XV. *Corpus est magnitudo tribus modis divisibilis.*

XVI. *Ejus terminus est superficies.*

I. ¶ Linea dicitur uno modo divisibilis, quia est mera longitudo sine latitudine aut profunditate ; ut, *ulna, stadium, milliare* : superficies duobus modis, quia est longitudo cum latitudine sine profunditate : ut, *jugerum* : corpus tribus modis, quia est longitudo cum latitudine & profunditate ; ut *subus, sphaera*. Quamvis autem corpus aliàs significet substantiam ex materia & forma compositam, hoc tamen loco nihil

L10. 4. *Physicorum* 4.
nihil aliud notat quàm magnitudinem sive quantitatem undiqueque divisibilem, in abstracto.

2. Neque verò putandum est reperiri longitudinem sine latitudine, aut latitudinem sine profunditate: non enim hæc reverà separata sunt, sed mente tantùm distincta. Hinc tamen non sequitur, puncta, lineas, superficies in sola mentis fictione consistere. Certissimis enim demonstrationibus evinci potest, hæc omnia in quolibet corpore existere. Nam planum tangitur à sphæra in puncto, à cylindro in linea: duo plana se mutuò tangunt in superficie.

XVII. *Ad superficiem revocatur locus.*

1. ¶ Locus enim, definiente Aristotele, lib. 4. *Phys. cap. 14. est superficies proxima corporis continentis.* Oratio tamen & motus non sunt species quantitatis, sed quanta quædam per accidens.

XVIII. *Notæ quantitatis sunt tres; 1. Quantitas non habet contrarium.*

1. ¶ Nempe, per se. Nam si quantitas quantitati contraria dicitur, id fit ob adjunctas qualitates: veluti, cum tempus hybernium contrarium dicitur æstivo, ratione frigoris & caloris.

XIX. 2. *Quantitas non recipit magis & minus.*

1. ¶ Hoc est, non intenditur, aut remittitur; sed extenditur & contrahitur:

XX. 3. *Res à quantitate dicuntur æquales aut inæquales.*

1. ¶ Æqualitas enim & inæqualitas sunt relationes, quæ rebus conveniunt ratione quantitatis.

2. Hactenus de quantitate propriè dicta: quæ quia hæc unâ categoriâ continetur, quantitas prædicamentalis sive categorica dici solet. Est & alia quædam quantitas impropriè dicta, quæ non consistit in partium extensione, sed in cuiusque rei perfectione, & virtute: unde & quantitas *perfectionis* & quantitas *virtutis* appellari solet. Etenim essentialis perfectio rerum & virtutes, ex diversis gradibus componuntur, sicut quantitas *molis* componitur ex diversis partibus. Hæc quia per omnes ferè categorias diffunditur, quantitas transcendentalis nuncupari consuevit.

3. His addi possunt, quæ Aristoteles præcipit *lib. 4. Met. cap. 13.* Quanta alia sunt per se, alia der accidens. Quanta per se dicuntur, in quorum definitione ponitur quantitas. Atque hæc vel sunt quanta κατ' ἐστίαν, quoad essentiam, ut, *linea, superficies, & cætera* quæ hætenus recensuimus : vel sunt κατὰ μέγεθος, hoc est, affectiones eorum quæ quanta dicuntur quoad essentiam ; ut, *multum, parum, magnum, parvum, & similia*, si sumantur κατὰ αὐτὰ, per se, atque absolutè. Nam si sumantur πρὸς ἀλλήλα, hoc est, comparata ad se invicem, pertinent ad categoriam relationis.

Quanta per accidens dicuntur duobus modis : Primò, quæ quanta dicuntur τὸ εἶναι πᾶν τὸ ἐν ᾧ ὑπάρχει, id est, quia quantum est id, in quo sunt : sive ipsa extensa, sint extensione subjecti, ut albòr in pariete ; sive non sint extensa, ut musica in homine : Secundò, quorum divisibilitas oritur ex divisibilitate aliorum ; ut, *motus*.

C A P. VI.

De Qualitate.

T H E O R E M A I.

Qualitas est accidens à quo subiectum quale duntaxat dicitur.

1. ¶ Aristoteles *lib. de Categ. cap. 8.* definit qualitatem hoc modo: Ποῖόντις ἐστὶ κατὰ τὸ ποῖόν τι καὶ λέγεται, hoc est, Qualitas est, à qua quales aliquo dicuntur. Hæc definitio nimis lata est, idque duplici nomine. Nam primò completitur etiam substantiarum differentias, quæ de speciebus prædicantur in quæstione quâ quæritur quales sint ; sive, à quibus species quales dicuntur : quæ tamen differentiæ ad hanc categoriam non pertinent, ut suprâ diximus : etsi Aristoteles *lib. 5. Phys. cap. 2. lib. 4. Metaph. cap. 14. & passim*, eas qualitates voçet. Ut autem hæc differentias excluderemus, definivimus qualitatem, accidens, &c.

2. Deinde, omnia accidentia, teste Prophyrio, *cap. 10. Introduct.* prædicantur in quæstione quâ quæritur qualis res sit, sed modo quodam generali: præter quem reliqua accidentia alium prædi-

prædicandi modum sibi vendicant propriam ac peculiarem. At qualitas non solum generali modo prædicatur in quæstione quâ quæritur qualis res sit ; sed etiam ratione sibi propriâ ac peculiari. Atque hoc expressimus, cum diximus, à qualitate subjectum quale *dumtaxat* dici, & non alio aliquo modo, ut cætera accidentia.

II. *Qualitatis species sunt quatuor, habitus & dispositio, potentia & impotentia naturalis, patibilis qualitas & passio, forma & figura.*

1. ¶ Singulis speciebus duo nomina tribuuntur, ad significandas qualitates gradu potius, aut tempore, aliâve circumstantiâ accidentali, quàm specie, aut essentiâ diversas : Nam habitus & dispositio, potentia & impotentia, differunt gradu ; patibilis qualitas & passio, tempore ; forma & figura, ratione sive modo.

III. *Habitus est qualitas adventitia ad operandum cum facilitate.*

IV. *Dispositio est habitus imperfectus,*

1. ¶ Habitus, Græcè ἔξις, interdum sumitur pro quacunque forma, quæ à subjecto separari potest, veluti cum opponitur privationi. Sic sumitur *cap. 10. lib. Categ.* & multis aliis in locis. Interdum pro vestitu, ut *lib. 4. Metaph. cap. 20.* unde & ultima cægoria dicitur cægoria τὸ ἔχειν. Apud Medicos sumitur pro corporis habitudine, bonâ vel malâ : unde ἐνέργεια, id est, *firma corporis constitutio*, qualis erat olim gladiatorum ac pugilum ; & κακὴν ἔξις, hoc est, *prava constitutio*. At hoc loco sumitur pro primâ specie qualitatis, quam definivimus.

2. Habitus dicitur qualitas *adventitia*, quia non fluit ab essentiâ subjecti, aut à principiis essentix, sed aliunde advenit ; & vel à Deo infunditur ; ut, *fides, spes, charitas, prophetia, donum linguarum*, &c. vel crebris actionibus acquiritur. Habitus acquisiti vel in corpore sunt ; ut, ἐνέργεια, sive *bona corporis habitudo* industriâ acquisita ; vel in animo. Atque hi vel in intellectu ; ut, *scientia, intelligentia, sapientia, prudentia, & ars* : vel in appetitu ; ut, virtutes, & vitia moralia.

3. Dispositio, Græcè διάθεσις, vel significat ordinem ejus quod partes habet ; ut, *lib. 4. Met. cap. 19.* vel qualitatem quamlibet

libet quæ materiam præparat ad formam substantialem recipiendam ; vel quamlibet qualitatem primæ speciei ; quo sensu dicit Philosophus *cap. 8. de Categ.* ubi de qualitate disputat, *omnem habitum esse dispositionem, sed non omnem dispositionem esse habitum* : vel denique habitum inchoatum & imperfectum ; quæ significatio hujus loci est.

4. Habitus differt à dispositione, quòd, cùm aliùs subiecto hæreat, *χρειώτερος καὶ μόνιμωτερος* fit, hoc est, *diuturnior ac permanentior*, quàm dispositio. Dispositio enim, ut citò fit, ità *ευκίνητος ἐστὶ, καὶ ταχὺ μεταβάλλεται*, hoc est, *facile movetur, ac citò mutatur*, ut loquitur Aristoteles loco citato.

V. *Potentia naturalis est qualitas sensibus non obvia, quæ subiectum naturā suā aptum est ad agendum, vel patiendum.*

VI. *Impotentia est diminuta potentia.*

1. §. Potentia naturalis, Græcè *δύναμις φυσική*, differt à tertia specie qualitatis, quòd non sit obvia sensibus, sicut illa. Eadem differt ab habitu, tum quia à natura est, habitus aliunde ; tum quia subiectum aptum tantum reddit ad agendum, aut patiendum ; cùm habitus subiectum etiam reddit propensum, idque ad agendum expeditè & cum facilitate.

2. Potentia naturalis dividitur ab Aristotele *lib. 4. Metaph. cap. 12.* in activam & passivam. Utraque definitur hoc modo : *Δύναμις λέγεται, ἢ ἡ ἀρχὴ κινήσεως ἢ μεταβολῆς ἐν ἑτέρῳ, ἢ ἢ ἑτέρῳ ἢ δ' ὁ ἑτέρῳ, ἢ ἢ ἑτέρῳ* hoc est, *Potentia quædam dicitur principium motionis aut mutationis in alio, quatenus est aliud ; quædam ab alio, quatenus est aliud.* Illa est potentia activa ; hæc passiva : Ex. gr. potentia generandi, loco movendi, calefaciendi, ædificandi, &c. est potentia activa : at molities est potentia passiva ad sectionem.

3. His addi potest potentia quædā mixta, quæ quia principium mutationis in seipsa est, simul activa est, & passiva ; ut *intellectus, voluntas, &c.* Ab hac potentia fluunt actiones immanentes ; ut, *intelligere, velle* : à potentia activa actiones transeuntes.

4. Præterea, potentia naturalis vel prima est, vel secunda. Prima est, quæ immediatè fluit à forma subiecti : secunda nihil aliud est, quàm dispositio materiæ, & apparatus organorum, quibus prima potentia suas functiones exercet. Ex. gr. facultas videndi, quatenus fluit ab anima sentiente, est poten-
tia

tia prima : at quatenus consistit in oculi structura & temperatione, est potentia secunda. Potentia prima nec tolli potest à subjecto, nec minui; secunda & minui potest & tolli : Cum ergò impotentia dicitur *diminuta potentia*, secunda potentia intelligi debet.

5. Ad potentiam secundam revocandæ sunt omnes naturæ dotes ; tum animi, ut *ingenium, indoles, memoria* ; tum corporis, ut *robur, sanitas, &c.* Hujusmodi dotes, si valde imperfectæ sint, veluti, si quis sit obruso ingenio, labili memoriâ, dicuntur impotentia : si penitus absint, non sunt qualitates, sed privationes meræ.

VII. *Patibilis qualitas est, quæ passionem efficit in sensu.*

VIII. *Quæ si citò evanescit, passio dicitur.*

1. ¶. Patibilis qualitas Græcè dicitur *παύτως παθητική*, non quia subjectum cui inest ab illa quicquam patitur, sed quia passionem efficit in sensibus. Huc pertinent quinque sensuum externorum objecta propria, *lux, color, sonus, sapor, odor, & qualitates tactiles*, quales sunt quatuor qualitates primæ, *calor, frigus, humiditas, siccitas* ; & quæ ex his oriuntur, ut *gravitas, levitas, raritas, densitas, &c.* Harum qualitatum, singulos sensus afficiunt singulæ, color visum, sonus auditum, calor tactum, &c. In quo differunt à figura & forma, quæ passionem in pluribus sensibus efficiunt.

2. Si patibilis qualitas citò pereat, ut pallor ex metu, rubor ex pudore, *παύση*, sive passio dicitur, quia nimirum cum passione advenit. Atque ita fit, ut habitâ ratione passionis potiùs, quàm qualitatis quæ ex passione oritur, non tam dicantur *quales*, quàm *aliquid passi*, qui ejusmodi qualitatibus afficiuntur, ut loquitur Aristoteles *cap. 13. Categ.*

IX. *Figura est qualitas orta ex terminatione magnitudinis.*

X. *Forma est figura cum colore.*

1. ¶. Forma Græcè *μορφή* dicitur, & *εἶδος* ; figura, *ἡμῶς*. Forma alia est substantialis, alia accidentalis. Forma substantialis pertinet ad categoriam substantiæ. Forma accidentalis in genere nihil aliud est quàm accidens, quod instar formæ subjecto suo inhæret. Hoc loco non quælibet forma accidentalis intelligitur, sed solum *ἡ ἐν τῷ αἵματι ὑπάρχουσα μορφή*, id est, *forma quæ circa unamquamque rem consistit,*

sistit, sive, quæ in superficie corporis oculis & tactui patet.

2. Et si autem figura & forma sæpe confundantur, hoc tamen loco sic distinguere solent, ut figura tribuatur rebus Mathematicis, in quibus nihil aliud spectatur quàm magnitudo, forma, rebus Physicis, in quibus etiam spectatur color. Ad figuram pertinet, *triangulum*, *circulus*, *quadratum*, *sphæra*, *cylindrus*, & cæteræ figurarum Mathematicarum appellationes, & continuæ quantitatis affectiones: ad formam *pulchritudo*, *deformitas*, &c.

XI. *Notæ qualitatis sunt tres: 1. Qualitas habet contrarium.*

1. ¶ Sic virtus vitio contraria est, & calor frigori. Contrarietas reperitur in prima & tertia tantum specie, non in secunda & quarta: nisi quod *pulchritudo* & *deformitas* videantur contrariæ, quæ tamen ad formam spectant.

XII. 2. *Qualitas recipit magis & minus.*

1, ¶ Hoc est, intenditur & remittitur: Nam aliud alio calidius est aut minus calidum, frigidus aut minus frigidum. Hæc qualitatum affectio, sive nota, vel oritur ex contrarietate, vel ex dispositione materiæ. Habitus, & qualitates patibiles recipiunt magis & minus à contrarietate: remittuntur enim, cum miscentur cum contrario; & intenduntur, cum à contrario liberantur. Excipitur *lux*, quæ, etsi sit qualitas patibilis, intenditur tamen aut remittitur propter inæqualem dispositionem subjecti, quia non habet contrarium. Eodem modo intenduntur & remittuntur potentiæ naturales, quibus nihil contrarium est, cum quo misceri possunt.

XIII. 3. *Res à qualitate dicuntur similes aut dissimiles.*

1. ¶ Nam similitudo & dissimilitudo sunt relationes, quæ rebus conveniunt ob qualitates.

C A P. VII.

De Relatis.

THEOREMA I.

ΠΡὸς τὸ τὰ τοιαῦτα λέγεται, ὅσα αὐτὰ, ἀπὲρ ὧν, ἐτίθενται λέγεται, ἢ ὅπως ἑτέρας πρὸς ἑτέρας hoc est, *Relata dicuntur, quæ ad ipsum quod sunt, aliorum esse dicuntur, aut alio quovis modo ad aliud referuntur.*

1. ¶ Re-

1. ¶ Relata, Græcè τὰ ρεζς, id est, ea quæ sunt ad aliud, in plurali numero dicuntur, quia relatio ejusmodi accidens est, quod non tantum in aliquo est, ut in subjecto, sed refertur etiam ad aliud.

2. Hæc definitio relatorum exstat initio cap. 1. de Categ. Relata dicuntur *aliorum*, hoc est, referuntur ad aliud in genitivo casu; ut pater est filii pater. *Vel quovis alio modo*, hoc est, in alio casu; ut, simile est simili simile, majus est minore majus. *Hoc quod sunt*, id est, eodem illo nomine quo appellantur. Sic pater dicitur filii pater; dominus, servi dominus. At tenebræ dicuntur quidem lucis, sed non lucis tenebræ, verum lucis privatio; ac proinde tenebræ non sunt in relatis, quia non dicuntur esse alterius *hoc quod sunt*. Hæc definitio generalis est, & multis competit quæ non sunt hujus categoriæ, ut ex sequentibus divisionibus liquebit.

II. Relata dividuntur vulgò in relata secundum dici, & relata secundum esse.

III. Relata secundum dici sunt res absolutæ, quæ relationem includunt aut connotant, ideòque non essentiâ, sed nomine tenus solummodo referuntur ad aliud.

IV. Relata secundum esse sunt οἷς τὸ εἶναι τωτὸν ὅτι τὰ ρεζς π πω: ἔχει, id est, quibus esse idem est atque ad aliud aliquo modo se habere, sive quorum tota essentia posita est in respectu ad aliud.

1. ¶ Relata secundum dici & secundum esse, non naturâ relationis, sed nominibus differunt. Nam nomina, quæ relatis secundum dici conveniunt, significant per se primò rem absolutam, & secundariò connotant relationem quæ in illa absoluta re includitur: at relatis secundum esse tributa sunt ejusmodi nomina, quæ per se primò significant relationem, & connotant rem absolutam, quam ista relatio, tanquam subiectum suum, præsupponit. Ex.gr. *scientia* & *scibile* nuncupantur relata secundum dici, quia scientia est nomen qualitatis, quæ respectum ad objectum scibile includit. Itaque tota scientiæ essentia non est posita in respectu ad objectum scibile: imò essentia scientiæ est absoluta qualitas, quæ tamen referri dicitur ad aliud, quia relationem connotat. At *pater* & *filius* sunt relata secundum esse, quia voces istæ per se primò significant

ficant relationem sive respectum mutuum : ideoque tota patris essentia, quatenus est pater, posita est in respectu ad filium, & essentia filii, in respectu ad patrem. Quid enim aliud est esse patrem, quàm habere filium ; & esse filium, quàm habere patrem ?

2. A relatis secundùm dici nihil aut parùm differunt relati transcendentia, sic dicta, quòd limites categoriarum transiliunt aut transcendunt. Nulla enim res est, cui ejusmodi relationes non conveniunt. Sic accidens refertur ad subiectum, actio ad objectum, pars ad totum, causa ad causatum, &c.

V. *Dividuntur etiam relata, in relata realia, & relata rationis.*

VI. *Relata realia sunt, quæ suâ naturâ, & absque mentis ope referuntur ad aliud.*

VII. *Relata rationis sunt, quæ solâ mentis operâ referuntur ad aliud.*

I. ¶ Ex. gr. pater & filius, maritus & uxor ; & id genus alia, sunt relata realia ; quia quòd pater sit filii pater, & maritus uxoris maritus, non dependet à mentis nostræ cogitatione. Ad dextrum & sinistrum sunt relata rationis, quia, quòd inter duas columnas consistenti, hæc dextra sit, illa sinistra, potius quàm contrâ, à mentis ordinatione est. Hoc sensu cœlo quoque dextrum & sinistrum, antè & post, cæterâsque positionum differentias attribuimus. Quòd verò manus una dextra dicatur, altera sinistra, non rationi, sed naturæ tribuendum videtur. Ad relationes rationis etiam ταυτότης sive identitas revocanda est. Nam cùm aliqua res cum seipsa ita comparatur, ut dicatur eadem sibiip̃si, una illa res ab intellectu sic usurpatur, ac si essent res duæ. Huc etiam referentia rationis, quæ ad se mutuò referuntur, ut, genus & species, subiectum & prædicatum, &c.

VII. *In omni relationi requiritur subiectum & terminus.*

IX. *Subiectum vocatur, cui relatio tribuitur, sive quod ad aliud refertur.*

X. *Terminus ad quem subiectum refertur.*

XI. *Subiectum dicitur relatum, & terminus correlatum, cùm relatione effecta sunt, ac cum illa considerantur.*

XII. *Relatum*

XII. Relatum & correlatum referuntur ad se mutuó; idque non uná sed geminá relatione.

XIII. In qua reciprocatione, quod est subiectum unius relationis, id terminus est alterius, & vice versá.

XIV. Quemadmodum & quod in una relatione relatum est, id est correlatum in altera, & vice versá.

1. ¶ Hæc ut intelligas, cogita inter patrem & filium duas relationes intercedere: quarum altera, quâ pater ad filium refertur, paternitas appellatur vulgò; altera, quâ filius refertur ad patrem, filiatio dicitur. Paternitas autem & filiatio non sunt una, sed duæ relationes à se invicem diversæ: quia aliter pater se habet ad filium, aliter filius ad patrem. Hæ duæ relationes requirunt duo subiecta, & duos terminos, qui sunt duo homines, putà, Philippus & Alexander. Philippus est subiectum paternitatis; Alexander, terminus: contrà, Alexander est subiectum filiationis; Philippus, terminus. Similiter, pater est relatum in paternitate; filius, correlatum: contrà, in filiatione, filius est relatum; pater, correlatum.

2. Cæterùm subiectum relationis vulgò distingui solet in subiectum inhæisionis & subiectum denominationis. Subiectum inhæisionis aiunt esse substantiam, cui relatio more cæterorum accidentium inhæreat. Subiectum denominationis vocant, cui relatio tribuitur, sive quod ad aliud referri dicitur: quod vel substantiam esse dicunt, vel accidens. Hæc duo subiecta volunt interdum coincidere; ut in paternitate: quæ in eo ipso est, putà in Philippo, qui pater denominatur. Interdum aiunt ista discrepare; veluti cùm duæ lineæ dicuntur æquales: relatio enim æqualitatis lineis quidem tribuitur, aiunt, at ea inhæret substantiæ cuidam lineatæ, sive longæ. Hæc plus habent subtilitatis quàm veritatis. Nam relatio nihil est aliud, quàm *ῥέσις*, sive respectus unius rei ad aliud, & ad aliud referri nihil est, quàm *οὐκ ἔχειν*, id est, ad aliud aliquo modo se habere: atque ideò relationes non tam inhærent alicui subiecto, quàm adhærent. Id verò cui adhærent, nihil est aliud, quàm subiectum illud quod referri dicitur ad aliud, sive quod ab illis denominatur: quod an substantia sit an accidens, nihil interest.

XV. Relationes quædam ponuntur posito subiecto & termino, aliæ præterea fundamentum requirunt.

XVI. Fun-

XVI. *Fundamentum est id, quo mediante relatio subiecto competit.*

1. §. Ex. gr. cùm ovum ovo simile dicitur, relatio similitudinis, quæ inter duo ova intercedit, in unoquoque ovo oritur, simul atque alterum ovum incipit exsistere, nec quicquam ad istam relationem requiritur, præter duorum ovorum coexistentiam, quod illius fundamentum esse possit. At relatio dominii non oritur in subiecto, simul atque terminus exsistit, sed oportet aliud quid intercedere, quo relatio dominii & servitutis subnixa est. Qui enim dominus est alicujus ideò dominus est, Quia illum in bello captum servavit, aut quia eum emit : & servus ideò alicujus servus est, quia ab illo servatus est, aut emptus. Sic fundamentum paternitatis, est genuisse quempiam ; & filiationis, ab illo esse genitum.

XVII. *Relata vel sunt synonyma sive ejusdem nominis, vel heteronyma sive diversi nominis.*

1. §. Relata synonyma nuncupantur vulgò relata æquiparantix ; ut *amicus, rivalis, hospes, &c.* Heteronyma dicuntur relata disquiparantix ; ut, *pater & filius, dominus, & servus, &c.* Si relatio, quæ heteronymis competit, nomen habet, alterum duorum vocatur relatum, nempe illud à quo relatio nomen habet ; alterum vocatur correlatum. Si relatio nomine caret, veluti cùm emptor refertur ad venditorem, relati & correlati distinctio pendet à nobis: ut & in relatis synonymis. Nulla enim ratio est cur emptor potius relatum dicatur quàm correlatum ; aut duorum amicorum hic potius quàm alter.

XVIII. *Notæ relatorum sunt quinque : 1, Relata habent contrarium.*

1. §. Relatum non est contrarium correlato suo ; sed unum relatum alteri relato contrarium est. Hæc nota non convenit relatis per se, sed ratione fundamenti aut subiecti. Ideoque non convenit omnibus relatis (nam nihil est contrarium patri aut filio, duplo aut dimidio) sed iis tantum quæ nituntur contrariis fundamentis, aut quæ conveniunt contrariis subiectis. Nam amicus & inimicus sunt contraria, quia fundamenta amicitix, & inimicitix, benevolentia scilicet, & malevolentia, contraria sunt. Similiter, simile & dissimile, æqua-

le & inæquale, contraria sunt, quia res ipsæ, sive subjecta, contraria sunt. Similitudo enim est inter easdem qualitates, & æqualitas inter easdem quantitates: at dissimilitudo est inter qualitates diversas, & inæqualitas inter diversas quantitates.

XIX. 2. Relata recipiunt magis & minus.

1. §. Hæc quoque nota relatis convenit ratione subjecti aut fundamenti: ideoque non convenit omnibus relatis (nam pater aut dominus non est alio magis pater aut dominus) sed iis tantum quæ nituntur mutabili subjecto aut fundamento. Quando enim subjectum aut fundamentum variatur, relatio intenditur aut remittitur.

Ex. gr. quæ inæqualia sunt, inæqualiora fiunt, aut minus inæqualia, cum quantitas, quæ subjectum inæqualitatis est, in altero duorum major fit, aut minor. Et quæ dissimilia sunt, dissimiliora fiunt aut minus dissimilia, quando qualitas in altero duorum intenditur aut remittitur.

XX. 3. Relata reciprocantur.

1. §. Hoc est, omne relatum refertur ad correlatum reciprocum: ut, dominus est servi dominus, & servus domini servus; duplum dimidii duplum, & dimidium dupli dimidium. Fit autem sæpe ob vocabulorum penuriam, ut hæc reciprocatio non appareat. Nam caput est alicujus caput, & ala alicujus ala: nec tamen his respondet idoneum correlatum. Nam animal non potest esse idoneum correlatum capitis, quia non omnia animalia caput habent: nec avis potest esse idoneum correlatum alæ, quia etiam mulsæ, vespæ, vespertilioes, &c. alas habent, nec tamen sunt aves. Igitur tunc necesse est (inquit Aristoteles hoc capite) *ὀνομαστικῶν*, id est, vocabula fingere, quamvis non adeo usitata. Ut ergo in dictis relatis appareat reciprocatio, dicendum est, caput est capitati caput, & ala est alati ala, &c.

XXI. 4. Relata sunt simul naturâ.

1. §. Nimirum, quatenus sunt relata. Etsi enim Philippus prior sit Alexandro, non est tamen Philippus pater, antequam Alexander sit filius.

XXII. 5. Relata sunt simul cognitione.

1. §. Quia nimirum relatorum alterum, quatenus relatum

est, non potest sine altero cognosci. Nam etsi cognosci possit is qui filius est, non cognito eo qui illius pater est; non tamen cognosci potest, aliquem esse filium, nisi cognoscatur eum habere patrem; nec cognosci potest cujus filius sit aliquis, si ignoretur quis sit illis pater.

CAP. VIII.

De Actione & Passione.

THEOREMA I.

Actio est, à qua dicimur agere.

II. Agere est aliquid efficere.

III. Passio est, à qua dicimur pati,

IV. Pati est recipere effectum agentis.

I. §. Actio & Passio non tam sunt res, quàm via ad res, aut modus quo res fiunt, ac fluxus ejus quod fieri dicitur.

V. In actionibus distinguenda sunt, agens, patiens sive subiectum, terminus à quo, & terminus ad quem.

I. §, Ex. gr. in calefactione, agens est ignis, aut sol; patiens sive subiectum, is qui calefit; terminus à quo, frigus; terminus ad quem, calor. Qui enim calefit, ex frigido fit calidus. Terminus ad quem, est semper vera aliqua res: sed terminus à quo, interdum quidem vera res est, termino ad quem contraria; ut in calefactione: nam frigus & calor sunt veræ qualitates, sibi quæque invicem contrariæ. Interdum terminus à quo nihil aliud est, quàm mera privatio termini ad quem: veluti, eum quis ex indocto doctus efficitur. Cum enim termino ad quem nihil est contrarium, terminus à quo illi privativè opponitur.

VI. In omni actione necessario requiritur agens, terminus à quo, & terminus ad quem.

VII. Et si terminus ad quem non potest per se subsistere, requiritur etiam subiectum sive patiens.

VIII. Si terminus ad quem per se subsistit; actio consistit sine patiente.

I. §. Etenim, cum actio nihil aliud sit, quàm fluxus effecti, sive termini ad quem in fieri, ut loquuntur, si terminus ad

ad quem subjectum requirit, ut sit in omni actione, excepta creatione, etiam actio subjectum requirit. Cum autem creationis effectum, sive terminus ad quem, sit integra substantia; fit, ut creatio subjectum sive patiens non habeat. Nihil enim aliud est creatio, quam productio rei ex nihilo, id est, ex nulla subjecta materia.

IX. Cum actio subjectum sive patiens habet, non est in agente, sed in patiente.

I. §. Actio enim (ut dictum est) est fluxus effecti; ac proinde in eo subjecto esse debet in quo est effectum: Atqui effectum est in patiente: ergo & actio debet esse in patiente.

X. Imò actio & passio reipsa non differunt, sed respectu tantum ad diversa.

I. §. Unus enim unius effecti fluxus est, qui, quatenus ab agente procedit, actio dicitur; quatenus in patiente recipitur, passio vocatur. Ut enim via quæ Athenis Thebas ducit, & ea quæ Thebis ducit Athenas, una tantum via est ad diversos terminos collata; utque acclive & declive in monte solo respectu differunt: ita quoque actio & passio hoc tantum modo differunt, quod illa referatur ad agens, hæc ad patiens.

XI. Actio alia est immanens, alia transiens.

XII. Actio immanens est, cujus effectum est in agente: ut intelligere, velle.

XIII. Actio transiens est, cujus effectum est in alio: ut, urere, verberare.

XIV. In actione immanente agens & patiens idem sunt; in transeunte reipsa differunt.

XV. Actio transiens dividitur pro diversitate termini ad quem, in quatuor species:

Prima est ad substantiam: ut generatio, cui opponitur corruptio.

Secunda ad quantitatem: ut, accretio, cui opponitur diminutio.

Tertia ad qualitatem: ut, alteratio.

Quarta ad locum sive ubi: ut, motus localis,

I. §. Hæc traduntur ab Arist. cap. 14. Categ. Sed plenius de iis agendum est in Physicis.

XVI. *Potest etiam actio dividi in univocam & equivocam.*

XVII. *Actio univoca est, quâ agens producit effectum sue speciei.*

XVIII. *Actio equivoca, quâ producit effectum diversæ speciei.*

1. ¶. Veluti, cùm mus generat murem, aut calor calorem, est actio univoca : at cùm sol mures generat, aut lux calorem, est actio æquivoca.

XIX. *Denique dividitur actio in perficientem & corruptentem.*

XX. *Actio perficiens est, quâ aliquid efficitur, sine ullius rei destructione.*

XXI. *Actio corruptens, quâ aliquid efficitur, & aliud destruitur.*

1. §. Ex. gr. illuminatio est actio perficiens; quia cùm aër illuminatur, lumine perficitur, nullâ re aut formâ destructâ. At generatio, & calefactio, sunt actiones corruptentes: quia, cùm animal aut tale quid generatur, simul aliud corrumpitur : & qui calefit, calorem suscipit amisso frigore. Causa hujus discriminis est, quòd actio perficiens versetur inter terminos privativè oppositos; corruptens, inter terminos contrarios aut disparatos.

XXII. *Notæ actionis duæ sunt : 1, Actio habet contrarium.*

XXIII. *Actio recipit magis & minús.*

1. ¶. Ex. gr. calefactio contraria est frigefactioni : & alia magis calefaciunt aut frigefaciunt, alia minús. Magis calefacere hoc loco, non est celerius, sed intensius calefacere ; hoc est, intensiorem calorem producere. Utraque nota convenit actioni ratione termini ad quem. Itaque neutra omnibus actionibus convenit, sed iis tantùm quarum termini contrarii sunt, & intensiorem & remissionem recipiunt. Itaque generare, figurare, &c. non habent contrarium, non intenduntur etiam aut remittuntur : quia substantia aut figura neque contrarium habet, neque intenditur aut remittitur.

2. Atque hæc omnia quæ de actione diximus, etiam passioni conveniunt. Eædem enim utriusque divisiones, eædemq; notæ sunt.

CAP. IX.

De quatuor pōstremis categoriis.

THEOREMA I.

Ubi est modus quo res finita alicubi esse dicuntur.

1. ¶. *Ubi* à loco differt, quòd locus cùm strictè sumitur, solis corporibus, *ubi* etiam substantiis incorporeis, si finitæ sint, conveniat. Nam substantiæ incorporeæ dicuntur esse in loco *definitivè*, hoc est, si dicuntur esse alicubi, ut non sint quidem alibi, sed tamen, ut locum non occupent, aliàsque substantias, sive corporeas sive incorporeas, ex illo loco excludant: quod est improprie in loco esse. At substantiæ corporeæ dicuntur esse in loco *circumscriptivè*, hoc est, dicuntur occupare locum, & alias substantias corporales ex eodem loco expellere: quod est proprie in loco esse. Dixi, *si finitæ sint*: Nam Deus, qui infinitus est, non *alicubi*, sed *ubique* esse dicitur.

2. Est & aliud discrimen inter locum & *ubi*. Nam locus pertinet ad quæstionem quâ quæritur quanta res sit, sive, quantum loci occupet; *ubi* spectat ad quæstionem quâ quæritur *ubi*, aut *unde* res sit; *quò*, aut *quâ* abiit. Atque ea quæ hisce quæstionibus redduntur: ut, *domi*, *foris*, *ruri*, *in templo*, *hinc*, *illinc*, *huc*, *illuc*, *hac*, *illac*, &c. in hac categoria collocantur.

II. Quando est modus quo res finita aliquando esse, fuisse aut fore dicuntur.

1. ¶. Quando differt à tempore, proprie strictèque dicto, ut *ubi* à loco. Nam tempus strictè sumptum convenit rebus tantùm successivis, & in perpetuo motu ac partium fluxu consistentibus. Definitur enim, *numerus motus secundum prius & posterius*, lib. 4 *Phys. cap. 11*. At quando etiam tribuitur rebus momentaneis & permanentibus, si finitæ sint. Quæ enim infinitæ sunt atque æternæ, non *aliquando*, sed *semper* esse dicuntur.

2. Præterea, vocabula temporis pertinent ad quantitatem, & ad quæstionem quæ fit per *quamdiu*: ut, *hora*, *annus*, *seculum*, &c. At vocabula quæ ad hanc categoriam pertinent, re-

spondent quæstioni quæ fit per quando : ut, *hodie, cras, heri, astate, vere, calendis, nonis, Consule Manlio, &c.*

III. *Situs est ordo partium corporis inter se.*

1. ¶. Situs enim convenit solis corporibus. Nam ordo partium in tempore, aut in numero, situs appellari non consuevit. Et si autem situs mutari non possit sine motu locali, qui est motus ad *ubi*, non est tamen situs cum *ubi* confundendus, nè quidem in corporibus. Potest enim *ubi* mutari, non mutato situ ; veluti, si quis sine ulla partium motione veheretur de loco in locum.

2. Situs alius naturalis est ; ut situs brachii ad scapulam, aut manus ad carpum : alius voluntatis ; ut, *sedere, stare, jacere, primum, supinum esse, &c.*

IV. *Habitus est modus, quo vestis, aut aliquid instar vestis, corpori circumpositum, appensum, aut alio aliquo modo adjectum est.*

1. ¶. Huc pertinent vocabula quæ vestium, armorum, & similibus rerum conjunctione cum corpore significant : ut, *vestitum, armatum, togatum, galeatum, hastatum, barbatus, tapetibus aut aulæis instratum esse, &c.* Hæc & similia vocabula non significant vestem aut arma, sed vestis aut armorum conjunctionem cum corpore. Quod significavit Aristoteles, cum lib. 4. *Metaph.* cap. 20. dixit habitum esse *ἐσθρῆσαν τῷ ἔχοντι* & *ἐχόμενος* id est, *actum habentis, & ejus quod habetur* : & habitum esse *μετὰ τὸ ἔχοντι ἐδόντα*, & *τῷ ἔχοντι ἐδόντα* id est, *inter eum qui vestem habet, & vestem quæ habetur*. Atque hæc de categoriis.

C A P. X.

De Prædicabilibus in genere.

THEOREMA. I.

Dicamus nunc de thematum simplicium affectionibus, seu notionibus secundis ; quæ, ut diximus, ex rerum in categoriis dispositarum, ac primarum notionum collatione oriuntur.

II. *Eæ vel simplices sunt, vel conjunctæ.*

III. *Affectiones simplices sunt, quæ singulis rebus seorsum conveniunt.*

IV. *Suntque*

I V. *Suntque vel prædicabilia, vel totum & pars, vel causa & causatum, vel subjectum & adjunctum.*

V. *Affectiones conjunctæ sunt, quæ pluribus rebus conjunctim conveniunt.*

VI. *Suntque vel convenientia, vel diversitas, vel oppositio, vel ordo.*

1. ¶. Etsi genus ad speciem referatur, totum ad partem, causa ad causatum, subjectum ad adjunctum, alterumque sine altero non consistat; unaquæque tamen res seorsum genus, totum, causa, subjectum, &c. dici potest: At uni rei seorsum, ut una est, non potest tribui convenientia, diversitas, oppositio, aut ordo.

VII. *Prædicabilia sunt, quæ de pluribus verè, propriè, naturaliter, atque immediatè affirmantur.*

1. ¶. Prædicabile (Græcè *κατηγορούμενον*) & universale, etsi reipsa non differant, (omne enim universale prædicari potest, & omne prædicabile debet esse universale) ratione tamen diversa sunt. Nam universale, quatenus universale est, prædicatur de inferioribus, in quæstione quâ quæritur quid sint: at prædicabile, quatenus est prædicabile, prædicatur etiam de coordinatis, idque in quæstione quâ quæritur qualia sint. Itaque, cum quinque sint prædicabilia, tantum duo tamen universalia sunt, genus & species. Nam differentia, proprium, & accidens, quatenus talia sunt, non sunt universalia, sed tantum quatenus sunt genera, aut species eorum quæ sub illis continentur. Ex. gr. sensus est proprium animalis, sed non est universale, quatenus ut proprium de animali prædicatur; sed quatenus prædicatur de visu, auditu, & cæteris sensibus, ut genus.

2. Prædicabilia dicuntur *affirmari*. Enunciationes enim negatæ non pertinent ad prædicabilia; tum quia non explicant quid aut qualis res sit, sed quid aut qualis non sit; tum quia attributa negata infinita sunt. Additur *de pluribus*, ut excludatur individuum, quod de seipso tantum prædicatur, ideoque non facit ad alterius rei explicationem. *Verè*) Nam quæ affirmantur falsò, dissidentanea sunt subjecto de quo affirmantur, ideoque infinita. *Propriè*) Nam etiam prædicatum

improprium, subiecto suo dissentaneum est, nisi proprio vocabulo permutetur. Ex. gr. in hac enunciatione impropria, *Ira est vis fortitudinis*. subiectum *ira*, & prædicatum *vis*, sunt dissentanea, alterumque alterius naturam non declarat: ideoque hæc prædicatio impropria, revocanda est ad hanc enunciationem propriam, *Ira auget fortitudinem*, & tunc est prædicatio proprii. *Naturaliter*) Prædicatio naturalis dicitur, in qua subijcitur & prædicatur, quod naturâ suâ subijci & prædicari debet: quod fit cum superius prædicatur de inferiore; ut, *Homo est animal*: vel accidens de substantia; ut, *Mel est flavum*: vel concretum de abstracto; ut, *Voluptas est jucunda*. Prædicatio ergo contra naturam erit, cum aut inferius de superiore prædicatur; ut, *Animal est homo*: aut substantia de accidente; ut, *Flavum est mel*: aut denique abstractum de concreto; ut, *Jucundum est voluptas*. Postremo, additur immediate: quia prædicabilia comparantur cum proximo subiecto. Itaque hæc prædicatio, *Homo sentit*, non potest ad ullum prædicabile revocari. Nam *sentire* neque genus hominis est, neque species, neque differentia, neque proprium, neque accidens: nimirum, quia *homo* non est proximum subiectum *sensus*, sed *animal*. Itaque hæc prædicatio, *Animal sentit*, sumenda est, eaque pertinet ad proprium.

VIII. Prædicabilia sunt quinque, genus, species, differentia, proprium, & accidens.

1. 1. Hic numerus sic colligitur: Quicquid de alio affirmatur eo quo dictum est modo, vel continetur in essentia subiecti sui, vel in illius essentia non continetur. Quod in essentia subiecti continetur, vel prædicatur in enunciatione quâ dicitur quid sit subiectum, vel in illa quâ dicitur quale sit. Quod prædicatur in enunciatione quâ dicitur quid sit, vel exprimit essentiam subiecti imperfecte, & est genus: vel perfecte & planè, & est species. Quod in essentia subiecti continetur, & exprimit quale illud sit, est Differentia. Quod non continetur in essentia subiecti, vel prædicatur de subiecto suo necessario, & est proprium, vel contingenter, & est accidens.

2. Hunc numerum non auget definitio: quia non est prædicabile simplex, sed compositum ex genere & differentia. Neque etiam genus duo prædicabilia constituit, quamvis prædicetur

prædicetur de speciebus, & de earum individuis; neque differentia, aut proprietas generica, quamvis non solum de generibus, sed etiam de speciebus atque individuis prædicentur: quia prædicabilia comparari debent de proximo atque immediato subjecto; genus cum speciebus, non cum individuis; & differentia aut proprietas generica cum genere, & non cum speciebus, aut cum individuis, ut paulò antè dictum est.

3. Quod quidem aiunt, etiam partem prædicari de toto, causam de effecto, adjunctum externum de subjecto; ac proinde plura esse prædicabilia quàm quinque, nullius prorsus momenti est. Nam pars non prædicatur de toto in casu recto, neque causa de effecto, neque adjunctum, externum de subjecto; sed tantum in casu obliquo. Neque enim dicimus, *Animal est caput*, sed, *est capitulum*, aut tale quid non dicimus etiam, *Eclipsis est interpositio terræ* (nisi improprie) sed, *fit ob interpositionem terræ*: neque, *Miles est gladius*, sed, *est gladiator*. Et ejusmodi prædicationes revocari debent ad differentiam, proprium aut accidens.

IX. *Uusus prædicabilium vel communis est, vel proprius.*

X. *Uusus communis est, inservire formandis definitionibus, divisionibus, syllogismis, & methodo.*

XI. *Uusus proprius est duplex: 1. Declarare quid in unaquaque categoria superius sit atque inferius, quid primum, quid ultimum; ac proinde, quid subjici suæ naturæ, ac prædicari aptum sit.*

XII. *Hunc usum habent genus, species, & differentia.*

XIII. 2. *Ostendere quo modo accidentia prædicentur de substantia.*

XIV. *Hoc præstant proprium & accidens.*

1. ¶ Utrumque usum indicavit Porphyrius cap. 1. *Isagoges*. Quare non sunt audiendi, qui proprium & accidens hujus loci esse negant.

CAP. XI.

De Genere & Specie.

THEOREMA I.

Γ' εἶκος ὅτι τὸ κτ' πλείονων καὶ διαφέροντων τῷ ἑδῇ ἐστὶ τῷ π
 ὅτι κατηγορεῖσθαι. hoc est, Genus est, quod de pluribus, &
 specie differentibus prædicatur in quaestione quâ quaeritur quid
 res sit: ut, quid est homo, aut bestia? animal.

1. ¶ Genus, Græcè γένος, dicitur ab inusitato verbo γένω, in cuius locum successit γίγνομαι, nisi quod pleraque tempora inusitati thematis remanserint. Hinc factum est Latinum genus. Nam pro gigno, geno dicebant antiqui: à quo mansit præteritum genui & cætera tempora quæ indè derivantur. Cæterum genus in communi sermonis usu, teste Porphyrio, sumitur pro multitudine hominum, qui ab eadem stirpe ortum trahunt; veluti cum dicimus, Heraclidarum genus: vel pro stirpe ipsa, sive pro maioribus à quibus ejusmodi multitudo orta est; veluti cum nobilitas ab Aristotele in fragmentis de nobilitate definitur, virtus generis, id est claritudo majorum. In Philosophia sumitur genus pro eo cui species subjectæ sunt, illorum generum similitudine ita appellatum. Nam ut majores principium sunt suæ posteritatis, utque posterii cognitione quâdam se contingunt, qui ab eodem genitore oriundi sunt: ita quoque genus aliquo modo principium est suarum specierum, ipsæque species subjectæ inter se eatenus conveniunt, quatenus in genere consentiunt.

2. Definitio generis existat lib. 1. Top. cap. 5. & apud Porphyrium cap. 2. Cum autem genus dicitur de pluribus prædicari, distinguitur ab individuis. Cum dicitur prædicari de pluribus specie differentibus, distinguitur à speciebus, quæ prædicantur de pluribus numero differentibus. Specie differre dicuntur, quæ differunt essentialiter sub eodem genere; ut, homo & bestia. Cum dicitur genus prædicari in quaestione quâ quaeritur quid res sit, distinguitur à differentia, proprio, & accidente. Et si enim genus non absolvat quaestionem, quid est, (hoc enim definitionis est) appositè tamen ad illam per genus respondetur.

II. Ἐιδός ἐστὶ τὸ καθόλου ὑπὸ τοῦ γένους hoc est, Species est, quæ collocatur sub genere. Vel Ἐιδός ἐστὶ καθ' ἑτὸ γένος κατὰ τοιοῦτον ἐν τῷ τι ἐστίν. hoc est, Species est, de qua genus prædicatur in quæstione quâ quæritur quid sit.

1. ¶ Species dicta est ab antiquo & inusitato verbo *specio*, id est, video : unde *aspicio*, *respicio*, &c. Græcè εἶδος; dicitur ab εἶδω. *video*. Species enim in communi sermone significat externam rei formam, quæ spectabilis est. Quod Porphyrius probat hoc versu.

Πρῶτον μὲν, εἶδος ἀξίον τιμῆς, *Primò quidem, species digna est imperio.*

Hunc versum Euripidi tribuit Stobæus, sermone de pulchritudine, & Athenæus in Deipnosophistis, lib 13. sed apud Euripidem hodie non reperitur.

2. Duas Porphyrii definitiones proposuimus, verbis tantum discrepantes. Utraque communis est omnibus speciebus. In utraque subintelligi debet *proximè*. Nam etiam genus prædicatur de individuis, eique individua subjiciuntur; sed mediante specie, non proximè atque immediatè.

III. genus aliud est *ὑπερῶτατον*, hoc est, generalissimum, sive summum; aliud ὑπάλληλον, hoc est, subalternum, sive medium.

IV. Similiter & species alia est εἰσδιδωτάτη, hoc est, specialissima, sive infima; alia subalterna.

V. Genus generalissimum est, ὃ γένος ἐν. ἐκ ἐστὶν εἶδος, hoc est, quod, cum genus sit, non est species: Vel ὃ ἐκ αὐτοῦ εἴη ἄλλο ἐπὶ ἀναβεβηκός γένος, hoc est, quo non est aliud superius genus.

VI. Species specialissima est, ἡ εἶδος ἐστὶν, ἐκ αὐτοῦ εἴη γένος, hoc est, quæ, cum species sit, non est genus: Vel καθ' ἣν ἐκ αὐτοῦ εἴη ἄλλο ἀποβεβηκός εἶδος, hoc est, quâ non est alia inferior species.

VII. Genera & species subalternâ dicuntur, quæ inter summum genus & infimam speciem interjecta, respectu inferiorum dicuntur genera, respectu superiorum species.

1. S. Hac de re vide Porphyrium. Ut autem hæc generum & specierum subordinatio intelligatur, sit pro exemplo categoria substantiarum: in qua ipsa substantia summum genus est;

est; homo, species specialissima; quæ inter substantiam & hominem interjecta sunt, ut animal, vivens, corpus, sunt sub altera. Nam animal est genus hominis, & species viventis; vivens est genus animalis, & species corporis; corpus est species substantiæ, & genus viventis.

2. Subalterna habent duas σχέσεις, sive relationes: Sunt enim genera, & species diverso respectu. Summa & infima tantum unam habent σχέση. Nam summum genus nihil aliud est quam genus; & infima species nihil aliud est quam species. Potest quidem species infima vel cum genere conferri, vel cum individuis (nam generi subicitur, & de individuis prædicatur) sed utraque collatione species est: respectu generis vocatur species subjecta, vel (ut vulgò loquuntur) subijcibilis; respectu individuorum dicitur species prædicata sive prædicabilis. Atque hæc sola constituit secundum prædicabile, & sic à Porphyrio definitur.

VIII. Εἰδος ἐστὶν ὃ καὶ πλεόντων καὶ διαφορέων τῷ αἰεθμῷ ἐν τῷ πᾶσι κατὰ τὴν ταύτην, hoc est, Species est, quæ de pluribus & numero differentibus prædicatur in questione quæ queritur quid res sit.

I. 1. Cum enim interrogatur, Quid est Plato, aut Socrates? rectè respondetur, Est homo. Species differt ab individu, quia prædicatur de pluribus: à genere, quia prædicatur de iis quæ numero differunt. Numero differre dicuntur, quæ, cum ejusdem essentiæ sint, ut multa numerari possunt; ut individua ejusdem speciei. Differt etiam species à differentia, proprio, & accidente; quia prædicatur in questione quæ queritur quid res sit.

IX. Dividitur etiam genus in synonymum sive univocum, & homonymum sive æquivocum.

X. Genus univocum est, quod æqualiter dicitur de speciebus suis.

XI. Æquivocum, quod inæqualiter dicitur de speciebus suis.

I. S. Inæqualiter dici de suis speciebus, nihil aliud est, quam uni speciei magis, alteri minùs convenire; aut uni immediate, alteri per alteram. Atque hoc fit, cum una species ab altera pendet. Si ens, si genus sit, æquivocum genus est,

quia

quia substantia magis est ens quàm accidens : imò accidens non est ens, nisi quia, & quatenus pendet à substantia. At animal est genus univocum, quia homo non est magis animal quàm bestia, nec bestia magis quàm homo.

2. Genus æquivocum imperfecto modo genus est, & ab Aristotele lib. 3. Metaph. cap. 2. appellatur τὸ πρὸς ἓ, καὶ πρὸς μίαν πρᾶ οὐσίαν, hoc est, quod respectum habet ad unum, & ad unam aliquam naturam. Et lib. 1. Eth. cap. 6. τὸ ἀπ' ἑνός, hoc est, quod ab uno est. Quod quamvis non sit univocum, negat tamen Aristoteles, illud esse penitus æquivocum, cum lib. 3. Metaph. cap. 2. ait ens dici quidem multipliciter, sed cum respectu ad unum, & ad unam aliquam naturam, non æquivocé. Simili modo loquitur lib. 1. de Cæl. cap. 3.

3. Hæc sunt quæ vulgò præcipi solent hoc loco de genere & specie. Sed quia Aristoteles in Topicis multos tradit eosq; utilissimos canones, quorum alii ad rem syllogisticam pertinent, & ad rationem inveniendi medii, alii ad doctrinam de simplici themate; non erit præter rationem instituti, si ex multis præcipuos seligamus eorum, qui pertinent ad illustrationem thematum simplicium, eosque suis locis inter seramus; cæteris ad syllogismi doctrinam rejectis.

XII. Species μετέχουσιν, hoc est, participes sunt suorum generum; genera suarum specierum non item.

1. ¶ Μετέχουσιν, definiente Aristotele, lib. 4. Top. cap. 1. ubi hic canon exstat, nihil aliud est quàm recipere definitionem ejus quod participatur. Atqui species recipit definitionem generis, sed genus non recipit definitionem speciei. Nam quicquid est in definitione generis, putà animalis, id omne etiam includitur in essentia speciei, nempe hominis, aut bestię, sed non vice versâ.

XIII. Genus dicitur de specie synonymas, non paronymas, sive denominativè, non etiam homonymas aut per metaphoram.

1. ¶ Synonymas de aliquo dici, nihil aliud est quàm quoad nomen & quoad definitionem dici, ut antè dictum est ex Aristotele cap. 5. de Categ. Atqui genus dicitur de specie quoad nomen & quoad definitionem, quia participatur à specie. Ergò dicitur de specie synonymas. Atque hoc docetur lib. 2. Top. cap. 2. Neque verò genus solum synonymas de specie

specie dicitur, sed etiam in quæstione quâ quæritur quid sit. Omnia enim quæ redduntur quæstioni, *quid est*, prædicantur synonymos, sed non vice versâ. Nam & differentia substantiarum synonymos prædicatur de specie, ut suprà dictum est, sed non potest reddi quæstioni, *quid est*. Paronyma dicuntur quæ de alio quoad nomen solum, & non quoad definitionem dicuntur: idque non in quæstione quâ quæritur quid res sit, sed quâ quæritur qualis sit, sive in casu obliquo. Ex quo sequitur, non posse esse genus alicujus rei, quod de illa dicitur paronymas. Itaque albor non est genus nivis, quia nix non dicitur albor, sed alba. Vide lib. 4. Top. cap. 1. Similiter homonyma, sub quibus etiam tropica continentur, sive ea quæ, ut Aristoteles loquitur, per metaphoram dicuntur, quoad solum nomen, & non quoad definitionem de pluribus dicuntur: atque ob hanc causam non possunt esse genus. Sic *canis* non potest dici commune genus animalis latrantis, & astri; quia est vocabulum homonymum: neque *ardor* est genus amoris, quia amor dicitur ardor concupiscentiæ per metaphoram. Vide lib. 4. Top. cap. 3.

XIV. *Quod est causa rei, aut pars, aut affectio, aut subiectum, id non potest esse genus illius.*

1. ¶. Hoc præceptum exstat lib. 4. Top. cap. 9. nititurque hac ratione, quod hæc omnia prædicantur oblique, & non in casu recto, sive in quid. Sic *dolor*, quia est *iræ causa*, non potest esse genus illius. Similiter *corpus* non potest esse genus animalis, quia est illius pars: *immortalitas* non est genus vitæ æternæ, quia est illius affectio: *aer* non est genus venti, quia est illius subiectum; ventus enim non est aer motus, sed motio aeris, aut certè exhalationis aeræ.

XV. *Genus & species sunt sub eodem genere, & si sint accidentia, in eodem subiecto.*

1. ¶. Primum membrum hujus præcepti exstat lib. 4. Top. cap. 1. alterum cap. 5. Utrumque nititur hac ratione, quia genus in specie continetur. Sic *voluntas* non est verum genus justitiæ, quia est potentia naturalis, cum justitia sit habitus. Sic *scientia* non est genus virtutis moralis, quia est in intellectu, virtus in appetitu.

XVI. *Genus prius est suâ specie, & species individuo.*

1. ¶. Hæc

1. ¶. Hæc regula traditur *lib. 4. Top. cap. 2.* Intelligitur autem prius quoad existendi consecutionem ; ea enim prioritas hîc locum habet. Positâ enim specie, ponitur genus ; sed non vicissim. Species ergò non potest esse sine genere ; at genus potest esse sine aliqua suarum specierum, non sine utraque simul. Genus synonymum potest esse sine utraque specie : genus æquivocum non potest esse sine utraque specie : sed tantum sine minùs principali. Ex. gr. *animal* potest esse sine homine, aut sine bestia ; sed non sine homine & bestia. At *ens* non potest esse sine substantia, sed tantum sine accidente. Illud igitur est genus synonymum, hoc homonymum. Ut autem genus se habet ad species, ita species se habet ad individua.

XVII. *Genus prædicatur de pluribus quàm species, & species de pluribus quàm individuum.*

XVIII. *Et quamvis species conservari possit in uno individuo ; genus tamen non potest conservari in una specie.*

1. ¶. Quòd genus latius sit suâ specie, & species individuo, ac proinde quòd genus de pluribus prædicetur quàm species, & species de pluribus quàm individuum, ex utriusque definitione sequitur, & ab Aristotele docetur, *lib. 4. Top. cap. 1.* Quòd verò species conservari possit in uno individuo, cum tamen genus non possit conservari in una specie, ejus rei causa est, quòd species κατ' εἶδος perfectior sit genere, cum tamen individuum non sit κατ' εἶδος perfectius suâ specie. Nam species includit genus suum, & præter genus, differentiam essentialem : at individuum nullam habet essentialem differentiam speciei additam, sed species essentialiam ejus absolvit ; tantum opus est accidentibus, quibus ab aliis individuis ejusdem speciei discernatur. Cum ergò species constituatur à genere & à differentia essentiali, cumque omnis differentia requirat multitudinem, sequitur unam speciem non sufficere ad ponendum genus. Individua verò non habent essentialiam differentiam quâ discernantur inter se, (totâ enim essentiali conveniunt) ac proinde non requiruntur plura individua ad constituendam speciem.

CAP. XII.

De Differentia.

THEOREMA I.

Differentia est, quâ res à re differt.

II. Estque vel accidentalis, vel essentialis.

III. Differentia accidentalis est, quâ res differunt accidentibus, vel ab aliis rebus, vel etiam à se ipsis.

IV. Differentia essentialis est, quæ addita generi, speciem constituit, eamque ab aliis speciebus essentialiter distinguit.

1. §. Differentia (Græcè Διαφορά) Porphyrio triplex; communiter, propriè, & propriissimè dicta. Differentia communiter dicta est, cum res differt accidente separabili: vel ab alia re; veluti cum dicimus alium ab alio differe, quod hic sedeat, ille stet; hic taceat, ille loquatur: vel à seipsa. Sic Hector visus est Æneæ, cum in somnio apparuit, differre ab illo Hectore, qui redit exuvias indutus Achillei. Differentia propriè dicta est, cum res à re differt accidente inseparabili, aut proprietate; ut, corvus ab olere, quod hic albus sit, ille niger. Utraque est differentia accidentalis. Differentia propriissimè dicta Porphyrio est eadem, quæ nobis differentia essentialis; veluti cum homo, quod ratione præditus sit, differre dicatur à brutis animantibus.

2. Omnis differentia, inquit Porphyrius, alicui adjecta, ἐπερὶ ὅν ποιεῖ. Ac differentiarum quidem accidentales ποιεῖ ἀλλοίον essentialis, ἄλλο hoc est, Omnes differentiarum efficiunt, ut res quocunque modo diversæ sint; accidentales, ut dissimiles, aliterve affectæ sint: essentialis, ut aliæ sint: unde ἀποποιεῖ, id est, specificæ dicuntur.

V. Differentiarum essentialis munera duo sunt, genus dividere, & speciem constituere.

1. §. Quatenus genus dividit, vocatur differentia διαποικίλη, divisiva: quatenus speciem constituit, vocatur συστατική, constitutiva, vel etiam συμπληρωτική, completiva, quia definitionem speciei complet, cum generi conjungitur. Differentia ergo divisiva & constitutiva non sunt duæ diversæ differentiarum, sed ejusdem differentiarum diversa munera. Summa genera non

non habent differentiam constitutivam, quia sunt primò atq; immediatè diversa; & species infimæ non habent differentiam divisivam, quia individua totâ essentiâ conveniunt. Cæterum accidentales differentiæ pertinent ad sequentia prædicabilia: sola differentia essentialis hujus loci est, atque sic definitur:

V I. *Differentia est, quæ de pluribus, vel numero, vel specie differentibus, essentialiter prædicatur, in quæstione quâ quæritur qualis sit res.*

1. §. Differentiæ infimarum specierum prædicantur de pluribus numero differentibus; ut *rationale* de Platone, Socrate, &c. differentiæ specierum subalternarum, de pluribus specie differentibus; ut, *sensu præditum esse* de homine & bestia. Differentia dicitur prædicari in quæstione quâ quæritur qualis sit res, quia est qualitas quædam generis. Genus enim, cum suâ naturâ indeterminatum sit, determinatur, & ut ita dicam, qualificatur à differentia. Quærenti enim, *Quale animal est homo?* appositè respondetur, *Rationale*. Differentia dicitur prædicari essentialiter, quia ponitur in definitione speciei, deque ea prædicatur synonymus, id est, nomine & definitione. Hac in re distinguitur differentia à proprio & accidente.

2. Porphyrius cap. 3. *Isag.* definit differentiam his verbis, Διαφορὰ ὅτι τὸ κατὰ πλεόνων, καὶ διαφορὰ τῶν τῷ εἶδει ἐν τῷ ὁποῖον τί ὅτι, κατηγορούμενον. hoc est, *Differentia est, quæ de pluribus, & specie differentibus prædicatur in quæstione quâ quæritur qualis res sit.* Sed, cum hæc definitio etiam proprio & accidenti aptari possit, ait ipse definitioni addendum esse, ὅτι οὐ τὸ εἶδος συμβάλλει, καὶ εἰς τὸ τί ἢ τῷ εἶδει, καὶ ὅτι τὰ διαφορὰ ὅτι οὐκ εἰς τὸ εἶδος. hoc est, *Quod ad essentiam confert, & ad definitionem, quodque rei pars est, aut aliquid tale.* Verum nè sic quidem legitima erit definitio: quia non convenit differentiis infimarum specierum, quæ de multis numero, non specie differentibus, prædicantur. Quare non videtur Porphyrius infimarum specierum differentias agnovisse simplices. Semper enim duas differentias subalternarum specierum conjungit, ad efficiendam unam differentiam speciei infimæ. Sic ait *rationale mortale* esse differentiam hominis.

VII. *Differentia posterior est genere, & prior specie.*

1. ¶. Hoc præceptum traditur *lib. 6. Top. cap. 6.* Ejus verò ratio est manifesta. Differentia enim dividit atque determinat genus, & speciem constituit. Ideoque actu est in specie, & in genere potentiâ.

VIII. *Differentia debet esse affirmata sive positiva.*

1. ¶. Hic canon exstat eodem loco: qui tamen de re potiùs quàm de vocibus accipiendus est. Sæpe enim fit ob vocabulorum penuriam, ut negatâ voce differentia positiva atque affirmata exprimat; veluti, cum *irrationale* dicitur esse differentia *bestiæ*. In nonnullis tamen differentiis assignandis utendum est negatione; ut in privativis.

IX. *Omnis differentia differentię opposita est, cum qua de genere dicitur disjunctim.*

1. ¶. Hic canon exstat ibidem. Sic *rationale* & *irrationale* sunt oppositę differentię animalis, deque animali disjunctim affirmantur. Nam animal vel ratione est vel irrationale.

X. *Differentia non prædicatur de genere, neque genus de differentia.*

1. ¶. Hoc præceptum traditur ibidem: estque intelligendum de differentia in abstracto. Non enim dicimus, *Animal est rationalitas*, aut *Rationalitas est animal*. Hujus rei ratio est, quod differentia non participet genus, *lib. 4. Top. cap. 2.*

XI. *Omnis differentia insert proprium genus: ideoque quę genere differunt, ea differentias diversus habere necesse est.*

1. ¶. Hęc præcipiuntur *cap. 3. de Categ. & lib. 6. Top. cap. 6.* Ratio præcepti hæc est: Differentia recipitur cum specie: quare, sicut eadem species non potest esse sub diversis generibus, ita quoque neque differentia. Si ergo eadem differentia reperiatur in diversis generibus, necesse est, aut homonymiam esse in voce, aut differentiam non esse essentialem.

CAP. XIII.

De Proprio & Accidente.

THEOREMA I.

Ἰδιὸν ὅστιν, ὃ μὴ ἀπλοῖ ἔστω τὸ τί ἦν ἔστι, μόνῳ δὲ ὑπάρχει, καὶ ἀντικατηγορεῖται. hoc est, *Proprium est, quod non declarat quid res sit, & tamen soli inest, & cum ea reciprocatur.*

1. ¶ *Proprium* Porphyrio dicitur quatuor modis : primò, quod convenit soli alicui speciei, sed non omnibus illius individuis ; sic homini convenit *esse musicum*. Secundò, quod convenit omnibus individuis alicujus speciei, sed non ~~semper~~ ; sic convenit homini *esse bipedem*. Tertiò, quod convenit soli alicui speciei, & omnibus illius individuis, sed non semper ; sic convenit homini *ridere*. Quartò, quod convenit soli alicui speciei, omnibusque illius individuis, & semper ; sic convenit homini *risibilem esse*.

2. *Proprium* quarto modo, ait Porphyrius *ἡμεῖς ἰδιὸν*, id est, *proprie proprium* : Aristoteles ἀπλῶς ἰδιὸν, hoc est, *simpliciter & absolute proprium*, vocat. Nam reliqua ait esse propria πρὸς τι, aut πρὸς ἕτερον, id est, *respectu alterius*, aut ποτὲ, id est, *proprium pro tempore*. Nam tres priores modi priorum accidentia sunt, & ad quintum prædicabile spectant.

3. Definitio proprii posita est lib. 1. Top. cap. 5. *Proprium*, ait, *non declarat quid res sit*, hoc est, non continetur in essentia rei ; sed essentiam illius sequitur. *Reciprocatur cum eo cui soli inest*, hoc est, cum primo ac proximo subjecto, non cum iis quæ sub proximo subjecto continentur. Etenim propria alia generum sunt, alia specierum. Propria generum cum generibus, non cum speciebus ; & propria specierum, cum speciebus, non cum individuis, conferri ac reciprocari debent. Sic quantum esse reciprocatur cum corpore naturali, non cum cælo, elemento, aut lapide. Et risibilitas reciprocatur cum homine, non cum Socrate aut Platone. Cum proprium generis de specie prædicatur, veluti cum cælum dicitur quantum, aut proprium speciei de individuo, veluti cum Plato dicitur risibilis, prædicatio non est quidem accidentis de sub-

cto, sed neque proprii. Nam numerus prædicabilium oritur ex comparatione prædicati cum proximo subjecto. Quæ enim cum remoto subjecto comparantur, non sunt hujus loci, ut suprà diximus.

II. *Propria vel manant ab essentia subjecti, vel à causa externa.*

I. ¶ *Propria vel immediatè manant ab essentia subjecti; sic manat risibilitas ab anima rationali, quantitas ab essentia corporis naturalis: vel mediâ aliâ proprietate; sic in loco esse manat ab essentia corporis, mediâ quantitate. At eclipsis, quæ est proprietas lunæ, non manat à lunæ essentia, sed à causa externa, nempe à terra inter solem & lunam interposita. Hæc non absolutè propria sunt, sed tantum ex hypothesei externæ causæ: quâ tamen positâ, necessariò insunt subjecto suo.*

III. *Propria, quæ manant ab essentia subjecti, ità necessariò subjecto suo insunt, ut nè cogitatione quidem possint ab illo separari.*

I. ¶ *Proprium, inquit Aristoteles lib. 5. Top. cap. 4. ἐξ ἀνάγκης αὐτοῦ ὡς πᾶρχει, hoc est, necessariò semper inest. Hæc necessitas tanta est, ut contradictoria dicat, qui proprium dicit abesse à subjecto suo. Qui enim dicit, corpus non esse quantum, aut ignem non esse calidum; tantundem dicit, ac si diceret, corpus non esse corpus, aut ignem non esse ignem.*

IV. *Propria non possunt communicari subjectis specie diversis.*

I. ¶ *Nemo proprium appellat, inquit Aristoteles lib. 1. Top. cap. 5. τὸ ἐνδεχόμενον ἄλλῳ ὡς πᾶρχειν, hoc est, id quod potest alii inesse. Etenim, cum propria manent ab essentia subjecti, si propria communicarentur, etiam essentiam communicari necesse foret. Quare, si equo communicaretur risibilitas, equus esset homo; si quantitas communicaretur spiritui, spiritus esset corpus; si ubique esse communicaretur creaturæ, creatura esset Deus.*

V. *Ut se habent propria, quæ ab essentia subjecti manant, ad subjectum suum absolutè; ità se habent propria, quæ manant ab externa causa, ad subjectum, positâ illâ causâ.*

I. ¶ *Sic quamvis luna non semper eclipsin patiatur; positâ tamen inter lunam & solem terrâ, tam necessarium est lu-*

lunam eclipsin pati, quàm necessarium est corpus esse quantum, aut ignem esse calidum.

VI. Συμβεβηκός ἐστιν ὃ ἐνδεχεται ὑπάρχειν ὁπωσδήποτε καὶ τῷ αὐτῷ καὶ μὴ ὑπάρχειν. hoc est, *Accidens est, quod cuius uni eidemque inesse potest, & non inesse.*

VII. Vel sic: *Accidens est, ὃ γίνεται καὶ ἀπογίνεται χωρὶς τῆς τοῦ ὑποκειμένου φθογῆς*, hoc est, *quod adest & abest sine subiecti interitu.*

I. ¶ Prior definitio exstat lib. 1. Top. cap. 5. altera in Porphyrii Isag. cap. 5. *Quod adest & abest*, id est, quod potest adesse & abesse, non quidem simul, sed diverso tempore. *Sine subiecti interitu*, hoc est, sine contradictione: contradictionis enim pars altera alteram destruit. Sensus ergo traditæ definitionis hic est: *Accidens est, quod sine contradictione de subiecto suo vel affirmari vel negari potest.*

VIII. *Accidens aliud est separabile, aliud inseparabile.*

IX. *Accidens separabile est, quod revera separari potest à subiecto; ut, stare, sedere.*

X. *Inseparabile est, quod revera separari nequit à subiecto; ut, nigror in corvo.*

I. ¶ Omnia accidentia à subiecto separari possunt cogitatione non implicante contradictionem: atque hæcenus sunt accidentia; in eoque à propriis distinguuntur, quæ nè cogitatione quidem separari possunt citra contradictionem. Qui enim cogitat corvum non esse nigrum, ut falsum cogitet, non tamen cogitat corvum non esse corvum, aut illud ex quo sequatur, corvum non esse corvum. At qui concipit ignem non esse calidum, illud concipit ex quo sequitur, ignem non esse ignem.

2. Accidens ergo separabile dicitur, quod revera separari potest, & non solâ cogitatione; sive, sine quo subiectum naturaliter existere potest: inseparabile, sine quo non potest subiectum naturaliter existere. Nam Deus etiam inseparabilia accidentia separare potest à subiecto: quia potest omnia efficere quæ se mutuò non evertunt, sive, quæ non implicant contradictionem.

CAP. XIV.

De Toto & Parte.

THEOREMA I.

Totum est, quod constat plurium rerum unione.

II. *Res istæ quæ unitæ totum constituunt, dicuntur partes.*

I. ¶. In toto ergò partes sunt, & unio partium. Quare, cum Deus dicitur esse *totus ubique*, aut cum anima humana dicitur esse *tota in toto*, & *tota in qualibet parte corporis*, vocabulum *totius* improprie sumitur, &, ut vulgò loquuntur, negativè. Nam Deum *ubique totum* esse, nihil aliud significat quàm Deum non esse ubique per partes, sed modo quodam indivisibili. Similiter, animam esse *totam in toto*, & *totam in qualibet parte corporis*, nihil aliud est quàm animam non esse in corpore per partes, sic ut partes animæ respondeant partibus corporis.

III. *Totum reipsa non differt à partibus suis simul sumptis, & unitis.*

I. ¶. Totum haud dubiè differt à partibus singulis : nam aliud est homo, aliud corpus aut anima. Differt etiam à partibus omnibus simul sumptis quidem, sed non unitis : nam substantia corporea diversa est à materia & forma ut traditur *lib. 2. de An. cap. 2.* & *lib. 7. Metaph. cap. 3.* Et syllaba non est idem quod literæ ex quibus constat, ut patet ex *lib. 6. Metaph. cap. 17.* Quinetiam totum dicitur generari corrumpi, &c. quæ de partibus dici nequeunt : & partes dicuntur constituere totum ; at totum non constituit seipsum. Verùm, si omnes partes simul considerentur & unitæ, omnino idem sunt quod totum : nihil enim fingi potest in toto, quod non sit in partibus unitis ; nihilque in partibus unitis, quod non sit in toto.

IV. *Partes naturâ priores sunt toto, & notiores simpliciter : at totum nobis notius est.*

I. ¶. Quod naturâ prius est, simpliciter notius est, hoc est, prius apprehenditur cognitione distinctâ ac perfectâ. Perfecta enim cognitio sequitur ordinem naturæ. Quod naturâ post-

rius

rius est, nobis notius est, hoc est, prius apprehenditur notione imperfectâ atque confusâ. Cognitio enim intellectus nostri primùm confusa est, quia originem ducit à sensibus. Partes ergò simpliciter notiores sunt toto; totum nobis notius est suis partibus, ut colligitur ex lib. 1. Phys. cap. 1.

V. Totum aliud est per se, aliud per accidens.

VI. Totum per se est, cui partes per se insunt.

VII. Totum per accidens, cui partes insunt per accidens.

1. ¶. Partes dicuntur per se inesse, cum aut ipsum totum partibus essentiale est, aut cum partes pertinent ad essentiam, vel saltem ad integritatem totius; per accidens, cum contrà est. Ex. gr. *Animal* est totum respectu hominis & bestię, quia utrique essentiale est. Est etiam totum per se respectu corporis & animę, quia ex corpore & animâ componitur. At cum homines dividuntur in liberos & servos, *homo* est totum per accidens; quia *servum* aut *liberum esse*, non convenit homini per se, sed per accidens, ac ratione conditionis suę quam habet in civitate.

VIII. Totum per se est quadruplex: aliud enim est totum universale, sive Logicum; aliud formale, sive Metaphysicum; aliud essentiale, sive Physicum; aliud denique integrale, sive Mathematicum.

IX. Totum universale nihil aliud est quàm genus respectu specierum, aut species respectu individuorum.

1. ¶. Universale (inquit Aristoteles lib. 1. Phys. cap. 1.) totum quoddam est; quippe multa complectitur, ut partes. Sic *animal*, ut diximus, est totum respectu hominis & bestię; *homo* respectu Socratis & Platonis, cæterorumque hominum. Et quia universale subiectas species & individua non actu continet, sed potentiâ; factum est, ut hoc totum dictum sit totum potentiale, cum cæterę species totius dicantur totum actuale, quia partes suas actu continent. Dicitur etiam totum Logicum, quia Logicę munus est de universis disputare.

X. Totum formale nihil aliud est quàm species respectu generis & differentię quibus definitur.

1. ¶. Sic *homo* est totum, ejusque partes sunt *animal* & *rationalis*. Hę partes distinguuntur solâ ratione: ideoque compositio ex genere & differentiâ, non est vera compositio; sed

compositio rationis, hoc est, compositio talis, quâ mens unam rem duabus notionibus intelligit, quarum una alteram determinat. Hoc totum solet appellari *totum Metaphysicum*, quia Metaphysica versatur circa ea ferè quæ non tam reipsa, quam ratione diversa sunt. Unde & partes quoque illius dicuntur *partes formales*, quasi dicas, quæ solâ ratione, quam *formalitatem* vocant, distinguuntur.

XI. *Totum essentialc est, quod constat materiâ & formâ.*

I. ¶. Huc pertinet primò ac præcipuè substantiæ corporeæ. Deinde, per similitudinem huc referuntur accidentia in concreto ; ut, *justum album*, &c. in quibus subjectum est instar materiæ, & accidens in abstracto instar formæ. In hoc numero sunt opera arte facta. Præterea, hujus loci sunt omnia in quibus distinguitur materiale & formale, sive in quibus est aliquid quod materiæ, & aliud quod formæ analogum est. Sic disciplinarum materia, sunt præcepta ; forma, est methodus : interpretationis materia, est vox ; forma, significatio. Hoc totum solet appellari *Physicum*, quia Physicus sibi vendicat earum rerum considerationem quæ materiâ & formâ constant : vulgò vocatur *totum essentialc*.

XII. *Totum integrale e, quid habet partem extra partem.*

I. ¶. Partes essentielles reipsa quidem differunt (nam aliud est materia, aliud forma) sed una pars non est extra aliam. Forma enim permeat materiam, omnesque illius partes informat. At partes integrantes, quia singulæ suâ præditæ sunt quantitate, non solum reipsa differunt, sed & situ aut saltem ordine diversæ sunt, ita ut nulla in alia contineatur. Hoc enim est habere partem extra partem. Ex. gr. partes humani corporis sunt *caput, thorax, venter, artus*, quarum nulla aliam continet. Sic numeri partes diversæ sunt, & una in alia non continetur. Hoc totum nuncupatur *Mathematicum*, quia quantitas Mathematicæ considerationis est ; vulgò *totum integrale*, rectius *integratum*.

XIII. *Totum integratum vel est continuum, vel discretum.*

XIV. *Utrumque dividitur in ὁμοιομεπές & ἀνομοιομεπές, hoc est, homogeneous & heterogeneous, sive simile & dissimile.*

XV. *Totum*

XV. Totum homogeneum est, quod habet partes ejusdem nominis ac naturæ.

XVI. Totum heterogeneum, quod habet partes diversi nominis ac naturæ.

I. ¶ Distributio totius integralis in simile & dissimile exstat lib. 1. hist. An. cap. 1. lib. 2. de part. An. cap. 1. & lib. 1. de gen. Anim. cap. 1. Ex. gr. Substantiæ inanimæ, ut aqua, vinum, caro, item magnitudo, motus, & tempus, sunt totum homogeneum continuum. Substantiarum animatarum corpora, sunt totum heterogeneum continuum. Numeri, ut ternio, decas, sunt totum homogeneum discretum: exercitus, ecclesia, mundus, &c. totum heterogeneum discretum.

XVII. Pars heterogenea, vel est principalis, vel minus principalis.

XVIII. Pars principalis dicitur, quæ ablatâ, totum interit.

XIX. Pars minus principalis est, quæ ablatâ, totum non interit quidem, sed mutilatur.

I. ¶ Ex. gr. Caput, cerebrum, cor, hepar, sunt partes principales hominis; quia his ablatis, necesse est hominem interire: pes, manus, auris, &c. sunt partes minus principales; quia his ablatis, non necesse est hominem interire.

XX. Totum per accidens dicitur quatuor potissimum modis, 1, Causa diversorum effectuum. 2, Effectum diversarum causarum. 3, Subiectum diversorum adjunctorum. 4, Adjunctum diversorum sub eorum.

I. ¶ Causa diversorum effectuum. (Sic planta dici potest totum; quia plantarum aliæ calefaciunt, aliæ frigefaciunt, aliæ siccant, aliæ humectant. Effectum diversarum causarum) vel efficientium; ut mures, quorum alii à sole, alii à muribus dicuntur gigni: vel finalium; ut supellex, quæ vel ad ornatum, vel ad necessitatem est: vel materialium; ut statua, quarum aliæ ex marmore, aliæ ex ære, &c. Causæ formales constituunt diversas species, ac proinde pertinent ad totum per se: ut & causæ efficientes aut finales accidentium propriorum simpliciter proximæ. Subiectum diversorum adjunctorum) ut homines, quorum alii servi sunt, alii liberi; alii boni, alii mali. Adjunctum diversorum sub eorum) ut morbi, quorum alii sunt

sunt animi, alii corporis : & morbi corporis, vel sunt cerebri, vel oculorum, vel pulmonum. In accidentibus propriis subiectum constituit diversas species, sicut forma in substantiis.

CAP. XV.

De Causa & Causato in genere.

THEOREMA I.

Causa est, cujus vi res est.

1. **Γ.** Ἀρχή, στοιχεῖον, αἰτία, hoc est, *principium, elementum, causa*, sunt voces cognatæ significationis. Principium vel latè sumitur, vel strictè. Principium latè sumptum definitur, *lib. 4. Metaph. c. 1. πρῶτον ὅθεν ἢ ὅτιν, ἢ γίγνεται ἢ γινώσκεται*, hoc est, *primum unde aliquid est, fit, aut cognoscitur*. Vox principii strictiùs sumitur *lib. 1. Phys. cap. 5.* cum definiuntur principia, *ἀμὲν ἐξ ἀλλήλων ὅτι, μὴ τὲ ἐξ ἄλλων, καὶ ἐξ ὧν πάντα*, hoc est, *quæ neq; ex se invicem sunt, neq; ex aliis, & ex quibus sunt omnia*. Hoc sensu tria tantum numerantur principia, materia, forma, & privatio. Elementi definitio exstat *lib. 4. Metaph. cap. 3.* eaque sic se habet : *Στοιχεῖον λέγεται, ἐξ ὧ σὺν κείναι πρώτῃ ἐνυπάρχοντι & ἀδιαιρέτῃ πρὸς εἶδεις ἑτέρον εἶδός*, hoc est, *Elementum est id ex quo primo aliquid componitur, cui inest, & quod suâ specie indivisibile est in aliam speciem*.

2. Generalis causæ definitio non exstat apud Aristotelem ; quare retinui definitionem receptam. Causa dicitur *cujus vi res est*, hoc est, quæ aliquid confert ad rei existentiam. Itaque privatio, etsi inter principia numeretur, causa dici non potest, quia nihil confert ad rei existentiam, sed tantum ad mutationē.

II. *Causatum est, quod à causis suis constituitur.*

1. **Γ.** Quod Græci αἰτιατὸν dicunt, id Scholastici *causatum* appellârunt. Et quanquam *causare, causatum, causalitas*, non sint voces eâ significatione Latinæ, quâ hoc loco à Philosophis usurpantur ; ita tamen in causarum doctrina necessariz sunt ut iis abstinere non possit.

III. *Causa causato suo prior est naturâ & cognitione.*

1. **Γ.** *Naturâ prior* ; quia causatum pendet à causa. *Prior cognitione*, id est, notior, nimirum simpliciter, & quoad cognitionem distinctam, quæ sequitur ordinem naturæ. Nam nobis

nobis causatum notius est, quia sensibus vicinius : à sensibus enim omnem cognitionem haurire debemus.

IV. *Causæ sunt quatuor, materia, forma, efficiens, & finis.*

I ¶. Hæc partitio exstat lib. 2. Post. cap. 11. lib. 2. Phys. cap. 3. lib. 1. Metaph. cap. 3. & lib. 4. cap. 2. eaq; optimâ ratione nititur. Quicquid enim fit, ab alio fit : nihil enim fit à seipso : Datur ergò causa efficiens. Nulla res finita potest aliquid ex nihilo producere : Ergò datur materia ex qua res fiunt, & forma quæ in materiam introducitur, cum res aliquæ generantur. Denique nihil agit temere : Ergò datur finis, cujus gratiâ causa efficiens agit. Exemplar, quod Plato quintam causam vocabat, referri debet ad causam efficientem minùs principalem. Est enim aut instrumentum causæ principalis, aut causa proegumena sive disponens.

V. *Causatum materiæ & formæ, dicitur compositum ; efficientis, effectum ; finis, medium, sive destinatum. Atque hæc non reipsa, sed ratione discrepant.*

I ¶. Nam cum ad causati constitutionem quatuor causæ concurrant (ut fit in rebus corporeis) non debet mirum videri, si una cademque res dicatur compositum, effectum, & medium, prout cum diversis causis comparatur.

VI. *Causæ suis muneribus sive causalitatibus ità distinctæ sunt, ut una alterius causalitatem exercere, aut defectum supplere propriâ causalitate non possit.*

I ¶. Hoc est, efficiens suâ efficientiâ non potest præstare manus formæ, sive non potest informare materiam eo modo quo forma : etsi possit formam efficere quæ materiam informet. Non potest etiam efficiens suâ efficientiâ præstare vicem materiæ, hoc est, non potest recipere ac sustinere formam. Et si fortè efficiens formam aliquam recipiat, hætenus non est efficiens, sed subiectum sive materia.

VII. *In unoquoq; genere est quædam causarum subordinatio.*

VIII. *Causæ subordinatæ sunt, quarum una pendet ab altera.*

I ¶. Nimirum vel quoad existentiam ; sic pendet filius à patre ; pater ab avo : vel quoad causalitatem ; sic pendet calamus à manu in scribendo : vel quoad utramque ; sic pendet causæ secundæ à prima, sive creaturæ à Deo creatore.

IX. *Causæ vel essentialiter subordinatæ sunt, vel accident-*
liter.

X. *Causæ*

X. *Causæ essentialiter subordinatæ sunt, quarum una pendet ab altera quando & quatenus causat.*

XI. *Per accidens subordinatæ sunt, quarum una quidem ab altera pendet, sed non quando, aut non quatenus causat.*

I. ¶ Causa dicitur bifariam alteri per accidens subordinari: primò, cùm à superiore causa pendet quidem, sed non quando causat: quod fit, cùm ab ea pendet quoad solam existentiam, & non quoad causalitatem. Hoc modo dicitur pater subordinari maioribus suis in generatione filii, & quælibet causa propinqua, causis remotioribus. Secundò, cùm etiam quando causat, sive quoad causalitatem à superiore causa pendet, sed non quatenus causat, sive non eo modo quo causat. Hoc modo subordinatur statuarius cœlo in efficienda statua. Nam quia statuarius virtute cœli indiget ad operandum, dici potest à cœlo pendere quoad causalitatem suam. Sed quia non pendet à cœlo, quatenus facit statuam, sed quatenus vivit; dicitur à cœlo per accidens pendere, eique per accidens subordinari in efficienda statua. Similiter, cùm equus ab equisone impulsus, læso crure, claudicat; crus læsum est causa claudicationis equisoni subordinata per accidens: Crus enim, sive equus, impellitur ab equisone ad motum, non ad motum vitiosum. Hæc duplex subordinatio non solum in causa efficiente, sed etiam in finibus spectatur, ut dicemus cap. 18. theor. 15. §. 3. in materia & forma non item.

XII. *In causarum subordinatione non datur progressus in infinitum.*

I. ¶ Hoc præceptum exstat lib. 1. Met. min. cap. 2. Nam infinitudo adversatur ordini, quia non habet primum, medium, ultimum: at subordinatio est ordo quidam. Deinde, infinita transiri nequeunt, ut dicitur lib. 1. Post. cap. 3. Quare tolleretur ratio & officium causarum, tolleretur scientia, quæ ex causis est, si causarum subordinatio esset infinita.

XIII. *In ejusmodi subordinatione datur una causa proxima; cæteræ remotæ sunt.*

XIV. *Causa proxima est, quæ immediatè causatum constituit.*

XV. *Causa remota quæ concurrat ad constituendum causatum mediâ aliâ causâ sui generis.*

I ¶. Causa proxima duobus modis dicitur, nempe vel in suo genere, vel absolutè. Causa absolutè proxima dicitur, quæ non solùm immediatè, sed & suâ existentia causatum constituit; atque adeò, quâ positâ, necesse est causatum poni. Causam proximam in suo genere jam definivimus, eamque diximus *immediatè*, hoc est, non interveniente aliâ sui ordinis, concurrere ad causatum constituendum. Una res habere potest plures causas in suo genere proximas, sed unam tantùm quæ sit absolutè proxima: quæ in substantiis est forma; in accidentibus, efficiens & finis. Sic cùm homini proxima materia sit corpus humanum; efficiens proxima, pater; finis proximus, bene esse; forma proxima, anima rationalis: sola tamen anima rationalis est causa absolutè proxima.

XVI. Denique in unoquoque genere sunt quædam causæ totales, quædam partiales.

XVII. Causa tota'is est, quæ sola in sua specie totum causatum causat.

XVIII. Causa partialis est, quæ cum aliis causis suæ speciei juncta, causatum ex parte tantùm causat.

I ¶. In unoquoque genere sunt plures causarum species: atque ex vel subordinatæ, ut causa prima & secunda, proxima & remota, principalis & instrumentalis; vel coordinatæ, quarum una non pendet ab alia. Causa totalis dicitur sola causatum constituere, quia non juvatur ab aliis causis suæ speciei. Ex. gr. scriptio pendet à calamo & à manu, sed ab utraque, ut à causa totali: Nam calamus est totale instrumentum; manus, totalis causa principalis. Similiter, cùm Deus, sol, & homo dicuntur hominem generare, unaquæque earum causarum totalis est: Deus totalis causa prima; sol sive cælum, totalis causa universalis; homo, totalis causa secunda & particularis. At cùm duo equi trahunt plaustrum, sunt causæ partiales: quia sunt ejusdem speciei.

XIX. Unius rei non possunt esse plures causæ totales ejusdem speciei: sed possunt esse plures, si specie differant, & subordinatæ sint.

I ¶. Si plures causæ non subordinatæ concurrant ad idem causatum, necessariò debent esse partiales, nam causa
totalis

totalis causat totam rem : Quare, si sint plures causæ totale aut cæteræ nihil causant, & sic non sunt causæ ; vel agunt quod jam actum est. Si causæ specie differentes subordinatæ sint, fieri potest, ut idem causatum pendeat à pluribus causis totalibus : sic tota scriptio pendet à calamo & à manu ; totus homo à Deo, à sole, & à parentibus.

CAP. XVI.

De Materia & Forma.

THEOREMA I.

EX quatuor causis duæ sunt internæ, materia & forma ; & totidem externæ, efficiens & finis.

II. Causæ internæ dicuntur, quæ causati essentiam ingrediuntur, ut partes.

I S. Et si forma longè nobilior sit quàm materia, & plus conferat ad constituendum causatum ; non est tamen dubitandum, quin etiam materia sit pars essentiae, & non vehiculum solum, auc receptaculum.

III. Materia, *Gracè ὕλη*, definitur, τὸ ἧς ἵκεται τὸ ἐκ τῆς οὐσίας, hoc est, id ex quo inexistente fit aliquid.

I S. Hæc definitio existat lib. 2. *Phys.* cap. 3. & lib. 4. *Metaph.* cap. 2. Potest autem materia plenius & explicatius definiti hoc modo ; Materia est causa interna, ex qua aliquid fit, aut constat. Cur addam constat, ex *Theor.* 9. satis intelligetur. Materia definitur etiam lib. 2. *Post.* cap. 11. sed obscurius, τὸ τινὰν ὄντων ἀνέχον τὸ τοιοῦτον id est, quod quibusdam positi necesse est esse.

2. Cæterum materia vulgò dividitur in materiam ex qua, in qua, & circa quam. Materia ex qua, est materia propriè dicta, quam jam definivimus ; materia in qua est subjectum ; materia circa quam, objectum : de quibus suo loco.

IV. Materię munera duo sunt : formas suscipere easque sustinere, & cum forma compositum constituere.

I S. Cùm materia prius munus exsequitur, dicitur causare ipsas formas : cùm alterum munus exercet, dicitur causare compositum.

V. *Materia vel est prima vel secunda.*

VI. *Materia prima est materia informis.*

VII. *Materia secunda est materia formata.*

I ¶. Et si nulla materia existat sine forma ; quia tamen materia non est omnino nihil, nec idem quod forma , quidam intelligi possit per se, non intellectu formâ ? Et hæc est materia prima, quam Aristoteles lib. 2. Phys. c. 9. definit hoc modo : λέγω ὅτι ὑάλιν τὸ πρῶτον ἀποκείμενον ἐκδύσει ὅς ἐστι καὶ πρῶτον ἀρχὸς καὶ οὐ καὶ οὐ μετέσχητος ; εἰ τε φθείρεται πρὸς τὸ ἀκίνητον ἔχον· hoc est, *Materiam dico primum subjectum, ex quo fit aliquid, eo pacto, ut non per accidens insit, & si corrumpatur, in hoc ultimum resolvetur.* Neque verò putandum est, materiam primam & secundam esse duas diversas materias : imò una eademque materia prima dicitur, & secunda, prout aliter atque aliter consideratur.

VIII. *Præterea, materia vel est corporum naturalium, vel artificialium.*

I ¶. Ex. gr. elementa sunt materia mistorum ; semen, viventium ; aurum aut argentum, materia poculi ; lignum, scamni.

IX. *Atque utraque vel compositionis, vel generationis.*

X. *Materia compositionis est, ex qua res constat.*

XI. *Materia generationis, ex qua fit.*

I ¶. Ex. gr. corpus est materia compositionis in animali ; semen, materia generationis. In rebus ab arte perfectis, eadem ferè est materia generationis & compositionis ; sicut & in meteoris. Nam scamnum fit, & constat ex ligno ; nubes, ex vapore ; glacies, ex aqua. Cum materia generationis & compositionis diversæ sunt, illa dicitur materia remota, hæc proxima.

2. Dividit etiam Aristoteles, lib. 8. Met. cap. 6. materiam in νοητὴν καὶ αἰσθητὴν, hoc est, *intelligibilem & sensibilem* : Materia intelligibilis est, cum in accidentibus aliisve rebus simplicibus mens distinguit materiale & formale. Sic literæ dicuntur materia dictionum ; dictiones, orationis : sic præcepta sunt materia disciplinarum ; methodus, forma. Hoc pacto distinguitur materiale & formale in disciplinarum subjectis. Materiale est res ipsa quæ consideratur ; formale, modus
confi-

considerandi. Sic Physicæ subjectum materiale est corpus naturale : formale, quatenus naturale.

XII Forma definitur τὸ π' (π' ἐν), hoc est, quod explicat quid res sit : vel λόγος τῆς π' ἐν, hoc est, ratio illius, quo explicatur quid sit res : vel denique λόγος τῆς ἐστίας, hoc est, ratio essentiae.

I ¶. Forma Græcè μορφή dicitur, vel etiam εἶδος, id est, species, aut παράδειγμα, hoc est, exemplar : Interdum etiam ἐντελέχεια, id est, interprete Hermolao Barbaro, perfectibilia. Tres formæ definitiones, quas tradidimus (quarum prima exstat lib. I. Post. cap. 11. secunda, lib. 2. Phys. 3. & lib. 4. Metaph. cap. 2. tertia, lib. 1. de gen. Anim. cap. 1.) sententiæ conveniunt, & huc redeunt, ut forma sit causa interna, per quam res est id quod est. Etenim per materiam etiam res est sive existit, sed per formam est id quod est, id est, hujus aut illius speciei. Ex. gr. quòd homo existat, tam à materia est, quàm à forma : sed quòd sit homo potius quàm aliud quid, à sola forma est.

XIII. Formæ munera duo sunt : materiam formare, & cum materia compositum constituere.

I ¶. Atque hæc munera non tam re quàm ratione diversa sunt. Nam cum materia ex se informis & indeterminata formam recipit, determinatur ad certam compositi speciem cum forma constituendam. Utraque ergò compositum constituit, materia recipiendo formam, & forma determinando sive formando materiam ; idque interveniente unione : Sine unione enim formæ cum materia compositum non constituitur.

XIV. Forma quadrifariam dividitur : ac primò, in formam materialem, & immaterialem.

XV. Forma materialis est, quæ producitur ex potentia materia, sive, quæ pendet à materia eo ipso momento atque actu quo fit.

XVI. Forma immaterialis est, quæ non producitur ex potentia materia, sive, quæ eo momento atque actu quo fit, non pendet à materia.

I ¶. Produci ex potentia materiæ, nihil aliud est quàm produci ab efficiente causa in materia, atque ita quidem, ut materia

materia suâ causalitate istam actionem promoveat : hoc modo producuntur formæ materiales : formæ immateriales ab efficiente causa producuntur quidem in materia, sed materiâ istam actionem non promovente. Atque hoc propriè dicitur *creare*. Formæ materiales non solum cum fiunt, sed etiam cum factæ sunt, pendent à materia ; immateriales, neutro modo. Hinc est quodd illæ corruptibiles, hæ incorruptibiles sint. Omnes formæ rerum naturalium sunt materiales, animâ humanâ exceptâ, quæ sola immaterialis est.

XVII. *Secundo dividitur forma in substantialem, & accidentalem : quarum illa substantiam constituit, hæc accidens aliquod in concreto.*

1. ¶. Ex. gr. forma substantialis Musici, quâ est homo, est anima rationalis : forma accidentalis, quâ est Musicus, est Musica. Similiter, forma substantialis statux, est ipsa forma marmoris aut æris : forma accidentalis, quâ est statua, est figura.

XVIII. *Formæ substantialis notæ sunt quatuor : 1, Non incurrit in sensus. 2, Non variatur gradibus. 3, Est bonum ac perfectum quid. 4, Et principium proprietatum, atque operationum.*

1. ¶. *Non incurrit in sensus*, nempe per se. Nam ut per accidens sentiatur, nihil vetat. Hinc fit, ut formas substantiales ferè ignoremus. Omnis enim nostra cognitio ducit originem à sensu.

2. *Non variatur gradibus.* Nam quemadmodum numerus, inquit Aristoteles, lib. 8. *Metaph. cap. 3.* non recipit magis & minus ; (additâ enim, aut ablatâ unitate, non est amplius idem numerus, sed diversus) ita neq ; *ἡ ἀτὰρ τὸ εἶδος οὐκ ἔστιν*, id est, *substantia quæ secundum formam est*, sive forma substantialis, gradibus augeri aut minui potest.

3. *Est bonum ac perfectum quid*, ideòque appetibile : idque non solum respectu materiæ, quæ lib. 1. *Phys. cap. 9.* formam appetere dicitur, sicuti fœmina marem, aut ut deformis pulchritudinem ; sed etiam respectu agentis, cui forma finis est, ut dicitur lib. 2. *Phys. cap. 8.* & lib. 4. *Metaph. cap. 4.*

4. *Et principium proprietatum.* Etenim materia est principium commune, & una eadèmq potest esse diversarum re-

rum materia. At proprietates non sunt communes. Non sunt igitur à materia, sed à forma. Præterea, materia est principium patiendi tantum, *lib. 2. de Gen. & Cor. cap. 7.* Ex quo sequitur formam esse fontem operationum, non materiam, ac proinde & proprietatum.

XIX. *Tertio dividitur forma in naturalem, & artificialem.*

XX. *Forma naturalis est, quæ à natura; artificialis, quæ ab arte proficiscitur.*

1. ¶ Ex. gr. anima est forma naturalis viventis. Cæteræ formæ naturales nominibus carent, & nobis ferè ignotæ sunt. Figura est forma artificialis statuæ, quatenus statua res artificialis est, non quatenus est res naturalis, putà marmor, aut æs. Formæ enim artificiales sunt qualitates rerum naturalium, non causæ formales: sunt tamen formales causæ arte factorum, quatenus arte facta sunt: quia arte facta sunt accidentia quædam cum substantiis concreta.

XXI. *Quarto denique dividitur forma in principalem, & disponentem.*

XXII. *Forma, principalis est, quæ speciem per se constituit.*

XXIII. *Forma disponens est, quæ materiam aptam facit ad recipiendam formam principalem.*

1. ¶ Forma principalis semper est substantialis forma. Forma disponens vel est accidentalis vel substantialis. Dispositio accidentalis requiritur in omnibus rebus substantialem formam habentibus; substantialis, in animatis tantum. Ex. gr. cum lignum comburitur, calefit primum atque siccatur, atque hoc modo redditur aptum ad recipiendam formam ignis. Similiter, cum ex trabe statua fit, debet illa sensim disponi, ac formari in statuæ figuram. At cum ex semine generatur animal, semen non qualitatibus solum, sed etiam suâ substantiali formâ disponitur, aptumq; efficitur ad recipiendam animam. Quæ quidem substantialis forma, respectu seminis, est principalis forma; at animæ sive animalis respectu, nihil aliud est quàm forma disponens.

2. Dividi potest etiam forma in *νοητὴν* & *αἰσθητὴν*, hoc est, intelligibilem & sensibilem. Sed de hac divisione satis dictum est in doctrina de materia.

3. Nonnulli dividunt formam substantialem in genericam & specificam, sed malé. Nulla enim est forma substantialis, quæ non sit specifica. Nam anima sensitiva non est forma generica hominis, sed forma specifica bestię. Mentis ergo opus est, formam genericam & specificam distinguere; reipsa diversæ non sunt.

4. Nihilo melio est divisio formæ in assistentem & informantem. Nam forma assistens id ipsum est rei cujus esse forma dicitur, quod nauta navi: neque enim essentiam tribuit, sed motum tantum. Sed nec exemplar causa formalis est, sed instrumentum: ideoque ad causam efficientem referendum.

CAP. XVII.

De causa Efficiente.

THEOREMA I.

Causæ externæ sunt, quæ non ingrediuntur essentiam rei; Cui efficiens & finis.

II. *Causa efficiens est causa externa, à qua res verâ causalitate proficiscitur.*

1. ¶. Platoni causa efficiens erat τὸ ὄν' ε', hoc est, id à quo res est, ut autor est Plutarchus, lib. 2. de plac. Philos. cap. 11. Hinc petita est definitio vulgaris; *Causa efficiens est à qua res est.* Sed non videtur ea satis plena, cum etiam fini aptari possit. Etsi enim res propter finem sit, nihil tamen vetat, quò minus etiam à fine dici possit. Quare addidi definitioni hæc verba, *causalitate verâ*, quibus efficiens à fine distinguitur. Res enim à fine proficiscitur quidem, sed causalitate metaphoricâ; ut docet Aristoteles; cum lib. 1. de Gen. & Cor. cap. 7. ait, finem non esse πινυτικὸν εἰ μὴ καὶ μεταφορικῶς, hoc est, non habere veram vim efficiendi, sed tantum metaphoricam.

III. *Causa efficiens latissimè patet, ejusque variæ sunt species: quas omnes conabimur octo divisionibus explicare.*

IV. *Primò, dividitur causa efficiens in activam, quæ effectum causat mediante actione; & in eam, à qua res immediate emanat, ac sine ulla actione proficiscitur.*

1. ¶. Interdum fit, ut causa effectum causet mediante ali-

quâ actione ; quæ illius causalitas esse dicitur in causando effecto : hujusmodi causam *activam* appellamus. Interdum fit, ut causa efficiens effectum causet suâ existentia, sine ulla causalitate quæ ab illius existentia distincta sit. Hæc à quibusdam vocatur *causa emanativa*. Quæ vox, etsi repugnante linguæ Latinæ analogiâ conficta sit, usurpanda tamen est hac in re, usquedum commodior suppetit. Ex gr. ignis est causa emanativa proprii caloris ; at est causa activa caloris in alio. Nam calor proprius, ignis existentiam necessario atque immediatè sequitur : at ignis in alio non efficit calorem suâ existentia, sed suâ operatione. Ex quibus liquet, causam emanativam minùs quidem propriè efficientem dici, quàm activam : convenientiùs tamen ad causam efficientem reducitur quàm ad aliud causæ genus. Ad causam emanativam pertinet omnis forma substantialis, respectu proprietatum quæ illam in eadem re consequuntur.

V. *Secundò dividitur causa efficiens in immanentem, & transeuntem.*

VI. *Causa immanens est, quæ producit effectum in seipsa.*

VII. *Transiens, quæ producit effectum extra se.*

I §. Ex. gr. cum faber domum ædificat, aut cum quis lapidem projicit, uterque dicitur causa transiens : at cum anima nostra intelligit, aut appetit aliquid, dicitur causa immanens suorum conceptuum, aut effectuum quos intelligendo & appetendo format. Aristoteles videtur solam causam transeuntem *efficientis* nomine intellexisse, cum causam efficientem, lib. 2. Phys. cap. 3. & lib. 4. Metaph. cap. 2. definit, *ἡ δὲ αἰτία τῆ μεταβολῆς ἢ πρώτης, ἢ τῆς ἡμετέρας*, hoc est, unde primum mutationis & quietis principium est : aut lib. 2. Post. cap. 11. *ἡ τῆς ἀρχῆς αἰτία*, hoc est, quæ primum movet.

VIII. *Causæ transeuntis conditiones duæ sunt : 1, Ut sit conjuncta patienti. 2, Ut sit patienti dissimilis.*

I. §. Prima conditio præcipitur lib. 7. Phys. cap. 3. altera, lib. 1. de Gen. & Cor. cap. 7. Causa efficiens dicitur duobus modis conjuncta patienti, nempe vel existentia, (vulgò dicunt *supposito*) vel virtute. Ex. gr. cum ignis lignum urit, existentia ligno conjungitur ; cum affidentes calefacit, non existentia suâ, sed virtute affidentibus conjunctus est.

2. Agens duobus etiam modis dissimile dicitur patienti : vel quoad speciem, vel quoad gradum. Priori modo, calidum frigido ; posteriori modo, quod calidius est, minus calido dissimile dicitur. Quæ neutro modo dissimilia sunt, eorum unum in alterum agere, aut ab eo pati, nullo modo potest.

IX. Tertiò, dividitur causa efficiens in liberam, & necessariam.

X. Causa libera est, quæ consultò causat.

XI. Necessaria, quæ non consultò, sed necessitate natura causat.

1. §. Libertas in genere est facultas faciendi quod lubet. Itaque qui absolutè liber est, immunis est à servitute, à lege sibi ab aliis lata, à coactione, & à necessitate naturali. Sed cum voluntas libera dicitur, cumque causa libera causæ necessariæ opponitur, *libertatis* nomine nihil aliud intelligitur, quàm immunitas à coactione & à necessitate ac determinatione naturali. Nam qui servus est aut legi alterius subditus, voluntatis suæ libertate fruitur, cum judicat domini sui nutu aut lege vivendum esse sibi : at necessitas naturalis & coactio libertatem evertunt. Cur ergò coacta causa hâc divisione non continetur ? quia qui cogitur, ab alio sic impellitur, ut ad effectum nihil ipse conferat ; ac proinde inter causas efficientes referri nequit.

2. Necessitas naturalis non ea solùm nobis est, quâ res inanimæ agunt, aut plantæ ; sed etiam illa quâ bruta agunt, aut infantes ante rationis usum. Nam actiones brutorum & infantium eo ferè modo proficiuntur ab instinctu naturali, & à sensu, quo plantarum actiones proficiuntur ab ipsa natura. Hoc sensu partes divisionis immediatè opponuntur ; eaque omnes causarum species continentur.

XII. Causa libera potest agere, & non agere, quicquid, quantum, & quando lubet.

XIII. Causa necessaria ad unum aliquod agendum determinata est, agitque quando, & quantum potest.

1. §. Ex. gr. ideo liberè quis disputare aut scribere dicitur, quia voluntate suâ aut consilio disputat aut scribit : ac proinde, quia potest disputare & non disputare, & coeptam disputationem, cum lubet, interrompere, vel aliud aliquid

agere eorum quæ dicuntur esse *ἐν τῇ*, id est, in nostra potestate. Ad hæc enim sola se extendit voluntatis libertas. Causæ necessariae ad unum determinatæ sunt, hoc est, possunt agere, sed non possunt non agere : & hoc tantum possunt agere quod agunt, & non aliud ; & tantum agunt, quantum possunt. Sic ignis non potest non calefacere materiam idoneam, & unamquamque rem tanto calore afficit, ut non possit majore.

XIV. *Quarto, dividitur causa efficiens in causam per se, & causam per accidens.*

XV. *Causa per se est, quæ quatenus talis est, producit effectum consilio suo, aut propensione naturali conveniens.*

XVI. *Causa per accidens est, quæ non producit effectum, quæ talis est ; aut quæ effectum producit præter consilium, aut naturæ suæ propensionem.*

I. ¶ Ut causa efficiens sit causa per se, duæ conditiones requiruntur : prima est, ut effectum respondeat illius consilio, aut propensione naturali : consilio, si sit causa libera ; propensione, si sit necessaria. Altera conditio est, ut efficiens effectum producat, quatenus talis est. Si alterutra harum conditionum absit, causa dicitur per accidens. Si prior conditio absit, causa dicitur per accidens, quia eventus aliquis aut effectum per accidens cohæret cum eo effecto quod à causa efficiente per se producitur ; veluti, cum quis terram fodiens, thesaurum invenit. Etenim terram fodere, est effectum fodientis per se : cum hoc effecto thesauri inventio per accidens, hoc est, præter consilium fodientis, & naturam fossionis conjungitur. Similiter, cum animal monstrum generat, est causa monstri per accidens ; quia monstri generatio cum generatione naturali per accidens, & præter naturæ scopum conjungitur. Si posterior conditio absit, causa dicitur per accidens, quia effectum non adscribitur causæ suæ, sed ei quod causæ accidit ; veluti cum Polycletus, aut Musicus, dicitur causa statuæ. Neque enim Polycletus statuam facit, quatenus Polycletus est, aut Musicus, quatenus Musicus est, sed quatenus est statuarius : Accidit autem statuarius, ut Polycletus sit, aut Musicus. Vide lib. 2. *Phys. cap. 2.* Cæterum cum prima conditio desideratur in efficiente causa, *πὲρ* per accidens est in effecto ; cum altera desideratur, est in ipsa causa.

XVII. *Ad causam per accidens revocatur fortuna & casus.*

1. §. Nimirum ad primam speciem, quæ per accidens dicitur ratione effecti Fortuna, Græcè *τύχη*, definitur ab Aristotele *lib. 2. Phys. cap. 5.* his verbis, *Δῆλον ἄρα ὅτι ἡ τύχη αἰτία καὶ συμβεβηκός ἐν τοῖς κατὰ προαίρεσιν ὅτι ἐνδεῶς τε* hoc est, *Manifestum igitur est, fortunam esse causam per accidens in iis quæ alicujus gratiâ fiunt, consultòque suscipiuntur.* A Themistio in paraphrasi hujus loci fortuna plenius definitur, *Αἰτία κατὰ συμβεβηκός ἐν τοῖς ὅτε ἐξ ἀναγκῆς, ὅτι ἐπὶ τὸ πολλὸν γινομένοις, ἀλλ' ἐν τοῖς ἐπ' ἑλαττον, καὶ ἔτιον γε ἐν τοῖς ἐνδεῶς τε κατὰ προαίρεσιν,* hoc est, *Causa per accidens earum rerum quæ neque necessariò, neque crebrò, sed quæ rarò eveniunt, atque in iis duntaxat quæ alicujus gratiâ consultò suscipiuntur.*

2. Casus, Græcè, *αὐτόματον*, est causa per accidens eorum quæ rarò contingunt, idque in iis omnibus quæ alicujus gratiâ suscipiuntur. Casus enim latius patet fortunâ : Nam cum utraque sit causa per accidens, quæ alicujus finis gratiâ agit, quæque in rarò contingentibus versatur ; fortuna solùm posita est in iis quæ agunt consultò, casus etiam in iis quæ agunt ex naturæ necessitate : ut in infantibus, in brutis, plantis, ipsisque etiam in rebus inanimis, in quibus non est locus fortunæ. Ex. gr. cum quis fodiens, thesaurum invenit, dicimus illud vel casu, vel fortuito factum : at cum tegula decidens de tecto, prætereuntem vulnerat, id casu factum est, non fortunâ. Omnes ergò fortuna casus est, sed non vicissim, ut dicitur *lib. cit. cap. 6.* Quamquam sæpe hæ voces confunduntur.

XVIII. Quintò, dividitur causa efficiens in principalem, & minùs principalem.

XIX. *Causa principalis est, quæ suâ virtute effectum producit.*

XX. *Causa minùs principalis est, quæ principali causæ inservit ad effectum producendum.*

XXI. *Causa principalis vel æqualis est effecto, vel nobilior ; nunquam deterior : causa minùs principalis, quatenus causat, semper deterior est effecto suo.*

1. ¶ Quando effectum cum causa comparamus, considerari debet causa; quatenus est causa, hoc est, secundum eam virtutem quâ causat. Cum virtus causæ tanta est, ut in ea contineatur quicquid in effecto est, dicitur causa principalis. Effectum dicitur in causa sua vel *formaliter*, vel *eminenter* contineri. Cum effectum in causa continetur formaliter, sive cum effectum ejusdem naturæ est cum causa sua, causa dicitur *univoca*; eaque æqualis est effecto suo: veluti cum calor calorem efficit, aut mus murem. Cum effectum in causa sua eminenter continetur, sive cum causa nobiliore quâdam virtute effectum producit, dicitur causa *equivoca*; eaque præstantior est effecto suo: veluti cum lux calorem efficit, aut architectus domum. Cum effectum in causa sua neque formaliter, neque eminenter continetur dicitur causa *minus principalis*; eaque non tam efficit, quàm subservit principali causæ ad effectum producendum.

XXII. *Causa minus principalis subdividitur in procatarteticam, proegumenam, & instrumentum.*

XXIII. *Causa procatartetica est, quæ causam principalem extrinsecus incitat ad agendum.*

XXIV. *Causa proegumena quæ causam principalem intus disponit, vel etiam proritat ad agendum.*

1. ¶ Causa *πρὸκαταρτῆτικὴ* quæ *προεγουμενὰ καὶ ἰνστρομένον* (Latine causa incipiens aut inchoans dici potest) vel est objectum, vel occasio, vel autor, vel meritum. Objectum eatenus dicitur causa procatartetica, quatenus excitat aut movet causam principalem. Occasio est temporis lociq; commoditas ad agendum quod velis: quæ & ipsa vim aliquam movendi habet ad agendum, quatenus agendi impedimenta tollit. Autor dicitur hoc loco, qui causam principalem propositis rationibus ad agendum hortatur, aut ab agendo dehortatur: vocatur etiam causa moralis. Meritum sive causa meritoria appellatur, quæ movet agentem ad talionem referendam; idque tam in bonis, quàm in malis. Atque hæc quidem omnia sunt extra causam principalem. In quo distinguuntur à causa proegumena, quæ in ipsa causa principali consistit. Ex. gr. si quis de nocte obambulans, multas res pretiosas observet in apertis inimici sui ædibus, à quo jam antea injuriam acceperat, negligenter custodiri

stodiri, easque alio instigante diripiat; causa objectiva hujus furti erunt ipsæ res pretiosæ furis avaritiam irritantes; occasio, noctis tenebræ, & patentes ædes, quæ nonnihil furis prepositum adjuvant; autor sive causa moralis, qui instigavit; causa meritoria est accepta injuriâ, ob quam pronior est furis animus ad furandum. Causa proægumena est propria furis avaritia: Cæterum autor sive causa moralis locum habeat solummodo in causis voluntariis; objectum, occasio, causa meritoria & proægumena etiam in aliis. Occasio sumitur interdum pro causa meritoria: veluti cum injuria illata dicitur occasio pugnæ, aut belli, aut cædis. Atque hoc sensu occasio, si ficta sit, appellatur Græcè *πρόφασις* & *πρόσχημα*, Latine, *prætextus*. Causa proægumena, vel *disponit* causam principalem solummodo, veluti cum temperamentum corporis dicitur causa morum: vel etiam *provit*; veluti cum ira est causa vindictæ; aut avaritia, furti.

2. Causa procatartica & proægumena magnum habent usum in Medicina. Medici enim omnes ferè morbos referunt ad tres causas; ad procatarticam, proægumenam, & *συνεχιστικήν* sive continentem. Causa procatartica illis est causa externa & evidens; reliquæ duæ internæ sunt & latentes; proægumena est causa antecedens; continens est causæ *ἐκείνης*, simulque cum morbo existens, eique immediatè cōstans: hæc nobis erit causa *proxima*. Ex gr. causa procatartica febris, est frigus aut balneæ adstringentes; proægumena, adstricta cutis & impedita evaporatio; causa continens, humor putrescens & accensus.

XXV. *Instrumentum est, quod causæ principali in effectione subservit.*

I. §. Non omnia instrumenta subserviunt causæ principali eodem modo. Sunt enim instrumenta quædam causæ principali in agendo conjuncta; sunt quædam ab illa in agendo separata. Instrumenta conjuncta sunt, quibus causa principalis in ipsa rei effectione utitur. Atque hæc vel activa sunt, ut calor in igne; vel passiva, ut culter, gladius, &c. Instrumenta separata sunt, quæ agunt loco atque vice causæ principalis: sic legatus est instrumentum principis; & semen multis videtur instrumentum generantis, sed perperam: Nam instrumenta

strumenta separata non habent locum in naturalibus, sed tantum in moralibus.

XXVI. *Instrumentorum essentia posita est in aptitudine ad usum.*

I. §. Instrumenta, ait Aristoteles *lib. 2. de An. cap. 4.* officiis usque distinguuntur inter se aut conveniunt. Nam unumquodque instrumentum est id quod est, quia & quatenus aptum est ad certum usum. Sic securis eatenus securis est, quatenus materiæ qualitate & formâ apta est ad secandum; & oculus eatenus oculus est, quatenus idoneus est ad videndum. Nam oculus, manus, cæteræque partes organicæ hominis, aut bestię mortuæ, non sunt oculus aut manus, nisi homonymas, ut docet Aristoteles *lib. 4. Meteor. cap. 17.*

XXVII. *Sexto, dividitur causa efficiens in primam & secundam.*

XXVIII. *Causa prima est, quæ à nullo pendet.*

XXIX. *Causa secunda est, quæ pendet à prima.*

I. §. Causa dicitur duobus modis prima, nempe vel absolute, vel in suo genere. Causa absolute prima dicitur, à qua omnia pendent, & cum fiunt, & cum existunt, & cum operantur, sive (ut vulgò loquuntur) in fieri, in esse, & in operari. Causa absolute prima tantum una est, nempe Deus. Omnia enim à Deo pendent, & quatenus fiunt, & quatenus sunt, & quatenus operantur, secundum illud Pauli, *Act. 17. In ipso vivimus, & sumus, & movemur.* Cæterum omnia dicuntur à Deo pendere, quatenus fiunt, aut in fieri, ratione creationis; idque vel proximè, vel remotè: cum sunt, ratione conservationis: cum operantur, ratione providentiæ, vel ordinariæ, vel extraordinariæ.

2. Causa prima in suo genere dicitur, à qua pendent reliquæ causæ ejusdem generis. Hujusmodi causa prima non solum datur in unoquoque genere causarum, sed etiam in una quaque subordinatione. Sic Adam est prima causa hominum in sua specie, quia à nullo alio homine genitus est, ut cæteri, sed immediate creatus à Deo. Sic etiam cælum est causa prima mortis, non absolute, sed in genere causarum naturalium, ut colligitur ex *lib. 1. Meteor. cap. 1.* Simili modo dici potest anima prima causa operationum vitalium; & quælibet cau-

la principalis prima dici potest respectu instrumentorum.

XXX. *Septimò, dividitur causa efficiens universalem, & particularem.*

XXXI. *Causa universalis est, quæ eâdem efficientiâ cum aliis causis concurrat ad plura effecta.*

XXXII. *Causa particularis est, quæ suâ efficientiâ unum tantum effectum producit.*

I. ¶. Universales causæ sunt Deus & cœlum. Deus concurrat cum causis particularibus ad omnes effectus: cœlum ad effectus tantum naturales & materiales. Hoc sensu dicitur *lib. 2. Phys. cap. 2.* sol, & homo (addo, Deus) hominem generare: sol, ut causa universalis (nam eâdem efficientiâ concurrat ad generationem omnium rerum) homo, ut causa particularis. Sic etiam equisò dici potest causa universalis, cum agit armentum equorum; quia eodem modo, eadêque virtute, omnes equos impellit, integros & claudos.

XXXIII. *Denique octavò, dividitur causa efficiens in proximam & remotam.*

XXXIV. *Causa proxima est, quæ producit effectum immediatè.*

XXXV. *Causa remota est, quæ producit effectum mediâ causâ propinquiore.*

I. ¶. Causa efficiens dicitur duobus modis *proxima*, nempe vel generaliter, vel specialiter. In genere dicitur causa proxima, quæcunque cum effecto vel existentiâ (vulgò dicunt *supposito*) vel virtute conjungitur. Nam cum virtus ejusmodi sit instrumentum causæ principalis, censetur cum causâ principali una tantum causa. Itaque cum causa principalis suâ virtute cum effecto conjungitur, ipsa censetur cum effecto conjuncta. Neque refert quicquam, sitne virtus illa instrumentum conjunctum an separatum. Ex. gr. ignis dicitur proxima causa ustionis; parentes, suorum liberorum: quamvis ignis agat mediante calore, & parentes, mediante semine. Nam quia calor & semen instrumenta sunt, non efficiunt suo interventu, ut causa principalis non possit dici effecto proxima. Causa ergò remota dicetur hoc sensu, quæ neque existentiâ, neque virtute cum effecto conjuncta est; veluti cum avus dicitur causa nepotis.

2. Causa efficiens in specie proxima dicitur, quæ suâ existentiâ cum effectu conjuncta est, idque sine ulla media virtute. Ejusmodi causa proxima non datur in substantiis, sed tantum in accidentibus, præsertim propriis. Substantia enim non efficit substantiam sine media virtute instrumentali. Atque hæc est causa quæ absolute proxima dicitur, eaque vel interna est, vel externa. Interna dicitur, quæ est in subjecto illius accidentis cujus causa est. Sic dicitur anima, omnisque forma substantialis, causa proxima suarum proprietatum. Huc pertinet causa emanativa; item causa continens, sive synectica Medicorum. Causa externa est, quæ non est in subjecto illius accidentis cujus causa est. Sic dicitur interpositio terræ causa proxima eclipsis. Hujus causæ usus in definitione & demonstratione priorum accidentium est longè maximus.

CAP. XVIII.

De Fine.

THEOREMA I.

Finis definitur, τὸ ἐνέργειᾳ, vel τὸ νύϋν ἐνέργειᾳ, hoc est, id cuius gratiâ res est.

1. 1. Harum definitionum prior existat *lib. 2. Phys. cap. 3. lib. 1. Metaph. cap. 3. & lib. 1. minor. cap. 2.* altera, *lib. 2. Polit. cap. 11.* Sensus hic est: Finis est causa, quæ sui amore causam efficientem incitat ad agendum, & ad sui consecutionem. Quod ut melius intelligatur, observandum est, bifariam posse considerari finem; nempe vel quatenus proponitur agenti, ab eoque intenditur, vel quatenus jam obtinetur: vulgò, in intentione, & in executione. Finis in intentione est causa, quia movet efficientem ad agendum; in executione, est effectum ipsius efficientis. Itaque finis & efficiens sibi mutuò causæ sunt, ut traditur *lib. 2. Phys. cap. 3.* Nam finis movet efficientem ad agendum, & ipse vicissim hanc efficientis actione producit. Ex. gr. bona corporis habitudo gymnastis est causa finalis exercitiorum, atque ipsa vicissim exercitiis gymnasticis acquiritur.

2. Finis dicitur movere efficientem ad agendum, quia illi injicit amorem atque appetitionem sui. Omne enim bonum est

est ἐπεὶ, id est, appetibile. Atqui omnis finis bonus est, aut saltem bonus esse videtur, ut docet Philosophus locis proximè citatis. Neque verò finem ea solum appetunt, quæ agunt ἐκ προαίρεσις, id est, consultò, ut homines; sed etiam, quæ agunt ex necessitate naturæ, ut res inanimæ. Harum rerum appetitus naturalis sive innatus dicitur, nihilq; aliud est quàm naturalis propensio ad finem sibi ab universali natura, hoc est, à Deo, præfixum. Hæc appetitio efficienti à fine injecta, est causalitas finis: quæ, ut ab efficientia distinguatur, motio metaphorica appellari solet: non quòd non sit motio propriè dicta, sed quòd non sit motio talis, qualis est effectio, quæ est causalitas efficientis. Atque ità finem discernit ab efficiente ipse Aristoteles, cum lib. 1. de Gen. & Cor. cap. 7. ait, Τὸ τέλος ἔστι πῶς ἐστὶν. εἰ μὴ κατὰ μεταφωρίαν. hoc est, Finis non habet vim efficiendi, nisi per metaphoram.

II. Finis causat media ad finem destinata, omnesque actiones causæ efficientis circa media.

1. ¶. Finis agentis oblatus, primò cognoscitur, deinde appetitur atq; intenditur. Harum actionum respectu, finis non est causa finalis, sed objectum sive causa abjectiva. quæ est species causæ procatarticæ. Ubi finis intentus est, movet efficientem ad deliberandum de mediis, ad eligenda media ex multis optima, ad media electa comparanda, & ad finem horum mediorum adminiculo consequendum. Hæ actiones pendunt à fine, non tanquam ab objecto, sed tanquam à causa finali. Atq; hinc liquet, cum una eadèmq; res causa procatartica dicatur & causa finalis, quomodo altera ab altera distingui debeat. Nam causa abjectiva sive procatartica dicitur respectu earum operationum quæ ab illa immediatè exercentur; causa finalis, respectu aliarum operationum, quæ ab illa sunt priorum interventu. Ex. gr. si quis eruditionem iudicet rem præclaram esse, eamque amet, optet, atque etiam intendat, harum omnium operationum eruditio est causa abjectiva: at si Academiam adeat, lectiones audiat, libros evolvat, &c. harum operationum eruditio est causa finalis.

III. Finis ponit mediis modum ac mensuram.

1. §. Hoc axioma sumptum est ex lib. 1. Pol. cap. 9. ubi ait Philosophus, finem expeti in infinitum, media non in infinitum.

tum, sed quantum satis est ad finem consequendum : finemq; terminum esse mediorum. Ex. gr. Qui cibum expetunt sanitatis tantum causâ, eum tantum cibum expetunt qui salutaris, & quatenus salutaris est : qui verò cibum expetunt solius voluptatis causâ, eum cibum expetunt tantum qui suavis est, & quousq; siue quatenus suavis est: sanitatem aut voluptatem ipsam omnes expetunt sine modo.

IV. *Finis conciliat etiam mediis amorem.*

I. ¶. Hoc est, finis in causâ est, ut media, quæ per se bona non sunt, imò quæ sæpe mala sunt, amentur tamen atque expetantur finis consequendi causâ. Ex. gr. Quamvis sani medicorum remedia aspernentur omnes, ut, quæ ingrata gustui sunt aut tactui; ægri tamen plerique ea expetunt, & libenter usurpant, si certa spes sit valetudinis eorum usu recuperandæ.

V. *Finis trifariam dividitur: primò, in finem cuius, & finem cui.*

VI. *Finis cuius est, quem efficiens expetit.*

VII. *Finis cui est, in cuius gratiam, siue cui, efficiens aliquid, tanquam finem expetit.*

I. ¶. Hanc distributionem tradit Philosophus lib. 2. de Anima, cap. 4. Ex. gr. Finis cuius medicinæ est sanitas; finis cui, æger. Finis cuius movet efficientem amore concupiscentiæ; finis cui, amore benevolentiae.

2. Finis cuius, teste Aristotele lib. 1. Eth. cap. 1. vel est operatio, vel opus aliquod præter operationem. Ex. gr. Finis Musicæ est peritè canere; finis virtutis *εὐπραγία* hoc est, recta & proba operatio: at artium mechanicarum finis non tam est operari, quàm opus aliquod, putà domus, navis, poculum, aut tale quid.

VIII. *Secundò, dividitur finis in principalem & secundarium.*

IX. *Principalis finis est, quem agens primò vel etiam primario intendit.*

X. *Finis secundarius est, quem agens intendit ut eum simul cum primario sine obtineat, vel ut eum consequatur, si principali sine excidat.*

I. ¶. Ex gr. Finis principalis vestium est, ut corpus nostrum,

strum tueantur contra cœli inclementiam ; finis secundarius, qui cum principali illo fine conjunctus est , ut corpus ornent. Item finis principalis propter quem Deus se manifestavit in mundi creatione, est, ut homines imbuantur Dei cognitione & pietate ; finis secundarius ac succedaneus, ut reddat eos ἀναπολογήτες, id est, *inexcusabiles*, qui veritatem in injustitia detinentes, in impietate persistunt.

XI. Tertiò , denique dividitur finis in subordinatum, & ultimum.

XII. Finis subordinatus est, qui refertur ad finem ulteriorem.

XIII. Finis ultimus est, ad quem reliqui fines referuntur, ipse ad ulteriorem finem non refertur.

1. Sæpe longa finium subordinatorum series est, in quâ finis subordinatus medium est respectu finis sequentis. Ex. gr. fodit aliquis terram, ut ferrum eruat : ferrum eruitur, ut ex eo fiat aliquod instrumentum quod nostris usibus inserviat ; putà scalpellum : scalpellum inservit Medico ad venæ sectionem : venæ sectio ad minuendum sanguinem superfluum, aut detrahendum vitiosum : sanguinis missio facit ad conservandam aut recuperandam sanitatem : sanitas per se quidem optabilis est, sed eò tamen refertur, ut actiones nostræ liberæ sint atque expeditæ : Rursus actiones aliæ ad voluptatem, aliæ ad gloriam, aliæ ad honestatem, aliæ aliò referuntur. In hâc finium subordinatione non potest iri in infinitum, ut suprâ docuimus ex Aristotele, *lib. 1. Met. minore, cap. 2.* Alioqui enim frustra foret & inanis appetitio, quam omnibus rebus indidit natura ; quemadmodum ipse Philosophus colligit *lib. 1. Eth. cap. 1.* Ergò datur finis aliquis summus & ultimus, in quo appetitus terminari atque quiescere potest.

2. Finis bifariâ ultimus dicitur, nempe vel suo genere, vel absolutè. Finis in suo genere ultimus vocatur, qui ultimus est inter eos fines qui intenduntur ab eodem agente. Sic in illa serie, quam retuli, multi sunt fines in suo genere ultimi : Nam ferrum eruere, est ultimus finis metallicorum ; scalpellum, fabrorum ; sanitas, medicorum : at unus tantum finis absolutè ultimus est, nempe felicitas.

3. Finis, qui in suo genere subordinatus est, refertur ad finem

nen ulteriorem per se : at qui in suo genere ultimus est, refer-
tur ad ulteriorem finem per accidens. Ex. g. Faber emollit
igne ferrum, imponit incudi, cudit, limat, acuit, donec ex eo
scalpellum effecerit. Hæc omnia per se, ac respectu ejusdem
agentis, nempe fabri, subordinata sunt : scalpellum enim to-
tius molitionis fabrilis finis est. At verò quòd Medico scal-
pellum inserviat ad incidendam venam, id non curat faber,
ideòque omnia quæ faber facit scalpelli conficiendi gratiâ,
huic Medicorum fini per accidens subordinata sunt.

XIV. *Cum finis bonus sit, quòd ulterior, eò meliorem esse
necesse est. Ultimus ergò finis est optimus, ipsùmque summum
bonum.*

1. ¶. Hoc theorema exstat lib. 1. Eth. cap. 5. Finem esse
bonum, suprà dictum est : aliter enim non moveret efficien-
tem. Neq; verò satis est, ut bonus sit, sed debet etiam per se
bonus esse : cū media non sint bona, nisi quatenus fini obti-
nendo inserviunt. Ex quo sequitur, finem meliorem esse me-
diis. Atqui finis subordinatus est medium respectu finis se-
quentis, sive ulterioris. Ultimus ergò finis est optimum quid;
quia nullius respectu medium est, quo possit esse deterior. Ni-
hil autem refert, sitne finis revera bonus, an bonus esse videat-
ur, ut dicitur lib. 4. Metaph. cap. 2. quia finis non aliter mo-
vet efficientem, quàm quatenus judicatur esse bonus.

XV. *Quòd finis posterior est in executione, eò prior est in in-
tentione, & vicissim.*

1. §. Hoc axioma sic effertur ab Aristotele, lib. 3. Eth. cap.
3. τὸ ἐχάστων ἐν τῇ ἀναλύσει, πρῶτόν ἐστιν ἐν τῇ γενέσει : hoc
est, quòd ultimum est in resolutione, primum est in generati-
one. Generatio enim hîc effectiōnem sive executionem,
resolutio intentionem denotat. Eadem est Aristotelis sen-
tentia lib. 2. Eud. cap. 3. ubi sic inquit, τῆς μετὰ νοήσεως ἀρχὴ
τὸ τέλος : τῆς ἡ προᾶξεως, ἡ τῆς νοήσεως τέλος τῆς hoc est, Co-
gitationis (sive intentionis) principium est finis : principium a-
ctionis, est cogitationis terminus. Ubi per terminum intellige
quod fuerat in cogitatione sive intentione postremum.

2. Dividitur etiam finis in internum & externum. Sed hæc
divisio non in omnibus rebus, sed in facultatibus tantum, si-
ve in artibus πραγματικαῖς locum habet : in quibus finis inter-

nus dicitur, quem artifex assequitur quoties vult; externus, quem non semper assequitur. Sic finis internus artis oratoriæ est, dicere ornatè atque accommodatè ad persuadendum, finis externus est persuadere.

3. Divisio finis in finem per se, & finem per accidens, quæ vulgò recepta est, non caret vitio, nisi commodè accipiatur. Finis enim per accidens non est causa finalis: nam causa finalis non est causa, nisi quatenus intenditur: at finis per accidens non intenditur, sed evenit præter intentionem. Quare, cum finis per accidens dicitur, eventus sive effectum per accidens intelligitur. Nam si quis agrum eo fine fodiens, ut eum reddat fertilior, thesaurum fortè inter fodiendum reperiatur, thesauri inventio non erit finis, sed effectum sive eventus per accidens.

C A P. XIX.

De Subjecto & Adjuncto.

THEOREMA I.

Subjectum est, cui aliquid præter essentiam adjungitur.

II. Adjunctum est, quod alicui præter essentiam adjungitur.

I §. Vulgò distingui solet inter subjectum *ὑποκείμενον*, & *κατηγορούμενον*, id est, *inhæſionis* & *prædicationis* sive *denominationis*. Subjectum *inhæſionis* nihil aliud est quàm substantia respectu accidentium sibi inhærentium: sic nix est subjectum alboris qui sibi inhæret. Subjectum *prædicationis* sive *denominationis*, vel latè sumitur, vel strictè. Latè sumitur pro qualibet re (sintne substantia an accidens, nihil refert) de qua aliquid dici potest quacunque prædicatione, sive essentiali, sive accidentali; sive internâ, sive externâ: sive absolutâ, sive limitatâ. Atque hoc sensu dici potest, omne subjectum *inhæſionis* esse subjectum *denominationis*: quia omne accidens dici potest de subjecto suo; vel voce denominativâ: veluti cum nix dicitur *alba* ab albore sibi inhærente: vel voce aliunde sumptâ; veluti cum quis *probus* dicitur propter virtutem. At non omne subjectum *prædicationis* est subjectum

F

inhæſionis.

inhæſionis. Multa enim dicuntur de ſubjecto, quæ non ſunt in ſubjecto. Hoc ſenſu ſumitur ſubjectum prædicationis in doctrina de prædicabilibus, & de enunciatione.

2. Cum ſubjectum prædicationis ſive denominationis ſtriçtè ſumitur, opponitur ſubjecto inhæſionis; idque biſariam. Vel enim ſumitur pro eo de quo aliquid prædicatur eſſentialiter, putà genus, ſpecies, aut differentia (ſic ſumitur *cap. 2. & 5. lib. Categ.* ubi eſſe in ſubjecto, & dici de ſubjecto, opponuntur) vel etiam ſumitur pro eo de quo aliquid dicitur prædicatione externâ, aut limitatâ; ut, *Miles eſt armatus; Æthiops eſt albus, Homo eſt immortalis.* Neque enim armatura inhæret militi, cùm ſit ſubſtantia; neque albor inhæret toti Æthiopi, ſed dentibus tantùm; neque immortalitas toti homini, ſed animæ ſolùm.

3. Hoc loco non ſubjectum inhæſionis ſolùm, ſed etiam omne ſubjectum prædicationis ſive denominationis, de quo aliquid prædicatur prædicatione accidentali, ſive externâ, ſive internâ, ſive abſolutâ, ſive limitatâ, conſiderandum eſt. Et quæ iſtoc modo de ſubjecto dici poſſunt, adjunctorum nomine intelliguntur. Quæ de aliquo prædicantur eſſentialiter, huc non pertinent, ut ex ſubjecti & adjuncti definitione intelligitur.

4. Nectamen confunditur hæc doctrina cum iis quæ de prædicabilibus docuimus. Nam in prædicabilibus ſpectantur adjuncta propria & communia, quatenus cum ſubjecto connexa ſunt in prædicando; quæ Logica connexio eſt, & in rationis fictione, non in rebus ipsis poſita eſt. Hoc loco conſiderantur adjuncta, quatenus cum ſubjecto connexa ſunt in exiſtendo; quæ eſt connexio Phyſica, & in ipsis rebus ſita.

III. *Adjuncta poſſunt triſariam dividi: Ac primò in propria & communia.*

I §. De propriis accidentibus ſatis dictum eſt in prædicabilibus. Accidentia communia nihil aliud ſunt quàm accidentia abſolutè dicta, quæ propriis opponuntur.

I V. *Secundò, dividuntur adjuncta in abſoluta & limitata.*

V. *Adjunctum abſolutum eſt, quod ſubjecto ſimpliciter & abſolutè convenit.*

V I. *Limitatum, quod ſubjecto convenit ſecundùm quid.*

I §. *Secundùm*

1 §. *Secundum quid*, hoc est, secundum certam aliquam Partem aut naturam; aut certo aliquo tempore, loco, aut respectu. Ex. gr. *Mortalitas* est absolutum hominis adjunctum; *immortalitas*, limitatum: quia homo non est absolute immortalis, sed tantum quoad animam. Sic *albor* est adjunctum limitatum *Æthiopis*; quia *Æthiops* non absolute, sed tantum quoad dentes, albus est.

VII. *Tertio*, dividuntur adjuncta in interna & externa.

VIII. *Adjuncta interna sunt, quæ subjecto inhaerent.*

IX. *Externa, quæ ad subjectum extrinsecus ordinantur.*

1 §. Subjectum recipit adjuncta interna in se; ut nix, alborem; anima, scientiam: adjuncta externa, ad se; ut visus, colorem; miles, arma. Interna tribuunt subjecto denominationem internam; externa, externam. Cum enim nix alba denominatur ab albore suo, est denominatio interna; at cum miles dicitur armatus, aut oculus colorem videre, est denominatio externa: vulgò denominatio *intrinseca* & *extrinseca* dicitur.

2. Adjuncta interna sunt accidentia, putà quantitas, qualitas, aut aliquid tale; eorumque subjectum semper est substantia. Adjuncta externa vel sunt substantiæ, vel accidentia: eaque vel substantiis vel accidentibus adjunguntur. Nam vel substantia substantiæ, vel accidens accidenti, vel accidens substantiæ, vel substantia accidenti adjungi potest, ut ex sequentibus patebit.

X. *Adjunctum externum vel est objectum, vel signum, vel circumstantia.*

XI. *Objectum est, circa quod aliqua res operando occupatur.*

1 §. Objectum ab Aristotele nunquam proprio ac peculiari nomine appellatur. Cum enim de objecto loquitur, vel *ἀντικείμενον* dicit, id est, *oppositum*, ut lib. I. de Anim. cap. I. vel *γένος*, *γένος ὑποκειμένου*, *γένος περὶ ὃ*, id est, *genus*, *genus subjectum*, *genus circa quod*; ut lib. I. Post. cap. 7. Quatuor sunt, quibus objectum tribui solet, *ὁσία*, *δύναμις*, *ἔξις*, *ἐνέργεια*: id est, *substantia*, *facultas*, *habitus*, *operatio*. Sic objectum animæ, mentis, scientiæ & contemplationis,

dicitur esse *omne ens*. Operatio requirit objectum ratione sui; substantia, facultas, & habitus, ratione suæ operationis. Nam *ens* non est objectum animæ, mentis aut scientiæ alicujus, nisi quatenus animæ, aut mens, imbuta scientiâ, illud contemplatur. Contemplatio enim est animæ, mentis & scientiæ operatio.

2. Objectum & subjectum in disciplinis ferè sine discrimine usurpantur: & certè in scientiis propriè dictis una eademque res utriusque rationem habet. Nam quatenus mens eam contemplatur, objectum dicitur: eadem subjectum dici potest, respectu proprietatum, quæ de illa per causas demonstrantur. Sic *corpus naturale*, dici potest objectum scientiæ Physicæ, & subjectum logi, temporis, motus, aliarumque affectionum quæ de corpore naturali demonstrantur. Extra hanc considerationem non est temerè objectum cum subjecto confundendum. Habent enim hæ notiones *ædes* sive respectus diversissimos.

3. In objectis disciplinarum distingui solet materiale & formale. Materiale est res ipsa quæ consideratur; formale est modus considerandi. Ex. gr. Objectum materiale Physicæ est *corpus naturale*; formale, *quatenus naturale*. Nam cum multæ disciplinæ versentur circa corpus naturale, putà, Mathematica, Medicina, artes Mechanicæ: sola Physica considerat corpus naturale *quatenus naturale*.

4. In disciplinis theoreticis unum tantum objectum requiritur, in cuius contemplatione sive cognitione tota disciplina consistit: sive objecti nomine nihil aliud intelligatur, quàm subjectum de quo proprietates demonstrantur per propria principia (quo sensu diximus corpus naturale esse objectum Physicæ) sive ipsæ etiam proprietates & principia objecti nomine veniant. In disciplinis practicis requiritur duplex objectum; unum doctrinæ, alterum usus sive praxis. Objectum doctrinæ dicitur, quod per definitiones & divisiones in tota disciplina explicatur. Objectum usus sive praxis vocatur, circa quod versatur ipsa disciplinæ exercitatio. Sic in Ethicis objectum doctrinæ, sunt virtutes & vitia; objectum praxis est anima: hanc enim imbuunt Ethica virtutibus. In disciplinis directricibus, objectum praxis ferè est geminum; alterum, quod

quod ab ipsa disciplina dirigitur; alterum, in quo operatur id quod dirigitur. Sic diximus Logicam, ratione usûs, versari circa omne thema, & circa ipsam mentem in thematum cognitione quærenda occupatam. Objectum quod dirigitur, *proximum*; id, in quo operatur id quod dirigitur, *remotum* docendi causâ appellari potest. In artibus mechanicis non apparet objectum doctrinæ, quia solâ exercitatione acquiruntur sine præceptis atque institutione.

XII. *Objectum aliud est per se, aliud per accidens.*

XIII. *Objectum per se est, quod & rei, quâ tale est, obijciatur, & circa quod res, quatenus talis est, versatur.*

XIV. *Objectum per accidens est, quod aut rei non obijciatur, quâ tale est, aut circa quod res non versatur, quatenus ipsa talis est.*

I. § Objectum per se requirit duas conditiones; alteram ratione sui, alteram ratione subjecti cui subijcitur. Ratione sui, ut rei obijciatur, *quâ tale est*: Sic *bonum* est objectum voluntatis per se; *malum*, per accidens: Voluntas enim appetit bonum naturâ suâ; malum suâ naturâ non appetit, imò malum non appetit, quâ malum, sed quatenus videtur esse bonum, *lib. 3. Eth. cap. 4.* Similiter objectum visûs per se est *color*; objectum per accidens, *Diaris filius. Lib. 2. de Anim. cap. 6.* Diaris enim filius non videtur, quatenus est Diaris filius, sed quatenus est coloratus; accidit autem, ut id quod coloratum est, sit Diaris filius. Altera conditio, quam diximus in objecto per se requiri ratione subjecti, est, ut res circa illud versetur, *quatenus ipsa talis est*. Ex. gr. Cùm Architectus ædificat domum, materia ex qua domus fit, est Architecti objectum per se; quia quatenus Architectus, circa illam versatur: at eadem materia erit objectum Musici per accidens, si Musicus dicatur ædificare: quia non ædificat, quâ Musicus, sed quatenus Architectus est.

XV. *Objectum per se vel proprium est, vel commune.*

XVI. *Objectum proprium est, quod uni tantum rei obijcitur.*

XVII. *Commune, quod obijcitur pluribus rebus.*

I. § Sic color est proprium objectum visûs; sonus, auditus; sapor, gustus, &c. magnitudo, numerus, figura, motus, quies, sunt objectum sensuum commune: quia pluribus sensibus singula eorum percipiuntur.

XVIII. *Utrumque vel mediatum est, vel immediatum.*

XIX. *Objectum mediatum est, quod alio mediante alicui obijcitur.*

XX. *Immediatum, quod nullo mediante alicui obijcitur.*

I §. Sic qualitates sensibiles sunt immediatum objectum sensuum; substantia hiis qualitatibus vestita, mediatum. Sic de objecto.

XXI. *Signum est, quod seipsum sensibus, & id, cujus signum est intellectui offert.*

I §. Signum est adjunctum, res signata subjectum. Signum hæc duo facit: primò seipsum sensibus offert; deinde mentem movet, ut de re signata cogitet.

XXII. *Signum variè dividitur: ac primò in naturale, & arbitrium.*

XXIII. *Signum naturale est, quod significat suâ naturâ.*

I §. Sic aurora est signum orituri solis; vestigium, pedis; imago in speculo, vultus. Signum naturale ferè pertinet ad doctrinam de causis. Nam omne signum naturale, vel est causa rei signatæ, vel effectum: vel utrumque est effectum ejusdem causæ.

XXIV. *Signum arbitrium est, quod ex institutione significat.*

I §. Vel humanâ; veluti cùm suspensa hedera, est signum venalis vini: vel divinâ; veluti cùm sacramenta dicuntur signa divinæ gratiæ.

XXV. *Secundò dividitur signum in formale, & materiale.*

XXVI. *Signum formale est, quod rem repræsentat.*

I §. Sic pictura est signum rei depictæ; vestigium, pedis; conceptus, rerum. Aristoteli *ὑποκείμενα*, id est, simulacrum dicitur, cap. 2. de interpr.

XXVII. *Signum materiale est, quod rem indicat quidem, sed non repræsentat.*

I §. Sic iris est signum pluvix; fumus, flammæ; pallida luna, signum ventorum; rubicunda, serenitatis.

XXVIII. *Tertiò dividuntur signa in antecedentia, consequentia, & conjuncta.*

I §. Signa antecedentia: ut, aurora, ortus solis; coactio nubium,

nubium, pluviae. Consequentia: ut, fluctuatio tabularum, tempestatis; pallor, morbi. Conjuncta: ut, inæqualitas pulsus, febris; cutis hispida, salacitatis. Huc pertinent signa meteorologica, & physiognomica.

XXIX. *Quartò denique dividuntur signa in necessaria & contingentia: quorum illa certum, hæc incertum rei indicium faciunt.*

I §. Ex. gr. Aurora certò prænunciat ortum solis, & inæqualis arteriæ pulsus certum facit indicium febris; aut pallor est indicium amoris; & nubium coactio, pluviae; sed fallax. Fallit autem signum, cum non necessariò cum re cohæret, vel cum pluribus rebus commune est. Signa necessaria Græcis dicuntur *τακτικήα*, reliqua *εἰκώτα*, hoc est, *verisimilia*. Quamquam videntur tum demum *εἰκώτα* dici, cum ex iis fiunt propositiones verisimiles: ut, *Cum nubes coguntur, pluet confestim: Qui pallet, amat.*

XXX. *Circumstantia est, quod circa rem est, etve adjacet, aut appositum est.*

I §. Huc pertinet locus, tempus, vestitus, armatura, & id genus alia. Atque hæc de affectionibus simplicibus.

C A P. X X.

De Convenientia rerum.

T H E O R E M A I.

Sequuntur convenientia, diversitas, oppositio, & ordo, quas diximus esse affectiones conjunctas.

I §. De convenientia & diversitate agit Aristoteles lib. 1. Top. cap. 7. & lib. 7. cap. 1. & 2. Item, lib. 4. Metaph. cap. 6. & 9. & lib. 6. Top. cap. 18. Probat utriusque considerationem non parum adjumenti conferre ad bene definiendum & ad argumentandum. De oppositione & ordine agit in fine lib. Categ.

II. *Convenientia est, quâ plura, aut quasi plura, uniuntur inter se.*

III. *Estque vel realis, vel rationis.*

IV. *Convenientia realis, est convenientia unius rei cum seipsa.*

V. *Convenientia rationis, est convenientia plurium in uno conceptu.*

I. § Hanc convenientiæ distributionem innuit Philosophus, cum lib. 4. *Metaph. cap. 7.* ait, *identitatem esse quandam unitatem essentiae, aut plurium* (hæc est identitas rationis) *aut eorum, quæ, ut plura, usurpantur ab intellectu nostro: quæ est identitas realis.* Nam quæ reverâ plura sunt, uniuntur in communi conceptu sui generis. Sic dicuntur homo & bestia convenire in communi conceptu animalis. Et quod reverâ unum est, mente distrahitur, & usurpatur ut plura: veluti, cum Petrus senex, dicitur idem esse sibi ipsi puero; vel cum attributa divina dicuntur eadem esse divinæ essentiæ. Illa rationis, hæc realis convenientia est. Et quamvis Aristoteles loquatur de sola identitate, nihil tamen causæ est, cur ea distributio non possit generatim intelligi de qualibet convenientia rerum. Cæterum locus, quem citavi, non rectè legitur in contextu: germana lectio in margine adscripta est, in editione Casauboniana. Ea sic habet, *Ἡ ταυτότης ἐνός τις τις ἐστὶ τῶ ἴδι, ἢ πλείονων, ἢ ὅταν χρῆται ὡς πλείον.* Hoc est, *Identitas est unitas quædam essentiæ vel plurium, vel eorum, quæ ut plura usurpantur.*

VI. *Dividitur etiam convenientia in simplicem & analogicam.*

VII. *Convenientia simplex, est convenientia unius cum alio in eadem tertio.*

VIII. *Convenientia analogica, sive analogia, est convenientia plurium cum pluribus in eadem habitudine.*

I. §. Analogia, Latine proportio, definitur ab Euclide, lib. 5. prop. 4. *ἡ τῶ λόγων ὁμοιότης*, id est, *rationum similitudo.* *Λόγος*, eodem autore, *ἐστὶ δύο μεγέθων ὁμομερῶν ἢ χῆρ πηλικότητα πρὸς ἀλλήλα ποῖα χῆρι.* Hoc est, *Ratio est duarum magnitudinum ejusdem generis mutua quædam secundum quantitatem habitudo.* Itaque cum ratio duos terminos, & analogia duas minimùm rationes habeat, sequitur analogiam in quatuor minimùm terminis consistere, quorum primus ita se habet ad secundum, ut tertius se habet ad quartum: ut in hisce numeris videre est, 4, 8, 6, 12. Nam ut quatuor se habent ad octo, ita se habent sex ad duodecim.

2. Et si autem Mathematici analogiam constituent in sola quantitate, & in habitudine totius ad partem, aut vicissim: nulla tamen causa est, cur analogia non possit omnibus rebus generaliter attribui, quæ mutuâ habitudine inter se conveniunt; siue ea habitudo sit totius ad partem, siue causæ ad causatum, siue subjecti ad adjunctum, aut contrâ, siue oppositi ad oppositum. Nam ut 4 & 6 sunt partes analogæ, habentes rationem dimidii ad 8 & 12; ita quoque sol & mus, sunt causæ efficientes, ut plerique judicant, analogæ eorum murium, qui ex putri materia & ex semine generantur; & os & radix, media analogæ ad nutritionem animalium & plantarum destinata; symmetria humorum & mediocritas affectuum, formæ analogæ sanitatis & virtutis; corpus & anima, analogæ subjecta sanitatis & virtutis, aut morborum & vitiorum; sanitas & virtus, morbi & vitia, analogæ adjuncta corporis & animæ; ipsaque sanitas & virtus analogicè contraria sunt morbis & vitiis. Ad analogiam referendæ sunt parabolæ, fabulæ, apologi, & id genus alia.

IX. Convenientia simplex vel est essentialis, vel accidentalis. Convenientia essentialis dicitur τὸν ὅτις, quasi dicas, identitas.

X. Identitas est ἰσότης τῷ ὅτι, hoc est, unitas essentiæ.

XI. Eadem sunt, ὅν μὴ α ἴσα, hoc est, quorum una est essentia.

I §. Prior harum definitionum legitur lib. 4. Metaph. cap. 9. posterior, ibidem cap. 15.

XII. Identitas vel subordinata est, vel coordinata.

XIII. Identitas subordinata est, quâ conveniunt superiora cum inferioribus sibi subjectis.

1. §. Nempe genus cum speciebus, & species cum individu- is sibi subjectis, & vicissim. Sic eadem sunt, animal & homo, homo & Socrates, albor & color, & vice versâ.

2. Hæc subordinatorum identitas, est identitas realis, quia superius est de essentia inferioris: ut animal, de essentia hominis & bestię; color, de essentia alboris & nigroris. Itaque mentis opus est, inter animal, & hominem aut bestiam; aut inter colorem, & alborem aut nigrorem, distinguere. Et quanquam quæ in eodem tertio conveniunt, inter se

se quoque conveniunt, non sequitur tamen specierum convenientiam esse realem, quamvis ipsæ species reverâ eadem sint generi. Nam neque genus, neque ullum universale reipsâ urum est, sed mentis tantum nostræ conceptione. Ac proinde, quæ in aliqua communi ratione generis conveniunt, ut *homo* & *bestia* in communi ratione animalis, ea inter se quoque uniuntur, non reipsâ, sed mentis conceptu.

XIV. *Identitas coordinata, vel est numerica, vel specifica, vel generica.*

XV. *Identitas numerica, est identitas unius individui cum seipso.*

XV I. *Eadem τὸ ἀριθμῶν, sive numero dicuntur, ὧν ἡ ὕλη μία, hoc est, quorum una est materia.*

1 §. Hæc definitio petita est ex *lib. 4. Metaph. cap. 15.* Cæterum *materia* nomine intelligit Philosophus collectionem proprietatum, quæ nunquam in alio eadem esse potest. Sic Petrus dicitur idem sibi ipsi, non alii. Atque hæc quoq; identitas realis est: unitas enim numerica in rebus ipsis est, citra ullam mentis operationem.

2. Cæterum quatuor modi recensentur ab Aristotele *lib. 1. Top. cap. 7.* eorum, quæ eadem numero dicuntur. 1, Vocabula synonyma: ut, *ensis* & *gladius*. 2, Definitio & definitum: ut, *homo*, & *animal rationale*. 3, Subjectum & illius proprium: ut, *homo* & *risibile*. 4, Subjectum & illius accidens commune: ut, *Socrates*, & *is qui disputat in Academia*, quando constat Socratem solum disputare. His additur quintus modus, *lib. 4. Met. cap. 6.* cùm eadem numero dicuntur, quæcunque continua sunt, aut continuitate naturali, aut artificiali: ut, *pertica*, *domus*, &c.

XVII. *Identitas specifica est identitas plurium individuum sub eadem specie.*

XVIII. *Eadem specie sunt, ὧν ὁ λόγος ἓς, id est, quorum una est ratio essentia: Vel ὅσα πλείω ὄντα ἀδιαφοροῦσι ἑᾷ ὁρίῃ hoc est, quæ cùm plura sint, specie non differunt: ut, Socrates & Plato, Bucephalus & Hirpinus, Melampus & Phylax.*

1 §. Prima harum definitionum traditur, *lib. 4. Metaph. cap. 6.* posterior, *lib. 1. Top. cap. 7.*

XIX. *Identitas generica, est identitas plurium specierum, aut individuorum, sub eodem genere.*

XX. *Ea-*

XX. Eadem genere sunt, ὅσα ὑπὸ τὸ αὐτὸ γένος εἰσὶν, hoc est, quæ sub eodem genere sunt: idque vel proximo; ut, homo & bestia, & eorum individua, sub animali: vel remoto; ut, corpus & spiritus, & eorum species & individua, sub substantia.

XXI. Sub eodem summo genere dicuntur omnia convenire, ὅτι αὐτὸ τὸ ἥμα κατηγορίας, hoc est, quorum eadem est figura prædicationis.

XXII. Quæcunque eadem numero sunt etiam sunt eadem specie; & quæ specie, etiam genere: non vicissim.

I §. Hæc omnia petita sunt ex lib. 4. Metaph. cap. 6. jam sapientis citato.

XXIII. Convenientia accidentalis, vel est interna, vel externa: & interna, vel est paritas, vel similitudo.

XXIV. Paritas est convenientia in quantitate.

XXV. Ταῖς ἴσαι λέγεται ὧν τὸ πῶσον ἴν. Hoc est, Paria dicuntur, quorum una est quantitas.

I §. Hæc leguntur lib. 4. Metaph. cap. 15. Dicit, quorum una est quantitas, nempe vel molis, vel virtutis sive perfectionis. Notæ paritatis sunt, Par, æquale, æquè ac, tam quàm, tantò quantò, tot quot, non minùs quàm: ut,

Tam ficti pravique tenax, quàm nuncia veri.

Non minor est virtus, quàm quærere, parta tueri.

XXVI. Similitudo est convenientia in qualitate, aut passione.

XXVII. Ὅμοια λέγεται πάντα ταῦτα τὰ πεπυθότα, καὶ τὰ πλείω ταῦτα πεπυθότα ἢ ἕτερα, καὶ ὧν ἡ ποιότης μία.. Hoc est, Similia dicuntur, quæ idem passa sunt, & quæ plura eadem passa sunt quàm diversa, & quorum una est qualitas.

I §. Ex lib. 4. Metaph. cap. 9. Dicit, quæ eadem passa sunt. Cur non ea quoque, quæ eadem egerunt? An quia actio, ut est actio, non est in agente, sed in patiente? Quorum una est qualitas] vel gradu scilicet, vel specie. Non malè retuleris huc convenientiam iu situ. Sic ovum ovo simile est ob colorem & figuram. Notæ similitudinis sunt, Instar, more, similis, tanquam, quemadmodum, ut, sicut, non secus, non aliter, &c. Cùm similitudo propositione & redditione explicatur, fit analogia.

XXVIII. Convenientia externa, est convenientia in ejusmo d

modi causis, effectis, subjectis, aut adjunctis externis, quæ ad essentiam non pertinent.

I. § Sic duo fratres germani conveniunt causâ efficiente; vestis & domus conveniunt fine; utraque enim est ad arcendas coeli injurias. Huc etiam revocari possunt, quæ materiâ conveniunt; ut nix & grando, ventus & terræ motus. Est enim materia sit causa interna, non facit tamen ad essentiam specificam. Quæ formâ conveniunt, essentiâ conveniunt. Porro duo artifices *quæ res ipsæ*, conveniunt effectis; virtutes & vitia, subjectis; ambo enim sunt in animo. Convenientia rerum in adjunctis varia est. Convenientia in adjunctis internis, pertinet ad paritatem & similitudinem. Huc solummodò referenda est convenientia in objectis, signis, & circumstantiis. Si causa efficiens aut finalis, subjectum aut adjunctum, ponatur in essentiali definitione rerum; tum, si quæ in iis conveniunt, convenientia non externa, sed essentialis censenda est.

C A P. XXI.

De Diversitate, sive Dictione rerum.

T H E O R E M A I.

Diversitas est, quâ res à se invicem distinguuntur.

II. Estque vel realis, vel rationis, vel modalis.

III. Diversitas realis est, quâ res distinguitur ab alia re, aut à sui negatione.

I. §. Distinctio realis dividitur in mutuam & non mutuam; & mutua in positivam & negativam. Positiva vocatur, quâ distinguitur res ab alia re: ut, *Petrus à Paulo, albor à nigrore, materia à forma*, &c. Distinctio negativa dicitur, quâ ens distinguitur à non ente sibi opposito, sive à sui ipsius negatione, aut privatione: ut, *visus à cæcitate, lux à tenebris*, &c. Non mutua distinctio est, quâ totum distinguitur à parte: ut, *homo à capite*.

IV. Diversitas rationis est, quâ res distinguuntur solis conceptibus.

I. § Quod fit, cum una eadèmq; res, non uno conceptu
intel-

intelligitur. Diversitatem sive distinctionem rationis, dividunt Scholastici suo more, hoc est, barbarè, in distinctionem rationis ratiocinantis, & rationis ratiocinatæ. Etenim *ratio* sive *ratio* commune nomen est, convenitque & intellectui & essentiae rerum, quæ definitione explicatur; quidditatem vulgò vocant. Intellectum vocant rationem ratiocinantem; quidditatem, rationem ratiocinatam. Itaque distinctio rationis ratiocinantis est Scholasticis, quæ ab ipso intellectu constituitur, quod fit, cum una eademque res duobus pluribusve, iisque similibus conceptibus, distinguitur. Distinctio rationis ratiocinatæ dicitur, cum in una res reperitur alia atque alia quidditas, sive definitio: quod fit, cum una eademque res obijcitur conceptibus dissimilibus. Similes conceptus dicuntur, qui unam eandemque rem, eodem prorsus modo, repræsentant: dissimiles, qui repræsentant eandem rem diversimodè. Ex. gr. Si quis Petrum concipiat eundem esse sibi ipsi, eum necesse est Petrum bis concipere, & quidem eodem prorsus modo. At si quis concipiat Petrum esse hominem, aut animal, eum etiam necesse est Petrum bis concipere, sed alio atque alio modo. Conceptus enim, quo Petrus concipitur, ut Petrus, dissimilis est illi conceptui, quo idem Petrus concipitur, ut homo, vel ut animal. Nec tamen diversæ res sunt, Petrus ut Petrus, & Petrus ut homo, aut ut animal.

2. *Distinctio rationis ratiocinantis & rationis ratiocinatæ*, hoc signo discerni poterunt. Quæ ratione ratiocinante distinguuntur, ea de se invicem prædicantur prædicatione identicâ: quæ distinguuntur ratione ratiocinatâ, eorum unum de altero prædicari nequit, aut si prædicetur, prædicatio non est identica.

V. *Diversitas modalis est, quâ res distinguuntur suis modis.*

§. Est aliquid in rebus, quod neque res ipsa est, neque alia res, neque prorsus nihil; sed medium quid inter rem & nihil. Atque illud solet appellari *modus rei*. Ex. gr. *Gradus qualitatis*, non est *qualitas*, neque etiam omnino nihil est; sed est *modus qualitatis*. Itaque cum *qualitas* intenditur aut remittitur, non fit alia *qualitas*, sed fit *qualitas alius modi*. Et cum *qualitas*, aut alia aliqua res, istâ ratione mutatur, dicitur modaliter distinguî à seipsa. Sic calor in primo gradu, distin-

distinguitur à seipso in secundo aut tertio gradu ; & manus explicata, à seipsa contracta.

2. Aristoteles revocat omnem diversitatem ad duas species. Quæ enim diversa sunt Aristoteli, vel τὸ ποικίλον diversa sunt, vel τὸ λόγον, id est, vel *subjecto* vel *ratione*: quorum, quæ subjecto differunt, reipsâ differunt ; reliqua, solâ ratione. Modalis distinctionis nusquam meminit. Non videtur tamen citra necessitatem excogitata. Nam modalis distinctio major est distinctione rationis, & minor distinctione reali : ejusque usus sæpe occurrit.

VI. *Potest etiam diversitas distribui in essentialem & accidentalem.*

VII. *Diversitas essentialis est, quâ res distinguuntur essentiâ.*

VIII. *Estque vel subordinata, vel coordinata.*

IX. *Diversitas subordinata est, quâ superiora differunt ab inferioribus sibi subjectis.*

I §. Nempe genus à speciebus, & species ab individuis sibi subjectis, & vicissim. Sic differt animal ab homine, homo à Socrate, color ab albore, & vice versâ. Hæc subordinatorum diversitas, est diversitas rationis. Quia enim subordinata reipsâ idem sunt, necesse est, ut solâ ratione distinguantur.

X. *Diversitas coordinata, vel est numerica, vel specifica, vel generica.*

XI. *Diversitas numerica est, quâ distinguuntur individua ejusdem speciei : ut, Plato & Socrates.*

XII. *Diversitas specifica est, quâ distinguuntur species ejusdem generis, & earum individua : ut homo & bestia, Alexander & Bucephalus.*

XIII. *Diversitas generica est, quâ distinguuntur ipsa genera, tum summa, tum subalterna, eorumque species & individua : ut, substantia & quantitas; corpus & spiritus; animal & planta; Socrates & hæc pyrus.*

XIV. *Summa genera totâ suâ essentiâ diversa sunt ; subalterna, parte tantum essentiæ.*

I §. Summa genera non habent commune genus, neque differentias constitutivas. Ex quo sequitur, ut totâ suâ essentiâ diversa sint. Genera subalterna conveniunt in communi genere, ac proinde non totâ suâ essentiâ, sed parte tantum essen

essentiæ diversa sunt, nempe differentiâ constitutivâ.

XV. Quæ genere distinguuntur, etiam distinguuntur specie; & quæ specie, etiam numero: non vicissim.

XVI. Diversitas accidentalis, vel interna est vel externa: & interna, vel est imparitas, vel dissimilitudo.

XVII. Imparitas est diversitas in quantitate.

XVIII. Imparia sunt, quorum alterum altero majus est, & minus.

I §. Nimirum, vel quantitate molis, vel virtutis ac perfectionis. Sic argentum, aurum, & virtutes imparia censentur hoc versu,

Vilius argentum est auro, virtutibus aurum.

Et cap. 7. Matth. confertur corpus cum vestitu, ut majus cum minore; & volucres cœli, liliæque convallium cum homine, ut minus cum majore.

XIX. Dissimilitudo est diversitas in qualitate, aut in passione.

I §. In qualitate, nempe vel diversæ speciei; ut, album & rubrum; vel saltem diversi gradûs; ut, magis & minus album. Quæ enim gradu, non specie differunt, partim sunt similia, partim dissimilia. Huc etiam referri potest convenientia in situ.

XX. Diversitas externa est, quâ res distinguuntur ejusmodi causis, effectis, subjectis, adjunctis externis, quæ non pertinent ad essentiam rei.

I §. Sic mures à sole geniti ex putri materia, ut vulgò creditur, distinguuntur causâ efficiente ab iis muribus, qui ex semine gignuntur: sic oculus & auris distinguuntur fine. Huc etiam pertinent, quæ differunt materiâ; ut statua marmorea, & ænea. Quæ formâ differunt, essentiâ differunt. Porro aqua & ignis differunt effectis; virtutes Ethicæ & dianoëticæ, subjecto: illæ enim sunt in appetitu, hæ in intellectu. Diversitas rerum in adjunctis internis, pertinet ad imparitatem, aut ad dissimilitudinem. Huc solum referuntur quæ differunt objectis, signis, aut circumstantiis. Si causa efficiens aut finalis, subjectum aut adjunctum, pertinent ad essentiam, aut definitionem rei, tum, si quæ in iis differunt, diversitas non externa, sed essentialis censeri debet.

CAP. XXII.

De Oppositione rerum.

THEOREMA I.

Oppositio est pugna rerum.

II. Pugnare dicuntur res, quæ neque de se invicem, neque de eodem tertio secundum idem, ad idem, eodem modo atque tempore verè affirmari possunt.

1 §. Quæ Aristoteli ἀντικειμένα dicuntur, ea Cicero contraria, nos opposita vocamus. Oppositio alia est in rebus, alia in affirmatione & negatione : illa simplicium, hæc complexorum thematum affectio est. De oppositione rerum, quæ hujus loci est, agit Aristoteles, cap. 10. Categ. de altera in libro de Interp. In utraque oppositione requiruntur quatuor conditiones, quæ traduntur cap. 5. lib. de soph. elench. Prima conditio est, ut oppositio fiat κατὰ τὸ αὐτὸ, secundum idem, id est, secundum eandem partem, aut naturam. Altera est, ut fiat κατὰ τὸ αὐτὸ, ad idem, id est, eodem respectu. Tertia, ut fiat ὁμοῦτως, id est, eodem modo. Quarta, ἐν αὐτῷ χρόνῳ, id est, eodem tempore. Si, hisce conditionibus positis, opposita de se invicem prædicentur, predicatio erit falsa ; ut, Homo est equus, Cæcitas est visus : aut si ambo de aliquo tertio prædicentur, alterutra enunciatio erit falsa ; ut, Socrates videt, Socrates est cæcus. Si opposita de se invicem, aut ambo de aliquo tertio verè affirmentur, necesse est aliquam distarum conditionum desiderari. Ex. gr. dominum esse, & filium Davidis, convenit eidem Christo, sed non secundum idem. Nam Christus est dominus Davidis secundum divinam, filius Davidis secundum humanam naturam. Similiter numerus quaternarius est duplum & dimidium, sed non ad idem. Est enim duplum binarii, & dimidium octonarii. Prætereà utrumque verum est, mundum habere, & mundum non habere principium : sed non eodem modo. Mundus enim habet principium durationis, non magnitudinis. Denique utrumque verum est, Olim erant fortes Milesii : &, Olim non erant fortes Milesii : sed non eodem tempore.

2. Cæterum etsi non possint opposita de eodem prædicari, servatis

servatis hisce conditionibus ; nihil tamen vetat , quò minùs idem possit prædicari de oppositis ; ut color, de albore & nigrore ; animal, de bestia & homine.

III. *Opposita sunt simul naturâ.*

IV. *Oppositorum eadem est scientia.*

I. §. Horum axiomatum prius exstat *lib. 6. Top. cap. 4.* posterius , *lib. 1. Top. cap. 14. lib. 2. cap. 2. lib. 6. cap. 6. & passim.* Posterioris axiomatis potest esse duplex sententia ; prior , ut significetur utrumque oppositorum pertinere ad eandem scientiam : útque eadem scientia , quæ verbi gratiâ de virtute differit, etiam differat de vitiis, & quæ de morbis , eadem de sanitate. Altera sententia est, ut significetur uno oppositorum cognito, etiam alterum cognosci.

V. *Opposita juxta se posita, magis elucescunt.*

I. §. Hoc illud tritum est, quod traditur, *lib. 3. Rhet. 12. Ἀντικείμενα παράλληλα μάλιστα φαίνονται.* Cujus usum vide *lib. 2. Rhet.* ubi affectus & mores senum ac juvenum contrarii sic conferuntur, ut ex mutua collatione valde illustrentur,

VI. *Oppositorum species sunt quinque ; Disparata, contraria, relativè opposita, privativè opposita, & contradicentia.*

I. §. Oppositorum unum, aut pluribus opponitur, aut uni. Ea, quorum unum pluribus opponitur, vocantur disparata. Cum unum uni opponitur, oppositio vel inter ens & non ens versatur, vel inter ens & ens. Quæ opponuntur ut ens & ens, vel sunt absoluta, vel relata : illa dicuntur contraria ; hæc, relativè opposita. Quæ opponuntur ut ens & non ens, vel habent idem subjectum, vel non habent : illa dicuntur privativè opposita ; hæc, contradicentia. Aristoteles non meminit disparatorum in Logicis, ubi ex professio species oppositorum recenset : meminit tamen eorum, *lib. 4. Metaph. cap. 10.* ibique ea vocat ἑτερεὰ πρὸς εἶδει, diversa specie, nempe, ὅσα ἐν τῇ ἐστίᾳ ἐναντίως ἔχει, hoc est, quæ contrario modo inter se affecta sunt ratione essentiæ.

VII. *Disparata sunt, quorum unum pluribus opponitur, eodem modo.*

I. §. Sic homo & equus, album & cæruleum, sunt disparata : quia homo non equo solùm, sed etiam cani, leoni, cæ-

terisque bestiarum speciebus ; & album, non solum cæruleo, sed etiam rubro, viridi, cæterisque coloribus mediis, opponitur *eodem modo*, hoc est, eodem oppositionis genere. Album & nigrum non sunt disparata, licet album non solum nigro, sed etiam mediis coloribus opponatur : aliter enim album nigro opponitur, aliter coloribus mediis. Similiter nec liber & servus disparata sunt, licet servus non solum libero, sed etiam domino opponatur, quia non est idem oppositionis genus utrobique : nam dominus & servus sunt relativè opposita ; liber & servus, contraria.

VIII. *Contraria sunt duo absoluta, quæ sub eodem genere plurimum distant.*

1. ¶ Aristoteles, *cap. 6. de Categ.* definit contraria, τὰ ἀλλήλων ἀλλήλων ἀντιθέκοντα ἢ ἐν αὐτῷ γένει hoc est, quæ plurimum à se invicem distant eorum, quæ posita sunt sub eodem genere. Sed ista definitio videtur minùs plena ; siquidem & disparatis competit, & iis quæ relativè sunt opposita.

2. Contraria sunt duo] Hæc parte distinguuntur à disparatis, quæ sunt plura duobus, aut saltem nihil impedit, quin plura sint. *Absoluta*] Hæc parte differunt ab iis quæ opponuntur relativè. Additur, *sub eodem genere* : nempe vel proximo ; ut, *albor & nigror*, sub colore : vel remoto ; ut, *justitia & injustitia*, sub habitu. Hæc parte distinguuntur contraria à contradicentibus, & ab iis quæ opponuntur privativè.

3. Nec obstat, quod Aristoteles, *cap. 11. Categ.* ait, bonum & malum quæ contraria sunt, non esse sub eodem genere, sed esse ipsa genera. Nam Aristoteles videtur ista dicere ex sententia Pythagoreorum, qui constituebant duas rerum συσολίαι, alteram bonorum, alteram malorum, ut testis est ipse Aristoteles, *lib. 1. Metaph cap. 5.* Nam cum bonum & malum reperiantur in omnibus categoriis, sicuti ens, ut docetur, *lib. 1. Eth. cap. 4.* non possunt esse summa genera. His addo, bono in Metaphysicis, ubi consideratur ut communis entis affectio, malum non esse contrarium, sed opponi ei privativè. In Ethicis bonum & malum contraria quidem sunt, sed continentur sub eodem genere, nempe vel sub habitu, vel sub actione morali, quam περὶ Aristoteles appellare solet. Vide *Ammonium & Simplicium ad cap. 11. Categ.*

4. Addi.

4. Additur portò, plurimum distant; nempe κατ' ἴσους, vel κατὰ τόπον hoc est, quoad formam, vel quoad locum. Sic enim distinguit Philosophus contrarietatem, lib. 5. Phys. cap. 2. & lib. 2. Meteor. cap. 6. ut altera sit in qualitate quam vocat contrarietatem secundum formam; altera in ubi, quam appellat contrarietatem quoad locum. Qualitate contraria sunt, album & nigrum, virtus & vitium, rectum & curvum, servus & liber, &c. Loco contraria dicuntur, quæ in sphaera aut circulo è diametro sunt opposita; ut polus arcticus & antarcticus. Huc referenda est contrarietas motuum, quæ sita est in contraria terminorum habitudine, ita ut terminus ad quem unius motus, sit terminus à quo alterius, & vice versâ. Thomas vocat contrarietatem accessus & recessus. Sic contraria sunt, generatio & corruptio, accretio & diminutio, calefactio & frigefactio, adscensus & descensus, &c. Itaque cum libro Categ. Philosophus contrarietatem qualitibus includit, & in substantia & quantitate locum habere negat, admodum strictè contrarietatis vocem accipere censendus est.

IX. Contraria se mutuò destruunt, alterumque alterius contagione remittitur.

1. §. Ità statuit Aristoteles, lib. 2. de Cæl. cap. 3. Ex gr. cum aqua calefit, tantum ei frigoris decedit, quantum caloris aliunde imprimitur. Quòd si contrarium à contrario suo per antiperistasin interdum intenditur, id fit per accidens.

X. Contraria non possunt simul esse in eodem singulari subiecto.

XI. Versantur tamen circa idem subiectum vel specie vel genere.

1. §. Hæc theorematum traduntur, cap. 11. de categ. Sensus utriusque satis est manifestus. Ex. gr. idem non potest simul esse iustus & iniustus, æger & sanus, par & impar, frigidus & calidus: iustitia tamen & iniustitia sunt in anima hominis; morbus & sanitas, in corpore animalis; par & impar, in numero; frigus & calor, in corpore elementari.

XII. Contraria vel mediata sunt, vel immediata,

XIII. Contraria mediata sunt, inter quæ medium utriusque particeps interiectum est.

XIV. *Immediata, inter quæ nihil medii interjectum est utriusque particeps.*

I ¶. Medium, quod in oppositione spectatur (ut cæteras acceptiones præteream) duplex est, alterum formæ, sive participationis, alterum subjecti, sive negationis. Medium formæ, sive participationis, dicitur, quod particeps est utriusque extremi. Sic tepor medium est inter calorem & frigus; rubrum, inter album & nigrum. Medium subjecti, sive negationis, dicitur, de quo utrumque extremum negatur. Sic spiritus est medium inter calidum & frigidum, inter magnum & parvum. Hæc contrariorum divisio, de medio participationis accipienda est. Quædam enim contraria habent medium participationis; ut, *album & nigrum, calor & frigus*: quædam non habent tale medium; ut, *par & impar, rectum & obliquum*. Medium negationis reperitur in omni oppositione, præterquàm in contradictione. Fit autem interdum, ut medium participationis propriâ voce carens, extremi sui negatione significetur.

2. Contrariorum immediatorum necesse est alterum inesse subjecto capaci. Sic necesse est, quemlibet numerum aut parem esse aut imparem. Mediatorum neutrum necesse est inesse capaci subjecto, quia medium potest subjectum occupare. Non est enim necesse, ut corpus sit aut album aut nigrum: potest enim esse rubrum, aut viride. Si tamen alterum contrariorum mediatorum sit subjecto naturale ac proprium, id necesse est subjecto inesse. Sic necesse est ignem esse calidum.

XV, *Relativè opposita sunt, quæ idipsum, quod sunt oppositorum esse, dicuntur, vel alio quovis modo ad illa referuntur.*

I ¶. Relata possunt bifariâ considerari; vel quatenus tribuuntur diversis; & sic se mutuò constituunt: vel quatenus tribuuntur eidem; & sic se mutuò tollunt, suntque revera opposita, præsertim si sint relata diversi nominis. Sic, ex. gr.posito patre, poni quidem debet filius; sed qui pater est alicujus, is non potest ejusdem esse filius. In relatis ejusdem nominis oppositio non apparet propter nominis identitatem.

XVI. *Privativè opposita sunt habitus & illius privatio.*

I ¶. Privatio interdum significat absentiam formæ, quæ potest in subjectum introduci (sic dicitur in semine privatio animæ;

animæ; in aqua frigida, privatio caloris) interdum absentiam formæ, quæ debet inesse subjecto. Illa Physica privatio vocatur, & inter principia generationis recensetur; hæc dicitur privatio Logica, eaque hujus loci est. Quemadmodum autem varia rerum genera sunt, quæ habitus nomine hoc loco intelligi debent, nempe potentia naturalis, habitus strictè dictus, patibilis qualitas, forma, operatio, habitus in decima categoria, &, ut verbo dicam, quodlibet accidens, quod potest à subjecto separari: ita quoque varia est privatio. Logica: privatio potentia naturalis; ut, *cæcitas*: habitus strictè dicti; ut, *ignorantia*: qualitatis patibilis; ut, *tenebræ*: formæ; ut, *τὸ ἀνοργον*, quale fuit in Chao: operationis; ut, *somnus*, *quies*: habitus in decima categoria; ut, *nuditās*. Sunt ergo opposita privativè, *visus* & *cæcitas*, *scientia* & *ignorantia*, *lux* & *tenebræ*, *vigilia* & *somnus*, *motus* & *quies*, *vestitum* & *nudum esse*, &c.

2. Privatio & habitus versantur περὶ τὰ αὐτὴν τι, circa idem subjectum. Quod subjectum debet esse capax habitus, hoc est tale, ἐν ᾧ πέφυκεν ὑπάρχειν ἢ ἔχειν, καὶ ὅτε πέφυκεν ὑπάρχειν id est, in quo habitus debet inesse naturâ, & quando debet inesse. Igitur privatio non potest tribui cuilibet subjecto, sed illi solum, quod per naturam suam, & per tempus à natura definitum, aptum est habitum oppositum recipere. Itaque lapis non potest dici cæcus, quia naturâ suâ ineptus est ad videndum; nec infans recens natus, potest dici edentulus, quia non potest dentes habere à nativitate.

XVII. A privatione ad habitum non datur regressus.

1. §. In privatione & habitu (inquit Aristoteles) mutatio inter se vicissim fieri nequit. Nam etsi ab habitu ad privationem detur mutatio, à privatione tamen ad habitum mutatio fieri non potest. Sed hæc de privatione potentia naturalis, quæ est maxima privatio, intelligenda sunt. Cæcus enim nequit visum amissum naturaliter recuperare. A privatione cæterarum rerum, quas supra recensui, datur regressus quàm sæpissime.

XVIII. Contradicentia sunt ens & non ens opposita.

1. §. Ut, homo, non homo, album, non album, videre, non videre. Contradicentia dicuntur opponi ut affirmatio & negatio,

gatio, non quod sint enunciationes, sed quod addito subiecto, constituent enunciationes affirmatione & negatione pugnantes: ut *Socrates est homo, Socrates non est homo; est albus, non est albus.*

XIX. *Contradictio caret omni medio:*

1. S. Tam negationis, quam participationis. Nihil enim enti & non enti commune est. Huc pertinet definitio contradictionis, quæ exstat *lib. 1. Post. 'Αντιφανής ὅτιν ἀντιθεός, ἢ, ἔστι κατὰ τὸ κατ' αὐτὴν.* Hoc est, *Contradictio est oppositio, quæ per se medio caret.*

XX. *Contradictio est oppositionum maxima, prima, & mensura reliquarum.*

1. ¶. *Maxima*, quia medio caret. *Prima*, quia nullam aliam oppositionem præsupponit. *Mensura reliquarum*, quia primum in unoquoque genere est mensura reliquorum. Ex. gr. *album & nigrum, videre & cæcum esse*, ideo sunt verè opposita, quia album est non nigrum; & videre, non esse cæcum.

2. Notandum est contradictionem aliam expressam esse, aliam implicitam. Expressa contradictio est, cùm unum extremum finitum est, alterum infinitum: ut, *homo, non homo.* Implicita contradictio est, cùm sine particula negationis, alterum extremum ab altero evertitur. Vulgò vocatur *contradictio in adjecto, vel oppositum in appposito*: veluti, si quis dicat, *sacrificium incruentum, corpus unum in pluribus locis, aut ubique, & id genus alia.*

C A P. XXXIII.

De Ordine, deque eo, quod Prius, Posterius, aut Simul dicitur.

T H E O R E M A I.

Ordō est, secundum quem aliquid altero prius, aut posterius, vel etiam simul cum illo dicitur.

1. ¶. De eo, quod prius aut posterius, eorūque modis, agit Aristoteles *cap. 12. de categ. de iis quæ simul dicuntur, cap. 13.*

II. Prius

I I. *Prius & posterius dicuntur quinque modis: tempore, naturâ, dispositione, dignitate, & cognitione.*

III. *Prius tempore dicitur, καὶ ὁ πρεσβύτερον ἔτερον ἐτέρῳ λέγεται, καὶ παλαιότερον.* hoc est, secundum quod aliquid altero vetustius & antiquius dicitur.

I. §. Πρεσβύτερον, inquit Simplicius, propriè dicitur de rebus animatis, ac præcipuè de hominibus. Sic dicimus Pythagoram Socrate πρεσβύτερον. At παλαιότερον dicitur de rebus inanimis, & de factis. Sic dicimus bellum Trojanum παλαιότερον bello Punico.

IV. *Prius naturâ dicitur duobus modis, existendi consecutione, & causalitate.*

I. §. Aristoteles ait illud solum esse prius naturâ, quod causalitate prius est. Sed videtur etiam illud, prius naturâ vocandum, quod prius est existendi consecutione.

V. *Prius existendi consecutione dicitur, αὐτὸ ὃ μὴ ἀντιστρέφει ἢ τὸ ἔξ ἀκολούθησις* hoc est, à quo non recipitur existendi consecutio.

I. §. Hoc Simplicius sic interpretatur, "Ὁ ἄλλω ὡς τιθέντι αὐτὸ ἐπιταί αὐτῷ ὃ τιθέντι, τὸ ἄλλο μὴ ἐπιταί" hoc est, quod alio posito ponitur; & quo posito, aliud non ponitur. Ex. gr. posito numero binario, ponitur unitas; at positâ unitate, non ponitur numerus binarius: & posito homine, ponitur animal; at posito animali, non ponitur homo. Unitas ergò est prior numero binario, & animal homine, & omnino genus suâ specie, & species individuo, quoad existendi consecutionem.

VI. *Prius causalitate est, ὃ ὅς ἀντιστρέφοντων κατὰ πλὴν τὸ ἔξ ἀκολούθησιν αὐτὴν εἶναι ὅπως αὐτὴν διατρέφει τὸ ἔξ* hoc est, quod recipitur secundum existendi consecutionem, & quomodocunque causa est, cur alterum existat.

I. §. Sic sol est prior luce; & res est prior orationis veritate. Nam quamvis sol & lux, res & veritas orationis, recipiuntur secundum existendi consecutionem, seseque mutuo ponant ac tollant; tamen sol lux lucis causa est, & res est causa veritatis in oratione. Quia enim res est aut non est, oratio vera vel falsa dicitur. Haftenus ergò sol prior est suâ luce; & res, orationis veritate.

2. Prius causalitate, sive naturâ causante, teste Aristotele, *lib. 2. de part. anim. cap. 1.* dicitur bifariâ ; nempe vel naturâ generante, vel naturâ intendente. Ordine naturæ generantis, prius dicitur, quod simplicius est ; ut, partes toto, principia & elementa rebus, quæ ex principiis & elementis constituuntur. Ordine naturæ intendentis prius dicitur, quod perfectius est, & cuius causâ alia fiunt : ut totum partibus, id quod ex principiis & elementis conflatur, ipsis principiis & elementis, & omnino finis mediis.

VII. Prius dispositione dicitur, quod minùs abest ab initio.

1. ¶. Sic exordium in oratione prius est propositione, propositio, narratione ; narratio, confirmatione ; confirmatio, refutatione ; refutatio, epilogo. Et in omni disciplina prius est, quod priore loco traditur.

VIII. Prius dignitate est, quod præstantius est.

1. ¶. Sic magistratus prior est subditis ; pater, liberis ; dominus, servis ; aurum, argento ; virtus, auro.

IX. Prius cognitione est, quod faciliùs cognoscitur.

1. ¶. Hujus modi prioritatis non meminit Aristoteles hoc loco : meminit tamen illius *lib. 4. Metaph. cap. 11. & lib. 6. Top. cap. 4.* ubi id, quod prius cognitione est, vocat *πρᾶξις*, hoc est, quod notius est, aut potiùs, quod, ut ità dicam, notabilius est. Aliquid altero duobus modis dicitur *πρᾶξις*, nempe vel *ἁπλῶς*, sive simpliciter, vel nobis, sive respectu nostrî. Simpliciter notius esse dicitur, quod *κατὰ λόγον*, hoc est, secundum rationem, & iis, quibus ratio rectè disposita est, notius est. Nobis notius esse dicitur, quod quoad sensum, & vulgò notius est. Igitur simpliciter notiora sunt, quæ naturâ suâ priora sunt ; ut, universalis singularibus, aut minùs universalibus ; partes, toto ; & principia iis, quæ ex principiis fiunt : at nobis ea notiora sunt, quæ naturâ posteriora, quæque sensibus propinquiora sunt. Porro, quæ simpliciter notiora sunt, quoad cognitionem distinctam ac perfectam notiora sunt. Distincta enim cognitio sequitur ordinem naturæ, in iisque est, qui mente bene dispositâ præditi sunt. At quæ nobis notiora sunt, notiora sunt quoad cognitionem

nem confusam & imperfectam, quæ à sensibus originem ducit.

X. Simul totidem modis dicitur, quot Prius : sed duo modis ceteris usitatioribus sunt, Simul tempore & Simul naturâ.

XI. Simul tempore dicuntur, quæ eodem tempore existunt.

I. S. Simul tempore dicitur duobus modis, simpliciter, & secundum quid. Simpliciter simul dicuntur, ὧν ἡ γένεσις ἐν αὐτῷ χρόνῳ, hoc est, quæ simul oriuntur ; ut æquales. Simul secundum quid dicuntur, quorum unum incipit, antequàm alterum definit ; ut σὺγχρονοί, sive contemporanei. Aristoteles enim & Plato dicuntur σὺγχρονοί, etsi Plato ante Aristotelem natus fuerit, & obierit.

XXII. Simul naturâ dicitur duobus modis : quædam enim simpliciter & absolutè, quædam secundum quid, ac respectu alicujus tertii, dicuntur esse simul.

XIII. Simul naturâ simpliciter & absolutè dicuntur, ὅσα ἀπὸ τῆς αὐτῆς φύσεως κατὰ τὴν αὐτὴν ἀκολουθίαν, μὴ διαμαρτύνοντες ἑαυτοὺς ἑκαστὸν τῶν ἄλλων· hoc est, quæ reciprocantur quidem secundum existendi consecutionem, sed ita, ut alterum non sit causa cur alterum existat.

I. ¶. Sic relatum & correlatum sunt simul naturâ, & duo effectus ab eadem causa proxima pendentes : ut, risibilem esse, & capacem esse disciplinarum, in homine.

XIV. Simul secundum quid & respectu alicujus tertii dicuntur, τὰ ἐκ τῆς αὐτῆς φύσεως ἀποδιηγόμενα ἀλλήλοις· hoc est quæ ex eodem genere in divisione sibi opponuntur.

I. ¶. Sic homo & bestia dicuntur simul naturâ, non simpliciter & per se, sed respectu animalis. Animal enim de illis simul prædicatur, & non de altero prius, de altero posterius. In quo distinguitur genus synonymum ab homonymo sive æquivoco : quia hoc non simul de suis speciebus prædicatur ; sed de una prius, de altera posterius. Atque hæc de thematicis simplicis affectionibus, tum simplicibus, tum conjunctis.

CAP. XXIV.

De Interpretatione in genere, deque
Nomine & Verbo.

THEOREMA I.

Supereſt ut dicamus de thematum ſimplicium interpretatione
ac vocabulū ; deque affectionibus, quas intellectus noſter vo-
cabulis affingit, ex modo conceptus ſuos interpretandi.

I. ¶. Eſt in uſu ſive praxi Logices, vocabula primū ex-
pendenda ſint ; in doctrina tamen, atque in præceptis artis,
ſecus fieri debet. Nam ut intelligere prius eſt, quā inter-
pretari conceptus ſuos ; itā prius explicanda ſunt ea quæ ſpe-
ctant ad intelligendi, quā ea, quæ ſpectant ad modum con-
ceptus interpretandi.

II. Interpretatio eſt vox articulata, animi conceptus ex inſti-
tuto ſignificans.

I. ¶. Ariſtoteles ſcripſit ſingularem librum, *περὶ ἑρμηνείας*, hoc eſt, *de interpretatione*. In quo eſt generalis interpreta-
tionis definitio non traditur, ea tamen, quæ à nobis propoſita
eſt, ex Philoſophi verbis facilè eruitur. Interpretatio defini-
tur vox. Vox eſt ſonus ſignificativus (ut ex Ariſtotelis *lib. 2. de Au. cap. 12.* colligitur) animalis respirantis, factus à pla-
ga aeris, pulmonum expiratione ad epiglottidem allifi. Vox
alia eſt *ἐν ᾧ ὁ ὅλος*, hoc eſt, *articulata*; alia *ἀνὰ ὅλον*, hoc eſt,
inarticulata. Vox articulata dicitur, quæ ex ſyllabis aut ex li-
teris, tanquam ex articulis, conſtata eſt, itā ut ſcribi poſſit :
ut, *homo, animal*. Vox inarticulata dicitur, quæ ſyllabis aut
literis non conſtat, quæque ſcribi non poteſt : ut, *boatus,*
hinnitus, fletus, riſus. Voces articulatæ ſignificant animi
conceptus, primò ſcilicet, atque immediatè : nam res etiam
ſignificant, ſed mediantebus conceptibus. Voces inarticula-
tæ ſignificant animi affectus ex inſtituto, ſive *κατὰ συνθήκην*,
hoc eſt, ex uſu arbitrario hominum eādē ſocietate utenti-
um. Nam utut homini naturale ſit, voces edere, imò etiam
voces articulas ; hoc tamen naturale non eſt, ut hiſce potiùs,
quā aliis vocibus conceptus ſuos interpretetur : totum illud

ab institutione est. Quæ enim naturalia sunt, semper & apud omnes eadem sunt : ut docetur *lib. 2. Eth. cap. 1.* Sed voces non sunt apud omnes eadem, ut neque literæ, *cap. 1. de Interpret.* Igitur, quod *blistri* nihil omnino significet, quodque *canis* significet animal latrans apud Latinos, apud Gallos nihil; quod denique *asinus* significet animal rudens potius quàm quidvis aliud, ab institutione est, atque ab usu,

Quem penès arbitrium est & vis & norma loquendi.

De hac re legi potest disputatio apud Platonem in *Cratilo.*

2. In superiori definitione vox est materia, eaque loco generis ponitur : forma, est *significatio*, aut vis significandi. Genus potest esse *symbolum* aut aliquid tale. Potest igitur interpretatio definiri hoc modo ; Interpretatio est *symbolum* ex articulata voce factum, animi conceptus ex instituto significans.

III. Interpretatio debet esse perspicua, hoc est, distincta, propria, & usitata.

1. ¶ Perspicuitas, inquit Aristoteles *lib. 3. Rhet. cap. 2.* est virtus sermonis. Ejusque officium est *πειρην ἡμῶν τὸν μά-
θου τὰ χεῖρα*, hoc est, *efficere ut discamus celeriter.* Perspicuitati opponitur obscuritas : quam, ut vitium interpretationis, vitandum esse idem docet, *lib. 1. Prior. cap. 39. lib. 2. Top. cap. 4. & alibi.* Ejus causæ præcipuæ sunt homonymia, metaphora, & insolentia : ut docetur, *lib. 6. Top. cap. 2.* Homonymia parit obscuritatem ; quia, quod non significat unum aliquid, nihil significare censetur, *lib. 2. Metaph. 13.* Metaphora, omnisque adeò tropus, parit obscuritatem, quia tropus species homonymiæ est. Ac proinde metaphoræ & tropi non minùs vitandi sunt in disputationibus, & definitionibus, quàm homonymiæ, *lib. 1. Post. cap. 13.*

2. Ut autem aliud alio vel *κατὰ λόγον* notius esse diximus, vel *κατὰ αἰσιν* ità etiam aliter menti, aliter sensibus perspicua censetur oratio. Oratio propria, menti perspicua est, & apta ad docendum : Namque

Ornari res ipsa negat, contenta doceri.

Oratio Metaphorica est menti obscura, & ad docendum non ità apta; quia objectis imaginibus, distrahit mentem à re proposita. At eadem est perspicua sensibus, & ad animum affe-

Et usque

etisq; movendos aptissima. Ex quibus conficitur, sermonem proprium convenire Philosophis ; metaphoricum sive tropicum, Oratoribus & Poetis.

3. Tertia causa obscuritatis, est insolentia. Insolens & inusitata vox dicitur, quæ aut vetustate obsoleta est, aut prænovitatem nondum recepta. Qui enim vocibus utuntur ita priscis, ut non nobiscum, sed cum Evandri matre loqui videantur; aut ita novis, quæ nondum usu receptæ sunt ; quid aliud agunt, quam ut non intelligantur, cum tamen unicus sermonis & interpretationis finis sit, ab aliis intelligi ? Aristoteles, lib. 6. Top. cap. 2. damnat Platonem novitatis, quod oculum appellasset ὀφθαλμίων, quasi dicas *ciliumbrem*, & araneam *ἀράχνη* sive *putrimordacem* : quid faceret, si superiorum seculorum Sophistas audiret, aut potius ipsam barbariem ? Nec tamen iis assentior, qui in verborum delectu ita anxie religiosi sunt, ut nè in ipsis quidem disciplinis, & disputationibus Scholasticis, ullam vocem boni consulant, nisi quæ in curia aut foro Romano ante mille & sexcentos annos nata sit. Ego sic judico, neque affectandum esse sermonis barbariem, neque admodum peccare sapientiæ doctores, si τῆς ἀκριβοῦς ἐνέκα ὀνοματοποιήσιν. De qua re vide epist. Pici Mirand. ad Hern. Barbarum. In novis aut antiquatis vocabulis usurpandis, aliquantò major licentia Poetarum est : quibus

---licuit, semperque licebit

Signatum præsentem notā procludere nomen.

Plura de perspicuitate sermonis pereruditè scripta sunt à clarissimo viro Ger. Vossio, lib. 4. Inst. orat. cap. 1.

IV. Interpretatio vel est dictio, vel oratio.

V. Dictio est interpretatio simplex.

VI. Interpretatio simplex dicitur, ἥς μὲν μέρθ' ὅτι συναντικόν καὶ χωρισμένον hoc est, cujus nulla pars significat separatim.

VII. Oratio est interpretatio composita.

VIII. Interpretatio composita dicitur, ἥς ἂν μέρων τι συναντικόν ὅτι καὶ χωρισμένον hoc est, cujus pars aliqua significat separatim.

I. 9. Partes dictionis dicuntur nihil, partes orationis aliquid

quid significare separatim : nimirum , quatenus partes sunt. Partes dictionis , sunt syllabæ ; partes orationis , sunt dictiones. Jam syllabæ , quatenus syllabæ , nihil significant illius rei , quam significant in dictione conjunctim. At dictiones , quatenus dictiones sunt , significant aliquid illius rei separatim , quam significant in oratione conjunctim. Ex. gr. *valebis* est dictio : : *jus* partes sunt *vale* & *bis* , quæ quidem aliquid seorsum significant , sed quatenus sunt dictiones , non autem quatenus sunt syllabæ , aut partes hujus dictionis , *valebis*.

2. Oratio alia est perfecta , alia imperfecta. Perfecta oratio est , quæ sententiam absolvit. Estque vel indicativi modi , ut enunciatio , de qua postea ; vel imperativi , vocativi , optativi , aut alterius modi. Oratio imperfecta est , quæ sententiam non absolvit : idque vel defectu verbi ; ut , *Animal mortale , pedestre bipes* : vel quia sententia suspensa est ; ut , *Si cælum rueret : Quos ego : sed , &c.*

IX. Dictio vel nomen est , vel verbum.

X. Nomen est dictio , quæ sine tempore significat , & conjuncta cum verbo substantivo *EST* , verum aut falsum effert.

XI. Verbum est dictio , quæ tempus adsignificat , & semper signum est eorum quæ de altero dicuntur.

1. ¶. Nomen interdum tam latè patet , quam dictio , ut c. 2. *Car. lib. 1. Top. c. 15. & alibi*. Similiter & verbum. At hoc loco nomen & verbum sunt species dictionis. Arist. definit nomen hoc modo , *Ὀνομα μὲν ἔστι φωνῇ σηματικὴ καὶ συνθήκη , αἰεὶ ἔχουσα ἡσυχίαν καὶ μὴ ἔχουσα ἄλλο τι* hoc est , *Nomen est vox significans ex instituto , sine tempore , cujus nulla pars significat separatim*. Et , ut appareat discrimen inter nomina , & casus nominum , addit , *Καὶ ὡς τὰ Ἑστί , ἢ Ἦν ἢ Ἐσται , αἰεὶ ἀληθεύει ἢ ψεύδεται* hoc est , *Et cum verbo Est , Erat , aut Erit , semper verum effert aut falsum*. Verbum sic definitur , *Ῥῆμα δὲ ἔστι τὸ προσσημαῖνον χρόνον , καὶ μὲν ἔσδεν σημαίνει χρόνος , καὶ ἔστιν αἰεὶ τῶν καθ' ἑτέρας λεγομένων σημειῶν* hoc est , *Verbum est , quod adsignificat tempus , cujus nulla pars significat separatim , & est semper nota eorum quæ de altero dicuntur*.

2. Nos nomen & verbum definivimus per proximum genus

nus quod utrique commune est, nempe per *diCTIONem*: quâ voce comprehendimus omnia quæ in Aristotelis definitionibus sunt posita, & non in nostris; putâ, quod nomen & verbum sint *vox ex instituto significans, cujus nulla pars significat separatim*; quæ nos adhibuimus, partim in definitione generali interpretationis, partim in definitione interpretationis simplicis, sive dictionis. Id verò, quod in definitione generis ponitur, malè reperitur in definitione speciei. Quod si tamen definitio generis non præcessit, sæpe fieri debet perspicuitatis causâ, ut quædam exprimantur in definitione speciei, quæ pertinent ad definitionem generis: quod hoc loco factum est ab Aristotele.

3. Duo igitur reliqua sunt, quibus nomen & verbum, tum inter se, tum etiam à suis casibus distinguuntur, quæ in eorum definitione nos quoque expressimus. Nam primò, nomen *significat sine tempore*, verbum *adsignificat tempus*. Adsignificare tempus nihil aliud est, quàm præter rem significatam, denotare temporis differentiam, in qua res significata esse, fuisse, aut fore intelligitur. Nomina significant quidem tempus; ut annus, mensis, dies, &c. sed non adsignificant tempus. At omne verbum adsignificat tempus, hoc est, significat rem, & denotat præterea differentiam temporis, in qua res significata existit, existit, aut existet. Ex. gr. *Disputatio* est nomen; *disputat* est verbum. Utrumque idem significat: sed *disputatio* significat actionem sine tempore; at *disputat* significat eandem actionem, & denotat præterea eam actionem in præsentī tempore celebrari.

4. Præterea, nomen cum verbo substantivo est, semper ἀνθεῖς ἢ ἑαυτοῦ, hoc est, *effert verum aut falsum*. Hæc parte nomen distinguitur à suis casibus. Ex. gr. hæc oratio, *Socrates est*, id est, existit, necessariò vera aut falsa est: at hæc, *Socratis est*, aut *Socrati est*, neque vera est neque falsa, nisi aliquid subintelligatur. *Socrates* ergò nomen est; *Socratis*, *Socrati*, &c. sunt casus nominum. Simili modo distinguitur verbum à suis casibus, hoc est, à verbis modi non indicativi. Nam verbum semper signum est eorum, quæ de alio dicuntur, hoc est, signum prædicati: ideòque nomini adjectum efficit orationem veram aut falsam. Nam hæc oratio, *Socrates*
dispu-

disputat, est necessariò vera aut falsa. At casus verborum non efficiunt orationem veram aut falsam : hæc enim oratio, *Socrates disputaret*, aut *disputasset*, neque vera est neque falsa. Itaque verba extra indicativum modum in Logicis non habentur pro verbis, sed pro casibus verborum. Videtur Aristoteles etiam verba indicativi modi, præteriti aut futuri temporis, à verbis sejungere, cum inquit, *Valebit*, *valuit*, non voco verbum, sed casus verbi. Sed rectius ista cum verbis junguntur, cum iis verbi definitio perfectè congruat.

5. Hoc eodem discrimine, quo diximus nomen & verbum differre à suis casibus, etiam inter se discrepant. Nam nomen significat rem aliquam absolutè; at verbum significat rem, quatenus de alio prædicatur, & quidem cum tempore. Itaque cum unum tantum munus nominis sit, significare rem aliquam : verbi tria munera sunt; rem aliquam significare, eamque cum alio, ut cum subjecto, conjungere, & tempus adsignificare.

6. Sed quid de reliquis orationis partibus dicendum, quas Grammatici recensent? Pronomen continetur sub nomine. Participium, etsi per se neque nomen sit, quia adsignificat tempus; neque verbum, quia additum nomini, non facit orationem veram aut falsam; in enunciatione tamen fungitur officio nominis, non verbi. Cæteræ partes orationis non habentur à Logicis pro partibus, sed pro additamentis & vinculis partium.

XII. *Utrumque, tum nomen, tum verbum, dividitur in finitum & infinitum.*

XIII. *Nomen aut verbum finitum est, quod habet significationem definitam.*

XIV. *Infinitum, cujus significationem negandi nota indefinitam facit.*

I. Ex. gr. *Homo* est nomen finitum, quia habet significationem definitam; *Non homo* est nomen infinitum, quia habet significationem infinitam, &, ut loquitur Aristoteles cap. 2. lib. de Interp. *ὁμοίως ἐπὶ ὅτις ἢ ὑπάρχει, καὶ ὅτις, καὶ μὴ ὅτις*, hoc est, pariter in quovis inest, tum ente, tum non ente. Nam & lapis est non homo, & equus, & Chimera, & quicquid dici potest, præter hominem. Similiter, *disputat* est verbum

verbum finitum ; non disputat, infinitum. Quomodo verbum infinitum in enunciatione distingui debeat à verbo negante, cap. 30. docebimus.

CAP. XXV.

De Etymologia & Conjugatis.

THEOREMA I.

In dictionibus spectanda est primùm etymologia & conjugatio ; deinde synonymia, homonymia, & acceptio vocabulorum, sive, ut Scholastici loquuntur, suppositio.

II. Etymologia est ratio vocis in significando, ex origine declarata.

I ¶. Etymologia ex $\epsilon\tau\mu\mu\alpha$ & $\lambda\omicron\gamma$ composita, veriloquium, aut veriverbium vertitur : sed videtur potius veram rationem significare, ut docet Scaliger, lib. 3. Poet. cap. 55. Etymologia enim reddit rationem vocis, aut potius significationis quæ voci imposita est. Atque hætenus multum juvat mentem nostram in quærenda rerum cognitione. Dum enim vides (ut verbis utar Ilidori) unde ortum est verbum, citius vim intelligis ejus rei quam cupis introspicere. Ex. gr. Siquis cum Scaligero lib. 4. Poet. cap. 16. putet hominem dictum esse ab $\delta\mu\omega\varsigma$, id est, simul, statim amplectetur illud quod ab Aristotele dicitur lib. 1. Polit. cap. 2. hominem naturâ suâ esse animal $\pi\lambda\iota\tau\iota\kappa\omicron\nu$, hoc est, gaudens societate civili. Similiter, siquis cum Platone deriveret $\alpha\gamma\alpha\delta\delta\omicron\nu$ ab $\alpha\gamma\omega$, id est, duco, statim probabit definitionem veterum quæ est apud Aristotelem, lib. 1. Ethic. cap. 1. $\alpha\gamma\alpha\delta\delta\omicron\nu \delta\epsilon\tau\iota\nu \epsilon\tau\alpha\upsilon\tau\alpha \epsilon\phi\iota\epsilon\tau\alpha\iota$ hoc est, Bonum est, quod omnia appetunt : & illam Senecæ, Bonum est, quod ad se impetum animi secundum naturam movet. Epist. 118.

III. Etymologiæ dicuntur ex causis, effectis, proprietatibus, objectis, aliisque adjunctis ; horumque intelligentiam efficiunt.

I ¶. Sic $\gamma\omicron\sigma\mu\mu\alpha$, id est, litera, dicitur à $\gamma\omicron\sigma\phi\omega$, scribo, quia literæ scriptione efficiuntur. Et homo, Hebræis adam, dicitur à verbo adam, id est, rubere, unde & adamah, id est, terra rufa, quali solet esse colore terra culta : nimirum quia homo

homo creatus fuit ex terra. Similiter *consul* à *consulendo*, & *angelus* ab ἀγγέλω, id est, *nuncio*, appellatus est: quia illius finis & effectum est, Reipublicæ consulere; hujus, Dei mandata hominibus nunciare. Sic *σωφροσύνη*, inquit Aristoteles, lib. 6. *Eth. cap. 5.* dicitur, quasi *σωφρονιστὴν τῶν ὁρῶντων*, id est, *servans prudentiam*. Est enim proprietas temperantiæ, animum in voluptate & dolore ita moderari, nè judicium de rebus practicis depravetur. Sic *Arithmetica* dicta est à *numero*, quia circa numeros versatur. Et sic in cæteris.

2. Grammatici docent etiam ex oppositis etymologias deduci, quas vacant κατ' ἀντίθεσιν. Sed ejusmodi etymologias merito rejicit clariss. Ger. Vossius, *Inst. Orat. cap. 13. lib. 4.*

I V. *Conjugata* (Græcè σύντακτα) sunt, quæ vocis & significationis affinitate juncta, terminatione differunt.

I S. Ut, *justitia*, *justus*, *justè*, *justè agere*. Quæ non differunt terminatione, ut *Grammatica ars* & *Grammatica* foemina, non sunt conjugata, sed homonyma. Atque hæc sunt conjugata perfecta. Sunt & alia conjugata, quæ voce quidem conveniunt, sed non significatione: ut *ebrius*, *ebriosus*; *somnus*, *somnolentus*. Non enim ebriosus est omnis, qui ebrius est; neque semper ebrius, qui ebriosus est. Hæc Grammaticis conjugata sunt; Logici eā rejiciunt. Alia denique sunt, quæ significatione, non voce, conveniunt: ut *virtus* & *probus*; ἀρετή & πρῶτος quæ, etsi propriè conjugata non sunt, in Logicā tamen habent vim conjugatorum.

V. *Conjugatio constat voce primitivā, paronymā sive denominatā, & casu.*

V I. *Vox primitiva est vox abstracta, quæ ab aliā voce non est denominata.*

I. ¶. In discernenda voce primitivā à derivatā, non debet spectari syllabarum paucitas aut multitudo (quod faciunt Grammatici) sed natura rerum. Ex. gr. *justitia* Grammaticis derivatur à *justus*: quia illud tetrasyllabum, hoc dissyllabum est. At Logicis dicitur *justus* à *justitia*, quia illud concretum, hoc abstractum, ac proinde simplicius est.

VII. *Vox paronymia, est vox concreta quæ à voce primitiva sic derivata est, ut ab ea solā terminatione differat.*

I ¶. Huc pertinent omnes voces concretæ, non modò

quæ ab accidentibus derivantur; ut, *quantus à quantitate, bonus à bonitate, candidus à candore, similis à similitudine, &c.* sed etiam quæ derivatæ sunt à substantiis; ut, *vestitus à veste, armatus ab armis, capitatus à capite, &c.* Atque hæc, inquit Aristoteles *cap. 5. Categ.* prædicantur de subiecto paronymas, hoc est, *καὶ τὸνομα μόνον καὶ μὴ μὲ τὸν λόγον, quoad nomen solum, non quoad definitionem.* Quæ quoad nomen & quoad definitionem de subiecto prædicantur, ea dicuntur Aristoteli eo ipso loco synonymas prædicari.

2. Aristoteles *cap. 1. de Categ.* definit *παρωνυμία* hoc modo, *Παρωνυμία λέγεται, ὅσα ὑπὸ πνεῦμα διαφέρουν τῇ πρῶτῃ, τὴν καὶ τὸνομα προσήκειαν ἔχει.* hoc est, *Paronyma, sive denominata dicuntur, quæ ab aliquo, sic ut casu differant, nominis appellationem habent.* Quæ definitio à nostrâ aliquantulum differt: quia Aristoteles res ipsas, quibus voces paronymæ tribuuntur, nos ipsas voces paronymas definimus.

VIII. *Casus sunt adverbia à nomine aut verbo suæ conjugationis deducta.*

1. Ut, *bene à bonus, sapienter à sapio, justè à iustitia, &c.* Sic accipit Aristoteles *casus* vocabulum, cum de conjugatis sermo est, vide *lib. 1. Top. cap. 15. lib. 2. cap. 9. lib. 6. cap. 10.* Aliàs *casus* Aristoteli est, dictionum quælibet terminatio ab origine suâ diversa: ut in definitione paronymorum modò allata, & *cap. 2. & 3. lib. de Interpr.*

CAP. XXVI.

De Synonymis, Homonymis, & vocabulorum variis acceptionibus.

THEOREMA I.

Voces synonymæ sunt, quæ significant res, quibus ratio essentialis communi nomini accommodata est eadem.

II. Homonymæ, quæ significant res, quibus ratio essentialis communi nomini accommodata est diversa.

1. I. Synonyma (Latinè *univoca*) Grammaticis sunt voces ejusdem significationis: ut, *ensis, & gladius.* Eodem sensu Scientiæ *synonymæ* dicuntur *lib. 1. Post. cap. 13.* quæ idem nomen

men habent, ut Musica, Mathematica, atque ea quæ spectat ad auditum. A Logicis synonyma vel strictè sumuntur, vel latè. Synonyma strictè sumpta dicuntur *cap. 6. de Categ.* quæ eadem ratione de pluribus dicuntur essentialiter, sive, quoad nomen & quoad definitionem: veluti, cum *animal* dicitur de homine & bestiâ. Latior acceptio est, cum ea omnia synonyma dicuntur, quæ non sunt homonyma. Prior significatio ita stricta est, ut etiam excludat paronyma; utpote quæ prædicantur tantum accidentaliter, sive quoad nomen & non quoad definitionem: significatio posterior etiam paronyma complectitur, si careant homonymiâ. Nam *album* esse de nive & lacte dicitur eadem ratione; ideòque *album* est vox synonyma, etsi sit ab albore denominata.

2. Synonyma hæc posteriori significatione, quæ hujus loci est, vel sumuntur pro ipsis vocabulis, vel pro rebus quibus synonyma vocabula tribuuntur: quorum illa vulgò vocantur *univoca univocantia*; hæc *univoca univocata*. Similiter & homonyma, quæ Latinis *æquivoca* dicuntur, in *æquivoca æquivocantia*, & *æquivocâ*, *æquivocata* dividuntur: & per *æquivoca æquivocantia*, vocabula homonyma, sive ambigua; per *æquivoca æquivocata*, res ambiguas vocabulis nominatæ intelligendæ sunt.

3. Aristoteles *cap. 1. lib. de Categ.* ubi ex professo de synonymis & homonymis loquitur, res ipsas definit, sive univoca, & æquivoca æquivocata; nos, vocabula, sive univoca, & æquivoca æquivocantia. Et tamen Aristotelis verba retinuimus, levi mutatione ad vocabulorum definitiones detorta. Synonyma sic definit Philosophus, *Συνώνυμα λέγεται, ὃν τὸ, τὸ ὄνομα κοινὸν, καὶ ὃ καὶ τὸ ὄνομα λόγῳ τῆς ἑστίας ὁ αὐτός*; hoc est *Synonyma dicuntur, quorum nomen commune est, & definitio communi nomini accommodata, eadem*. Homonyma sic definiuntur, *Ὅμωνυμα λέγεται, ὃν τὸ ὄνομα μόνον κοινὸν, καὶ ὁ λόγος τῆς ἑστίας καὶ τὸ ὄνομα ἕτερος*; hoc est, *Homonyma dicuntur quorum nomen solum commune est, & ratio essentialis communi nomini accommodata, diversa*. Nomen solum commune dicitur homonymis; non ut excludantur accidentia nominum, putà, genus, declinatio, conjugatio, spiritus, quantitas, accentus, & id genus alia (nam si hæc eadem non sint, non erit idem

nomen) sed tantum ut excludatur λόγος τῆς οὐσίας, hoc est, id quod definitione explicatur. Neque verò satis est, ut ratio essentiae diversa sit homonymis, sed hoc quoque requiritur, ut sit diversa καὶ τῶν οὐσιῶν, hoc est, quoad nomen commune, sive quatenus communi nomine conveniunt. Ex. gr. *Animal* est nomen commune homini & bestiae, nec tamen est homonymum. Et si enim alia sit hominis, alia bestiae definitio, quatenus nominibus discrepant: in unâ tamen definitione conveniunt, quæ communi nomini animalis respondet. At si *animal* referatur ad vivum & pictum, homonymum est, quia nulla definitio vivo animali & picto communis est, communi nomini *animalis* accommodata.

III. Homonymia vel à casu est, vel à consilio.

IV. Homonymia à casu dicitur, cum vox eadem diversis rebus sine ratione est imposita.

V. A consilio, cum vox eadem adhibetur ad diversas res significandas certâ ratione.

VI. Ratio homonymiae vel in rebus est, vel in nobis.

VII. In rebus est tropus, vel inaequalis attributio.

VIII. Ratione tropi dicuntur homonyma, quæ à propriâ significatione interdum deflectuntur ad alienam, ob mutuum rerum ad se invicem habitudinem; vel simplicem, vel analogicam. Atque hæc tam latè patent, quàm tropus.

IX. Ob inaequalem attributionem dicuntur homonyma, quacunque significant communem naturam quæ subjectis speciebus inaequaliter communicatur.

X. In nobis est ratio homonymiae, cum nomen libris nostris tribuimus, aut propinquæ nobis charæve personæ, ad conservandam memoriam; vel personæ illustris, ob spem similitudinis, aut ad exemplum.

XI. Ex his, omnium longissimè à synonymis absunt, homonyma à casu, quæque causam homonymiae habent in nobis; propius ad synonymorum naturam accedunt tropica, ac imprimis analogica; at omnium proximè, quæ ambigua sunt ob inaequalem attributionem.

§. Causa homonymiae in genere, est infinita rerum multitudo, & paucitas vocabulorum. Quia enim multò pauciora vocabula sunt, quàm res, necesse est unum vocabulum pluribus

pluribus rebus significandis adhiberi. Causa, cur hæc aut illa vocabula homonyma sunt, vel nulla est, ut in homonymis à casu; vel, si qua causa sit quæ movere possit sapientem ut idem vocabulum diversis rebus significandis adhibeat, ea est, aut deflexio vocabuli à significatione propriâ ad alienam, ut in tropicis; aut inæqualis attributio, ut in iis quæ inferioribus ex æquo non conveniunt; aut memoria alicujus conservanda, sive similitudinis aut exemplum. Ex. gr. cum *jus* appellatur, quod sorberi potest, & id, quod injuriæ opponitur, homonymia à casu est: Nulla enim ratio est, cur nomen hoc rebus impositum sit nullam affinitatem inter se habentibus.

2. Quod sit tropus, & quotuplex, ex Rhetoricâ petendum est. Facit autem tropus homonymiam, quia sententia tropicis vocabulis prolata, potest esse ambigua & fallax; veluti, cum *vulpes* ponitur pro homine vafro; *pastor*, pro ecclesiæ ministro; *anima*, pro homine; *autor* pro opere, &c. Incertum enim esse potest, num quis istis vocabulis in propriâ, an in translata significatione utatur. Homonymiæ ob inæqualem attributionem sunt. Ex. gr. *Eus* respectu substantiæ & accidentis, *sylogismus* respectu syllogismi strictè nuncupati, & cæterarum argumentationum, quæ & ipsæ syllogismi solent appellari; item *sanum* tributum animali, medicinæ, & urinæ, &c.

3. Atque hæc quidem omnia causam habent ambiguitatis suæ in rebus: Sunt & alia quæ causam habent ambiguitatis in nobis, & in arbitrio nostro sitam: veluti, cum nomen parentis nostri filio damus ad illius memoriam conservandam; aut pii eruditæ viri, sperantes nostrum ejus exemplo excitatum iri, eique similem fore. Illa vocat Ammonius in *comm. in lib. Categ.* τὰ κατ' ἐλπίδα. hæc, τὰ κατ' ἐπιθυμίαν.

4. Aristoteles lib. 7. *Phys. cap. 7.* tradit homonymorum species hoc modo: Τῶν ὁμωνυμῶν, inquit, αἱ μὲν εἰσι πλεονεχῆσαι, αἱ δὲ πῶς ὁμοιότητα ἔχουσαι, αἱ δὲ ἐγγύς, ἢ γίγναι, ἢ ἀναλογία. Id est, Homonymiæ quædam multum distant, quædam habent quandam similitudinem, quædam propinquæ sunt vel genere vel analogiâ. Quæ hoc loco dicuntur multum distare, ea lib. 1. *Eth. cap. 4.* dicuntur ἀπὸ τὸ ἕτερον, à casu esse:

quæ enim casu homonyma sunt, nullam habent rerum convenientiam. Cætera sunt homonyma propinqua, sive homonyma à consilio, eorûmque tres constituuntur species: Quædam enim sunt propinquæ similitudine simplici, quædam analogiâ, quædam genere. Quæ hæc appellantur propinqua genere, ea dicuntur *lib. 6. de gen. & corr. cap. 6. τὰ τε ἐξ ἑνὸς τῶν πατέρων, καὶ προτέρων*, id est, quorum altera ab aliis atque prioribus sunt; *lib. 1. Eth. cap. 4. τὰ ἀφ' ἐνός*, hoc est, quæ ab uno sunt; & *lib. 3. Metaph. cap. 2. τὰ πρὸς ἓν, καὶ μίαν πρὸς φύσιν*, hoc est, quæ ad unum, sive ad unam aliquam naturam referuntur. Quanquam nonnihil discriminis intercedere videtur inter τὰ ἀφ' ἐνός, & τὰ πρὸς ἓν, quod accuratè explicatur ab Ammonio citato loco. Homonyma à casu ἀπλῶς homonyma dicuntur: cætera, quia propriùs accedunt ad naturam synonymorum, sæpe ab homonymis distinguuntur, ac imprimis ea quæ homonyma sunt ratione inæqualis attributionis: quando enim cum fortuitis conferuntur, non videntur esse homonyma. Consulantur loca paulò antè citata.

5. Hæc tripartitâ divisione homonymorum à consilio non omnia vocabula tropica continentur, sed tantùm ea quæ metaphoram habent; cum tamen in cæteris tropis non minùs sit homonymiæ locus, quàm in metaphora. Quare duas causas posui illius homonymiæ quæ à consilio est, inæqualem attributionem generis, & tropum; quo nomine comprehendo, non solùm metaphorica, quæ homonyma sunt propter similitudinem, aut simplicem, aut analogicam; sed omnia, quæ à significatione propria ad alienam deflectuntur.

6. Scholastici omnia *analogà* vocant, quæ à consilio homonyma sunt, eorûmque faciunt duas species; *analogà attributionis*, (sic appellant ea, quæ homonyma sunt ratione generis, sive ob inæqualem generis attributionem) & *analogà proportionis*: sic vocant omnia, quæ ob similitudinem homonyma sunt. Verùm enim vero, præterquam quòd hæc divisione non contineatur synecdoche, metonymia, & ironia, quas diximus non minùs esse sedes homonymiæ, quàm est metaphora, etiam analogiæ vox admodum ineptè usurpatur. Nam in iis quæ inæqualiter attribuuntur, nulla est proportio, ut neque

neque in iis quæ similitudine simplici inter se conveniunt. Ut jam τὰ κατὰ μῆμιν, & τὰ κατ' ἐλπίδα omittam, de quibus Ammonius ad Categ. Aristot. ut antè dixi.

7. Atque hæc de homonymis. Ut autem vocabulorum homonymia inter disputandum deprehendi possit (quod imprimis necessarium est) notanda sunt aliquot κειμήλια, sive canones, quos tradit Aristoteles lib. 1. Top. cap. 15. Ex quibus præcipuos hîc recensebimus. Omnia ea vocabula homonyma sunt, 1, Quibus multa sunt contraria; ut, *grave*, cui contrarium est *leve* & *acutum*. 2, Quæ interdum contrarium habent, interdum non; ut *φιλεῖν* cui interdum contrarium est *μισεῖν*, sive *odisse*; interdum nihil contrarium est, cum scilicet significat *consuescere*. 3, Quæ interdum medium habent, interdum medium non habent; sic *candidum* & *fuscum* sunt homonyma; quia, cum de colore sermo est, pallor, aliique colores mediî, inter candidum & fuscum interjecti sunt; at, cum vox *candida* aut *fusca* dicitur, nihil interjectum est. 4, Quibus aliquid oppositum est, quod ambiguum est: sic *acutum* est homonymum, quia *obtusum* est homonymum. Nam & securis *obtusa* dicitur, & vox, & ingenium. Similiter *grex* est ambiguum; ergo & *pastor*. Et sic in cæteris oppositorum generibus, exceptis disparatis. 5, Quorum conjugata sunt homonyma: sic, quia *sanum* homonymum est, (nam & animal dicitur sanum, & medicina, & urina) etiam *sanitas* homonyma est. 6, Quæ significant res diversorum generum: sic *bonum* est homonymum, quia est in omnibus categoriis; & *ὄν*, quia asinum significat, & lapidem molarem. 7, Quæ tribuuntur iis, quæ non sunt *συμβλητὰ κατὰ τὸ μέλλον, ἢ ὁμοίως*, hoc est, *talia*, ut comparari queant, atque alterum altero magis tale dici possit, aut similiter tale: Itaque *candidum* est homonymum, quia & voci & vesti tribuitur; cum tamen vox neque candidior veste dici possit, neque æquè candida. 8, Quæ significant differentias generum non subalternatorum; ut *acutum*, quod est differentia vocis & magnitudinis. 9, Quæ diversas differentias habent; ut, *jus*: Aliæ enim sunt differentie juris à quo Jurisconsulti dicuntur, aliæ juris foribilis. 10, Quæ nunc speciem, nunc differentiam significant; ut *candor*, qui est species coloris, & differentia vocis.

XII. *Diversæ vocabulorum acceptiones, quas Scholastici barbarè suppositiones vocant, non efficiunt homonymiam.*

XIII. *Vocabula vel accipiuntur materialiter, vel formaliter.*

XIV. *Materialiter dicuntur accipi, cùm accipiuntur pro seipsis.*

XV. *Formaliter, cùm accipiuntur pro rebus significatis.*

¶ Ex. gr. cùm dico, *Animal est trisyllabum*, neutrius generis, tertiæ declinationis; *homo est dissyllabum*, communis generis; vocabula *homo* & *animal* sumuntur materialiter, hoc est, per se ac pro seipsis, haud secus, ac si nihil omnino significarent. At cùm dico, *Homo est animal*, vocabula *homo* & *animal* sumuntur formaliter, hoc est, pro rebus quas significant ex instituto.

XVI. *Acceptio formalis in vocabulis singularibus unius tantùm modi est: in vocabulis universalibus, vel est simplex, vel concreta.*

XVII. *Acceptio simplex est, cùm vocabulum universale sumitur pro naturâ communi ab inferioribus abstracta.*

XVIII. *Acceptio concreta est, cùm vocabulum universale sumitur pro naturâ communi ab inferioribus.*

¶ Ex. gr. cùm dico, *animal est genus hominis*, vocabulum *animal* sumitur simpliciter pro naturâ animalis in abstracto considerata, prout animi notione præcisa est ab inferioribus. At cùm dico, *Homo est animal*, vocabulum *animal* accipitur in concreto, quatenus existit in humanâ specie. Concreta acceptio Scholasticis dicitur *personalis*, qui admodum prolixè disputant de vocabulorum acceptionibus, sive, ut illi loquuntur, de suppositionibus. Ex quibus hæc pauca selegimus: quæ ob præclarum usum, quem habent in disputationibus, non poterant sine damno præteriri: cætera magis ad pompam faciunt, & ad ingenii ostentationem. Atque hæc de themate simplici, de quæ illius categoriis, affectionibus, atque interpretatione.

De Enunciatione in genere ; deque Enunciatione simplici & compositâ, in specie.

THEOREMA I.

Sequitur nunc thema complexum , ejusque interpretatio, quæ Enunciatio dicitur.

I. In doctrinâ de themate simplici , distinctè rerum & vocabulorum affectiones consideravimus. Id hoc loco non est necessarium. Nihil enim themate complexo considerandum est, quod non enunciationi quoque convenit; nihil etiam in enunciatione, quod non themati complexo congruit.

2. Enunciatio dicitur Græcè *ἐννοια*, à verbo *ἐννοεῖν*, id est, ostendo, exhibeo. Dicitur etiam *πρότασις*, id est, propositio. Quanquam videtur propositio ab enunciatione, si non re, saltem ratione & usu discrepare. Nam *πρότασις* dicitur, quæ in syllogismo conclusioni prætenditur sive præmittitur, à verbo *πρότεω*, hoc est, prætendo, prætexo: at enunciatio consideratur per se, & sine respectu ad syllogismum. Deinde propositio videtur etiam in mente esse; at enunciatio est in verbis tantum, & in oratione prolata. A Cicerone & Varone vocatur *pronunciatum*, *pronunciatio*, *effatum*, *profatum*; à Stoicis, *axioma*, ab *ἄξιόω*, hoc est, postulo. Aristoteli *axioma* est enunciatio omnium judicio vera, quasi deductum sit ab *ἄξιόν*, id est, dignus; quia omne *axioma* est *ἄξιόμισεν*, id est, dignum cui fides habeatur. Vide lib. I. Post. cap. 2.

II. Enunciatio est oratio, in quâ aliquid de alio verè vel falsò pronunciatur.

I. Veritas alia est simplicis thematis, alia complexi. De veritate simplicis thematis loquitur Aristoteles lib. I. *Metaph. minor. cap. I.* cum ait, *Ἐκαστον ὡς ἐχέ τὸ ἔν, ἔτω καὶ τὸ ἀληθείας*, hoc est, *Tantum habet unaquæque res veritatis, quantum existentiae*. Veritas thematis complexi non est in rebus, sed in judicio mentis, aut in oratione. Judicium mentis dicitur verum, cum componit quæ revera conjuncta sunt, aut dividit quæ revera diversa sunt. Oratio vera dicitur, & quando cum rebus convenit, & quando convenit cum mentis judi-

judicio, etiamsi à rebus discrepet. Convenientia orationis cum rebus vocatur veritas Logica; convenientia cum mentis judicio, veritas Ethica.

III. In enunciatione spectandæ sunt species & affectiones.

IV. Species enunciationis primò sunt simplex & composita: deinde pura & modalis.

V. Enunciatio simplex est, quæ non potest in plures enunciationes resolvi.

VI. Enunciatio composita est, quæ constat ex pluribus enunciationibus inter se copulatâ.

I ¶. Sitne enunciatio simplex an composita, ex copulâ verbali optimè deprehendi potest. Quæ enim unam tantum habet copulam verbalem, simplex est; ut, *Homo est animal: Socrates sedet.* Quæ duas, pluresve copulas habent, vel expressas, vel intellectas, sunt compositæ; ut, *Et prodesse volunt, & delectare Poetæ: Unâ Eurûsque Notûsque riuum.* Quod tantundem est ac si dictum esset, *Eurus ruit, & Notus ruit.* Neque verò satis est ad constituendam enunciationem compositam, ut plures copulas verbales habeat; sed hoc quoque requiritur, ut enunciationes simplices, ex quibus composita conflata est, copulentur inter se, vel conjunctione Grammaticâ; ut, *Si Deus est, non est Fortuna: Aut dies est, aut nox;* vel partium relatione; ut, *Donec eris felix, multos numerabis amicos.*

VII. Enunciatio simplex constat subiecto & prædicato.

VIII. Subiectum est, cui aliquid tribuitur in enunciatione simplici.

IX. Prædicatum, quod alicui in enunciatione simplici tribuitur.

X. Prædicatum constat copulâ & re copulatâ.

I ¶. Ex. gr. in hac enunciatione, *Homo est animal*, homo est subiectum; *animal*, prædicatum; *est*, copula verbalis. Copula interdum diversa est à re copulatâ, ut in exemplo prolato; & tum dicitur enunciatio *trinaria*: interdum cum re copulatâ in uno eodemque verbo includitur; ut, *Socrates disputat*; & tum dicitur enunciatio *binaria*. Cum verbum substantivum est constituit enunciationem binariam, ut, *Homerus non est*, id est, non existit, dicitur, *secundi adjecti*; at cum con-

constituit enunciationem trinariam, ut, *Homerus est pater sapientia*, appellatur *tertii adjecti*. Est secundi adjecti fungitur omnibus verbi officiis : significat enim existentiam, adsignificat tempus, & notat vim, quâ subiectum nomen sibi devincit. Est *tertii adjecti* admittit significationem suam, & copulat alterius vocis significatum cum subiecto. Cum enim dico, *Chimæra est figmentum*, copula est non denotat existentiam, sed copulat notionem figmenti cum Chimæra. Ac proinde est *tertii adjecti* non est verbum, sed verbalis copula, & vox syncategorematica.

2. Hinc non efficitur, ut est *tertii adjecti* non sit pars enunciationis : imò hinc efficitur, ut sit pars, & forma adeò, atque anima prædicati. Etenim si verbum est, cum in alio verbo includitur, sit pars prædicati, cur non erit pars prædicati, cum seorsum ponitur ? Cum dico, *Deus miseretur peccatorum penitentiam agentium*, hæ voces, *miseretur peccatorum*, &c. sunt prædicatum. Quare cum dico, *Deus est misericors erga peccatores*, id est *misericors*, erit prædicatum quod respondet verbo *miseretur*, ac proinde est prædicati pars censeretur debet. Præterea, quod in conversione loco subiecti constituitur, id est prædicatum : atqui non sola res copulata, sed ipsa etiam copula in locum subiecti transferenda est in conversione: ergò copula etiam est pars prædicati. Ex. gr. hæc enuntiatio, *Omnis senex fuit puer*, sic convertitur, *Aliquis, qui fuit puer, est senex*.

XI. Subiectum & prædicatum non ex situ, sed ex sensu enunciationis discernenda sunt.

I. Q. Sæpe enim non liquet, utrum duorum subiectum sit, aut prædicatum ; præsertim in enunciatione trinariâ. Non enim semper ponitur subiectum priore, prædicatum, posteriore loco : Ut in hac enunciatione, *Nobilitas sola est atque unica virtus*, *nobilitas* est prædicatum ; *virtus*, subiectum ; idque non aliunde, quàm ex sensu, & natura rerum colligitur.

XII. Enunciatio composita est quintuplex, copulativa, hypothetica, disjunctiva, adversativa, & relativa,

XIII. Enunciatio copulativa est, cujus partes connectuntur particulâ copulativâ.

I. Q. Cujusmodi sunt, &, que, quoque, ac, atque, etiam, nec, neque, & similes ; ut,

Unde

*Unde Eurýsque Notýsque ruunt crebérque procellis Africus
Credidit Abraham Deo, & imputatum fuit illi ad justitiam*

XIV. Enunciatio hypothetica est, cujus partes connectuntur conjunctione conditionali.

I §. Cujusmodi est particula *si* ; ut, *Si non est prudentia in rege, non est quies in populo*. Enunciationis hypotheticæ pars prior vocatur *antecedens* ; posterior, *consequens*. In horum nexu consistit veritas, non in veritate ipsius antecedentis aut consequentis. Ex. gr. quamvis non sit verum, asinum volare, aut, asinum alas habere ; tamen hoc verum est, *Si asinus volat, habet alas*.

XV. *Si conditio sit impossibilis, enunciatio hypothetica æquipollet categoricæ simpliciter & sine conditione neganti.*

I ¶. Cum enim Deus Abrahamo dicit, *Si numerari potest pulvis terræ, numerabitur semen tuum*, tantundem est, ac si diceret, *Tam numerosam fore posteritatem Abrahami, ut numerari non possit*. Et JC^{ti} docent hanc formulam promittendi, *Dabo tibi filiam, si cælum tetigeris*, non obligare, quia neganti similis est.

XVI. Enunciatio disjunctiva est, cujus partes connectuntur conjunctione disjunctivâ.

I ¶. Cujusmodi sunt, *aut, vel, sive, seu, ve, & similes* ; ut, *Aut fide justificamur, aut operibus* : *Aut dies est, aut nox*.

XVII. Partes enunciationis disjunctivæ debent esse immediate oppositæ.

I ¶. Si enim oppositæ non sunt, sed subordinatæ, efficitur enuntiatio nugatoria ; ut, *Aut homo est, aut animal*. Si non sint immediate oppositæ, enunciatio erit falsa ; ut, *Aut pax est, aut bellum* : possunt enim esse *induciæ*. Interdum enunciatio mediata suâ naturâ, vim habet immediatæ ratione pacti alicujus, aut propositi præcedentis : veluti cum Leander apud Ovidium ait,

Aut mihi continget felix audacia salvo,

Aut mors solliciti finis amoris erit.

Poterat quidem Leander neque amore frui, neque mori ; sed alterutrum fieri debebat, quia jam decretum erat.

XVII. Enunciatio adversativa est, cujus partes connectuntur conjunctionibus adversativis.

I ¶. Cujus-

I. ¶. Cujusmodi sunt, *quamvis* tamen, non hoc sed illud, quidem sed, & similes; Ut, *quamvis* Deus est omnipotens, non potest tamen mentiri:

Non formosus erat, sed erat facundus Ulysses:

Difficile est, fateor, sed tendit in ardua virtus.

XIX. Enunciatio relativa est, *cujus partes connectuntur relatione.*

I. ¶. Partium relatio nominibus, pronomini, adverbis, aliisque partibus orationis comparisonem denotantibus, indicatur; ut, *Qualis magistratus, tales subditi: Quod non est compositum, est immortale. Ubi cadauera, ibi congregantur equilæ: Dum spiro, spero.*

C A P. XXVIII.

De Enunciatione purâ & modalî.

T H E O R E M A I.

E Nunciatio pura est, in quâ non exprimitur quomodo partes coherent.

II. Modalis, in quâ exprimitur quomodo partes coherent.

I. ¶. Ex. gr. hæc enunciatio, *Homo est animal*, *Homo non est lapis*, est pura; quia solummodo enunciat prædicatum animal cum homine convenire, lapidem pugnare, non exprimens modum hujus convenientiæ aut pugne. Ab Aristotele lib. I. Post. cap. 2. appellatur enunciatio τὸ ἀπὸ τοῦ ὅτι significans inesse. At hæc enunciatio, *Necesse est hominem esse animal*, *Impossibile est hominem esse lapidem*, est modalis; quia non solum enunciat prædicatum cum subiecto convenire, aut pugnare; sed etiam exprimit, quomodo conveniat cum subiecto, aut quomodo cum illo pugnet.

III. Modi sunt quatuor, necesse, impossibile, possibile, contingit.

I. ¶. Modi alii materiales sunt, alii formales. Modi materiales afficiunt enunciationis materiam, subiectum aut prædicatum. Ex. gr. in hac enunciatione, *Pastor bonus ponit animam suam pro ovibus*, vocabulum *bonus* est modus subiecti. In hac, *Rhetor dicit ornate & copiose, adverbia ornate & copiose*

piosè sunt modi prædicati. Modi formales afficiunt formam, sive dispositionem enunciationis. Hos diximus esse quatuor, græcè dicuntur ἀναγκαῖον, ἀδύνατον, δυνατόν & ἐνδεχόμενον. His quidam adjiciunt, *verum* & *falsum*; sed admodum imperité. Nam *verum* & *falsum* non afficiunt affirmationem aut negationem. Nam qui dicit, *Verum est, hominem esse animal*: *Falsum est, hominem esse lapidem*, nihilo plus dicit, quàm, *Homo est animal*: *Homo non est lapis*.

IV. Enunciatio modalis constat dicto & modo. Dictum est quasi subiectum, modus quasi prædicatum.

I ¶. Enunciatio modalis vel adverbialiter effertur; ut, *Homo necessariò est animal*: vel nominaliter; ut, *Necesse est hominem esse animal*. Cùm effertur adverbialiter, non differt specie ab enunciatione purâ. Cùm effertur nominaliter, constituit novam speciem aut formulam enunciationis, in quâ dictum est pro subiecto, & modus pro prædicato. Dictum est oratio constans casu nominis, & verbo infinitivi modi: ut in hâc enunciatione, *Necesse est Deum esse bonum*, dictum est, *Deum esse bonum*; modus, *necesse*. Quòd modus prædicatum sit in enunciatione modali, aut quasi prædicatum, ex copulâ colligitur. Copula enim pars prædicati est, ideòque illud prædicatum est, cui copula cohæret: atqui copula cohæret cum modo: modus ergò habet rationem prædicati. Idem liquet ex mutatione enunciationis modalis in puram. Hæc enim enunciatio, *Necesse est ignem esse calidum*, in puram enunciationem convertitur, hoc modo; *Igni calor est necessarius*.

V. Ad enunciationes modales revocandæ sunt enunciationes exclusivæ, exceptivæ, & restrictivæ.

I ¶. Enunciatio exclusiva dicitur, in quâ particula exclusivæ, *tantum*, *solum*, *duntaxat*, aut similis additur subiecto, aut prædicato; ut, *Soli electi servantur*: *Diaboli tantum agunt malè*. Enunciatio exceptiva est, in quâ ponitur particula exceptivæ, *præter*, *præterquam*, *nisi*, aut similis; ut, *Omnes homines diluvio absumpti sunt, præter Noachum cum familia*. Restrictiva est, in quâ ponitur particula restringens ac limitans, quâ, *quatenus*, *quoad*, aut similis; ut, *Homo sentit, quatenus est animal*: *Christus est ubique secundum divinam naturam*. Hujusmodi enunciationes in syllogismo mutandæ sunt, &

expo-

exponendæ clariore aliquâ orationis formulâ. Hinc vocantur à Scolaſticiſ *exponibiles*. Atque hæc de ſpeciebus enunciationum.

CAP. XXIX.

De enunciatione univerſali, particulari, indefinitâ ac ſingulari.

THEOREMA I.

Affectiões enunciationum vel abſolutæ ſunt, vel relatæ.

II. Affectiões abſolutæ ſunt quantitas, & qualitas.

III. Ratione quantitatis dividitur enunciatio in univerſalem, particularem, indefinitam & ſingularem.

IV. Enunciatio univerſalis eſt, in quâ ſubjectum univerſale accipitur univerſaliter : quod fit, cūm univerſali ſubjecto additur nota univerſalitatis, omnis, nullus, &c.

V. Enunciatio particularis eſt, in quâ ſubjectum univerſale accipitur in parte : quod fit, cūm univerſali ſubjecto additur nota incertæ partis, ſive particularitatis, aliquis, quidam, &c.

VI. Enunciatio indefinita eſt, cujus ſubjectum univerſale nullâ quantitatis notâ definitur.

VII. Enunciatio ſingularis eſt, cujus ſubjectum eſt ſingulare.

I. ¶ Ariſtoteles cap. 7. de Interp. probat hanc quadrimembrem diviſionem, hoc modo : Enunciationis prædicatum vel enunciatur de ſubjecto univerſali, vel de ſubjecto ſingulari. Si prædicatum de ſubjecto univerſali enuncietur univerſaliter, hoc eſt, cum notâ quâ definiatur prædicatum omni aut nulla ex parte ſubjecto convenire, enunciatio eſt *καθόλου*, ſive univerſalis ; ut, *Omnis homo eſt animal* : Nullus homo eſt lapis. Si prædicatum de ſubjecto univerſali enuncietur particulariter, hoc eſt, cum notâ quâ definiatur prædicatum ex parte tantum ſubjecto convenire enunciatio eſt *ἐν μέρει*, hoc eſt, particularis ; ut, *Aliquis homo eſt juſtus* : Non omnis homo eſt juſtus. Si prædicatum de ſubjecto univerſali neutro modo enuncietur, nullâq; notâ quantitatis definiatur, num prædicatum ſubjecto toti, an ex parte conveniat, enunciatio eſt *ἀόριστος*, ſive indefinitâ :

finita ; ut, *Iustitia est virtus pulcherrima*. Si prædicatum de subiecto singulari enunciatur, enunciatio dicitur *æd' ægæor*, singularis ; ut, *Socrates est Philosophus*.

2. In enunciatione potest duplex quantitas considerari; una subiecti, quæ est quantitas numeri ; altera prædicati, quæ est quantitas loci, temporis, aut modi. Quantitas numeri his notis indicatur, *omnis, cuncti, universi, quilibet, quivis, quicunque, quotquot, nullus, nemo* ; item, *aliquis, quidam, plerique, pauci, nonnulli, non omnis, &c.* quorum illæ universalem, hæc particularem enunciationem efficiunt. Quantitas loci hisce notis cognoscitur, *ubique, ubicunque, nusquam, nullibi, alicubi, &c.* Quantitas temporis has habet notas, *quandocunque, semper, nunquam, aliquando, plerumque, &c.* Quantitas modi has, *quomodo, quomodocunque, &c.* Et si quantitas prædicati in syllogismis eodem sæpe loco sit, quo est quantitas numeri; hic tamen ea non consideratur. Nam hæc quadrimembris divisio ex quantitate subiecti sumpta est, non ex quantitate prædicati.

3. Syncategoremata *omnis, universi, cuncti, &c.* similia, vel collectivè sumuntur, vel distributivè. Collectivè dicuntur sumi, cum prædicatum neque de speciebus neque de individuis subiecti sui seorsum prædicari potest ; ut in hac enunciatione, *Omnes planetae sunt septem : Omnes partes sunt idem quod totum*. Distributivè dicuntur sumi, cum prædicatum etiam iis attribui potest quæ subiecto continentur : & si possit illius tantum speciebus attribui, dicuntur sumi distributivè in genera singulorum ; ut, *Omnia animalia fuerunt in arcâ Noachi : Christus sanavit omnem morbum* ; id est, omnia genera, aut potius species, animalium & morborum. Si prædicatum possit etiam attribui singulis subiecti individuis, dicuntur sumi distributivè in singula generum ; ut, *Omnis homo est animal*. Cum syncategoremata sumuntur distributivè in singula generum, enunciatio est simpliciter universalis ; cum sumuntur distributivè in genera singulorum, est universalis secundum quid ; cum sumuntur collectivè, videntur enunciationem indefinitam efficere. Hujus rei hæc est ratio : Cum vox *omnis* sumitur distributivè, nihil aliud est, quam syncategorema : at cum sumitur collectivè, est pars subiecti.

VIII. *Nota universalitatis non est addenda prædicato.*

I ¶. Ità docet Aristoteles cap. 3. de Interpr. Ratio est, quia denotat quantitatem numeri, quæ est quantitas subiecti, ut diximus, non prædicati. Itaque verè dicitur, *omnem hominem esse animal*, sed non potest verè dici, *hominem esse omne animal*. Si tamen vox *omnis* non immediatè cohæreat, ipsi prædicato, sed voci alicui prædicatum circumscribenti, ac determinanti, non erit enuntiatio falsa; ut, *Deus vult omnes homines salvos fieri: Christus curavit omnem morbum*. In his enim enunciationibus prædicatum non est, *homines, morbi*: sed *vult, curavit*.

IX. *Quantitas enunciationis modalis præcipuè æstimatur ex dicto; ex modo, tantum secundario.*

I ¶. Quantitas dicti eadem est cum quantitate puræ enunciationis. Sive enim dicas, *Necesse est omnem hominem esse animal*, sive *Omnis homo est animal*, utraque est universalis. Quantitas modi, est quantitas loci & temporis. Modus enim *necesse* includit adverbia *semper & ubique*; *impossibile* includit adverbia *nunquam, nusquam*: quorum illa vim habent universaliter affirmandi; hæc, universaliter negandi. *Possibile & contingens* includunt adverbia *aliquando, raro, plerumque*, quæ vim habent particulariter affirmandi. Atque hæc de quantitate enunciationis.

CAP. XXX.

De Enunciatione affirmatâ, negatâ, finitâ,
& infinitâ.

THEOREMA I.

R *atione qualitatis dividitur enuntiatio, primò in affirmantem & negantem; deinde, in veram & falsam.*

II. *Enuntiatio affirmans est, quæ partes conjungit.*

III. *Negans, quæ partes dividit.*

I ¶. Ex. gr. enunciationes affirmatæ sunt, *Omne vivens alicuiusmodi est; Si Deus est, mundus regitur providentiâ: Necesse est ignem esse calidum*; quarum negationes hæc sunt, *Non omne vivens*

vivens alitur : non si Deus est , mundus regitur providentiâ : Non necesse est ignem esse calidum.

IV. *Utraque enunciatio dividitur in finitam & infinitam.*

V. *Enunciatio finita est, quæ constat subjecto & prædicato finitis.*

VI. *Infinita, quæ constat subjecto, aut prædicato, aut etiam utroque, infinito.*

I ¶. *Enunciationes finitæ sunt , Omne corpus est in loco: nullum corpus potest in duobus locis simul esse. Enunciationes infinitæ ; Non-ens excluditur à categoriis : Aliquis homo est non indoctus : Quidam non adeò divites , sunt minimè sortidi.*

VII. *Si in enunciatione simplici nota negandi ponatur proximè ante notam quantitatis, aut si in notâ quantitatis contineatur, vel etiam, si ponatur ante copulam , aut ante verbum quod vim habet copulæ, enunciatio erit negata ; nisi quòd duæ negationes censeantur affirmare.*

VIII. *At si ponatur alibi, putà immediatè ante subjectum aut illius partem, vel post copulam aut verbum, enunciatio erit infinita.*

I ¶. *Enunciationes negatæ sunt , Non omnis homo est doctus : Nulla planta sentit : Quidam homines non sunt electi : Lapides non vivunt. At hæc , Nullus homo non vivit, censetur affirmata propter duas negationes. Enunciationes infinitæ ; Quidam non locuples potest esse dives : Omne animal non rationale est bestia : Ulysses erat, non formosus : Æneas potuit non vincere Turnum. Eodem modo cognoscitur discrimen inter enunciationem finitam & infinitam in modalibus. Ex, gr. Hominem esse doctum non est necesse, est enunciatio negans ; Hominem esse doctum est non necesse , est infinita : quia in illâ ponitur negatio ante copulam ; in hac, post copulam.*

2. *Et si enunciatio infinita affirmans, & finita negans, in multis idem significant, ut Ulysses erat non formosus, Ulysses non erat formosus : Deus est non injustus, Deus non est injustus : (hæc enim eodém redeunt) in multis tamen magnum discrimen est ; ut, Adam potuit non peccare , Adam non potuit peccare :*

ur: *Aeneas potuit non vincere Turnum, Aeneas non potuit
vincere Turnum.*

IX. Enunciatio composita censetur negata, cum negatio adheret cum vinculo, quo duae enunciationes simplices conne-

¶ Sumamus exemplum enunciationis affirmantis ex
unaquaque specie: *Socrates & sapiens fuit & probus: Si spon-*
des, debes: Aut bellum est aut pax: Qualis pater, talis filius.
Hæ enunciationes sic negantur: *Socrates non fuit sapiens &*
probus: Non si spondes, debes; hoc est, etiam si spondeas, non
camen debes. Non aut bellum est aut pax: Non quatis pater,
talis filius; hoc est, non est talis filius, qualis pater. Enun-
ciatio adversativa non recipit affirmationem aut negationem
ratione vinculi, sed tantum ratione singularum partium; ut,
Non est doctus, sed probus. Hæc enim enuntiatio sic negatur,
Est doctus, sed non probus.

X. Enunciations exclusivae, & restrictivae censentur negatiae, cum nota negandi ponitur ante particulas exclusivas, aut restrictivas.

1. q. Ut, Non solus homo est animal : Cicero non solum fuit
 water : Christus non quoad humanam naturam est ubique ; hoc
 est, Christus est quidem ubique, sed non secundum naturam
 humanam.

XI. *Affirmatio prior est negatione & notior.*

1. q. Hac assertio collecta est ex cap. 25. lib. 1. Post. & 10. lib. 2. de Cælo. Cæterum affirmatio dicitur prior negatione, quia prius est esse, quàm non esse; notior, quia negationis enunciatio per affirmatam innotescit: novi enim hominem non esse lapidem, quia novi eum aliud esse à lapide.

C A P. XXXI.

**De Enunciatione verâ & falsâ, necessariâ &
contingente, & earum gradibus.**

THEOREMA I.

Enunciatio vera est, quæ conjungit ea quæ conjuncta sunt,
et dividit quæ divisa sunt.

II. *Falsa, quæ conjungit ea quæ divisa sunt, aut dividit quæ conjuncta sunt.*

I. ¶. Intelligitur hoc loco veritas & falsitas Logica, quæ diximus esse convenientiam orationis cum rebus significatis, aut discrepantiam ab iis, in affirmando & negando. Enunciatio vera conjungit, quæ conjuncta sunt, hoc est, enunciat esse, quod est; ut, *Homo est animal*: vel dividit, quæ divisa sunt, hoc est, enunciat non esse, quod non est; ut, *Homo non est bestia*. Enunciatio falsa conjungit, quæ divisa sunt, hoc est, enunciat esse, quod non est; ut, *Homo est lapis*: vel dividit, quæ conjuncta sunt, hoc est, enunciat non esse, quod est; ut, *Planta non vivit*.

III. *Enunciatio vera, vel est necessaria, vel contingens.*

IV. *Enunciatio necessaria est, quæ non potest esse falsa.*

V. *Contingens, quæ potest esse falsa.*

I. ¶. Necessarium in genere dicitur, quod non potest non esse, aut aliter se habere: contingens, quod potest non esse, aut aliter se habere. Necessarium dicitur duobus modis, nempe vel absolutè, vel secundum quid. Absolutè necessarium est, quod sine contradictione non potest statui non esse, aut aliter se habere: necessarium secundum quid, quod quidem posita aliquâ conditione, aut aliquo respectu, necessarium est; sed eâ conditione ablata, aut respectu mutato, sine contradictione statui posset, non esse, aut aliter se habere. Utraque necessitas simul & contingens, vel in existentia spectatur, vel in causis, vel in enunciatione. Atque hæc sola est hujus loci. Necessitas enunciationis nihil aliud est quàm indissolubilis partium nexus: contingens est dissolubilis & mutabilis nexus partium. Ex. gr. hæc enunciatio, *Homo est animal*, est necessaria; quia fieri non potest, ut homo non sit animal. Atque hæc necessitas absoluta est. Item hæc enunciatio, *Corvus est niger*, est necessaria, non absolutè, sed secundum quid; quia naturaliter quidem fieri non potest, ut corvus non sit niger: potest tamen illud fieri supernaturali virtute Dei. At hæc enunciatio, *Crassus est dives*, est contingens; quia fieri potest, ut Crassus non sit dives.

VI. *Necessitas enunciationis tribus gradibus distinguitur.*

Primus

Primus gradus necessitatis est, καὶ παντὸς de omni: alter καὶ αὐτῷ, per se: tertius καὶ ὅλως πρῶτον, universaliter primum.

VII. Enunciatio de omni est, in qua prædicatum omni subiecto, & semper convenit.

1. ¶ De gradibus necessitatis in enunciatione agit Aristoteles lib. 4. Post. cap. 4. indeque petita est hæc, & sequentes definitiones. Cæterum enunciatio καὶ παντὸς requirit duas condiciones; ut prædicatum insit omni subiecto, & semper. Ex gr. hæc enunciatio, Homo est iustus, non est de omni, quia iustum esse, non convenit omni homini: ut neque hæc, Vivens crescit, quia non semper crescit: sed hæc, Corvus est niger: omnis enim corvus niger est, & semper.

VIII. Enunciatio per se est, cujus subiectum & prædicatum essentiali nexu coherent.

IX. Estque vel primi, vel secundi modi.

X. Enunciatio per se primi modi est, cum prædicatum continetur in definitione subiecti.

XI. Secundi modi, cum subiectum continetur in definitione prædicati.

XII. Enunciationi per se, opponitur enunciatio καὶ συμπεριεχόμενος sive per accidens,

XIII. Enunciatio per accidens dicitur, in qua neque prædicatum continetur in definitione subiecti, neque subiectum in definitione prædicati.

1. ¶ Aristoteles citato loco hos duos modos per se describit hisce verbis; Καὶ αὐτὰ δὲ λέγω, ὅσα ὑπάρχει ἐν τῷ πᾶσι, καὶ ὅσοις τὸ ἐνυπαρχόντων αὐτοῖς, αὐτὰ ἐν τῷ λόγῳ ἐνυπαρχῶσι, καὶ πᾶσι δικλῆντι, hoc est, Per se appello, quæ insunt subiectis in attributione declarante quid sint (hæc sunt primi modi) & quæ attributis suis insunt in oratione declarante quid sint: hæc sunt secundi modi.

2. Ad primum modum pertinent quinque genera enunciationum: 1. Cum genus proximum prædicatur de specie; ut, Homo est animal. 2. Cum prædicatur genus remotum; ut, Homo est substantia. 3. Cum prædicatur proxima differentia; ut, Homo est rationalis. 4. Cum prædicatur differentia remota; ut, Homo habet facultatem sentiendi. 5. Denique, cum definitio prædicatur de definito; ut, Homo est animal rationale.

nale. Ad secundum modum pertinent eæ enunciationes, in quibus proprietates dicuntur de subiecto suo; idque vel singularæ seorsum; ut, *Homo est risibilis*: vel duæ disjunctim; ut, *Numerus vel est par vel impar*. At hæc enuntiatio, *Corvus est niger*, quamvis necessaria sit, per accidens tamen dicitur, quia neque corvus nigræ, neque nigræ corvi mentione definitur.

3. His addit Aristoteles tertium & quartum modum τὸ καθ' αὐτὸ, sive ejus quod per se est; sed qui huc non pertinent. Nam tertius modus est modus existendi, nihilque aliud docet, quàm substantiam existere per se; accidens non existere per se, sed per accidens, sive per substantiam. Et quartus modus est modus causandi, explicans discrimen inter causas per se & causas per accidens, de quo egimus cap. 16. Quod si ex causis aut effectis per se, formentur enunciationes, facile revocari possunt ad duos modos jam explicatos. Si enim causa per se prædicetur de effecto; ut, *Eclipsis fit ob interpositionem terræ*, enuntiatio erit primi modi: si effectum prædicetur de causa per se; ut, *Interpositio terræ efficit eclipsin*, erit secundi modi.

XIV. Enuntiatio universaliter prima est, in quâ prædicatum subiecto convenit ἢ καθ' αὐτὸ, hoc est, quatenus ipsum, id est, quod est.

XV. Itaque constet terminis reciprocis.

¶ I. Aristoteles sic ait, καθόλου ἢ ἀπὸ τοῦ παντός, καὶ καθ' αὐτὸ, καὶ ἢ αὐτὸ. hoc est, *Universale dico, quod & omni inest, & per se, & quatenus ipsum*. Sed satis erat ἢ αὐτὸ. Nam quicquid est ἢ αὐτὸ, etiam est κατὰ παντός & καθ' αὐτὸ. Prædicatum dicitur convenire subiecto ἢ αὐτὸ, cum subiecto convenit secundum eam ipsam rationem, per quam est id, quod est. Ad eam rem requiritur, ut prædicatum sit καθόλου, & subiectum πάντων. Quod cum fit, prædicatum recipitur cum subiecto, eiq; convenit ἢ αὐτὸ. Ejus rei signum est, quòd subiectum sumi potest cum duplicatione, sive reduplicativè. Ex gr. hæc enuntiatio, *Homo est risibilis*, hinc cognoscitur esse universaliter prima, quia dici potest, *Homo, quâ homo, est risibilis*, adeoque omnis & solus homo est risibilis.

XVI. Horum graduum secundus primum, & tertius secundum includit, non vicissim.

1. Hoc est, omnis enunciatio per se, est etiam de omni; & omnis enunciatio universaliter prima, est etiam per se: sed non vice versa. Atque hoc intelligendum est de enunciationibus subjectum universale, ac capax signorum quantitatis, habentibus. Nam si subjectum sit singulare, potest enunciatio esse per se, quæ tamen non sit de omni. Nam hæc enunciatio, *Socrates est animal*, est per se, non est tamen de omni, quia subjectum non est universale.

2. Necessitas primi gradus minima est, & proximè ad contingentiam accedit; quia non est necessitas absoluta. Necessitas secundi & tertii gradus absoluta quidem est, sed inæqualis tamen. Nam quia necessitas tertii gradus est mutua, necessitas secundi gradus non mutua: enunciatio universaliter prima magis necessaria est quàm enunciatio per se, quæ non est universaliter prima. Ex. gr. magis necessaria censetur hæc enunciatio, *Homo est risibilis*, quàm hæc, *Homo est animal*; qui licet homo non possit non esse animal, animal tamen potest non esse homo; at homo non potest non esse risibilis; & quod risibile est, non potest non esse homo.

XVII. Enunciationum contingentium quædam plerumque veræ sunt, quædam rarò, quædam ancipiti naturâ nunc veræ sunt, nunc falsæ.

1. Hæc exstant cap. 9. de Interp. & lib. 2. Top. cap. 6. Ex. gr. plerumque verum est, ut parentes ament liberos suos; rarò verum, ut homo nascatur biceps; ancipiti natura est, & modò verum, modò falsum, aleâ ludentem vincere. Horum, quæ plerumque eveniunt, dicuntur τὰ ὅτι τὸ πολὺ quæ rarò, τὰ ἐπ' ἐλαττον quæ utrolibet modo, τὰ ὁποτέρ' ἐτυχε.

XVIII. Enunciatio falsa, vel est possibilis, vel impossibilis.

XIX. Enunciatio possibilis est, quæ, cum falsa sit, potest esse vera.

XIX. Impossibilis, quæ, cum falsa sit, non potest esse vera.

1. Impossibile dicitur duobus modis, nempe vel absolute, vel secundum quid. Absolute impossibile est, quod implicat contradictionem; ut, *hominem esse lapidem*. Impossibile secundum quid est, quod, cum non implicet contradictio-

nem, à Deo quidem fieri potest, sed non à causis naturalibus ; ut, *solem stare; ignem non urere ; virginem parere*. Similiter & possibile duobus modis dicitur. Aliud enim Deo soli , aliud etiam causis naturalibus possibile est. Atque hoc revera non differt ab eo, quod contingens est , sed solâ tantum ratione. Nam possibile dicitur, quod non est, sed potest esse : contingens, quod est, sed potest non esse. Hæc de affectionibus absolutis.

CAP. XXXII.

De Conversione, Equipollentiâ, & Subalternatione enunciationum.

THEOREMA I.

Affectiones relatæ dicuntur , quæ conveniunt enunciationibus inter se comparatis.

II. Atque hæc sunt quatuor, conversio, equipollentia , subalternatio, & oppositio.

III. Conversio est transpositio prædicati in locum subiecti, & subiectum in locum prædicati, salvâ veritate.

I ¶. Conversio dicitur Aristoteli ἀντιστροφή. De eâ agit lib. I. Prior. cap. 2. In conversione debet servari veritas , quia conversio debet ex convertendâ sequi.

IV. Conversio dividitur in simplicem, in eam quæ est per accidens, & in eam quæ est per contrapositionem.

V. Conversio simplex est, in quâ servatur quantitas & qualitas enunciationis.

VI. Habêtque locum in universali negante , & particulari affirmante.

I ¶. Ut, Nullus homo est bestia; Ergò nulla bestia est homo: aliquis homo est albus ; Ergò aliquod album est homo.

VII. Conversio per accidens est , in quâ servatâ qualitate, diminuitur quantitas.

VIII. Habêtque locum in universali affirmante.

I ¶. Diminuitur quantitas, hoc est, universalis mutatur in particularem; ut, Omnis planta vivit : Ergò aliquod vivens est planta.

IX. Con-

IX. *Conversio per contrapositionem est, in quâ loco subjecti & prædicati, ponitur utriusque contradictio.*

X. *Habetque locum in universali affirmante.*

1. ¶. *Ut, Omne mortale est genitum: Ergò quod non est genitum, non est mortale.* Aristoteles omittit hanc speciem conversionis in Analyticis; ejus tamen meminit lib.2. Top. cap. 1. ubi eam vocat τὴν ἀντιπαλιν ἀπολέθουσαν ἐκ τῆς ἀντιφάσεως, id est, consecutionem reciprocam ex contradicentibus.

XI. *Particularis negans non convertitur.*

1. ¶. Non enim sequitur; *Aliquod animal non est homo: Ergò aliquis homo non est animal.* Si tamen particularis negans aliquando convertitur; ut, *Aliquis homo non est albus: Ergò aliquod album non est homo,* id fortuitum est, & materiæ imputandum: ut & illud, quòd universalis affirmans interdum converti possit servatâ quantitate, nimirum cùm constat terminis reciprocis; ut, *Omnis homo est animal rationale: Ergò omne animal rationale est homo.*

XII. *In conversione enunciationum debet totum prædicatum cum toto subjecto sedem commutare.*

1. ¶. Hoc est, quicquid ad prædicatum pertinet, debet reansferri in locum subjecti; & quicquid spectat ad subjectum, in locum prædicati. Ex. gr. hæc enuntiatio, *Aliquod templum est in urbe,* non debet converti in hanc, *Aligua urbs est in templo;* sed in hanc, *Aliquid, quod est in urbe, est templum:* quia prædicatum enunciationis convertendæ non est *urbs*, sed *esse in urbe*. Similiter prædicarum hujus enunciationis, *Omnis senex fuit puer;* non est *puer*, sed *fuit puer*. Itaque non est convertenda in hanc enunciationem, *Aliquis puer fuit senex;* sed in hanc, *Aliquis, qui fuit puer, est senex.*

2. *Conversio modalium fit ratione dicti, modo manente.* Enunciationes necessitatis convertuntur, ut puræ: universales negantes, & particulares affirmantes, simpliciter; universales affirmantes, per accidens, aut per contrapositionem; ut, *Necesse est omnem hominem esse animal: Ergò necesse est aliquod animal esse hominem;* vel, *Necesse est, quod non est animal, non esse hominem.*

3. *Unum hîc observandum est, ut enunciationes habentes modum necessitatis, sint necessariæ καὶ αὐτὲ, per se.* Si enim hanc

hanc necessitatem non habent, conversio est fallax; ut, *Necesse est omnem senem fuisse puerum*: Ergo necesse est aliquem, qui fuit puer, esse senem. Necesse est omnem doctum didicisse: Ergo necesse est aliquem, qui didicit, esse doctum, &c. Ejusmodi conversiones non cohærent; quia *senem fuisse puerum*, aut *doctum didicisse*, non est necessarium καὶ ἀπὸ τοῦ, sed tantum κατὰ τὴν. Conversio enunciationum modalium in cæteris modis, nullis certis regulis præcipi potest. Nam quæ Aristoteles tradit 1. *Prior. cap. 3.* plus habent difficultatis, quàm utilitatis.

XIII. *Equipollentia est enunciationum verbis discrepantium convenientia in sensu.*

1. **¶.** Equipollentia Græcè dicitur ἰσοδυναμία. Quæ de æquipollentia præcipi solent, præsertim à Scholasticis, magnam partem inutilia sunt iis qui artis Grammaticæ periti sunt. Siqua difficultas est, ea sita est in cognoscendâ æquipollentiâ enunciationum, situ particulæ negativæ discrepantium, sententiâ convenientium; aut enunciationum modalium, diversos modos habentium. Illarum æquipollentia continetur hisce quatuor versibus;

Non omnis, quidam non : omnis non, quasi nullus.

Non nullus, quidam : sed nullus non, valet omnis.

Non aliquis, nullus : non quidam non, valet omnis.

Non alter, neuter : neuter non, præstat uterque.

2. De modalium æquipollentiâ notentur hæ quatuor regulæ. 1. Contingens & possibile æquipollent, si eodem modo affirmentur aut negentur; ut, *Contingit esse, aut non esse*; &, *Possibile est esse, aut non esse*. 2. Necesse & impossibile æquipollent, si dictum in altero affirmetur, in altero negetur: ut, *Necesse est esse*; &, *impossibile est non esse*: aut, *Impossibile est esse*; &, *Necesse est non esse*. 3. Necesse & possibile æquipollent, si in altero modus & dictum affirmentur, in altero negentur; ut, *Necesse est esse*; &, *Non possibile est non esse*; aut, *Possibile est esse*, &, *Non necesse est non esse*. 4. Possibile & impossibile æquipollent, si in altero negetur modus; in altero affirmetur: ut, *Possibile est esse*, &, *Non impossibile est esse*: aut, *Impossibile est esse*, &, *Non possibile est esse*.

XIV. *Subalternatio est, quâ enunciationes particulares, & singulares universalibus subordinantur, ex iisque necessariò sequuntur non vicissim.*

1. ¶ Ex. gr. *Si omnis homo est mortalis, etiam aliquis homo, & hic aut ille, est mortalis; & Si nullus homo est quadrupes, etiam aliquis homo, & hic aut ille, non est quadrupes.*

2. In modalibus subalternatio non solum ratione dicti, sed etiam ratione modi consideratur. Subalternatio dicti eadem est in modalibus, quæ in puris. Modi possibile & contingens, subalternantur modis necesse & impossibile. Necesse enim includit adverbium semper; & impossibile, nunquam; quæ voces denotant universalitatem temporis. Contingens & possibile includunt aliquando; quæ est nota particularitatis in tempore.

CAP. XXXIII.

De Oppositione enunciationum,

THEOREMA I.

Oppositio enunciationum vel est κατ' ἀλήθειαν, secundum veritatem, vel κατὰ λέξιν μόνον, quoad vocem tantum, lib. 2. Prior. cap. 15.

II. Oppositio vera, est pugna enunciationum in affirmando & negando.

III. Pugnare dicuntur enunciationes, in quibus idem, de eodem, secundum idem, ad idem, eodem modo, & eodem tempore affirmatur & negatur.

I. ¶ Distinctio oppositionis traditur lib. 2. Prior. cap. 15. Oppositio vera vel est materialis, vel formalis. Oppositio materialis est, cum disparata, contraria, relata, aut privantia eidem subjecto tribuuntur, secundum idem, ad idem, eodem modo & eodem tempore. Hæc, quia est oppositio enunciationum ratione prædicati, pertinet ad themata simplicia, deque eâ actum est cap. 22. Ubi etiam explicatæ sunt conditiones legitimæ oppositionis. Oppositio formalis est pugna in affirmatione & negatione: de quâ agit Aristoteles cap. 7. de Interpret.

IV. Oppositio vera, vel est contrarietas vel contradiçtio.

V. Contrarietas est oppositio inter duas universales.

VI. Harum utraque non potest simul esse vera, sed potest simul esse falsa.

I. §. Ex.gr. utraque hæc enunciatio, *Omnis homo est justus*, *Nullus homo est justus*, falsa est. Sed neque hæc, neque ullæ alix contrariæ, possunt simul esse veræ: Quæ enim simul veræ sunt, non sunt verè oppositæ.

VII. *Contradictio est oppositio inter universalem & particularem; vel inter duas singulares.*

VIII. *Harum alterutra semper vera est, & altera semper falsa.*

I. ¶. Ut, *Omnis homo est justus*, *Non omnis homo est justus*; *Nullus homo est justus*, *Aliquis homo est justus*; *Aristides est justus*, *Aristides non est justus*. Harum enunciationum altera vera est, altera falsa: & in cæteris eadem ratio est. In enunciationibus singularibus de futuris contingentibus, non liquet quidem homini, utra duarum vera sit, utra falsa: sed hoc tamen liquet, non posse utramque simul veram, aut utramque falsam esse. Ex.gr. alterum verum est, ut, qui aleâ ludit, vincat, aut ut non vincat; sed utrùm vincet, necne, non potest ab homine definiri: quod tamen coram Deo definitum est.

IX. *Oppositio κατὰ λέξιν, sive apparens, vel est subcontrarietas, vel oppositio indefinita.*

X. *Subcontrarietas est inter duas particulares; oppositio indefinita, inter duas indefinitas.*

XI. *Utræque possunt simul esse veræ, sed non possunt simul esse falsæ.*

I. ¶. Subcontrariæ sunt, *Aliquis homo est justus*, *Aliquis homo non est justus*. Harum utraque vera est: nam Aristides fuit justus, Verres non fuit justus: sed non potest utraque simul esse falsa. Si enim subcontrariæ simul essent falsæ, contrariæ simul essent veræ, quia contrariæ subcontrariis, additâ aut demptâ negatione, contradicunt. Indefinitè oppositæ sunt, *Homo est justus*, *Homo non est justus*. In terminis essentialibus, aut repugnantibus, accensentur indefinitè oppositæ contradicentibus; ut, *Homo est animal*, *Homo non est animal*; *Homo est lapis*, *Homo non est lapis*. Altera enim semper vera est, altera falsa. Sed hoc non fit ob formam oppositionis, sed ob peculiarem conditionem materiæ.

2. Subcontrariæ dicuntur κατὰ λέξιν opponi, & non κατὰ ἁπλόγην, tum quia possunt simul esse veræ, tum quia non habent

habent idem subjectum. Cum enim dico, *Aliquis homo est justus*, *Aliquis homo non est justus*, non eundem hominem utrobique intelligo; aut si eundem hominem intelligo, jam erit contradictio singularium. Eadem est ratio indefinite oppositorum.

XII. Contradictio modalium consistit in affirmatione & negatione modi in eodem dicto.

I §. Ut, *Necesse est hominem esse animal*; *Non necesse est hominem esse animal*. Sic opponuntur, *impossibile*, *non impossibile*; *contingit*, *non contingit*.

XIII. Contrarietas modalium consistit partim in dicto, partim in modo.

XIV. Ratione dicti contrariæ sunt duæ enunciationes habentes modum necesse, aut duæ habentes modum impossibile, si in alterâ dictum affirmetur, in alterâ negetur.

I §. Ut, *Necesse est hominem esse animal*, *Necesse est hominem non esse animal*; *Impossibile est hominem esse lapidem*, *Impossibile est hominem non esse lapidem*.

XV. Ratione modi contrariæ sunt, enunciatio habens modum necesse, & altera habens modum impossibile, si dictum utriusque sit ejusdem qualitatis.

I §. Ut, *Necesse est hominem esse animal*, *Impossibile est hominem esse animal*.

XVI. Subcontrariæ sunt duæ enunciationes habentes modum possibile, aut modum contingit, si in alterâ dictum affirmetur, in alterâ negetur.

I §. Ut, *Possibile est aut contingit alcâ ludentem vincere*, *Possibile est aut contingit alcâ ludentem non vincere*.

XVII. Enunciationes exclusivæ & restrictivæ accipiunt contradictionem à negatione additâ particulis exclusivis aut restrictivis.

I §. Ut, *Sola fides justificat*, *Non sola fides justificat*; *Homo est mortalis quoad animam*, *Homo est mortalis, sed non quoad animam*.

XVIII. Contradictio enunciationum compositarum posita est in negatione, quæ pertinet ad nexum consequentis cum antecedente.

I §. Itaque hæc enunciatio, *Si Sinon miser est, vanus est*

& mendax, tali contradictione evertitur apud Virgilium, lib. 2. *Æneid.*

----Nec si miserum fortuna Sinonem

Finit, vanum etiam medacemque improba finget :
quæ sic resolvas, *Nec, si Sinon miser est, vanus etiam, & mendax est ;* hoc est, et si miser sit, non ideo tamen mendax est. Huic enunciationi, *Qui uxorem ducit, aut pulcram ducit aut deformem,* tali modo contradicitur, *Non aut pulcram aut deformem ducet.* Simili modo & hæc contradictoria sunt, *Maria fuit & mater Christi & expers peccatorum, Maria non fuit & mater Christi & expers peccatorum ;* hoc est, illa duo in Maria conjuncta non sunt. Item hæc, *Qualis rex, talis grex ; Non qualis rex, talis grex, &c.*

Cæterum quia difficile est enunciationibus modalibus, omnes hæc affectiones intelligere ; ut discentibus subveniremus, diagramma subjecimus, in quo enunciationum modalium æquipollentia, subalternatio & oppositio, uno intuitu spectandæ proponuntur.

DIA-

DIAGRAMMA.

Equipollentes.

PUR- Non possibile est non esse.
 PU- Non contingit non esse.
 RE- Impossibile est non esse.
 A. Necessesse est esse.

Subalterna.

Equipollentes.

A- Possibile est esse.
 MA- Contingit esse.
 BI- Non impossibile est esse.
 MUS. Non necesse est non esse.

Contrarie.

Contradictories.

Subcontraria.

Equipollentes.

I- Non possibile est esse.
 LI- Non contingit esse.
 A- Impossibile est esse.
 CE. Necessesse est non esse.

Subalterna.

Equipollentes.

E- Possibile est non esse.
 DEN. Contingit non esse.
 TU- Non impossibile est non esse.
 LI. Non necesse est esse (esse).

Explicatio Diagrammatis.

In hoc Diagrammate cernuntur quatuor classes enunciationum modalium, & in unaquaque classe quatuor enunciationes secundum quatuor modos. 1. Enunciationes ejusdem classis sunt æquipollentes. 2. Enunciationes primæ classis subordinantur enunciationibus quartæ classis; & enunciationes secundæ classis, enunciationibus tertiæ classis. 3. Enunciationes primæ & tertiæ, item secundæ & quartæ classis, sunt contradicentes. 4. Enunciationes tertiæ & quartæ classis sunt contrariæ vel ratione dicti, vel ratione modi. 5. Enunciationes primæ & secundæ classis sunt subcontrariæ. 6. Vocales vocum, quæ singulis classibus præfixæ sunt, denotant qualitatem dicti & modi:

A	} denotat	}	dictum & modum affirmatum.
E			dictum negatum & modum affirmatum.
I			dictum affirmatum & modum negatum.
U			dictum & modum negatum.

Atque hæc de thematicâ sive primâ parte Logices, quæ veluti materia est circa quam instrumenta Logica versantur, & ex quâ conficiuntur. Nam etsi hujus partis præcepta mentem nonnihil juvent in rerum cognitione comparandâ; præcipuè tamen faciunt ad instrumentorum effectiorem, quæ secundâ parte trademus.

Finis Libri Primi.


Institutionum Logicarum

LIBER SECUNDUS.

CAP. I.

De Definitione in genere, deque Definitione nominali.

THEOREMA I.

 Ostendam in primâ parte actum est de thematibus, quæ instrumentis Logicis tractanda sunt; deque affectionibus eorum, atque notionibus secundis, ex quibus instrumenta Logica conficiuntur: superest, ut in secundâ parte agamus de ipsis instrumentis, deque modo instrumenta conficiendi, quam inde Organicam initio appellavimus.

II. Instrumenta Logica sunt quatuor, definitio divisio, syllogismus & methodus: quorum, definitio & divisio, inserviunt tractandis thematibus simplicibus; syllogismus, complexis; methodus, utrisque.

COMMENTARIUS.

I. ¶. Mens nostra quadruplici defectu laborat, cum occupata est in investiganda rerum cognitione: Vel enim non assequitur propositæ rei essentiam, sed circa illius accidentia solum hæret, ac sensibiles notas; vel essentiam rei confuse tantum concipit, & ratione minimè distinctâ; vel in dubiis non reperit quid statuat, aut etiam statuit quod falsum est; vel denique non servat ordinem in commentando, qui cum natura rerum consentit. Hisce quatuor malis opponit Logica totidem remedia, quæ sunt quatuor illa instrumenta quæ jam recensuimus. Definitio exhibet menti essentiam rerum: divisio efficit cognitionem distinctam: syllogismus tollit animi incertitudinem & errorem circa thematâ complexa, methodus, α'ταξίαν sive confusionem.

III. Definitio est λόγος τῆς π' οὐσίας aut plenius, λόγος ὁ τοῦ π'

τὴν ἐν τῇ σημαίνων, hoc est, oratio declarans quid sit id quod quaeritur.

I. ¶ Harum definitionum prior exstat lib. 2. Post. cap. 10. ibique definitio dicitur ὅρος, id est, terminus: altera traditur lib. 1. Top. cap. 5. quo loco nuncupatur δεισμός, sumptā Metaphorā à re rustica. Ut enim termini ac limites, quos ὄρας Græci dicunt, agrum δεικνύσσι, id est, limitant, & à vicinis agris distinguunt: ita etiam definitio naturam rei circumscribit, & ab aliis rebus, differentiis interpositis, discernit.

2. Definitio dicitur λόγος, nempe vel internus, qui mente formatur tantum, vel externus, qui etiam ore pronuntiatur: præcipue tamen internus. Quia definitio formari potest sine oratione, quæ est λόγος externus, sive προφορικὸς sine cogitatione, quæ est λόγος internus, sive ἐνδιάθετος, formari non potest. Λόγος constat duabus minimùm vocibus. Itaque explicatio nominis per aliud nomen notius (veluti si quis machæram dicat esse gladium) non potest propriè definitio dici: debet tamen referri ad definitionem, ut postea liquebit. Causa cur definitio debeat esse oratio, hæc est. Ea est mentis nostræ imbecillitas, ut uno conceptu non possit rei essentiam distinguere & apprehendere. Huic imbecillitati ut occurrat definitio, distrahit rem in partes, eamque tradit menti pluribus conceptibus intelligendam, singulasque partes suis appellat nominibus.

3. Adhibetur autem in definitione (inquit Aristoteles lib. 1. Top. cap. 5.) aut oratio pro nomine, aut oratio pro oratione. hoc est, Definitum interdum unâ voce proponitur, veluti cum definitur homo, eclipsis, tonitru, aut tale quid: interdum pluribus, sive oratione; veluti cum definitur, quid sit minuere majestatem, incertus possessor, conditio indebiti, sylva caedua, &c.

IV. Definitio alia est nominis, alia rei.

V. Definitio nominis est, quæ declarat, τὴν τὸ λεγόμενον ὅτι, quid sit illud quod dicitur: vel τὴν σημαίνον τὸ ὄνομα, quid significet nomen.

VI. Idque vel etymologiā, vel voce conjugatā, vel voce synonymā.

I. § Harum definitionum prior habetur, lib. 1. Post. cap. 2. altera,

altera, lib. 2. cap. 10. Cæterum Aristoteles distribuit definitionem in ὀνομαστικήν, nominalem, & ἐπὶ οὐσίᾳ, essentialem. Sed non videntur omnes species definitionum hisce duobus membris contineri. Sunt enim definitiones quædam, quæ neque nomen rei declarant, neque essentiam exprimunt, nempe definitiones accidentales.

2. Definitio nominalis est triplex : Prima est definitio κατ' ἐτυμολογίαν, quæ nominis significationem declarat ex suâ origine ; ut, *Triangulum est, quod habet tres angulos: Philosophia est φιλοσοφία τῆς σοφίας*, id est, *amor & studium sapientiæ*. Interdum accidit, ut ex genere & nominis etymologiâ contextatur ipsa definitio rei; ut, *Aritmetica est scientia numerorum*. Secunda est definitio κατ' ὁμοιοπαρίαν, quæ nomen declarat voce conjugatâ ; ut, *Qualitas est; à quâ quales aliqui dicuntur: Vir bonus est, qui virtute præditus est*. Tertia est definitio κατ' ἀνάλυσιν, cum vox obscura declaratur unâ aut pluribus vocibus notioribus; ut, *Καλὸν ὄζει τὸ πρέπον*. Sic Agellius *apludam*, vocem priscam, interpretatur *frumenti fursurem* : & vocem *flores* apud Cæcilium, *vinī facem ex vinaceis expressam* ; sicuti *fraces*, ex oleis, & vox *bovinator*, quæ est apud Lucilium exponitur *tergiversator*. Quanquam, cum vox unâ voce synonymâ explicatur, satis improprie definitio dicitur ; cum ejusmodi explicatio non sit λόγος, debet tamen ad definitionem revocari, ut autor est Aristoteles lib. 1. Top. cap. 5.

CAP. II.

De Definitione perfectâ.

THEOREMA I.

Definitio rei est, quæ explicat quid res ipsa sit.

II. Estque vel perfectâ, vel imperfectâ.

III. Definitio perfectâ est, quæ rei essentiam attributis essentialibus explicat perfecte.

IV. Imperfectâ est, quæ rem non explicat attributis essentialibus, aut saltem non explicat perfecte.

1. ¶ Plerique confundunt definitionem perfectam cum essentiali, & imperfectam cum accidentali; sed imperité. Nam

etsi omnis perfecta definitio essentialis sit, & omnis definitio accidentalis imperfecta; non tamen omnis imperfecta definitio accidentalis est. Nam definitio, quæ essentialiam proprii accidentis explicat genere & subjecto, sine mentione causæ proximæ (veluti; cum eclipsis definitur *defectus luminis in Lunâ*) ab Aristotele *lib. 2. Post. cap. 10.* pro imperfectâ definitione habetur; nec tamen accidentalis est.

V. *Leges perfectæ definitionis præcipuæ sunt sex. Prima lex; Definitiones debent esse breves.*

1. ¶ Hæc lex præcipitur *lib. 2. Post. cap. 13. & lib. 6. Top. cap. 3.* Cæterum breves dicuntur definitiones, in quibus neque minus dicitur quàm necesse est, neque quicquam otiosum est. Ut autem aliquid in definitione otiosum sit, tribus potissimum modis contingit. Primò, cum tautologia committitur. Tautologia non solum committitur, cum idem aliâ voce synonymâ repetitur; veluti, si homo definiatur *animal rationale, & intelligendi potestate præditum*: sed etiam, cum in speciei definitione exprimitur, quod ponendum erat in definitione generis, veluti, si cæcitas definiatur *privatio visus qui naturaliter debebat inesse*. Nam illud, *qui naturaliter debebat inesse*, redundat, & privationis appellatione per se continetur. Secundò, otiosum est in definitione, quod definitum non distinguit ab ullâ aliâ re; ut transcendentia: veluti, si virtus definiretur *res propter quam honestus aliquis dicatur*. Hoc tamen modo definienda sunt summa genera. Tertiò, otiosum censetur in definitione, quo ablato, definitio reliqua nihilominus propria est, rei quæ essentialiam explicat: veluti, si homo definiatur *animal rationale capax disciplinarum*. Nam etiamsi illud, *capax disciplinarum*, detrahatur, reliqua tamen definitio homini propria est, ejusque essentialiam explicat.

VI. *Secunda; Definitiones debent esse perspicuæ.*

1. ¶ Perspicuitas definitionum, teste Aristotele *lib. 6. Top. cap. 2.* unde hæc lex desumpta est, debet esse tanta, ut statim appareat quid sit illud quod definitur: imò ut ex eâ contrariæ rei definitio possit colligi. Omnia ergò vitanda sunt in definitione, quæ in verbis obscuritatem pariunt; ut insolentia, homonymia, metaphora. Si tamen vox propria non suppetit, aut si vox aliqua utilior est in metaphoricâ, quàm in propriâ signi-

significatione, nihil vetat vocem metaphoricam in definitione adhiberi. Itaque cum Logica à multis definitur *ars bene differendi*, perperam rejicitur ista definitio ob metaphoram: cum multò rarius *differendi* vox propriè usurpetur, quàm in hâc significatione metaphoricâ. Sed alius est fortè, quod in illâ definitione meritò reprehendi possit.

VII. *Tertia; Definitiones debent cum definito reciprocari.*

I. ¶ Hoc est, quicquid in definito continetur, debet contineri in definitione; & quicquid continetur in definitione, debet contineri in definito. Quare, cum JC^{us} jus naturale definiunt, quod natura omnia animantia docuit; definitio nimis laxa est. Jus enim inter solos homines consistit; brutis non competit. Contrà, cum Logica definitur *ars differendi*, live *argumentandi*; definitio nimis angusta est. Logica enim non differendi solùm, sed definiendi etiam, dividendi, & ordinandi ars est: quæ omnia differendi notione non satis aptè continentur.

VIII. *Quarta; Definitiones debent esse affirmatæ.*

I. ¶ Hic canon traditur lib. 6. Top. cap. 6. isque nititur hâc ratione, quòd definitiones negatæ non tam explicent quid res sit, quàm quid non sit. Quare, cum Aristoteles duas accidentis definitiones proposuisset lib. 1. Top. cap. 5. posteriorem priori præfert; quòd illa negatione generis, speciei, proprii, & accidentis, esset concepta. Sæpe tamen cogimur, vel ob vocabulorum inopiam, vel ob mentis nostræ imbecillitatem, vel ob rerum imperfecti nem, adhibere definitiones negatas: veluti cum definimus angelum *substantiam finitam corporis expertem*; bestiam, *animal irrationale*; cæcitatem, *privationem visus*. Et tum sunt definitiones imperfectæ.

IX. *Quinta; Definitiones debent sine copulatione aut disjunctione partium proponi.*

I. ¶ Definitio enim est explicatio unius essentiae; ideòque debet esse una & simplex oratio. At particulæ copulativæ & disjunctivæ plura connectunt. Ex. gr. homo non debet definiri *animal terrestre & bipes*, sed *animal terrestre bipes*; ut colligitur ex cap. 5. de Interpret. & ex cap. 4. lib. 2. Post. Similiter numerus non debet definiri *multitudo par vel impar* (hæc enim numeri divisio est) sed *unitatum collectio*. Hujusmodi

tamen definitiones sæpe ferendæ sunt, non quia perfectæ sunt, sed quia non dantur perfectiores : veluti cum *lib. 2. Phys.* natura definitur *principium & causa motus & quietis* : & enunciatio, *cap. 4. lib. de Interp.* Oratio verum aut falsum pronuncians.

X. *Sexta, definitiones debent constare ex attributis prioribus & notioribus simpliciter, atque adeo ex indemonstrabilibus.*

I. ¶ Hunc canonem pluribus explicat & confirmat Philosophus *lib. 6. Top. cap. 4.* in hanc ferè sententiam. Definitio cognoscendi causâ traditur : at non ex quibusvis cognoscimus, sed ex prioribus & notioribus. Cum autem definitio constare possit vel ex iis quæ nobis notiora sunt, vel ex notioribus simpliciter ; conandum est, ut ex prioribus & notioribus simpliciter posteriora declarentur potius, quàm contrâ : quia hic definiendi modus ad scientiam maximè accommodatus est. Attamen apud eos qui ejusmodi definitiones non capiunt, necesse est fortè definitiones conficere ex iis quæ illis nota sunt potius, quàm ex notioribus simpliciter. Sed ejusmodi definitiones non declarant rei essentiam ; ideoque imperfectæ sunt, nisi idem nobis notius sit, & notius simpliciter. Quæ cum ita sint, facilè intelligitur, neque idem definiti posse per seipsum, neque oppositum per oppositum, nisi sola relata. Neque verò ex notioribus solùm, sed etiam ex indemonstrabilibus constare debet definitio perfecta. Definitio enim est principium demonstrationis, ut dicitur *lib. 1. de Anima cap. 1.* Et *lib. 1. Post. cap. 1.* docetur principia demonstrationis esse immediata ; quod certè fieri non posset, si partes definitionis per priores causas possent demonstrari.

XI. *Definitio perfecta constat genere proximo, & differentiâ specificâ.*

I. ¶ Hic canon præcipitur *lib. 6. Top. cap. 1.* Si tamen proximum genus nomine caret, ejus loco adhibetur genus remotum cum differentia, quæ genus remotum limitat, & ex eo genus proximum efficit. Sic, cum animal definitur *substantia corporea vivens sentiens*, loco generis proximi ponitur *substantia corporea vivens* ; differentia specifica est *sentiens*,

XII. *Differentia substantiarum sumitur à formâ ; aut si formam non habeant, eâve ignota sit, proprietas adhiberi solet loco formæ.*

I. ¶ Sic cùm homo definitur *animal rationale*, differentia petita est ab hominis formâ, quæ est anima rationalis. Sed quia substantiæ incorporeæ non habent formas, & substantiarum corporearum formæ specificæ nos latent, quia per se non incurrunt in sensus nostros, loco formarum sumenda est aliqua proprietas; ut, *Angelus est substantia incorporea: Canis est bestia latrans.*

XIII. Differentiæ accidentium non sumuntur ab eorum forma aut essentia, sed à respectu ad subiectum, obiectum, causam efficientem aut finalem, aut aliquid tale quod in eorum essentia non continetur.

I. ¶ Hæc est causa, cur Aristoteles lib. 6. Metaph. cap. 5. dixerit substantias *ἁπλῶς*, & *ὑπὸ τῶς*, id est, simpliciter ac primò, definiri; accidentia, *κατὰ τὴν*, & *ἐν τῷ ἁπλῶς*, h. est. secundùm quid ac secundariò: & accidentium definitiones esse *λόγους ἐκ προσδέσεως*, hoc est, orationes ex additione: quia, quæ eorum generi in definitionibus adduntur, extra essentiam sunt, & ferè alterius categoriæ.

XIV. Proprietates definiuntur genere, subiecto, & causâ proximâ; eaque vel efficiente, vel finali, vel utrâque.

I. ¶ Causâ efficiente; ut, *Eclipsis est defectus luminis in Luna, ob terram inter Solem & Lunam è diametro interpositam: Tonitru est sonus fractæ nubis ob ignem oppressum.* Finali; ut, *Sensus est facultas naturalis in animali, ad judicandum de singularibus: Appetitus est facultas naturalis in animali, ad consequendum quod sibi bonum; vel vitandum quod malum videtur.* Vel utrâque; ut, *Respiratio est attractio & expulsio aeris reciproca, à pulmonibus facta, ad cordis refrigerium.* Subiectum in definitione propriorum interdum reticetur, quia vel in genere, vel in causâ continetur; ut, *Memoria est sensus internus conservans imagines rerum cognitarum.* Hic non exprimitur memoriæ subiectum, nempe *animal*, quia in voce sensus continetur, in ejusque definitione exprimebatur. Item, *Risibilitas est facultas naturalis ridendi, orta ab animâ rationali.* Non dixi, *in homine*; quia satis intelligitur risibilitatem esse facultatem hominis, cùm dicitur orta ab animâ rationali.

XV. Accidentia non propria, præter genus, in definitione,

loco differentiae assumunt, vel subiectum, vel obiectum; vel causam efficientem aut finalem, vel aliqua ex his combinata.

I. ¶. Modus definiendi accidentia non propria, vix potest certis regulis contineri. Quædam definiuntur genere & subiecto; ut, *Simitas est curvitas nasi*. Quædam genere & obiecto; ut, *Physica est scientia corporis naturalis*. Hoc modo definiuntur scientiæ theoreticæ. Quædam genere & fine; ut, *Grammatica est ars bene loquendi*: vel etiam genere, fine, & obiecto: ut, *Logica est ars conficiens instrumenta, iisque dirigens intellectum in cognitione rerum*: *Liberalitas est virtus servans mediocritatem in dandâ & accipiendâ pecuniâ*. Hoc modo definiuntur artes & habitus morales. Quædam denique definiuntur genere & causâ efficiente; ut, *Albor est color oriundus ex prædominio perspicui*: *Sonus est qualitas patibilis, orta ex plagâ acris inter duo corpora collisi*. Hoc modo definiuntur qualitates patibiles, si non sint propriæ. De cæteris accidentium generibus vix dari possunt certa præcepta: singula quomodo definienda sint, usu dicendum est, & exemplis probatorum autorum, quæ Logicæ studiosus in eum finem colliget.

XVI. Partes definitionis ita collocandæ sunt, ut egenus differentiam præcedat, & vox quæque sequens præcedentem limitet.

I. ¶. Ità docet Aristoteles lib. 2. Post. cap. 13. Ex. gr. animal non debet definiri *sentiens animatum corpus*, sed *corpus animatum sentiens*.

CAP. III.

De Definitione imperfectâ.

THEOREMA I.

Definitio imperfecta, quæ *ὑποτάξις*, hoc est, descriptio, proprio vocabulo vocatur, vel est necessaria, vel arbitraria.

II. Definitio imperfecta necessaria est, cum definitum non est capax perfectæ definitionis, vel cum ob mentis imbecillitatem, rei definiendæ essentiam non possumus assequi, vel denique cum desunt vocabula idonea, quæ in accuratâ definitione requiruntur.

III. Per-

III. Perfectam definitionem respuunt, 1, res infinitæ : 2, quæ non habent veram essentiam : 3, quæ non habent essentiam perfectam : 4, quæ non habent essentiam per se unam : 5, denique, quæ non collocantur immediatè sub aliquo genere.

1. ¶ 1, Res infinitæ ; ut, Deus. 2, Quæ non habent veram essentiam ; ut, entia rationis, res fictæ, simulacra rerum, privationes. 3, Quæ non habent essentiam perfectam ; ut, partes, principia rerum, res in fieri, sive res imperfectæ. 4, Quæ non habent essentiam per se unam ; ut, concreta, aggregata, complexa. 5, Quæ non sunt sub aliquo genere ; ut, transcendentia & summa genera : aut saltem non immediatè ; ut, individua : Hæc enim continentur immediatè sub specie; eaque mediante, sub genere.

IV. Ob imbecillitatem mentis nostræ perfectè defini nequeunt substantiæ incorporeæ, & pleræque corporearum substantiarum specialissimæ species.

1. ¶ Nam species & genera subalterna utcunque defini possunt ; ut, *Animal est corpus vivens sentiens*. In definitione corporearum substantiarum infimæ speciei, loco differentię essentialis adhibetur proprietas, ut paulò antè diximus. Incorporearum substantiarum proprietates nobis etiam ignotæ sunt. Homo tamen, etsi sit species infima, satis rectè definitur *animal rationale*.

V. Cùm idonea vox desideratur, ejus loco adhibentur duæ pluresve voces coniunctione Grammaticâ colligatæ.

1. ¶ Hujusmodi definitiones peccant in quintam definiendi legem, theor. 9. cap. superioris propositam quod vide.

VI. Definitio imperfecta arbitraria est, cùm rejectâ definitione perfectâ, rem propositam crassè delineamus, vel delectationis ergò, vel ut ad aliorum captum definitionem nostram accommodemus.

VII. Imperfectæ definitionis variæ sunt species, quarum aliæ aliis tantò propius ad perfectam definitionem accedunt, quantò magis conveniunt cum legibus definiendi paulò antè traditis.

VIII. Præcipuæ species hæc sunt : Prima est, cùm accidens proprium definitur causâ duntaxat externâ.

1. ¶ Ut,

I. ¶ *Eclipsis est interpositio terræ inter Solem & Lunam ; Mors est extinctio calidi vitalis. Hæc vocatur definitio ætæ ætæ, live causalis, lib. 2. Post. cap. 10.*

IX. *Secunda, cum accidens proprium definitur genere & subiecto, sine mentione causæ.*

I. ¶ *Ut, Eclipsis est defectus luminis in Lunâ : Mors est interitus viventis. Ex hac definitione conjuncta cum definitione causali, constituitur proprii accidentis perfecta definitio ; ut, Eclipsis est defectus luminis in Lunâ, ob terram inter Solem & Lunam è diametro interpositam : Mors est interitus viventis, ob extinctum calorem vitalem.*

X. *Tertia, quæ constat ex genere & proprietate unâ, aut pluribus.*

I. ¶ *Ut, Canis est bestia latrans : Homo est animal risibile: Magnes est lapis trahens ferrum. Hoc modo definiuntur substantiæ quarum essentielles differentię nos latent, ut antè dictum est.*

XI. *Quarta, quæ constat enumeratione partium aut specierum.*

I. § *Ut, Logica est ars definiendi, dividendi, argumentandi & ordinandi : Jus civile Romanum est id, quod legibus, senatusconsulto, rebus judicatus, juris-prætorum autoritate, more ætæque & æqualitate constat ; ut Cicero ait in Topicis.*

XII. *Quinta, quæ constat remotione oppositi.*

I. ¶ *Tale est illud Horatii,
: Virtus est vitium fugere, & sapientia prima
Stultitiâ caruisse.*

XIII. *Sexta, cum relatum definitur per relatum, sine mentione generis ac fundamenti.*

I. ¶ *Ut, Dominus est, qui habet servum ; pater, qui liberos ; præceptor, qui discipulos.*

XIV. *Septima, quæ constat coacervatione circumstantiarum, & adjunctorum communium.*

I. ¶ *Atque hæc propriè est descriptio : licet jam usus obtineat, ut omnis imperfecta definitio descriptio vocetur, Ex. gr. Homo est animal bipes, implume, erecto vultu, manibusque præditum. Hæc definiendi formula usitata est Historicis & Poetis, in describendis personis, factis, locis, & similibus rebus singularibus.*

2. Boetius alias addit definitionis imperfectæ species : ut est 1. definitio *κατὰ μεταφοράν* veluti, cum adolescentia definitur *flos ætatis*; senectus, *hycms vitæ*; somnus, *imago mortis*. 2. *κατ' ἐπαινον* quò spectant elogia, quæ rebus laudis aut vituperii causâ tribuuntur; veluti, cum Historia à Cicerone lib. 2. de Orat. describitur *testis temporum, lux veritatis, vita memoria, magistra vitæ, nuncia vetustatis*; cum describitur Philosophia à Platone, *ὁμοιωσις τῆς Θεοῦ ὅτιον διὰ τὸν ἀνθρώπον*. id est, *similitudo cum Deo*, quanta esse in homine potest: aut contrà, cum voluptas dicitur *esca malorum*; ira *furor brevis*, aut *voluntaria insania*; *καὶ ὁ δὲ ἀνθρώπος*. 3. *κατὰ περὶ φασιν* ut, *Homerus est Trajani belli scriptor*. 4. *κατὰ διαφοράν* ut, *Odium est, quod ira diuturnius est*. 5. *ὡς ἐν τῷ πᾶσι* ut, *animal est veluti homo, equus*. 6. *κατ' ἐνδεῖαν πλῆρως ἢ τῆς αὐτῆς γένους* ut, *deunx est, cui deest unica ut sit as*. Sed hæc omnia talia sunt, ut vix, ac nè vix quidem, nomen definitionis mereantur.

CAP. IV.

De modo investigandæ definitionis.

THEOREMA I.

Definitiones vel divisione investigantur, vel inductione, vel demonstratione, vel etymologiâ, derivatione, vel denique ex contrarii definitione colliguntur.

I. ¶ Divisione investigatur definitio, cum factâ divisione summi generis, & subordinatarum specierum, sub quibus definitum continetur, usque ad ipsum definitum, colliguntur omnia definiti attributa essentialia, ex quibus definitio formanda est. Queratur hâc methodo definitio hominis. Homo est substantia: verum quia etiam angelus substantia est; ut liqueat, quomodo homo ab angelo differat, dividi debet substantia in corpoream & incorpoream. Homo corpus est, angelus incorporeus. Sed & lapis corpus est: ut ergò homo à lapide separetur, dividenda est substantia corporea in animatam & inanimam. Homo est substantia corporea animata, lapis inanimis. Sed plantæ quoque animatæ sunt. Dividatur,

tur ergò substantia corporea animata in sentientem & sensus expertem. Homo sentit, planta non item. Sed equus quoque sentit, aliæque bestię. Dividatur ergò sentiens in rationale & irrationale. Hic jam subsistendum est, cum constet omnem & solum hominem rationalem esse. Ex hac divisionum serie colligitur hæc hominis definitio; *Homo est substantia corporea, vivens, sentiens, rationalis*; aut, nè in definitione speciei ponatur definitio generis, *animal rationale*. Hanc methodum tradit Arist. *lib.2. Post.cap. 13.* ibique monet, in hac divisionum serie, nullam differentiam essentialem prætereundam; addo ego, & nullam accidentalem adhibendam esse.

2. Per inductionem investigatur definitio, cum collatis attributis essentialibus eorum quæ continentur sub definito, & rejectis iis quæ singulis sunt propria, definitio conficitur ex reliquis quæ omnibus communia sunt. Quæratur definitio animalis. Sub animali continetur homo, equus, leo, &c. hominis, equi, leonis essentialia attributa sunt, *substantia corporea, vivens, sentiens*. Hæc omnibus communia sunt. Hominis proprium est, *esse rationalem*; *irrationalem esse*, equo & leoni commune est; proprium equo, *hinnire*; leoni, *rugire*. Ut ergò invenias animalis definitionem, rejicienda sunt *rationale, irrationale, hinnire, rugire*, ut angusta nimis. Ex reliquis colligitur ejusmodi definitio; *Animal est substantia corporea, vivens, sentiens*. Hanc methodum tradit Aristoteles loco jam proximè citato.

3. Demonstratio *δὲν* solum terminorum *δῖον* differt à perfectâ definitione accidentis demonstrandi, ut dicitur *lib.1. Post.cap.8.* Itaque quamvis demonstratio non sit *τὸ πᾶσι*, sit tamen *τὸ πᾶσι* per demonstrationem manifestum, ut autor est Philosophus *lib.2. Post.cap.8.* Nihil enim facilius est, quàm demonstrationem *δὲν* convertere in definitionem affectionis demonstrandæ. Quod quâ ratione fieri debeat, dicetur *cap.23. hujus libri, theor. 14.*

4. Etymologia sæpe differentiam rei supplet, quæ cum genere constituat definitionem. Sic, quia Arithmetica dicta est *ἀπὸ τῆς ἀριθμῆς*, id est, à numero, colligitur Arithmeticam esse scientiam numerorum; & quia Physica dicta est, *ἀπὸ τῆς φύσεως*, id est, à naturâ, colligitur Physicam esse scientiam rerum naturalium.

5. De-

5. Derivatione colligitur definitio, cum ex definitione unius conjugati colligitur definitio alterius. Πολλὰ κίς αἱ ἔξες, = inquit Aristoteles, *ᾗ καὶ ὄνται ἀπὸ τῆς ὑποκειμένης* id est, *Sæpe innotescit habitus ex subjectâ materiâ*: sæpe etiam vice versâ. Sic colligit lib. 6. Eth. cap. 10. definitionem prudentiæ ex definitione prudentis.

6. Ex definitione unius contrarii colligitur definitio contraria alterius. Contrariorum enim est eadem scientia. Itaque cum Aristoteles lib. 3. Eth. cap. 1. definivisset ἀέσιος, quod *per vim aut per ignorantiam fit*; cumque per vim fieri dixisset, *cujus principium externum est, atque ejusmodi, ut nihil ad illud conferat, qui agit, aut patitur*; inde colligit ἐκείσιον esse, *cujus principium est in eo qui agit, factique circumstantias non ignorat.*

CAP. V.

De Divisione, ejusque speciebus ac legibus.

THEOREMA I.

Divisio alia est nominis, alia rei.

II. Divisio nominis est, enumeratio significationum homonymi vocabuli, aut sententiarum ambiguae orationis.

I. §. Ut, si quis recenseat significationes juris, carnis, mali, &c. aut si quis distinguat hanc orationem, *Aio te Æacida Romanos vincere posse*. Divisio nominis non est propriè dicta divisio, sed enumeratio; & frequentius *distinctio* appellatur, quàm divisio.

III. Divisio nominis, sive distinctio, in principio disputationis adhibenda est.

I. ¶. Idque, ut κατ' αὐτὸ τὸ πρῶτον, καὶ μὴ πρὸς τὸ ὄν, hoc est, *adversus rem, & non adversus nomen*, instituat disputationem. Accidit enim, ut non eodem cogitationem dirigat, qui responderet, & qui interrogat; cum aliquid in oratione ambiguum est, ut ait Aristoteles lib. 1. Top. cap. 8.

IV. Divisio rei, quæ est propriè dicta divisio, est explicatio totius per partes.

V. Estque vel per se, vel per accidens.

VI. Divisio

VI. *Divisio per se est, quâ dividitur totum in partes quæ ipsi per se insunt.*

VII. *Divisio per accidens est, quâ dividitur totum in partes quæ ipsi per accidens insunt.*

I. ¶ Ex. gr. cùm animal dividitur in hominem & bestiam, aut in animam & corpus, est divisio per se : quia homo & bestia per se sub animali continentur ; & animal ex corpore & animâ per se componitur. At cùm homines dividuntur in servos & liberos, in bonos & malos ; divisio est per accidens : quia non ipsi homines per se dividuntur, sed status ac conditio hominum, aliâve accidentia, quæ hominibus conveniunt.

VIII. *Divisio per se est quadruplex : Alia est divisio totius universalis, sive generis in species : alia totius formalis, sive definiti in partes definientes, quæ sunt genus & differentia : alia totius essentialis, sive compositi in partes componentes, quæ sunt materia & forma : alia denique totius integrati in partes integrantes. Atque hac peculiari nomine Partitio nominatur.*

I. ¶ Ex. gr. cùm animal dividitur in hominem, & bestiam ; aut elementum, in ignem, aerem, aquam, & terram ; aut virtus moralis, in justitiam, fortitudinem, temperantiam, &c. divisio est totius universalis, sive generis in species. Cùm definitio hominis in partes resolvitur, sive cùm animal & rationale dicuntur esse partes hominis, sive definitionis humanæ essentia, dicitur divisio totius definiti, sive formalis. Cùm homo dividitur in corpus & in animam rationalem, est divisio totius compositi, sive essentialis. Huc referri debet omnis distinctio rerum in materiale & formale ; veluti cùm vocabuli materiale dicitur esse vox ; formale, significatio. Tandem cùm homo, sive corpus humanum, dividitur in tres ventres, & artus ; annus, in duodecim menses ; regnum, in suas provincias, numerus major, in plures minores ; Logica, in thematicam & organicam, est divisio totius integrati, sive partitio.

IX. *Divisio per accidens est quadruplex, nimirum vel causa per effecta, vel effecti per causam efficientem, materialem, aut finalem, vel subjecti per adjuncta, vel adjuncti per subiecta.*

I. § *Causa per effecta ; ut, plantæ aliæ calefaciunt, aliæ frige-*

frige faciunt, aliæ exsiccant, aliæ humectant : syllogismus alius fidem efficit , alius opinionem , alius scientiam. *Effecti per causam efficientem* ; ut, testimonia alia divina sunt, alia humana : *per causam materiale* ; ut statux aliæ sunt ex ære, aliæ ex marmore , &c. viventia alia ex semine gignuntur , alia ex putri materiâ : *per causam finalem*, ut, homines alii sunt *ἐπὶ τὴν ἀπολαυστικὴν*, id est, voluptarii ; alii *ἐπὶ τὴν χρηματικὴν*, id est, pecuniæ studiosi ; alii *ἐπὶ τὴν θεωρητικὴν*, id est, speculationibus dediti ; alii *ἐπὶ τὴν πρακτικὴν*, id est, propensi ad res gerendas. Divisio effecti per causam formalem , est divisio per se : forma enim, si diversa sit , diversas species constituit. Est etiam divisio per se, cùm accidens proprium dividitur per causam efficientem aut finalem proximam : Sic morbi specie differunt , qui diversam habent causam proximam sive *συνεκρικὴν* : ut, febris & pleuritis, &c. *Subiecti per adjuncta* ; ut , homines alii sunt liberi , alii servi ; alii docti, alii indocti : sonus alius est gravis, alius acutus : numerus alius est par, alius impar : charitas alia est erga Deum , alia erga proximum : flores alii sunt verni, alii æstivi : animalia vel sunt terrestria, vel aquatilia, vel amphibia. *Divisio subiecti per adjuncta* , non raro est divisio per se ; ut, sensus externus vel circa calorem versatur , vel circa sonum, vel circa odorem, vel circa saporem , vel circa qualitates tactiles. *Adjuncti per subiecta* ; ut, vitia alia animi sunt, alia corporis : virtutes aliæ sunt in intellectu, aliæ in appetitu.

V. *Leges bonæ divisionis præcipuæ sunt septem. Prima lex, Partes debent in toto consentire.*

I. ¶ Itaque vitiosa est divisio hominum in vivos & mortuos, veros & pictos ; quia homines mortui aut picti non sunt homines, nisi æquivocè. Similiter vitiosa est divisio animalium in mortalia & immortalia ; quia nullum animal immortale est.

XI. *Secunda, partes debent inter se opponi.*

I. ¶ Τοῖς ὑποκρινέουσιν (inquit Aristoteles, lib. 1. de part. animal. cap. 3.) *χρὴν διαπεῖν*, id est , *oppositis dividendum est*. Vitiosa ergò divisio est, cùm aut partes non differunt ; veluti cùm voluptas dividitur in delectationem & gaudium ; aut cùm pars altera in alterâ continetur ; ut, si animal divideretur in mortale & rationale. Optima, quidem ea divisio est , quæ
constat

constat partibus affirmatis : sæpe tamen ob mentis nostræ imbecillitatem , aut vocabulorum inopiam , *ἐπί τε ἀπὸ τοῦ αἰσθητοῦ*, hoc est, privatione oportet dividere ; veluti cum corpus dividitur in animatum & inanimatum.

XII. *Tertia, In divisione sumendæ sunt partes proximæ & immediatæ.*

1. ¶ Ex. gr. non debet vivens statim dividi in plantam, hominem & bestiam, sed prius in animal & plantam, & animal deinde in hominem & bestiam, & sic porro : vide lib. 2. Post. cap. 13.

XIII. *Quarta, Singule partes debent minus continere quàm totum.*

1. ¶ Totum enim majus est suâ parte. Si una pars toti æqualis sit, altera erit superflua , ac proinde vel non differet ab alterâ, vel cum toto non consentiet.

XIV. *Quinta, Partes universæ nec plus nec minus continere debent quàm totum.*

1. ¶ Si plus contineant, erit aliquid in divisione superfluum, & toti dissentaneum ; si minus, divisio erit mutila : ut, si ritus dividas in pios & impios. Omittuntur enim hæc divisione ritus mediæ naturæ, ut campanæ pulsu populum ad sacras conciones convocare, &c.

XV. *Sexta, Divisio debet constare partibus, quantum natura rei patitur paucissimis ; & si fieri commodè possit, duabus.*

1. ¶ Quânto enim partes pauciores sunt, tantò magis & manifestius opponuntur , meliusque memoriæ mandantur. Non tamen semper affectanda est *διχομία*, sive bimembris divisio. Sæpe enim totius dividendi natura dichotomiam respuit. Divisio totius definiti & compositi semper debet esse bimembris. Divisio generis membrorum paucitate commendatur sed non semper potest esse bimembris. In divisione totius integralis, aut in divisione per accidens, dichotomiam semper quærere, accuratæ cujusdam vanitatis est.

XVI. *Septima, Modus dividendi adhibendus est, nè subdivisionum numerus nimium crescat.*

1. ¶ Idem enim vitii habet (inquit Seneca Epist. 89.) nimia, quod nulla divisio : simile enim confuso est , quod in pulverem usque sectum est. Atque hæc de definitione & divisione. Sequitur syllogismus.

CAP. VI.

De Syllogismi Definitione & Partibus.

THEOREMA I.

ΣΥΛΛΟΓΙΣΜΟΣ ὁτι λόγος, ἐν ᾧ τὸ δέναν πῶν ἐπεὶ π ἢ
 καὶ ἄλλαι εἰς ἀόριστον συλλαβεῖται τῷ τῷ τῷ τῷ. hoc est,
 syllogismus est oratio, in quâ quibusdam positis, diversum quid
 à positis, propter ea quæ posita sunt, necessario sequitur.

1. ¶ Hæc definitio exstat lib. I. Prior. cap. I. Syllogismus dicitur à συλλαγίζω, quod in disciplinâ Arithmetica est colligere, sive plurium numerorum summam conficere. Hinc aptâ translatione traductum est ad declarandum argumentationis modum. Logicis enim συλλαγίζω est concludere, hoc est, ex propositionibus quibusdam summam probationis efficere.

2. Genus Syllogismi est λόγος, nempe vel internus, sive mentis, vel externus, sive oris; magis tamen internus: quia: sine externâ oratione consistere potest syllogismus in mente; sine internâ non potest. Additur δέναν, quod interpretatur Alex. Aphrodisiensis in comment. in cap. I. lib. I. Prior. συλλαγίζω, Gellius, lib. I. cap. 26. consensu & concessis: sed malè. Non omni enim syllogismo convenit ex concessis concludere, sed tantum topico. Demonstratio concessionem non requirit. Τὸ δέναν ergo est positis, hoc est, propositis, sive præpositis conclusioni. Quibusdam, nempe propositionibus.

3. Per diversum quid à positis, intelligitur conclusio. Nam quamvis nihil sit in conclusione quod non fuit in præmissis, est tamen conclusio propositio à præmissis diversa: quia cum alterutra earum unum tantum terminum communem habet, altero termino ab utraque differt. Hâc parte excluduntur à syllogismi definitione, conversio, æquipollentia & subalternatio enunciationum, quas consecutiones sententiarum vulgò appellant: quia enuntiatio conversa non est diversa à convertendâ, neque subalternata à subalternante, neque æquipollens ab æquipollente. Constant enim omnes ex iisdem terminis.

4. Cùm conclusio dicitur necessario sequi ex præmissis, non intelligitur necessitas ipsius conclusionis quæ sequitur, quæ necessitas consequentis appellatur, sed necessitas sequelæ,

sive *consequentia*. Necessitas enim conclusionis consequentis, in solâ demonstratione locum habet: necessitas consequentiæ, in omni syllogismo bene formato: hæc enim necessitas est: anima syllogismi: cā enim sublatā, syllogismus non erit syllogismus, sed paralogismus.

5. Tandem additur, τὸ τὸ ὑπὸ τῆς ἰδέας, quod lib. I. Top. cap. I. exponitur, ἡ δὲ καὶ κερύων, h. e. vi & efficientiā præmissarum: ita ut ad sequentiæ necessitatem, nihil extra syllogismum querendum sit. Ex. gr. si verum sit, bonum esse, quicquid secundum naturam est; &, omnem voluptatem esse secundum naturam: necessariò efficitur, omnem voluptatem esse bonam; idque vi istorum terminorum qui in duabus præmissis continentur, sine ullo aliorum terminorum auxilio.

II. Syllogismus vel absolutè consideratur, vel cum respectu ad diversa effecta, quæ producit ob conditionum materiæ suæ diversitatem.

I. ¶ Aristoteles agit de syllogismo absolutè ac sine relatione ad conditiones materiæ, duobus libris Analyticorum priorum, quos ob eam causam libros de syllogismo vocat lib. I. Post. cap. 3. & II. In lib. poster. Analyticorum, in Topicis, & in libro de Elenchis Sophisticis consideratur syllogismus; cum relatione ad diversas materiæ conditiones, atque effecta; quæ sunt opinio, scientia, error, ut postea patebit.

III. Prior tractatus constabit tribus membris: primum erit de genesi, sive de ratione struendi syllogismum; alterum de εὐτομία, sive de ratione inveniendi medium terminum; tertium de divisione syllogismi ac variis speciebus argumentationum.

IV. Genesis intelligitur explicatione materiæ, tum remotæ, tum proximæ; & formæ.

V. Materia remota sunt tres termini; duo extremi, major scilicet, qui est prædicatum, & minor, qui est subiectum quæstionis; & unus medius, qui est argumentum, quod ad probandam quæstionem extrinsecus assumitur.

I. ¶ Terminum (Græcè ὅρον) definit Aristoteles, εἰς δὲ διαλύεται ἡ πρότασις, hoc est, in, quem dissolvitur propositio. Partes quæstionis dicuntur τὰ ἄκρα, id est, extrema, sive termini extremi: & argumentum, τὸ μέσον, h. e. medium, sive terminus medius; idque non propter situm (nam in solâ figura prima

prima argumentum situ medium est) sed propter officium. Ut enim ad homines dubiæ voluntatis conciliandos, arbitèr adhibetur; ità etiam adhibetur argumentum, ad prædicatum cum subjecto conjungendum, aut ab eo sejungendum.

2. Prædicatum quæstionis vocatur ab Aristotele *lib. 1. Prior. cap. 4.* τὸ μείζον ἄκρον, id est, *maius extremum*, & τὸ πρῶτον ἄκρον, id est, *primum extremum*, & τὸ πρῶτον absolutè. *Lib. 2. Post. cap. 24.* etiam ἄκρον absolutè nominatur. Subjectum appellatur τὸ ἑλάττω ἄκρον, id est, *minus extremum*, & τὸ ἐσχάτον ἄκρον, id est, *ultimum extremum*, & τὸ ἐσχάτον absolutè; ut patet ex dicto *cap. 4. lib. 1. Prior.* Dicitur etiam τὸ τρίτον, hoc est, *tertium*, absolutè. Hujus appellationis ratio est, quòd prædicatum subjecto suo, aut majus semper est, hoc est, universalius, sive communius; aut certè æquale; nunquam minus, aut angustius: quòdque in syllogismo priori loco cum medio combinetur. Prædicatum enim quæstionis debet in primâ propositione cum medio disponi; subjectum, in secunda.

3. Medium sive argumentum, tantùm unum esse debet. Quod enim unit, id ipsum debet esse unicum. Si duo media adhiberentur in uno syllogismo, tertio medio opus esset, ad explorandum duorum illorum mediorum convenientiam aut pugnam: sicuti, cùm duarum magnitudinum, æqualitas aut inæqualitas exploratur duabus diversis mensuris, tertiâ mensurâ opus est, ad explorandam æqualitatem aut inæqualitatem ipsarum mensurarum.

VI. *Materia proxima syllogismi sunt tres propositiones, quæ ex tribus terminis combinatis efficiuntur.*

VII. *Ex iis duæ antecedunt, & inferunt; tertia sequitur, & infertur.*

VIII. *Prima vocatur πρότασις, Latine propositio, vel major propositio; secunda, assumptio, vel minor propositio; tertia, συμπερασμα, Latine collectio, conclusio, complexio.*

1. ¶ Prima propositio vocatur πρότασις, ὅπερ τὸ πρῆναι, quod significat *prætendere*; quia cæteris propositionibus in syllogismo prætenditur, hoc est, præponitur. Eadem vocatur *major propositio*, quia ex majore extremo & medio componitur; sicuti secunda vocatur *minor*, quia componitur ex

minore & medio. Tertia vocatur *conclusio* ; quia partes quæstionis in præmissis separatas, colligit ac conjungit.

2. Ex hac duplici materiâ syllogismus efficitur, hoc modo. Primum quæstio aliqua se offert ; verbi gratiâ , *An Logica sit ars ?* Hæc quæstio duas partes habet ; subjectum, quod est *Logica* ; & prædicatum, quod est *ars*. Ad probandum *Logicam esse artem*, sumatur argumentum sive medium, idque sit *habitus effectivus*. Hoc argumentum jungatur primum cum prædicato quæstionis, & efficietur major, *Omnis habitus effectivus est ars* ; deinde cum subjecto, & efficietur minor, *Logica est habitus effectivus* : Hinc jam sequetur conclusio, *Logica est ars*.

3. Conclusio revera non differt à quæstione. Nam quæd ante factum syllogismum quæstio, sive problema dicebatur, id in syllogismo dicitur conclusio. Unde obiter colligitur conclusionem non esse effectum, sed partem syllogismi. Nam cum syllogismus sit oratio in quâ conclusio sequitur ex præmissis, omnino sequitur, conclusionem effectum quidem non esse præmissarum, sed partem syllogismi.

IX. *Forma syllogismi est apta trium propositionum dispositio ad conclusionem ex præmissis necessario colligendam.*

X. *Hæc aptitudo posita est in figurâ & modo.*

XI. *Figura est dispositio legitima medii cum partibus quæstionis.*

1. ¶ Quemadmodum se habet punctum ad lineam, & linea ad figuram, in Geometriâ ; ita se habet terminus ad propositionem, & propositio ad figuram syllogismi, in Logicâ. Et quemadmodum ad constituendam figuram rectilineam, puta triangulum tribus minimùm rectis lineis opus est, & totidem punctis, in quibus rectæ lineæ coeunt, angulos efficiunt ; ita in syllogismo, tribus propositionibus opus est, & totidem terminis,

XII. *Modus est legitima propositionum secundùm quantitatem & qualitatem determinatio.*

1. ¶ Conclusio enim non sequitur ex quibuscumque præmissis, aut saltem, non sequitur necessario ; sed tantum ex præmissis certâ quantitate affectis, certaque lege ac modo affirmatis & negatis.

XIII. *Modus*

XIII. *Modi syllogismorum alii directi sunt, alii inversi.*

XIV. *Modi directi sunt, in quibus concluditur majus extremum de minore.*

Ut, *Omnis homo est animal :*

Socrates est homo :

Ergò Socrates est animal.

XV. *Modi inversi sunt, in quibus concluditur minus extremum de majore ;*

Ut, *Omnis homo est animal :*

Nullus lapis est homo :

Aliquod ergò animal non est lapis.

Horum modorum nullus, aut admodum exiguus est usus.

XVI. *Modi directi vel universales sunt, vel singulares.*

XVII. *Modi universales sunt, in quibus utraque, vel altera præmissarum, universalis est :*

Ut, *Omne animal vivit :*

Omnis homo est animal :

Ergò omnis homo vivit,

Vel, *Omnis homo est animal rationale :*

Socrates est homo :

Ergò Socrates est animal rationale.

XVIII. *Modi singulares, in quibus utraque præmissarum singularis est :*

Ut, *Fudas fuit improbus :*

Fudas fuit Apostolus :

Aliquis igitur Apostolus fuit improbus.

Ejusmodi argumentationes non dignatus est Aristoteles appellatione *syllogismi*, sed eas vocat *ἐκθεσεις*, expositiones, sive exhibitiones ; quia necessitatem sequelæ in tertiæ figuræ syllogismis exponunt, & sensibus exhibent. A Peripateticis appellantur *syllogismi expostorii* ; à Ramo, *syllogismi proprii* ; ab aliis, *syllogismi singulares*.

CAP. VII.

De tribus syllogismorum figuris, & eorum modis.

THEOREMA I.

Figuræ syllogismorum sunt tres. Tot enim modis disponi potest argumentum cum partibus quæstionis.

II. Prima figura est, in quâ argumentum majori extremo subicitur, & de minore prædicatur.

I. ¶ In primâ figurâ tres termini, inquit Aristoteles lib. I. Prior. cap. I. ita affecti sunt, ut extremus sit in toto medio, & medius sit in toto primo, vel non sit. Medium ergò in primâ figurâ fuerit, ὃ καὶ αὐτὸ ἐν ἅλλῳ, καὶ ἅλλο ἐν τῷ τῷ ὅτι. hoc est, Quod & ipsum in alio est, cum aliud in ipso sit. Ac proinde medium hic non solùm officio, sed & δέσσει, hoc est, situ, medium est. Ex. gr. in hoc syllogismo,

Omne animal sentit :

Omnis homo est animal :

Ergò omnis homo sentit ;

terminus extremus, sive subiectum est homo ; primus terminus sive prædicatum, sentit ; medius, animal : atqui homo sub animali continetur, & animal sub eo quod sentit. Sit alius syllogismus,

Nullum animal est lapis :

Omnis homo est animal :

Ergò nullus homo est lapis.

Hic minor terminus, sive subiectum homo, continetur quidem in medio termino, qui est animal ; at medius terminus animal non continetur in prædicato, quod est lapis.

III. Secunda figura est, in quâ argumentum de utroque extremo prædicatur.

I. ¶ Argumentum enim in secundâ figurâ ponitur ἔξω μὲν καὶ ἔξω ἀκρῶν. ἄνω γὰρ τὴν καὶ τὴν δέσσει, id est, extra extrema, & primum situ. Nam medium ambobus extremis attribuitur, & majus extremum situm est prope medium, minus extremum longius abest à medio, ut docetur lib. I. Prior. cap. 5. Ex. gr.

Omne

Omne animal sentit :

Nulla planta sentit :

Igitur nulla planta est animal.

Hic medius terminus *sentit* primo summoque loco collocatur, prædicatum *animal* secundo, subjectum *planta* tertio. Nam *sentire* de animali dicitur, & *animal* de planta. Atque hoc est, quod dicitur, minus extremum longius abesse à medio, quàm majus extremum.

IV. *Tertia figura est, in quâ argumentum utrique extremo subjicitur.*

1. ¶ Argumentum in hac figurâ ponitur ἕξω μὲν τῶ ἀκρων, ἔξω αὖ τῶ ὅ τῃ δέσσει, id est, extra extrema, atque ultimum positione. Nam medium utrique extremo subjicitur, & majus extremum longius abest à medio, minus extremum ad illud proprius accedit, ut docet Arist. cap. 6. ejusdem lib. Ex. gr.

Omne animal sentit :

Omne animal vivit :

Quoddam ergò vivens sentit.

In hoc syllogismo medium *animal* utrique extremo subjectum, ultimum locum obtinet; minus extremum *vivit*, secundum; majus extremum *sentit*, primum ac supremum: ex quo patet majus extremum longius abesse à medio, quàm minus extremum.

2. Non desunt quibus videtur medium quarto modo cum partibus quæstionis disponi posse, ac proinde dari quartam figuram, in quâ argumentum de majori extremo prædicetur, & minori subjiciatur. Ex. gr.

Omnis homo est animal :

Omne animal sentit :

Quoddam igitur sentiens est homo.

Sed ejusmodi syllogismi indirectè concludunt in primâ figura. Nam ex duobus terminis extremis, is censeri debet major, qui de medio prædicatur, & is minor, qui medio subjicitur. Si uterque terminus subjiciatur medio, ut fit in secunda figura, aut si uterque prædicetur de medio, ut fit in tertia, tum is major terminus censeri debet, qui prius; & minor, qui deinde cum medio conjungitur. Ex propositionibus ea major est, in quâ major terminus, & minor, in quâ minor terminus cum

medio combinatur. Conclusio ità inferenda est ex præmissis, ut major terminus sit prædicatum, & minor subiectum conclusionis. Si aliter sit, conclusio inferitur indirectè. Ex. gr. in syllogismo quartæ figuræ quem suprâ posui, *animal* est terminus medius: *sentit* ergò est major terminus, quia prædicatur de animali; & *homo* est minor, quia subicitur animali. Ex quo sequitur hanc propositionem, *Omne animal sentit*, esse propositionem majorem, quia in eâ major terminus cum medio ponitur; & hanc, *Omnis homo est animal*, esse minorem, quia in eâ ponitur medium cum minore termino. Ac proinde hanc esse conclusionem, *Ergò omnis homo sentit*: non hanc, *Quoddam sentiens est homo*. Cùm enim minor terminus de majore colligitur, syllogismus est indirectus.

3. Si syllogismus quartæ figuræ habeat majorem negatam, transpositis præmissis, erit syllogismus primæ figuræ, concludens indirectè in *sapismo*, aut *frisismo*: de quibus modis agimus sub finem hujus capituli. Ex. gr. sit syllogismus quartæ figuræ;

Nullus lapis est homo:

Omnis homo est animal:

Ergò quoddam animal non est lapis.

ex eo formatur syllogismus primæ figuræ in *sapismo*, hoc modo;

Omnis homo est animal;

Nullus lapis est homo:

Ergò aliquod animal non est lapis.

V. Modi universales certò & directè concludentes, sunt quatuordecim: quatuor in primâ figurâ, *barbara*, *celarent*, *darii*, *ferio*; quatuor in secundâ, *cesare*, *camestres*, *festino*, *baroco*; sex in tertiâ, *darapti*, *felapton*, *disamis*, *datisi*, *bocardo*, *ferison*.

I. ¶ Qui omnes hisce versiculis memoriæ causâ continentur;

Barbara, celarent primæ, darii, ferioque.

Cesare, camestres, festino, baroco secundæ.

Tertia darapti sibi vendicat, atque felapton;

Adjungens disamis, datisi, bocardo, ferison.

VI. Harum vtrum singulæ syllabæ singulis propositionibus præfi-

præfiguntur, earumque quantitatem & qualitatem suâ vocali indicant.

VII. Vocales modorum sunt quatuor; A, E, I, O. Quarum A denotat universalem affirmantem, E universalem negantem, I particularem affirmantem, O particularem negantem.

1. ¶ Atque id hoc disticho exprimitur;

Asserit A, negat E, verum generaliter ambæ:

Asserit I, negat O, sed particulariter ambæ.

VIII. Propositiones indefinitæ habentur hoc loco pro particularibus; ut & singulares, si propositioni universali, aut particulari in eodem syllogismo adiunguntur. Nam si singulares solæ sint, constituunt syllogismos singulares, sive expositorios.

IX. Modi singulares syllogismorum expositiorum in unaquâque figurâ duo sunt; quorum qui in primâ & secundâ figurâ fiunt minùs naturales sunt, quia singulare de nullo naturaliter affirmatur.

1. ¶ Exempla modorum universalium certò & directè concludentium in primâ figurâ.

Bar. Omne animal sentit:

ba. Omnis homo est animal:

ra. Omnis ergò homo sentit.

Ce. Nullum animal est lapis:

la. Omnis homo est animal:

rent. Igitur nullus homo est lapis.

Da. Omnis color est visibilis:

ri. Quædam qualitas est color:

i. Quædam ergò qualitas est visibilis.

Fe. Nulla virtus est extremum:

ri. Quidam habitus est virtus:

o. Quidam igitur habitus non est extremum.

2. Modorum singularium in primâ figurâ alter affirmat, alter negat. Ex. gr.

Messias debuit crucifigi:

Jesus Christus est Messias:

Ergò Jesus Christus debuit crucifigi.

*Aristoteles non fuit Atheniensis :
 Præceptor Alexandri fuit Aristoteles :
 Igitur præceptor Alexandri non fuit Atheniensis.*

3. Exempla modorum universalium certò & directè concludentium in secundâ figurâ.

Ces- Nullus dives est egenus :
 a- Omnis avarus est egenus :
 re. Ergò nullus avarus est dives.

Cam- Omne animal est mortale :
 es- Nullus Angelus est mortalis :
 tres. Nullus igitur Angelus est animal.

Fes- Nullum animal est planta :
 ti- Quoddam vivens est planta :
 no. Quoddam ergò vivens non est animal.

Ba- Omnis homo est animal :
 co- Quædam substantia rationalis non est animal :
 co. Quædam igitur substantia rationalis non est homo.

4. Modi singulares in secundâ figurâ ambo concludunt negativè. Ex. gr.

*Plato non fuit Stagirita :
 Aristoteles fuit Stagirita :
 Ergò Aristoteles non fuit Plato.*

*Aristoteles fuit Stagirita :
 Plato non fuit Stagirita :
 Ergò Plato non fuit Aristoteles.*

5. Exempla modorum universalium certò & directè concludentium in tertiâ figurâ.

Da- Omnis virtus est ardua :
 rap- Omnis virtus est honesta :
 ti. Quoddam ergò honestum est arduum.

Fe- Nullus lapis vivit :
 lap- Omnes lapis movetur naturaliter ad suum locum :
 ton. Aliquid igitur quod naturaliter ad suum locum movetur, non vivit.

- Dis- *Aliquis homo furit :*
 am- *Omnis homo est animal rationale :*
 is. *Igitur aliquod animal rationale furit.*
- Da- *Omnis avarus eget :*
 tis- *Quidam avarus est locuples :*
 i. *Quidam ergò locuples eget.*
- Bo- *Aliquod corpus non est corruptibile :*
 car- *Omne corpus constat materiâ & formâ :*
 do. *Aliquid ergò, quod materiâ & formâ constat, non est corruptibile.*
- Fe- *Nulla virtus adfert miseriam :*
 ris- *Quædam virtus est molesta :*
 on. *Quoddam igitur molestum non adfert miseriam.*

6. Modorum singularium in tertiâ figurâ, alter affirmat, alter negat. Ex. gr.

- Judas fuit impius :*
Judas fuit Apostolus :
Ergò quidam Apostolus fuit impius.
- Socrates non fuit improbus :*
Socrates fuit Ethnicus :
Quidam ergò Ethnicus non fuit improbus.

7. Atque hi sunt modi directi, quorum usus in disputationibus est multò maximus. His addidit Aristoteles *lib. 1. Prior. cap. 7.* modos quosdam inversos, qui ex majore affirmata, sive universali sive particulari, & ex minore negatâ, concludunt negationem particularem termini minoris de majore. Tales modi duo sunt in primâ & tertiâ figurâ : in primâ, *sap- esmo, frisesmo* ; in tertiâ, *sapemo, frifemo* : quorum hæc sunt exempla.

- Sap- Omnis homo est animal :*
 esm- *Nullus equus est homo :*
 o. *Aliquod igitur animal non est equus.*
- Frif- Aliquod animal est homo :*
 esm- *Nulla planta est animal :*
 o. *Aliquis igitur homo non est planta.*

- Fap- *Omnis ars est habitus :*
 esm- *Nulla ars est scientia :*
 o. *Quidam igitur habitus non est scientia.*
- Fris- *Quidam improbus est dives :*
 esm- *Nullus improbus est beatus :*
 o. *Quidam ergo dives non est beatus.*

8. Omnes hi modi concludunt inverso ordine. At si præmissæ transponantur, & debito modo convertantur, fiunt ex iis syllogismi primæ figuræ, concludentes majus extremum de minore, idque in *ferio*. Quomodo autem ad modos directos reduci debeant, ex consonantibus F, S, M, P, cognosci potest, quarum idem usus est hoc loco, qui in modis directis secundæ & tertiæ figuræ ad primam reducendis. De quâ re dicemus *cap. 8.*

9. Sunt, qui alios etiam modos inversos in primâ figurâ collocant, quos *baralipton*, *celantes*, *dabitis* vocant. Sed non oportebat hos modos distinguere à tribus modis prioribus primæ figuræ. Nam *baralipton* nihil aliud est quàm *barbara*, conclusionem per accidens conversâ; & *celantes* nihil aliud est quam *celarent*, & *dabitis*, nihil aliud quàm *darii*, conclusionem conversâ simpliciter. Atqui sola conclusionis mutatio non mutat modos; sed mutatio qualitatis aut quantitatis in præmissis. Ad hunc modum licet etiam modos universales secundæ, & modos affirmantes tertiæ figuræ geminare. Aristoteles certè hos modos non recensuit *lib. 1. Prior.* ubi agit de modis syllogismorum; sed *lib. 2. cap. 1.* ubi agit de potestate plura concludendi ex iisdem præmissis.

10. Idem judicium esto de *farefmo*, & *firefmo*, quos indirectos syllogismos in secundâ figurâ quidam esse volunt, eosq; formant hoc modo:

- Fa- *Omne animal sentit :*
 resm- *Nulla planta sentit :*
 o. *Ergo quoddam animal non est planta.*
- Fi- *Aliquod vivens est animal :*
 resm- *Nulla planta est animal :*
 o. *Ergo aliquod vivens non est planta.*

Nam in *fresmo* concludendum erat directè, *Aliqua planta non vivit*; ex quo per conversionem simplicem sequitur, *aliquod vivens non esse plantam*. In *fresmo* concludendum erat, *Nulla planta est animal*, ex quo per simplicem conversionem colligitur, *nullum animal esse plantam*, & hinc per subsumptionem, *quoddam animal non esse plantam*. Ità ut etiam hi modi potiùs ad potestates plura concludendi (de quibus & nos agemus in fine sequentis capitis) quàm ad modos indirectos referri debeant.

CAP. VIII.

De regulis, legibus, & proprietatibus syllogismorum.

THEOREMA I.

Necessitas consecutionis, quam animam syllogismi esse diximus, nititur quibusdam fundamentis sive regulis ità certis & notis ut à nullo negari possint.

II. Syllogismi universales affirmantes nituntur dicto sive regulà de *Omni*, quæ ità se habet; Quicquid de aliquo universali dicitur universaliter, id etiam dicitur de omnibus quæ sub isto universali continentur.

Ex. gr. *Vivere* dicitur universaliter de animali; ut, *Omne animal vivit*: Homo continetur sub animali; ut, *Omnis homo est animal*: Ergò *vivere* potest etiam de homine affirmari; ut, *Omnis homo vivit*. Atque hic est syllogismus affirmans in primâ figurâ.

III. Syllogismi universales negantes nituntur dicto sive regulà de *Nullo*, quæ ità se habet; Quicquid de aliquo universali negatur universaliter, id etiam negatur de omnibus iis quæ sub isto universali continentur.

I. § Ex. gr. *Lapis* negatur de animali; ut, *Nullum animal est lapis*: Homo continetur sub animali; ut, *Omnis homo est animal*: Ergò *lapis* poterit etiam de homine negari; ut, *Nullus homo est lapis*. Hic est syllogismus negans in primâ figurâ. Quàm igitur necessarium est Leidam in Belgio esse, cum

constet Hollandiam esse in Belgio, & Leidam esse in Hollandiâ aut Leidam non esse in Angliâ, cum constet Belgium non esse in Angliâ, Leidam esse in Belgio : tam necessarium est, conclusionem sequi ex præmissis legitimè dispositis. Quod faciliùs intelligetur, si dictum de Omni & de Nullo paraphrasticè proponatur, & syllogismis accommodetur, hoc modo; *Quodcumque prædicatum universaliter affirmatur aut negatur de aliquo medio, id etiam de subiecto affirmatur aut negatur, quod sub illo medio continetur*; ubi tres sunt distinctæ partes, quarum prima repræsentat majorem, secunda conclusionem, tertia minorem.

IV. *Syllogismi singulares nituntur hoc axiomate*, Quæcunque uni tertio singulari conveniunt, ea quoque inter se conveniunt : &, quorum unum alicui tertio singulari convenit, alterum non convenit, ea quoque inter se non conveniunt.

I. § Quemadmodum, si duæ trabes sint æquales eidem mensuræ, rectè colligitur trabes inter se quoque æquales esse; ità quoque, si Davidi conveniat fuisse Prophetam simul & homicidam, sequitur aliquem Prophetam fuisse homicidam, idque tali syllogismo,

David fuit homicida :

David fuit Propheta :

Ergò aliquis Propheta fuit homicida.

Contrà quemadmodum, si duarum trabium altera sit æqualis alicui mensuræ, altera non item, sequitur eas inter se inæquales esse; ità quoque, si Judæ convenit fuisse Apostolum, & non fuisse Domino suo fidelem, sequitur aliquem Apostolum non fuisse Domino suo fidelem; idque tali syllogismo,

Judas non fuit Domino suo fidelis :

Judas fuit Apostolus :

Ergò quidam Apostolus non fuit Domino suo fidelis.

Si duo sint, quorum neutrum alicui tertio convenit; incertum est, an inter se conveniant, necne.

V. *Qui cum hisce regulis conveniunt, sunt veri syllogismi: qui ab iis dissentiunt, sunt paralogismi sive syllogismi vitiosi.*

VI. *Quo faciliùs syllogismi à paralogismis discerni possint, obser-*

observandæ sunt aliquot leges : quarum aliæ communes sunt omnibus figuris, aliæ singulis figuris peculiares.

VII. Leges communes sunt septem : Prima, In syllogismo non debent esse plures termini nec pauciores tribus.

1. ¶ Hæc lex præcipitur lib. 1. Prior. cap. 25. eaque sic probatur. Quæstio duos terminos habet, majorem & minorem, sive prædicatum & subiectum ; medium, sive argumentum forinsecus assumitur, idque debet esse unicum, ut ostendimus cap. 6. hujus libri.

2. Sæpe contingit, ut in syllogismo quatuor termini sint, cum tres tantum esse videantur ; idque fit tribus potissimum de causis : primò, quia vox aliqua, aut oratio in syllogismo ambigua est ; ut in hoc syllogismo,

Quod caret principio & fine, est æternum :

Mundus caret principio & fine :

Ergò Mundus est æternus.

Hic sunt quatuor termini : quia principium & finis in majore de duratione intelliguntur ; in minore, de magnitudine.

3. Secundò, quia abstracta cum concretis, aut concreta cum abstractis confunduntur ; ut in hoc syllogismo,

Albor est qualitas :

Nix est alba :

Ergò nix est qualitas.

4. Tertiò quia casus mutantur in nominibus, aut tempora in verbis ; ut in his exemplis,

Omnes servi sunt domini sui :

Davus est servus :

Ergò Davus est Dominus sui.

Nullus puer diu vixit :

Nestor fuit puer :

Ergò Nestor non diu vixit.

5. Si tamen mutatio casuum, aut temporis, in præmissis facta, etiam fiat in conclusione, non efficit quartum terminum ; ut patet ex his exemplis,

Omnes servi sunt domini sui :

Davus est servus :

Ergò Davus est Domini sui.

Nullus puer diu vixit :

Nestor fuit puer :

Ergò Nestor, quamdiu fuit puer, non diu vixit.

VIII. *Secunda lex, Non debet esse plus aut minus in conclusione quàm fuit in præmissis.*

I. ¶ *Id est, extrema, quæ cum medio fuerant in præmissis disposita, ità debent poni in conclusione, ut erant posita in præmissis, sine ulla additione aut detractiōe. Si enim aliquid extremis addatur, aut detrahatur, fiunt quatuor termini; ut liquet ex subjectis exemplis,*

Qui placent Deo sunt beati :

Omnes fideles placent Deo :

Omnes igitur fideles sunt beati, nullisque calamitatibus affliguntur.

Omnes peccatores resipiscētes recipiuntur in gratiam

Quidam homines non recipiuntur in gratiam :

Quidam igitur homines non sunt peccatores.

Uterque enim syllogismus vitiosus est : prior, quia plus ; posterior, quia minus in conclusione est , quàm fuerat in præmissis.

IX. *Tertia, Medium non debet ingredi conclusionem.*

I. ¶ *Medium enim non est , quod concluditur , neque id de quo aliquid concluditur. Vitiosi ergò sunt syllogismi, cùm aut medium integrum, aut illius pars in conclusione ponitur :*

Ex. gr.

Omnis equus differt ab homine :

Socrates non differt ab homine :

Ergò Socrates non differt ab equo.

Hic syllogismus vitiosus est , quia differt est pars medii. Inferendum enim erat, Ergò Socrates non est equus.

X. *Quarta, Extrema ità collocanda sunt in conclusione, ut erant sita in præmissis.*

I. ¶ *Hoc est , Quod de medio prædicatur in præmissis, debet in conclusione prædicari, & quod medio subjicitur, debet in conclusione subjici: aut , si utrumque extremum medio subjiciatur , vel si utrumque de medio prædicetur ; illud debet*

debet in conclusione prædicari, quod in majore propositione cum medio conjungitur; & illud debet subjici, quod in assumptione cum medio collocatur. Erit ergo hic syllogismus vitiosus,

Omne animal vivit :
Omnis homo est animal :
Ergo omne vivens est homo.

Debebat enim inferri, *Ergo omnis homo vivit.* Cum alius est situs extremorum in præmissis, alius in conclusione, syllogismus vel nihil omnino concludit, vel concludit indirectè.

XI. *Quinta ; Ex duabus negantibus nihil concluditur.*

I ¶. Hæc lex præscripta est lib. 1. cap. 24. Prior. hæcque ratione nititur; quod dictum de Omni utramque propositionem, dictum de Nullo, alteram requirat affirmatam. Est ergo hic syllogismus vitiosus,

Nullus lapis est animal :
Nullus homo est lapis :
Nullus igitur homo est animal.

2. Si tamen negatio sit pars medii, bonus syllogismus ex duabus negantibus conficitur: Hic enim syllogismus,

Quod non sentit, non est animal :
Planta non sentit :
Ergo planta non est animal,

rectè concludit; quia particula *non* juncta cum *sentit* in majore, non faciebat negationem, sed solummodo reddebat medium infinitum, eandemque vim debet in assumptione exercere: ac proinde, licet minor in speciem sit negans, habetur tamen pro affirmante prædicati infiniti. Potest etiam dici concludere syllogismum hunc vi dispositionis secundæ figuræ, majorémque per contrapositionem conversam positam esse pro convertendâ. Nam si pro, *Quod non sentit, non est animal*, dicatur, *Omne animal sentit*, erit syllogismus secundæ figuræ, in camestres.

XII. *Sexta ; Ex duabus particularibus nihil concluditur.*

I ¶. Hæc lex ibidem proponitur, eandemque ratione nititur: nempe quod dictum de Omni & de Nullo, vel utramq;

vel alteram saltem propositionem requirat universalem. Hic ergo syllogismus vitiosus est,

Quoddam animal est homo :

Quoddam animal est bestia :

Quædam igitur bestia est homo.

2. Quod ex duabus singularibus aliquid rectè concludatur, & non ex duabus particularibus, hæc est causa : Individua vaga, quæ particulares propositiones constituunt, sunt homonyma. Ideoque in syllogismo ex puris particularibus sunt quatuor termini. Individua determinata, quæ propositiones singulares constituunt, homonymiæ non sunt obnoxia.

XIII. *Septima, Conclusio sequitur partem debiliorem, sive deteriorem.*

1. ¶ Quare, cum propositio negans deterior sit affirmante, & particularis, universali ; si altera præmissarum negans sit, conclusio quoque debet esse negans ; & , si altera sit particularis, conclusio quoque debet esse particularis. Propositiones enim præmissæ sunt causa conclusionis : at causa non potest esse deterior effecto : quare, si qua debilitas hæret in præmissis, ea transit ad conclusionem, sicut morbi hæreditarii ad posteros. Hæc regula se extendit etiam ad conditiones materiæ, ita ut si altera præmissarum sit necessaria, altera contingens, conclusio debeat esse contingens ; ut docetur *lib. I. Prior. cap. 24.* Atque hæc leges generales sunt.

XIV. *Leges speciales sunt tres : Prima, Major primæ figuræ debet esse universalis, & minor affirmans.*

1. ¶ Hæc lex colligitur ex *cap. 4. lib. I. Prior.* Itaque hi syllogismi vitiosi sunt,

Aliquod animal est bestia :

Omnis homo est animal :

Omnis igitur vel aliquis homo est bestia.

Omnis homo est animal :

Nullus equus est homo :

Ergo nullus equus est animal.

Si tamen negatio sit pars mediæ, syllogismus non est vitiosus, ut suprà diximus.

XV. *Secunda, Major secundæ figuræ debet esse universalis, & altera præmissarum negans.*

1. ¶ Hæc lex existat *ibid. cap. 5.* Itaque hi syllogismi vitiosi sunt,

Aliquod animal est homo :

Nullus equus est homo :

Aliquis igitur equus non est animal.

Omnis homo est animal :

Omnis equus est animal :

Omnis igitur equus est homo.

XVI. *Tertia, Minor tertiæ figuræ debet esse affirmans, & conclusio particularis.*

1. ¶ Hæc lex continetur *cap. 6. ejusdem libri.* Itaque hi syllogismi sunt vitiosi,

Omne animal vivit :

Nullum animal est planta :

Ergò aliqua planta non vivit.

Omnis homo est animal :

Omnis homo vivit :

Omne vivens igitur est animal.

XVII. *Proprietates, quæ syllogismis secundum has regulas formatis conveniunt, duæ sunt : prima, Quòd ex veris nihil sequatur nisi verum.*

1. ¶ De hac proprietate agit Aristoteles *lib. 2. Prior. cap. 2.* Itaque, si ex veris præmissis sequatur falsa conclusio, signum est vitiosam esse syllogismi formam, & peccatum esse in aliquam ex legibus suprà dictis. Itaque hic syllogismus,

Omnis homo est animal :

Omnis equus est animal :

Omnis equus igitur est homo,

paralogismus est, quia conclusio falsa colligitur ex veris præmissis; idque, quia utraque præmissarum affirmata est in secundâ figurâ. Si forma syllogismi bona sit, nihil vetat ex falsis præmissis veram conclusionem colligi. Sic in hoc syllogismo,

Omnis lapis est animal :

Omnis homo est lapis :

Omnis igitur homo est animal,

forma bona est ; & utraque præmissarum aperte falsa , & tamen conclusio est vera : sed hoc casu contingit. At ex veris præmissis legitimè dispositis nunquam sequitur falsum.

XVIII. *Altera proprietas est, Quòd ex uno syllogismo rectè formato, plures conclusiones colligi possint ; idque vel per conversionem conclusionis, vel per subalternationem.*

I §. Hæc proprietas traditur cap. i. ejusd. lib. Etenim qui probavit, *omnem hominem esse animal,* aut *nullum hominem esse lapidem,* aut *aliquas plantas esse noxias ;* is iisdem præmissis probavit, *aliquod animal esse hominem,* *nullum lapidem esse hominem,* & *aliquod noxium esse plantam ;* quia conclusiones illæ in has converti possunt, vel per accidens , vel simpliciter. Hos modos appellant Scholastici *baralipton, celantes, dabitis,* ut suprà diximus.

2. Subalternatio, five subsumptio, vel sub subjecto contingit, vel sub medio, vel sub prædicato. Sub subjecto, cum quis ex conclusione universali infert propositionem particularem, quæ in illâ continetur ; veluti si quis probâset, *omnem sensum fieri receptione objecti,* indèque colligeret, *visum quoque fieri receptione objecti.* Sub medio fit subalternatio, cum ex majore universali primæ aut tertiæ figuræ , inferitur particularis, quæ sub illâ continetur ; ut, si quis ex hoc syllogismo,

Omne animal nutritur :

Omnis homo est animal :

Ergò omnis homo nutritur :

inferet *chamæleontem nutriri.* Sub prædicato contingit subsumptio , cum ex majore universali secundæ figuræ, inferitur particularis, quæ sub illâ continetur ; veluti si quis ex hoc syllogismo,

Nullum corpus inanime nutritur :

Omnis planta nutritur :

Nulla planta igitur est inanimis ;

inferret, *lapides non nutriri,* cum sint inanimis.

CAP. IX.

De declaratione secundæ ac tertiæ figuræ, per reductionem ad primam, & per expositionem.

THEOREMA I.

Syllogismi primæ figuræ cæteris perfectiores sunt. Idque duplici de causâ : primò, quia in eâ concludi possunt omnia genera problematum, affirmantia, negantia, universalis, particularia : cùm in secundâ figurâ tantùm concludi possint problemata negantia ; in tertiâ tantùm particularia.

I. ¶ Ob hanc causam dicit Aristoteles lib. I. Prior. cap. 14. primam figuram esse *μάλιστα ὁρισμὸν καὶν*, id est, aptissimam ad gignendam scientiam.

II. Secunda causa ob quam prima figura cæteris perfectior habetur, hæc est ; Quòd in eâ appareat necessitas sequelæ syllogisticæ, ac dictum de Omni & de Nullo: quæ in cæteris figuris non ità liquidò conspiciuntur, quin declaratione indigeant.

I. ¶ Medium enim in primâ figurâ, situ medium, & inter extrema positum est ; ità ut prædicatum obtineat primum ac supremum locum, medium secundum, subiectum tertium. In reliquis figuris medium officio tantùm medium est, situ extremum. Nam in secundâ figurâ, ponitur medium primo ac supremo loco, prædicatum secundo, & subiectum tertio ac infimo ; in tertiâ, ponitur prædicatum primo loco, subiectum secundo, & medium tertio. Hoc voluit Aristoteles, cùm lib. I. Prior. cap. 5. & 6. dixit, majus extremum in secundâ figurâ esse τὸ πρὸς τῷ μείωσι καίμακρον, id est, quod situm est propè medium ; minus extremum, τὸ πρὸς τῷ μέσῳ, hoc est, quod longius abest à medio ; in tertiâ figurâ contrà, majus extremum esse τὸ πρὸς τῷ μέσῳ, quod longius abest à medio ; minus extremum, τὸ ἐγγύς, hoc est, quod proprius accedit ad medium.

2. Ob hanc causam est, quòd syllogismus primæ figuræ ad amissum dicti de Omni & de Nullo constructus, conclusionem non solum necessariò infert, sed etiam tam evidentè,

ut cuius ea sequela pateat: secus quàm fit in syllogismis secundæ ac tertiæ figuræ, qui ad amissum dicti de Omni & Nullo non sunt constructi. Atque hoc nomine dicuntur syllogismi primæ figuræ perfecti; & syllogismi secundæ ac tertiæ figuræ, illorum respectu, imperfecti: appellatione multum diversâ ab ea quâ postea syllogismum dividemus in perfectum & imperfectum. Perfectus enim syllogismus hoc loco dicitur, definiente Aristotele *lib. I. Prior. cap. I.* ὁ μὲν δὲ ὁδὸς ἄλλῃ περὶ δέξιμας παρὰ τὰ εἰλημμένα, περὶ τὸ φανῆναι τὸ ἀναγκαῖον. Hoc est, qui præter ea quæ accepta sunt, nullâ aliâ re indiget, ut appareat necessitas consecutionis. Imperfectus vocatur, ὁ περὶ δέξιμας ὁ μὲν δὲ ὁδὸς, ἢ πλεόντων, ἃ ὅτι μὲν ἀναγκαῖα διὰ τῶν προκειμένων ὄρων, ἢ μὲν εἰλημμένα διὰ περὶ τῶν ὄρων. Hoc est, qui unâ re pluribusve indiget, quæ quidem per suppositos terminos sunt necessaria, non tamen sumptæ sunt per propositiones, ut appareat scilicet necessitas consecutionis. Quæ res illæ sint quibus syllogismus imperfectus indiget, jam dicemus.

III. Necessitas consecutionis in syllogismis secundæ ac tertiæ figuræ, declaratur duobus modis, reductione ad primam figuram & expositione.

IV. Syllogismi secundæ ac tertiæ figuræ vel *διεκτικῶς*, hoc est, ostensivè, ad primam reducuntur, vel διὰ τῆς ἀδυνάτεως, sive per impossibile.

V. Reductio ostensiva est, quæ fit propositionibus conversis, vel etiam transpositis.

VI. Reductio per impossibile est, quæ fit alterâ præmissarum manente, & contradicente conclusionis loco alterius positâ.

VII. Utrique reductioni inserviunt consonantes, quæ in nominibus modorum continentur.

VIII. Consonantes initiales indicant modum quemlibet secundæ ac tertiæ figuræ, ad eum modum primæ figuræ reducendum esse qui eandem habet consonantem initialem; cesare, camestres, ad celarent; festino, felapton, ferison, ad ferio; darapti, disamis, darisi, ad darii; baroco, bocardo, ad barbara.

IX. Ex consonantibus mediis notandæ sunt hæ quatuor, S, P, M, C. Quarum S denotat propositionem eam cui præfigitur, simpliciter convertendam esse; P, convertendam per accidens;

cidens ; M. præmissas esse transponendas, alteram alterius loco ; C, syllogismum reducendum esse per impossibile.

1. ¶. Atque hoc exprimitur disticho vulgato ;

S vult simpliciter verti ; P verò, per accid.

M vult transponi ; C, per impossibile duci :

Ex. gr. sit syllogismus in *cesare* ;

Ces- Nullus dives est egenus :

a- Omnis avarus est egenus :

re. Ergò nullus avarus est dives ;

litera *S* in primâ syllabâ majori præfixa, indicat eam convertendam esse simpliciter, in hanc, *Nullus egenus est dives*. Hâc conversione factâ, & minore & conclusione servatâ, erit syllogismus in *celarent*. Eodem modo reducuntur *festino* & *ferison* ad *ferio*; *datisi* ad *darii*; nisi quòd in *ferison* & *datisi* minor simpliciter convertenda sit, quia *S* minori præfixum est.

2. Sit etiam syllogismus in *darapti*,

Da- Omnis virtus est ardua :

rap- Omnis virtus est honesta :

ti. Aliquod igitur honestum est arduum ;

in quo si pro, *Omnis virtus est honesta*, dicatur, *Quoddam honestum est virtus*, quæ est conversio minoris per accidens, cui præfigitur *P*, manente majore & conclusione, erit syllogismus in *darii*. Eodem modo reducitur *felapton* ad *ferio*.

3. Sit denique syllogismus in *camestres*,

Cam- Omne animal est mortale :

es- Nullus angelus est mortalis :

tres. Nullus igitur angelus est animal ;

ubi litera *M* denotat majorem loco minoris, & minorem loco majoris collocandam esse. Deinde litera *S* præfixa minori, & conclusioni, denotat utramque convertendam esse simpliciter. Quibus peractis, erit talis syllogismus in *celarent* ;

Nullus mortalis est angelus :

Omne animal est mortale :

Nullum igitur animal est angelus.

Eodem modo reducitur *disamis* ad *darii*, nisi quòd hîc non

minor, sed major, cui S præfixum est, convertenda sit simpliciter.

X. Omnes modi secundæ ac tertiæ figuræ, non solum ostensivè, sed etiam per impossibile reduci possunt ad primam, præter baroco & bocardo, qui hoc tantum modo, & non etiam ostensivè reduci possunt, ut indicat litera C.

XI. In secundâ figurâ servatur major, contradictione conclusionis in locum minoris suffectâ.

XII. In tertiâ servatur minor, contradictione conclusionis suffectâ in locum majoris.

I ¶. Atque hoc indicant vulgares versiculi,
Servat majorem, variâtque secunda minorem;
Tertia majorem variat, servâtque minorem.

Ex. gr. sit syllogismus in baroco;

Ba- *Omnis homo est animal:*

ro- *Aliquod vivens non est animal:*

co. *Ergo aliquod vivens non est homo;*

si fortè quis, concessis præmissis, neget hujus syllogismi consecutionem, quia in eo non videt dictum de Omni aut de Nullo, demonstranda erit necessitas consecutionis, relictaque majore, & contradictione conclusionis loco minoris positâ, absurda conclusio colligenda in *barbara*, hoc modo;

Omnis homo est animal:

Omne vivens est homo:

Ergo omne vivens est animal.

Hujus syllogismi conclusio est falsa, vel eo ipso judice, qui in priore syllogismo necessitatem consecutionis requirebat. Atqui hæc conclusio ex præmissis apertè sequitur; quia inferitur ad normam dicti de Omni. Itaque cum ex veris præmissis in syllogismo bene formato non sequatur falsum, necesse est alteram præmissarum esse falsam. At major non potest judicari falsa ab eo, quicum nobis res est; quia fuit in priore syllogismo ab illo concessa. Relinquitur ergo, ut minor falsa sit ejusque contradictio vera; quia duæ contradicentes non possunt simul esse falsæ. Atqui conclusio prioris syllogismi contradicit minori falsæ. Ergo conclusio prioris syllogismi est vera, quod debet demonstrari.

2. Si syllogismus in *baroco* consistet minore singulari, reduci debet ad *darii*. Sit syllogismus,

Omnis homo est risibilis :

Bucephalus non est risibilis :

Ergo Bucephalus non est homo,

ponaturque conclusionis contradictio loco minoris, manente majore, & erit ejusmodi syllogismus in *darii* ;

Omnis homo est risibilis :

Bucephalus est homo :

Ergo Bucephalus est risibilis.

3. Sit etiam syllogismus in *bocardo*,

Aliquod animal non est homo :

Omne animal vivit :

Ergo aliquod vivens non est homo ;

si servatâ minore, contradictio conclusionis penatur loco majoris, erit ejusmodi syllogismus in *barbara* ;

Omne vivens est homo :

Atqui omne animal vivit :

Ergo omne animal est homo.

Hæc conclusio est falsa ; ergo alterutra quoque præmissarum. Non minor , quia in priore syllogismo concessa fuit. Si ergo major falsa est, prioris syllogismi conclusio est vera, quæ illi contradicit.

4. Hoc modo reduci possunt omnes modi secundæ & tertiæ figuræ ad primam : *selapton* cum *baroco* & *bocardo*, ad *barbara* ; *festino*, *darapti*, & *disamis*, ad *celarent* ; *camestres* & *ferison*, ad *darii* ; *cesare*, & *datisi*, ad *ferio*. Sed reductio ostensiva est facilior. Demus tamen exemplum unum aut alterum. Sit syllogismus in *camestres* ;

Omne animal est mortale :

Nullus angelus est mortalis :

Ergo nullus angelus est animal ;

ex quo, majore manente, & contradictione conclusionis loco minoris positâ, fiet ejusmodi syllogismus in *darii* ;

Omne animal est mortale :

Aliquis angelus est animal :

Aliquis igitur angelus est mortalis.

Sit etiam syllogismus in *darapti* ;

Omnis virtus est ardua :

Omnis virtus est honesta :

Aliquod igitur honestum est arduum :

si, minore manente, contradictio conclusionis ponatur loco majoris, erit syllogismus ejusmodi in *celarent* ;

Nullum honestum est arduum :

Omnis virtus est honesta :

Ergo nulla virtus est ardua.

XIII. *Et si syllogismi primæ figuræ cæteris meliores sint evidentiâ consecutionis, conditio tamen materiæ sæpe ratiocinantem trahit ad secundam aut tertiam figuram, ita ut eadem conclusio non possit, eodem medio servato, in primâ figurâ colligi, sine conversione ; aut saltem non possit colligi ex præmissis finitis, & æquè naturalibus.*

I. ¶ Quod propterea moneo, nè quis putet secundam & tertiam figuram propterea inutiles esse, quia omnia problematum genera in primâ figurâ concludi possunt, & quidem necessitate, si non majore, saltem manifestiore. Sæpe enim conclusio in primâ figurâ non admittit syllogismum, nisi ex propositionibus infinitis. Nam si quis probare velit, *aliquod vivens non esse hominem*, per medium *animal*, struendus est syllogismus ejusmodi in *baroco*,

Omnis homo est animal :

Aliquod vivens non est animal :

Aliquod igitur vivens non est homo ;

aut ejusmodi in *bocardo* ;

Aliquod animal non est homo :

Omne animal vivit :

Aliquod igitur vivens non est homo.

Si quis eandem conclusionem colligere velit in primâ figurâ, servato eodem medio, cum necesse erit mutare præmissas finitas in infinitas, hoc modo ;

Quod non est animal, non est homo :

Aliquod vivens non est animal :

Aliquod igitur vivens non est homo.

Atqui

Atqui propositiones finitæ simpliciores haud dubiè sunt, & naturaliores, quàm infinitæ.

2. Sit etiam syllogismus in *disamis*;

Aliquis homo est albus;

Omnis homo est animal:

Quoddam igitur animal est album.

Hic formari quidem poterit in *darii*, hoc modo;

Omnis homo est animal:

Aliquod album est homo:

Aliquod igitur album est animal:

sed quis non videt minorem hujus syllogismi, & conclusionem, minùs naturales esse, quàm sunt propositiones syllogismi prioris? Atque hæc de reductione.

XIV. Expositione declaratur necessitas consecutionis in *tertiâ figurâ*, cum loco medii universalis sumitur medium singulare, quod sub illo universali continetur, ad colligendam eandem conclusionem.

1. §. Ex.gr. sit syllogismus in *dati*;

Omnis homo potest errare:

Aliquis homo est Philosophus:

Aliquis igitur Philosophus potest errare.

si quis de hujus illationis necessitate dubitet, sumatur medium singulare, putà *Aristoteles loco hominis*, & erit ejusmodi syllogismus expostorius;

Aristoteles potuit errare:

Aristoteles fuit homo:

Ergò quidam homo potuit errare.

Hæc illatio evidentior est, quia habet medium sensibile, quo conformis est huic evidentissimo axiomatici; *Quæcunque eidem singulari congruunt, ea inter se quoque congruunt.*

2. Syllogismi secundæ figuræ non declarantur expositione, quia medium in secundâ figurâ debet prædicari: at singulare naturaliter non prædicatur, sed tantùm subjicitur. Atque hæc de *genesi*, sive de ratione struendi syllogismos.

CAP. X.

De inventione medii accommodatâ ad
figuras & modos.

THEOREMA I.

*Sequitur $\Sigma\mu\epsilon\iota\alpha$, sive ratio inveniendi medium idoneum, ad
conclusionem in qualibet figurâ & modo colligendam.*

I. *¶ De $\Sigma\mu\epsilon\iota\alpha$, sive de ratione inveniendi medii termini, agitur hoc loco, non quatenus ea ad veritatem & falsitatem, aut ad necessitatem & contingentiam conclusionum pertinet (sic enim de illâ agemus in speciali consideratione syllogismi) sed quatenus spectat ad formam syllogisticam, & ad figurarum ac modorum diversitatem. Hoc modo disputat Aristoteles de medii inventione lib. I. Prior. cap. 26. usque ad cap. 32.*

II. *Inventio idonei medii consistit in præcognitione conclusionis, & in collatione medii cum partibus quæstionis.*

III. *In conclusionem spectanda est quantitas & qualitas: idque ut appareat, in quibus figuris ac modis illa probari ac refutari possit.*

I. Quod in pluribus figuris & modis probari potest, illud est probatu facilius, quàm id quod in paucioribus probari potest. Itaque universalis affirmans probatu difficillima est, quia potest tantum probari in *barbara*. Proxima est universalis negans, quæ probari potest in tribus modis, in *celarent*, *cesare*, & *camestres*. Tertia est particularis affirmans, quæ potest probari in quatuor modis, in *darii*, *darapti*, *disamis* & *datisi*. Omnium probatu facillima est particularis negans, utpote quæ probari potest in *ferio*, *festino*, *baroco*, *felapton*, *bocardo*, *ferison*. Similiter, cujus oppositum in pluribus figuris & modis concludi potest, illud est refutatu facilius, quàm id quod in paucioribus concluditur. Itaque universalis affirmans refutatu est facillima. Refutatur enim probatione universalis aut particularis negantis, quod fit in novem modis, in *celarent*, *cesare*, *camestres*, *ferio*, *festino*, *baroco*, *felapton*, *bocardo*, *ferison*. Proxima est universalis negans, quæ refutatur in quinque modis affirmantibus, in *barbara*, *darii*, *darapti*, *disamis*, *datisi*. Parti-

Particularis affirmans sequitur, quæ refutatur in tribus tantum modis, in *celarent*, *cesare*, *camestres*. Particularis negans difficillimè refutatur, idque in uno tantum modo, nempe *barbara*.

IV. Medium cum utroque extremorum comparari potest, ut antecedens, ut consequens, & ut repugnans.

V. Medium dicitur antecedens, cum in enunciatione affirmatâ subjicitur; consequens, cum in enunciatione affirmatâ prædicatur; repugnans, cum subjicitur aut prædicatur in enunciatione negatâ.

I. ¶. Hinc facile est colligere, cujusmodi medium figura quæque ac modus postulet. In *barbara* & *dariz*, medium est antecedens prædicati, & consequens subjecti; in *celarent*, *ferio*, *cesare*, *fessino*, repugnans prædicati, & consequens subjecti; in *camestres* & *baroco*, consequens prædicati, & repugnans subjecti; in *darapti*, *disamini*, & *datisi*, antecedens utriusque extremi; in *felapton*, *bocardo*, & *ferison*, repugnans prædicati, & antecedens subjecti. Si medium sit consequens prædicati & antecedens subjecti, erit syllogismus indirectus in primâ (vulgò, in quartâ) figurâ; si sit repugnans utriusque extremi, erit paralogismus ex duabus negantibus; si antecedens prædicati, & consequens subjecti, erit paralogismus ex minore negante in primâ, aut in tertiâ figurâ; si denique sit consequens utriusque extremi, erit paralogismus ex duabus affirmantibus in secundâ figurâ.

2. Hæc doctrina paucissimis vocibus docetur à Scholasticis, sicut figurarum modi; sed quarum usum difficulter intelligas. Earum vocum ratio facilior est, quæ hoc disticho continentur;

Per NAPCAS, NIPCTIS, vel NIPIS, REPCERE,
CEPRES,

Et ROPCOS, COPROS, NOSROP medium invenis omne.

In quibus vocibus considerandæ primùm sunt vocales A, E, I, O, quæ qualitatem & quantitatem conclusionis consueto valore denotant; deinde consonantes N, C, R, S, P: quarum N denotat antecedens; C, consequens; R, repugnans; S, subjectum; P, prædicatum. Itaque, si probanda sit conclusio universalis;


versalis affirmans, *NAPCAS* indicabit suis consonantibus *N, P, C, S*, medium requiri, quod sit antecedens prædicati, & consequens subjecti : si particularis affirmans, *NIPCS* indicabit medio opus esse, quod sit antecedens prædicati, & consequens subjecti ; *NIPIS*, quod sit antecedens utriusque extremi. Si universalis negans, ex voce *REPCESB* deprehenditur, medium debere esse repugnans prædicati & consequens subjecti : & sic de cæteris.

3. Pro exemplo sit vulgatum problema, *An voluptas sit bona ?* Quære primùm consequentia prædicati, *eligendum, conducibile* ; deinde antecedentia, *felicitas, sanitas, &c.* denique repugnantia, *fugiendum, turpe, &c.* Quære etiam consequentia subjecti, *tranquillum, secundum naturam* ; deinde antecedentia, *voluptas ex musica* ; denique repugnantia, *molesum, labor, &c.* Fiat nunc conclusio universalis, *Omnis voluptas est bona.* Ea reperitur in *NAPCAS* duntaxat, quæ vox indicat medium debere esse antecedens prædicati & consequens subjecti. Sumatur verbi causâ *secundum naturam*, & erit syllogismus in *barbarâ* ; *Quicquid est secundum naturam, est bonum : Omnis voluptas est secundum naturam : Ergò omnis voluptas est bona.* Si concludi debeat, *aliquam voluptatem esse bonam*, ex voce *NIPIS*, sumi debet antecedens utriusque, putâ *voluptas musica*, eritque syllogismus in *darapti, disamis*, aut *datifi* ; ut, *Omnis voluptas musica est bona : Omnis voluptas musica est voluptas : Ergò quædam voluptas est bona.*

Addamus diagramma, in quo hæc doctrina apertè conspiciatur.

DIA-

DIAGRAMMA.



Atque hæc de ratione struendi syllogismum, & modo medium terminum inveniendi.

CAP. XI.

De Inductione, Enthymemate, & Exemplo.

THEOREMA I.

Superest ut agamus de syllogismi divisione & speciebus,
 II. Syllogismus quinque potissimum modis dividi potest :
 Primò, in syllogismum strictè & propriè dictum, & in syllogis-
 mum ἡ ἐπαγωγὴς, id est, ex inductione ; Secundò, in syllo-
 gismum perfectum & imperfectum ; Tertiò, in simplicem &
 compositum ; Quartiò, in purum & modalem ; Quinto denique,
 in directum & indirectum.

I. Syllogismus est ἐκ τῶν πρὸς ἐν, sive ex eorum nù-
 mero, quæ suis speciebus inæqualiter communicantur. Itaque
 quæ hactenus de syllogismo dicta sunt, ea de syllogismo stri-
 ctè & propriè dicto, perfectò, simplici, puro, & directo, præ-
 cipuè intelligenda sunt ; de inductione, syllogismo imperfecto,
 composito, modali, atque indirecto, secundariò tantum, ac
 quatenus ad primariæ speciei naturam accedunt.

III. Syllogismus strictè & propriè dictus est, in quo extre-
 mum de extremo per medium colligitur.

IV. Ἐπαγωγὴ ἢ ὁ ἡ ἐπαγωγὴς συλλογισμὸς ὅστις, ἐν ᾧ διὰ
 τῆς ἐτέρης διὰ τερον ἄκρον τῷ μέσῳ συλλογίζεται. Hoc est, In-
 ductio & syllogismus ex inductione est, in quâ alterum extre-
 mum per alterum de medio concluditur. Inductio definitur et-
 iam, ἢ ὑπὸ τῶν κατέκαστα ἐπὶ τὰ καθόλου ἐφοδὸς, id est, pro-
 gressio à singularibus ad universalia.

I. Inductio dicta est, quia ab iis, quæ certa sunt, audi-
 toris animum inducit ad credendum, quod incertum est. In-
 ductio (inquit Aristoteles lib. 2. Prior. cap. 23.) colligit ex-
 tremum, nempe majus, hoc est, prædicatum, de medio, per al-
 terum extremum, nempe minus, sive per subiectum, eaque
 omnia, quæ subiecto sunt similia. Itaque inductio quodam-
 modo syllogismo opposita est. Nam in syllogismo colligitur
 extremum de extremo, hoc est, prædicatum de subiecto, per
 medium. Non tamen hinc sequitur, medium in conclusione
 poni, cum inductio formatur. Medium enim dicitur in defi-
 nitione inductionis, non quod conclusionem arguit, sed quod

suâ naturâ medium est, quôdque in syllogismo strictè dicto argumentum esse debuisset. Sumamus tres terminos, ex. gr. *longævum esse*; *vacare bile*; *homo, equus, asinus*. Siquis naturæ ductum sequeretur, probaret *hominem, equum, &c. longævos esse, quia vacant bile*: isque esset syllogismus propriè & strictè dictus, in quo prædicatum, *longævum esse*, probatur de subje. cto, *homine, equo, asino, &c.* per medium, *vacare bile*. At in inductione probatur *animalia quæ bile vacant, esse longæva*; quia *homo, equus, asinus, &c. sunt longævi*. Atque hoc est Aristoteli extremum de extremo per medium colligi.

2. Cùm inductio, lib. I. Top. cap. 11. definitur, *progressio à singularibus ad universalis*, definitionis verba non sunt nimis strictè accipienda. Nam duæ sunt species inductionis, ut rectè observat Rud. Agricol. lib. 2. cap. 18. de Inv. Dial. una, quæ ex speciebus colligitur genus, aut ex singularibus universale; altera, quæ ex partibus concluditur totum. Utriusque exempla passim sunt obvia apud bonos scriptores. Sic probat Aristoteles, lib. 8. Eth. cap. 1. amicitiam omnibus hominibus necessariam esse: quia divitibus eâ opus est ad exercendam beneficentiam, & ad conservandam prosperam fortunam; pauperibus, ad perfugium, & ad sublevandam egestatem; senibus, ut colantur, utque quibus rebus gerendis ipsi interesse non possunt propter infirmitatem, & transigantur ab amicis; adolescentibus, nè peccent; iis qui in vigore ætatis sunt, ad res præclare gerendas. Hæc est inductio prioris generis, eaque propriè est *progressio à singularibus ad universale*, aut saltem à minùs universalibus ad universalis. Exemplum posterioris inductionis fuerit, siquis probet totam scripturam sacram esse *divinam*, quia Lex, Prophetæ, Evangelia, & scripta Apostolorum sunt divinitus inspirata. Hæc inductionis species impropriè dicitur *progressio à singularibus ad universale*.

V. Ut inductio firma sit, enumerari debent omnia singularia, ut ex iis universale; aut omnes partes, ut ex iis concludatur totum.

VI. Vel, si illud nimis sit molestum, post plurimum singularem, aut partium enumerationem, subjiciendum est, cæterorum esse eandem rationem, aut simile quid.

1. ¶ Sic Horatius probare volens nullos homines suâ

sorte contentos esse, postquam dixisset neque mercatores, neque milites, neque agricolas, neque jurisconsultos suâ sorte contentos esse, inductionem claudit, hoc modo ;

Cætera de genere hoc (adeo sunt multa) loquacem Delassare valent Fabium.

VII. *Inductio everitur, cum dissimile cæteris exemplum exhiberi potest : idque ἐνστανς, hoc est, instantia, dicitur.*

I. ¶ Ex. gr. si quis colligat quamlibet corporis partem amputandum esse, si ita malè affecta sit ut de illius salute nemo sperare possit, & periculum sit nè totum corpus suâ lue inficiat ; quia pes, manus, auris, in ejusmodi eventu amputanda est : responderi potest, in cæteris partibus quæ prætereuntur, dissimilem esse rationem : Nam ridiculum foret, etiam caput amputare, reliqui corporis servandi causâ. Et si capitis quoque mentio fuisset facta in inductione, nemo concessisset illam partem, etsi malè affectam, amputandam esse. Atque hæc de prima syllogismi divisione.

VIII. *Secundò, dividitur syllogismus in perfectum & imperfectum. Syllogismus perfectus est, in quo nulla pars desideratur.*

IX. *Imperfectus, in quo desideratur aliqua propositio, ut enthymema ; vel pars argumenti, ut exemplum.*

I. ¶ Aristoteles passim recenset quatuor argumentationum species, syllogismum, inductionem, enthymema, & exemplum. Enthymema ait esse imperfectum syllogismum ; & exemplum, imperfectam inductionem : tum Dialécticum uti syllogismo & inductione ; Rhetorem, sive oratorem, enthymemate & exemplo. Etsi enim orator syllogismo etiam utatur & inductione ; magis tamen gaudet enthymematibus & exemplis, tum ut celet artificium, tum nè videatur auditorum ingenio diffidere, quasi necesse sit cum iis agi, veluti cum ignavis rerum vulgarissimarum.

X. *Enthymema est syllogismus alter à propositione truncatus.*

XI. *Itaque constat duabus propositionibus ; quarum prior vocatur antecedens, posterior consequens.*

XII. *Si subjectum consequentis ponitur in antecedente, suppressa est major ; si prædicatum, minor. Utrumvis accedat, enthymema poterit reduci ad syllogismum categoricum, additâ propositione quæ omissa est.*

XIII. *Si*

XIII. Si neque subjectum neque prædicatum consequentis in antecedente est, major suppressa est: eaque additâ, reducitur enthymema ad syllogismum hypotheticum.

1. ¶ Enthymema dicitur Ἐνθύμημα, id est, cogito, quia altera propositio voce exprimitur, altera cogitanda relinquitur. In hoc enthymemate, *Avarus eget: Ergò avarus non est dives*, ponitur subjectum consequentis in antecedente; ex quo colligitur deesse majorem: quâ additâ, erit plenus syllogismus, hoc modo; *Nullus dives eget: Omnis avarus eget: Ergò nullus avarus est dives*. Aliud, *Qui non peccat, non est autor peccati: Ergò Deus non est autor peccati*: hîc prædicatum consequentis in antecedente expressum est: ergò deest minor; quâ additâ, erit talis syllogismus, *Qui non peccat, non est autor peccati: Deus non peccat: Ergò Deus non est autor peccati*. Addamus tertium; *Virtus efficit felices: Ergò vitium efficit miseros*: hîc neque subjectum, neque prædicatum consequentis exprimitur in antecedente: ex quo sequitur majorem deesse; quâ additâ, erit syllogismus hypotheticus, ad hunc modum; *Si virtus felices efficit, vitium efficit miseros: Sed virtus efficit felices: Ergò vitium miseros*.

2. Aristoteles lib. 2. Prior. cap. 27. definit enthymema hoc modo, Ἐνθύμημα ὅστις συλλογισμὸς ἀτελής ἐστὶν ὁλότῳ καὶ σημείῳ: hoc est, *Enthymema est syllogismus imperfectus ex verisimilibus & signis*. Hæc definitio non convenit enthymemati per se ac ratione formæ, sed tantum ratione materiæ: ideòque non omni enthymemati convenit, sed tantum enthymemati Rhetorico. Quia enim Dialectici frequentius utuntur syllogismis quàm enthymematibus, Rhetores contrà frequentius utuntur enthymematibus quàm syllogismis; factum est, ut Aristoteles illa solum enthymemata suâ definitione complexus sit, quæ Rhetoribus in usu sunt: qualia sunt ea, quæ argumentum petunt ex loco verisimilium, & signorum.

3. Quintilianus lib. 5. cap. 10. vertit enthymema commentum, sive commentationem; idque dicit triplicem habere intellectum: unum, quo omnia mente concepta significat; alterum, quo sententiam cum ratione; tertium, quo certam quandam argumenti conclusionem, vel ex consequentibus, vel ex repugnantibus. Ciceroni in Top. ad Treb. enthymema est qua-

libet sententia, sed imprimis ea, quæ ex contrariis conficitur, quia videtur acutissima; ut, Eam quam nihil accusas, damnas: Bene quam meritam esse autumas, dicis malè mereri.

XIV. Παράδειγμα δέον, ὅταν τῷ μίῳ τὸ ἄκρον ὑπάρχον δειχθῇ διὰ τῶ ὁμοίᾳ τῷ τρίτῳ. hoc est, Exemplum est, quando extremum medio inesse ostenditur per simile tercio.

1. §. Hoc est, quando majus extremum, sive prædicatum, colligitur inesse medio per exemplum aliquod, quod sit simile tertio, hoc est, subiecto. Constat enim exemplum quatuor terminis, ex quibus fiunt duæ ratiocinationes; una perfecta, in qua ex majore universali colligitur aliquod particulare; altera imperfecta, in qua ex particulari, quod simile est subiecto conclusionis illatæ, colligitur universa propositio, quæ continet similitudinem utriusque rei particularis, quæque fuerat major primæ ratiocinationis. Ex. gr. sit majus extremum, perniciosum esse; medium, inferre bellum finitimis: minus extremum sive subiectum, Athenienses inferre bellum Thebanis; simile minori extremo, sive subiecto, Thebanos inferre bellum Phocensibus. Ex his fiat exemplaris argumentatio talis; Finitimis inferre bellum, est perniciosum: Atqui si Athenienses inferunt bellum Thebanis, finitimis bellum inferunt: Ergo si Athenienses inferunt bellum Thebanis, est perniciosum. Addatur huic ratiocinationi exemplum, eoque confirmetur propositio major; Perniciosum fuit Thebanis inferre bellum Phocensibus: Atqui illud erat inferre bellum finitimis: Ergo bellum inferre finitimis est perniciosum. Hic jam concluditur prædicatum de medio, per aliquid simile subiecto præcedentis syllogismi.

2. Exemplum non concludit necessariò, ideòque non efficit certam notitiam; quia progreditur à particulari ad universale: persuadet tamen & generat opinionem, idque ex hoc fundamento, Similibus similia convenire consentaneum est. Sed tum demum persuadet, si exploratum sit, medium convenire subiecto, nempe, Athenienses inferre bellum Thebanis, esse bellum inferri finitimis, & prædicatum convenire ei, quod est simile subiecto, nempe, perniciosum fuisse Thebanis inferre bellum Phocensibus.

3. Exemplum habet rationem partis ad partem, quia ex uno particulari notiori, alterum colligitur quod ignotius est.

Neque

Neque verò hoc pugnat cum tradita definitione, in qua dicitur majus extremum de medio probari, ac proinde inferri conclusionem universalem ex particulari : quia non monstratur in exemplo universa propositio propter se, sed ut ex ea alterum particulare simile colligatur.

4. Exemplum definitur à Quintiliano, *lib. 5. cap. 11. rei gestæ, aut ut gestæ, utilis ad persuadendum id quod intenderis, commemoratio.* Unde duo sunt exemplorum genera, teste Aristotele, *lib. 2. Rhet. cap. 20.* unum, cum res præteritas commemoramus ; alterum, cum ipsi fingimus aliquid, ut *gestam*. Hoc genus iterum in fabulam & parabolam dividitur. Atque hoc modo sumitur exemplum à Rhetoribus, & quidem propriè. Logicis exemplum est omne id, quo rem singularem aliâ simili re probamus.

C A P. XII.

De syllogismo hypothetico, disjunctivo, & relativo.

T H E O R E M A I.

Tertio, dividebatur syllogismus in simplicem & compositum. Syllogismus simplex est, qui neque constat propositionibus compositis, neque in plures syllogismos resolvi potest.

II. Compositus, qui ex altera vel utrâque præmissarum composita, vel etiam ex pluribus syllogismis conflatus est.

III. Syllogismus ex altera vel utrâque præmissarum composita conflatus, vel est hypotheticus, vel disjunctivus, vel relativus.

IV. Syllogismus hypotheticus est, cujus major, aut minor, aut utraque propositio est hypothetica.

V. Si sola major sit hypothetica, conclusio est categorica : at si minor hypothetica sit, necesse est conclusionem quoque hypotheticam esse.

I. ¶ Quemadmodum omnis enunciatio composita vulgò hypothetica nuncupatur ; ità etiam appellatur omnis syllogismus hypotheticus, qui ex altera vel utrâque propositione composita conflatus est. Aristoteli syllogismus est *κατάσκευαστος*

est syllogismus indirectus, cujus species est syllogismus *διὰ τοῦ ἀδυνάτου*, id est, per impossibile; ut videre est lib. I. Prior. cap. 23. de quo nos agimus cap. 14. Adjiciamus exempla:

1. Si Deus est, mundus regitur providentiâ:
Atqui Deus est:
Ergo mundus regitur providentiâ.
2. Quicquid nutritur, habet partes heterogeneas:
Atqui si lapis vivit, nutritur:
Ergo si lapis vivit, habet partes heterogeneas.
3. Si homo sentit, etiam vivit:
Atqui si homo est animal, sentit:
Ergo si homo est animal, etiam vivit.

VI. Syllogismi hypothetici habentis solam majorem hypotheticam, duo sunt modi bene concludentes: prior, à positione antecedentis ad positionem consequentis; alter, à remotione consequentis ad remotionem antecedentis.

VII. Toridem sunt modi fallaces: prior, à remotione antecedentis ad remotionem consequentis; alter, à positione consequentis ad positionem antecedentis,

1. ¶ Ponere antecedens aut consequens, est illud assumere servatâ qualitate; hoc est, affirmatum affirmare, aut negatum negare. Removeve antecedens aut consequens, est illius contradictionem assumere; hoc est, affirmatum negare, negatum affirmare contradictoriè; Ex. gr.

1. Si homo sentit, est animal:
Atqui homo sentit:
Ergo homo est animal.
2. Si lapides vivunt, nutriuntur:
Atqui lapides non nutriuntur:
Ergo lapides non vivunt.

Horum syllogismorum prior procedit à positione antecedentis ad positionem consequentis, hoc est, assumit antecedens majoris hypotheticæ, indèque infert illius consequens: posterior procedit à remotione consequentis ad remotionem antecedentis, hoc est, assumit contradictionem consequentis, indèque infert contradictionem antecedentis. In disputationibus studemus compendio, & cum volumus ex antecedente inferre

ferre consequens, propositâ majore, dicimus: *Atqui verum est antecedens, ergo & consequens*: vel, *Atqui verum prius, ergo etiam posterius*. Si volumus ex consequente colligere antecedens, dicimus, *Atqui falsum consequens, ergo & antecedens*: vel, *Atqui falsum posterius, ergo etiam prius*.

2. Addamus exempla syllogismorum vitiosorum,

1. *Si planta est animal, vivit*:
Atqui planta non est animal:
Ergo planta non vivit.
2. *Si planta est animal, vivit*:
Atqui planta vivit:
Ergo planta est animal.

Horum syllogismorum prior vitiosus est, quia procedit à remotione antecedentis: posterior, quia procedit à positione consequentis.

3. Sed & hic vitiosus est,

Si omne animal est rationale, omnis etiam bestia est rationalis:
Atqui nulla bestia est rationalis:
Ergo nullum animal est rationale.

Causa peccati est, quòd minor contraria sit consequenti, & conclusio contraria sit antecedenti, non contradictoria. Debebat enim inferri, *Ergo aliquod animal non est rationale*. Hoc enim est remove antecedens, ut diximus.

VIII. *Si idem sit subjectum antecedentis & consequentis in majore hypothetica, syllogismus hypotheticus fieri poterit categoricus & simplex, abjecto cum conditione SI communi antecedentis & consequentis subjecto.*

IX. *Et syllogismus à positione antecedentis, erit in prima; à remotione consequentis, in secunda figura.*

1. ¶ Sint exempli loco syllogismi illi duo, quos dixi supra bene concludere: horum prior erit in prima; alter, in secunda figura, si cum particula SI subjectum conclusionis majori detrahatur, hoc modo:

- I. *Omne sentiens est animal*:
Omnis homo sentit:
Ergo omnis homo est animal.

1. *Omne vivens nutritur :*
Nulli lapides nutriuntur :
Ergò nulli lapides vivunt.

2. Atque hinc liquet, cæteros modos syllogismorum hypotheticorum vitiosos esse. Si enim syllogismus à remotione antecedentis fiat categoricus, erit paralogismus ex minore negante in prima figura. Si syllogismus à positione consequentis fiat categoricus, erit paralogismus ex duabus affirmantibus in secunda figura. Sint exempli loco duo syllogismi vitiosi, quos suprà proposui ; ex iis fient categorici, hoc modo ;

1. *Omne animal vivit :*
Atqui planta non est animal :
Ergò planta non vivit.

2. *Omne animal vivit :*
Atqui omnis planta vivit :
Ergò omnis planta est animal.

X. Si aliud sit subjectum antecedentis, aliud consequentis in majore, & prædicatum idem ; syllogismus hypotheticus, poterit quidem fieri categoricus, sed non poterit fieri syllogismus simplex.

XI. Si etiam prædicatum diversum sit, nè categoricus quidem fieri poterit ex iisdem terminis.

1. ¶. Hic enim syllogismus,
Si Abraham justificatus est ex fide, nos quoque ex fide justificabimur ;

Atqui Abraham justificatus est ex fide :

Ergò nos quoque justificabimur ex fide,
 poterit quidem fieri categoricus, sed qui habeat majorem partium relatione compositam ; ut,

Quo modo justificatus est Abraham, eo modo nos quoque justificabimur :

Atqui Abraham justificatus est ex fide :

Ergò nos quoque ex fide justificabimur.

At hic syllogismus,

Si ex lege est justitia, Christus frustrà mortuus est :

Atqui Christus non frustrà mortuus est :

Ergò ex lege non est justitia,

nullo

nullo pacto potest fieri categoricus : quia medium quod assumitur ad probandam conclusionem, non est simplex, sed integra hæc enunciatio, *Christus frustra mortuus est* ; ac proinde sunt in eo quatuor termini, *justitia, esse ex lege, Christus, frustra mortuum esse* : At in syllogismo categorico non possunt esse quatuor termini simplices. In quo differt à syllogismo hypothetico, qui potest ex quatuor terminis simplicibus componi, sed ita tamen, ut duo eorum coalescant in enunciationem, quæ est terminus complexus, & tota sumitur ut medium, eodemque munere fungitur in syllogismo hypothetico, quo terminus simplex in syllogismo simplici.

2. Ex quibus liquet syllogismos hypotheticos non esse rejiciendos, imò sæpe esse necessarios. Interim præstat inter disputandum, si fieri potest, adhiberi categoricos, quia si fortè consequentia syllogismi hypothetici à respondente negetur, ejus probatio difficilis est, & multis verborum ambagibus involuta.

XII. *Syllogismus disjunctivus est, cujus major est propositio disjunctiva.*

XIII. *Quæ si constet duobus membris immediatè oppositis, procedi potest à positione alterutrius membri ad eversionem alterius ; aut ab eversione alterutrius ad positionem alterius.*

1. § Ex. gr. ex hac positione, *Aut dies est, aut nox, inferri potest, Sed est dies, ergò non est nox ; vel, Sed est nox, ergò non est dies : vel, Sed non est dies, ergò est nox ; vel, Sed non est nox, ergò est dies.*

XIV. *Si major habeat plura membra duobus, cæteris sublati, quod reliquum est concluditur.*

1. ¶ Ut, *aut hyems est, aut æstas, aut ver, aut autumnus :*

*Atqui hyems non est, neque autumnus, neq; æstas :
Ergò ver est.*

Si membra propositionis disjunctæ non sint opposita, aut non plenè enumerata, syllogismus est vitiosus ; ut in hoc syllogismo,

*Aut Jurisconsultus est, aut Medicus, aut Philosophus :
Sed non est Jurisconsultus, neque Medicus :
Ergò est Philosophus.*

Ubi illatio vitiosa est, quia Jurisconsultum, Medicum, Philosophum esse, non sunt opposita. Idem enim & Jurisconsultus esse potest, & Medicus, & Philosophus. Tum membra non sunt plenè enumerata. Potest enim aliquis nihil istorum omnium esse: qui aut doctus non sit, aut etiam Theologus sit, aut Philologus.

XV. *Cum remotis ambobus vel omnibus membris, remove-tur totum, est syllogismus ab enumeratione partium.*

I. ¶ Ex. gr. *Qui injuriam facit, id facit aut furto, aut adulterio, aut contumeliâ, aut tali aliquo modo.*

Sed nemo sua furatur, aut seipsum adulteratur, neque afficit contumeliâ:

Ergo nemo sibi facit injuriam.

XVI. *Syllogismus disjunctivus fit hypotheticus, cum major disjuncta fit hypothetica.*

I. ¶ Ex. gr. hæc præpositio, *Aut dies est, aut nox*, mutari potest in hypotheticam, hoc modo; *Si dies est, non est nox: Si nox non est, est dies,*

XVI. *Syllogismus relativus est, cujus major partium relatione composita est:*

Ut, ubi est Christus, ibi etiam erunt fideles:

Atqui Christus est in cælo:

Ergo fideles quoque erunt in cælo.

Huc pertinent syllogismi proportionales: Ex. gr.

Ut se habent duo ad quatuor, ita se habent tria ad sex:

Sed duo se habent ad quatuor, ut dimidium ad totum:

Ergo tria se habent ad sex, ut dimidium ad totum.

Hujusmodi syllogismi non multum differunt figurâ à simplicibus. Cæterum, quàm perperam syllogismi hypothetici & disjunctivi confundantur cum iis, quos Aristoteles vocat syllogismos $\chi\tau\iota\ \alpha\epsilon\tau\iota\lambda\eta\lambda\iota\sigma\tau\iota$, & relativi cum iis, quos appellat $\chi\tau\iota\ \omega\epsilon\iota\lambda\eta\lambda\iota\sigma\tau\iota$, postea dicimus. Hæc de syllogismo qui constat ex propositionibus compositis.

CAP. XIII.

De Dilemmate, Prosyllogismo, & Sorite.

THEOREMA I.

Syllogismus ex pluribus syllogismis compositus, vel est dilemma, vel prosyllogismus, vel sorites.

II. Dilemma est argumentatio duorum membrorum, quorum utrumque adjunctum habet incommodum.

I. §. Δίλεμμα dicitur quasi δις λαμβάνων, hoc est, syllogismus anceps, & utrinque capiens, sive constringens adversarium. Sit pro exemplo illud Biantis apud Gellium, lib. 5. cap. 11. Si ducenda est uxor, aut pulchra ducenda est, aut deformis: si pulchram ducis, habebis communem; si deformem, feres pœnam.

III. Dilemma constat syllogismo disjunctivo, quo à partium remotione concluditur remotio totius; & duobus syllogismis categoricis: quibus partium remotio confirmatur.

I. § Dilemma jam allatum sic resolvi potest;

Si ducenda est uxor, aut formosa ducenda est, aut deformis:

Atqui non est ducenda formosa, neque deformis:

Ergò uxor non est ducenda.

Uxor communis non est ducenda:

Atqui formosa communis erit:

Ergò formosa non est ducenda.

Quæ ducenti futura est pœna, non est ducenda:

Atqui deformis ducenti futura est pœna:

Ergò deformis non est ducenda.

IV. Dilemma inefficax est: primò, cum membra non sunt immediatè opposita: secundò, cum non satè gravi incommodo urgentur: tertio, cum pari efficacità retorqueri potest in autorem.

I. § Duplici ergò nomine infirmum est dilemma Biantis de re uxoria: primò, quia membra non sunt immediatè opposita: datur enim media forma, inquit Gellius, quæ à nimia pulcritudinis periculo, & à summo deformitatis odio vacat,

quæ

quæ ab Ennio perquam-eleganti vocabulo, statuta dicitur; à Favorino, uxoria. Deinde non sequitur necessario, ut aut formosa communis sit futura; aut deformis, odio. Exemplum retorsionis apud Gellium etiam existat eod. lib. cap. 10. nimis quàm scitum. Euathlus eloquentiæ discendæ, causarumque orandi cupidus, sese dedit in disciplinam Protagoræ, dimidi-umque mercedis jam tunc dedit statim, priusquàm disceret, pe-pegitque ut reliquum dimidium daret, quo primo die causam apud iudices orasset, & vicisset. Postea, cum longum tempus transcurreret, Protagoras litem cum Euathlo contestatur, & in hunc modum disputat; *Sive contra te pronunciatum erit, sive pro te, reddas oportet, quod peto: Nam si contra te lis data erit, merces mihi ex sententia debebitur, quia vicerò; sin ve-rò contra me iudicatum erit, merces mihi ex pacto debebitur, quia tu viceris.* Euathlus primum ait, isti captioni potuisse obviam iri, si verba non ipse faceret, sed patrono uteretur. Deinde retorquet dilemma hunc in modum; *Sive contra me pronunciatum erit, sive pro me, non reddam quod petis: Nam si iudices pro meâ causâ senserint, nihil tibi ex sententia debe-bitur, quia ego vicerò; sin contra me pronunciaverint, nihil tibi ex pacto debebo, quia non vicerò.*

V. Prosyllogismus est, cum duo syllogismi quinque propo-sitionibus ita continentur, ut prioris conclusio sit major vel mi-nor sequentis.

I. § Ex. gr. *Omne vivens nutritur: Omnis planta vivit: Ergò omnis planta nutritur: Atqui nulli lapides nutriuntur: Ergò nulli lapides sunt plantæ. Vel sic, Omne animal sentit: Omnis homo est animal: Ergò omnis homo sentit: Quicquid autem sentit, est mortale: Ergò omnis homo est mortalis.* Ho-rum syllogismorum posterior utrobique est principalis; prior est auxiliaris, & accersitus ad probationem, vel majoris, ut in primo; vel minoris, ut in secundo exemplo.

VI. Sorites est argumentatio constans multis propositionibus ita collocatis, ut prædicatum propositionis præcedentis fiat sub-jectum sequentis, indeque prædicatum ultimum concludatur de sub-jecto primo.

I. § Σωρείτης dicitur à σωρός, hoc est, acervus, quia est quædam propositionum veluti coacervatio. Exempli loco sit illud

illud Apostoli ad Rom. cap. 8. Quos Deus præcognovit, prædestinavit: quos prædestinavit, vocavit: quos vocavit, justificavit: quos justificavit glorificavit. Hinc collige, Ergo quos præcognovit, glorificavit.

VII. Sorites continet tot syllogismos, quot termini inter primæ propositionis subjectum, & ultimæ prædicatum interpositi sunt.

I. ¶. Itaque Sorites Pauli continebit tres syllogismos, qui hoc modo formari possunt. 1. Quos Deus prædestinavit, eos vocavit: Atqui quos præcognovit, prædestinavit: Ergo quos præcognovit; vocavit. 2. Quos Deus vocavit, justificavit: Atqui quos prædestinavit, vocavit: Ergo quos prædestinavit, justificavit. 3. Quos Deus justificavit, glorificavit: Atqui quos vocavit, justificavit: Ergo quos vocavit, glorificavit.

CAP. XIV.

De syllogismo modali & indirecto.

THEOREMA I.

Quartò dividebatur syllogismus in purum & modalem. Syllogismus purus est, qui constat utrâque propositione purâ.

II. Modalis, qui constat utrâque vel alterâ propositione modali.

I. ¶. De syllogismo modali agit Aristoteles capite 8. & sequentibus usque ad caput 23. lib. 1. Prior Syllogismi modalis quinque sunt ordines: primus ordo est eorum, qui constant utrâque propositione modi necesse; ut,

Necesse est omne animal sentire:

Atqui necesse est omnem hominem esse animal:

Ergo necesse est omnem hominem sentire.

Secundus ordo est eorum, qui constant alterâ propositione modi necesse, alterâ purâ; ut,

Necesse est omne animal sentire:

Atqui omnis homo est animal:

Ergo necesse est omnem hominem sentire.

Tertius ordo est eorum, qui constant ex utrâque propositione modi contingit; ut,

Contingit

Contingit omnem hominem ambulare :

Atqui contingit aliquem hominem esse album :

Ergò contingit aliquod album ambulare.

Quatus ordo constat ex altera propositione pura , & altera modi *contingit* ; ut,

Contingit omne animal currere :

Atqui omnis homo est animal :

Ergò contingit omnem hominem currere.

Quintus ordo constat ex altera propositione modi *neceffe*, & altera modi *contingit* ; ut,

Contingit omne animal dormire :

Atqui necesse est omnem hominem esse animal :

Ergò contingit omnem hominem dormire.

Propositiones modi *impossibile* annumerantur propositionibus modi *neceffe* ; & propositiones modi *possibile*, iis quæ sunt modi *contingit*. In syllogismis modalibus observandæ sunt multæ regulæ, & cautiones, quas Aristoteles citato loco diligenter tradit : verum, quia syllogismorum modalium non est ita magnus usus, & hæ regulæ admodum difficiles sunt, non duxi operæ præmium eas sollicitè inculcare. Siquis tamen eas cognoscere desideret, legat doctissimam paraphrasin Jo. Monlorii in lib. I. Prior.

III. Quintò denique dividebatur syllogismus in directum & indirectum. Syllogismus directus est, qui ex sumptis pronuntiatis ipsam quæstionem colligit.

IV. Syllogismus indirectus est, qui non ipsam quæstionem colligit, sed aliud quid : ex quo tamen probatio quæstionis quâdam conventionione sequitur.

I. ¶ Arist. lib. I. Prior. cap. 23. appellat syllogismum directum syllogismum *ἀπὸ τοῦ ἐκείνου*, & indirectum, syllogismum *ἐκ τινος ἄλλου*, hoc est, ex conventionione aut constituto, & rectè. Syllogismus enim indirectus non ipsam quæstionem probat, sed aliud quid : idque eo pacto ac conditione, ut eo probato, ipsa quoque quæstio probata habeatur.

V. Syllogismus indirectus, vel est syllogismus *ἀπὸ τῆς ἀντιθέσεως*, hoc est, deducens ad incommodum, vel *ἀπὸ τῆς ὁμολογίας*, hoc est, concludens ex concessione.

VI. Syllogismus ducens ad incommodum est, cum ex con-

traditione quaestionis quam volumus probare, & aliâ propositione manifestè verâ, colligimus aliquid quod est manifestè falsum

I. § Syllogismus, quo τὸ ἀδύνατον, sive falsum atque incommodum concluditur, est syllogismus directus: ac proposita quaestio, ex falsa conclusione indirectè, & per ambages colligitur. Ea collectio nititur duobus fundamentis, in quibus utrinque consentitur Prius est *Ex veris præmissis non sequitur falsa conclusio*. Alterum, *Duo contradicentia non possunt simul esse falsa*. Declaremus rem exemplo, sitque quaestio, *An lapides vivunt*? Tu negas lapides vivere: adversarius, ex Cardani sententia, ait vivere. Sume ergò sententiam Cardani, quæ tuæ contradicit, *Lapides vivunt*: eique adjuuge hoc pronuntiatum, vel ipsius adversarii iudicio verum: *Quicquid vivit, nutritur, habetque partes organicas*: indèque sit argumentare:

Quicquid vivit, nutritur, habetque partes organicas:

Atqui lapides vivunt:

Ergò lapides nutriuntur, habentque partes organicas:

Hæc certè conclusio est falsa, vel ipsâ experienciâ teste. Quare, cùm ex veris non sequatur falsum, necesse est alteram propositionum falsam esse. Jam verò, majorem concedit adversarius. Si ergò minor falsa sit, (quod certè necesse est) sequitur ejus contradictionem, *Lapides non vivunt*, veram esse; quod erat probandum.

VII. Syllogismus δι' ὁμοκειρίας, hoc est, concludens ex concessione, est, cùm quaestio proposita in aliam transfertur, hâc conventionem factâ, ut illâ probatâ, quaestio proposita probata sit.

I. ¶ Quaestio proposita probatur indirectè: sed illa in quam proposita quaestio transfertur, probatur directè. Sic probat Aristoteles, lib. 2. de Cælo. cap. II. *Omnia astra esse rotunda*. Quia autem difficile est unâ ratiocinatione id de omnibus astris simul concludere, transfert quaestionem ad Lunam, probâtque, *Lunam rotundam esse*, indèque colligit, *Omnia astra esse rotunda*, præsupponens omnium astrorum eandem esse rationem. *Lunam esse rotundam*, probat ex eo quod ejus lumen portionibus sphaericis crescat, atque minuitur.

2. Aristoteles *lib. 1. Prior. cap. 44.* appellat syllogismos ejusmodi, syllogismos διὰ συνθήκης ἐμολογημάτων, hoc est, ex conventionē concessos; & *cap. 23.* syllogismos πρὸς τὸ μεταλαμβάνειν, hoc est, qui concludunt transumptum; item, *cap. 29.* syllogismos καὶ μεταλήψιν, ex transumptione, hoc est, ex commutatione quæstionis propositæ. Huc debet revocari syllogismus καὶ πίσωτα, quem vocat Aristoteles, quo scilicet probatur, quod minùs probabile est, eâ conditione, ut probatum sit, quod magis probabile est. Atque hæc de syllogismo absolutè, & ratione formæ, considerato.

CAP. XV.

De Syllogismo Dialectico.

THEOREMA I.

SEquitur syllogismus ratione materiæ, sive in certis materia conditionibus considerandus, & in ordine ad diversos effectus, qui diversas materiæ conditiones sequuntur.

II. Atque hæc consideratione dividitur syllogismus in verum & fallacem: & verus, in dialecticum & apodicticum.

I. §. Duplex est notitia thematis complexi, sive enunciationis: una, quâ partes enunciationis seorsum apprehenduntur; altera, quâ judicatur enunciationem esse veram aut falsam. Illa vocatur vulgò notitia apprehensiva; hæc, notitia judicativa, vel etiam assensus. Notitia apprehensiva antecedit syllogismum. Non potest enim thema complexum syllogismo probari aut refelli, nisi partes cognitæ sint, & mente præconceptæ. Assensus, si opus sit, efficitur syllogismo: ita ut existimatio generale sit effectum syllogismi. Assensus vel verus est, vel falsus: unde & syllogismus, alius ad errorem deducit, alius ad veritatem. Si deducit ad errorem, vocatur syllogismus ἀπατητικός, sive fallax, *lib. 1. Post. cap. 16.* & si deceptor victoriam tantum spectet & gloriam, dicitur ἐπιστικός, hoc est, contentiosus; si etiam lucrum respiciat, σοφιστικός, id est, sophisticus, *cap. 11. Soph. elench.* Sophista enim est, qui lucrum captat ex ea, quæ videtur esse sapientia, & non est, *Ibid. cap. 1.* Si syllogismus ad veritatem ducit, vel generat scientiam,

am, vel opinionem, aliūve assensum, aut existimationem, quæ non est scientia. Si scientiam generat, dicitur ἀποδείξις, hoc est, *demonstratio*, ut lib. 1. Post. cap. 2. Cap. 2. Soph. elench. vocatur syllogismus demonstrativus, & syllogismus didascalicus; & lib. 8. Top. cap. 11. philosophema. Si generat opinionem, aut aliam aliquam assensionem, dicitur syllogismus dialecticus: & si aliquid concludit ex iis, quæ adversario videntur probabilia, πειραστικός, hoc est, *tentativus*, ut videre est cap. 11. Elench. sophist. ubi dicitur, πειραστικῶς εἰς διαλεκτικὴν τινά, id est, *partem aliquam dialectices*.

III. Syllogismus dialecticus, est syllogismus generans opinionem, aut alium quemlibet assensum præter scientiam.

1. ¶ Aristoteles lib. 1. Top. cap. 1. definit syllogismum dialecticum, συλλογισμὸν ἐξ ἐνδοξῶν συλλογίζεσθαι, hoc est, *syllogismus, qui ex probabilibus colligitur*: & dialecticum, cuius instrumentum est syllogismus dialecticus, methodum αὐτῆς δινοσέμεθα συλλογίζεσθαι περὶ παντὸς περὶ δὲ βλήματος ἐξ ἐνδοξῶν, καὶ αὐτοὶ λόγοι ὑπάρχοντες μηδὲν ἑρπιδυῖν παντίον, hoc est, *quæ poterimus de quolibet proposito problemate argumentari, & ipsi disputationem sustinentes, nihil dicemus repugnans*. Duæ igitur sunt partes dialectici; pro utraque parte adferre quicquid facit ad probandam sententiam suam; & diluere, quicquid ab aliis contrā assertur, aut verò afferri potest. Hisce partibus censetur dialecticus bene defungi, cum nihil prætermittit eorum, quæ ad hosce fines consequendos conducunt, eod. lib. cap. 3.

2. Methodus sive ars dialectica ad tria potissimum utilis est; πρὸς γυμνασίαν, hoc est, *ad exercitationes scholasticas*, ingenii acuendi & iudicii confirmandi causâ instituendas; πρὸς ἐντευξιν, hoc est, *ad conventus & colloquia*, quæ in quotidiana conversatione cum quibuslibet hominibus instituenda sunt; & πρὸς τὰς κατὰ φιλοσοφίαν ὁπσιμαί, hoc est, *ad comparandas scientias Philosophicas*. Atque hoc quidem duplici ratione: primò, quia in quæstione perplexâ, expensis & ponderatis utrinque rationibus, facilius est statuere, quid verum sit; ut testis est Aristoteles, lib. 1. Met. cap. 2. secundò, quia ad scientiarum principia confirmanda, si fortè in dubium vocentur, Dialectica plurimum adfert auxilii. Nam cum prin-

cipia propriis rationibus in sua scientia non possint confirmari, unum superest, ut confirmentur rationibus communibus, sive dialecticis.

3. Atque hoc modo tradit Aristoteles artis Dialecticæ, & syllogismi dialectici naturam, & definitionem: quàm rectè, jam non disputabo. Hoc tantùm dicam, in aperto errore versari eos, qui syllogismi dialectici nomine eas solùm argumentationes intelligunt, quæ ex probabilibus præmissis generant opinionem; & tamen syllogismum verum partiuntur in dialecticum & apodicticum. Multa enim sunt loca, quæ argumenta suppeditant, non apodictica quidem, sed tamen necessaria: quæ, etsi non generent scientiam strictè dictam, efficiunt tamen assensum firmum & indubitatum: quem, qui opinionem vocat, nimis audacter *opinionis* vocabulo abutitur. Ut igitur omnes argumentationes non apodicticas, syllogismi dialectici appellatione concluderemus, definitionem proposuimus laxiorem, eamque à fine petitam. Ut enim demonstratio est syllogismus scientiam pariens, ita syllogismus dialecticus dicitur non is solùm qui opinionem generat, sed quicumque generat assensum qui non est scientia.

IV. In syllogismo dialectico consideranda sunt problemata, propositiones, & inventio argumentorum.

V. Quæstio dialectica sive problema debet esse tale, ut neque pietati aut bonis moribus, neque sensui communi adversetur.

I. ¶ Nihil refert, sitne problema, quod syllogismo dialectico probandum est, necessarium an contingens, probabile an paradoxum, verum an falsum; modò non adversetur pietati, bonis moribus, aut sensui communi. Non enim oportet (inquit Aristoteles *lib. I. Top. cap. II.*) omne problema in quæestionem vocare, sed illud solùm, de quo dubitare possit quispiam ἢ λόγῳ θεομύθῳ, καὶ μὴ κοινῶς ἢ αἰδησίῳ, hoc est, eorùm, adversus quos rationibus agendum est, non πᾶσι, aut sensuum testimonio. Siquis enim in dubium vocet, *Sitne Deus colendus, parentes honorandi, magistratui parendum*; &c. supplicio potius quàm rationibus dialecticis coercendus est, Similiter, si quis dubitet, *An nix sit alba*, non aliâ ratione quàm sensuum testimonio confutandus est: quod qui spernit quid tandem concedit?

VI. De subiecto problematum dialecticorum non est laborandum. Attributa dialectica vel sunt primarum, vel secundarum notionum: quorum ista constituent problemata realia; hæc, notionalia.

VII. Problemata notionalia tam latè patent, quàm ipsæ affectiones sive notiones Logicæ, primo libro traditæ.

1. ¶ Ex.gr. cùm quæritur, *An locus sit superficies*; est problema primæ notionis, sive reale; quia attributum est vera res: at cùm quæritur, *An superficies sit loci genus*; est problema notionale; quia attributum non est vera aliqua res, sed notio tantùm Logica, sive secunda, quæ nihil aliud est quàm aliquid ratione confictum. Aristoteles lib. 1. Top. cap. 4. facit quatuor classes attributorum dialecticorum, ad quas vult omnia problemata revocari. Hæ classes sunt genus, definitio, proprium, & accidens. Differentiam generi adjungit, si sit latior specie; definitioni, si cum specie reciprocetur. Species, si fortè attributatur in problemate, revocatur ad genus. Problemata de eodem & diverso, ait ad definitionem pertinere.

2. Problemata generis, definitionis, & proprii, sunt problemata secundarum notionum sive notionalia. Problemata realia revocantur ad problemata accidentis; & ex problematibus notionalibus ea, in quibus quæritur, an aliquid sit alicujus accidens. Non enim id solum Aristoteli problema accidentis est, cùm quæritur, verbi gratiâ, *An nigror sit accidens corvi*; sed etiam cùm quæritur, *An corvus sit niger*; *an crociter*; *an sit avis*, &c.

3. Hæc attributorum dialecticorum divisio fortè apta est ad scopum consequendum, quem Aristoteles sibi habet in Topicis propositum. At nostro instituto accommodatius est; notionalia attributa ad istum modum dividere & disponere, quo libro primo simplicium thematum affectiones divisimus, ac disposuimus. Nulla enim Logica affectio est, de qua non possit problema proponi. Sic quæritur in Theologia, *An Antichristus sit futurus unum certum individuum*: *An fides sit causa electionis*: *An fides sit causa instrumentalis justificationis*: *An charitas sit forma fidei*, &c. Quæ problemata difficulter possunt revocari ad illas classes attributorum, quas Aristoteles proposuit.

VIII. *Problemata realia vel sunt absoluta, vel comparata.*

IX. *Problemata absoluta sunt, cum quæritur, an attributum subiecto conveniat, necne.*

X. *Problema comparatum est, cum propositis duobus pluribusve subiectis, quæritur utri magis, vel cui maxime conveniat attributum: vel cum propositis duobus pluribusve attributis, quæritur utrum subiecto magis, vel quodnam ex omnibus maxime conveniat.*

I. Ex.gr. cum quæritur, *An gloria sit in bonis enumeranda, est problema absolutum: at cum quæritur, Sine virtus, an gloria magis expectanda: fueritne Alexander fortior an temperantior, est problema comparatum.*

XI. *Problemata dialectica cujuscunque sint generis, per se possunt ex omnibus disciplinis.*

I. § Dialectica enim est ars universalis, quæ omnibus disciplinis inservit. Aristoteles lib. I. Top. cap. II. & 14. tria tantum problematum dialecticorum genera enumerat: Ethica; ut, *An voluptas sit bonum*: Physica, ut, *An mundus sit æternus*: & Logica; ut, *An detur quarta figura syllogismorum*. Sed videtur Aristoteles spectasse divisionem Philosophiæ in naturalem, moralem, & rationalem sive Logicam, tum temporis acceptam. De qua vide Diog. Laertium in vita Zenonis Cittiensis.

XII. *Propositiones dialecticæ debent esse certæ, aut saltem probabiles non paradoxæ.*

XIII. *Probabile est, quod, cum certum non sit, magis tamen videtur verum esse quam falsum.*

XIV. *Probabilitatis gradus sunt quinque. Probabile enim dicitur, & quod omnibus videtur, & quod plerisque, & quod sapientibus; iisque vel omnibus, vel plerisque, vel nobilissimis vel celeberrimis.*

XV. *Paradoxum dicitur, quod verum est præter opinionem vulgi.*

XVI. *Itaque quod paucis, iisque celeberrimis sapientum videtur: tum demum probabile est, cum idem non est paradoxum.*

1. ¶ *Propositio dialectica* definitur ab Aristotele, *lib. 1. Top. cap. 10.* ἐρωτήσις ἐνδὸξος, hoc est, *interrogatio probabilis*; ἐρωτήσις τῆς ἀντιφάσεως, hoc est, *interrogatio contradictionis*; item, λήψις τῆς φαινομένης καὶ ἐνδὸξας, hoc est, *sumptio ejus quod apparet esse verum, quodque probabile est.* Etenim dialecticus olim interrogando eliciebat assensum ejus cum quo disputaret, & quod concessum esset, assumebat ad ratiocinandum, ut respondentem ex concessis redargueret. Quæ disputandi ratio apparet, in dialogis Platonis, eamque docet Aristoteles *lib. 8. Topicorum.* Igitur *propositio dialectica* dicitur *interrogatio*, quoad eum qui percontatur; & *sumptio*, quoad eum qui ratiocinatur. Cum autem *interrogatio* sit multiplex (nam quæri potest, an res sit, quid sit, quanta, qualis, quotuplex, aut unde sit) ea sola *interrogatio dialectica* dicitur, ad quam responderi potest, *ita*, vel *non*.

2. Probabile definitur, quod, cum certum non sit, magis tamen videtur esse verum, quam falsum. Nam Aristoteles non tam definitur probabile, quam illius gradus ac modos recensuit. *Propositio dialectica* debet esse ἐνδὸξος non ἀντιφάσεως, hoc est, contraria opinioni vulgi, aut respondentis. Quomodo enim concedet respondens, quod judicat esse falsum? Propositiones dialecticæ, vel certæ sunt; ac necessariæ (nam & hæ probabiles sunt) vel contingentes, hoc est tales, ut interdum falsæ sint. Hæc enim *propositio, Matres diligunt liberos suos*, omnibus hominibus videtur vera; etsi reperta sint matres, quæ liberos suos oderunt.

CAP. XVI.

De Inventione argumentorum dialecticorum,
sive de locis & regulis topicis.

THEOREMA I.

Ad inventionem argumentorum dialecticorum spectat locus & regula.

II. Locus est sedes, & nota quadam communis, cujus admodum argumentum invenitur.

III. Regula sive canonicum est propositio continens rationem consequentiæ syllogismi dialectici.

I. § Nomen loci ait Cicero, in *Topicis ad Trebatium*, ab Aristotele acceptum esse pro sede sive domicilio argumenti, vel etiam pro nota, unde omnis in utramque trahitur oratio. Addit etiam in lib. 2. de *Orat.* aptam hujus acceptionis causam: *Ut enim*, inquit, *si cui aurum, quod esset multifariam defossum, commonstrare vellem, satis esse deberet, si signa & notas ostenderem locorum, quibus cognitis ille sibi foderet, & id quod vellet, parvulo labore, nullo errore inveniret: Sic has argumentorum novi notas, quæ illa mihi quærenti demonstrant, ubi sint: reliqua, curâ & cogitatione eruuntur.* Boethius, lib. 1. *Comment. in Topica Ciceronis*, ait ipsos canones, quos maximas vocat, ab Aristotele locos appellari in *Topicis*, quia reliquas propositiones, eo modo, quo loci corpora, complectuntur. Ipse ait, locum esse sedem argumenti: quâ definitione vult partim intelligi propositionem maximam, sive regulam, partim maximæ propositionis differentiam. *Vid. lib. 2. de diff. Top. cap. 2.* Quicquid sit de sententia Aristotelis aliquantò magis videtur rationi consentaneum, propositiones universalissimas & notissimas appellare canones sive regulas. Ex iis enim, veluti ex quibusdam axiomatibus dialecticis, omnis ratiocinatio fluit. Ex, gr. cum probatur, *Logicam esse artem, quia est habitus cum recta ratione effectivus*, argumentum sumptum est a definitione, nititurque hoc canone, *Cui convenit definitio, ei convenit etiam definitum.* Hujus argumenti locus, sedes, ac nota, est definitio: canon, quo hæc ratiocinatio nititur, est maxima; sive axioma dialecticum. Locus facit ad inventionem argumentorum: canon ad judicium, sive ad discernenda argumenta firma ab infirmis.

IV. *Argumenta dividuntur in εντεχνα sive artificialia, & ἀτεχνα sive inartificialia.*

V. *Argumenta artificialia sunt, quæ ex consideratione partium problematis, non sine arte eliciuntur.*

VI. *Inartificialia, quorum inventio artem non requirit. Sântque nihil aliud quàm testimonia.*

I. ¶ Argumenta artificialia appellantur à Cicerone, in *Part. orat. infra*; inartificialia, *assumpta*: quia illa in ipsis rebus infixæ sunt; hæc verò foris assumuntur. Et quanquam sine arte inveniuntur, non tamen sine arte tractantur.

VII. *Ar-*

VII. *Argumenta inartificialia eodem modo adhibentur ad confirmanda aut refellenda problemata notionalia & realia ; argumenta artificialia non item.*

VIII. *Argumenta artificialia , quæ adhibentur ad confirmanda aut refellenda problemata notionalia , sumuntur ex natura aut proprietate illius affectionis, siue notionis , de qua in problemate quæritur.*

I. ¶ Hoc est, Sumitur definitio illius affectionis, siue notionis, quæ controversa est, vel canon aliquis ad eam perti-
nens (quales in doctrinâ thematum simplicium nonnullos
collegimus) isque ponitur loco majoris, & ex eo, factâ as-
sumptione, concluditur affectionem controversam inesse sub-
jecto. Hoc modo concluditur, *Aerem non esse genus venti,*
quia est illius subjectum siue materia: Immortalitatem non
esse genus vitæ æternæ, quia est illius affectio. Eâq; argumen-
tatio hoc canone nititur; *Quod est subjectum aut proprietas rei,*
non potest esse illius genus; quem nos posuimus cap. 11. lib. 1.
theor. 15. Sic probant Theologi, *Bona opera non esse causam*
nostræ justificationis; quia omnis causa prior est effectu suo: at-
qui bona opera sunt posteriora justificatione. Hæc argumen-
tatio nititur *theor. 3. cap. 15. lib. 1.* Hujusmodi syllo-
gismi vocantur ab Aristotele *lib. 2. Po⁹. cap. 8.* syllogismi
Logici, hoc est, notionales, eorûmq; usus maximus est in
omnibus disciplinis. Et Aristoteles videtur præcepta sua To-
pica præcipuè ad illius fabricandi rationem & usum accom-
modasse, nisi quòd libro secundo & tertio quædam tradat,
quæ spectant ad inventionem argumenti realis. Quare nobis
fuit aliquantulùm recedendum ab Aristotelis methodo in tra-
denda doctrina de argumentorum dialecticorum inventionem;
quia non idem Aristoteli consilium fuit, quod nobis esse
debut.

IX. *Argumenta artificialia, quæ adhibentur ad probanda
aut refellenda problemata realia, sumuntur ex affectionibus ad
naturam subjecti aut prædicati pertinentibus, tanquam ex lo-*
cis suis.

X. *Quorum tamen ea præstantiora sunt, quæ sumuntur ex
naturâ prædicati: quia non quæritur, an sit subjectum, sed an
sit prædicatum, siue an prædicatum inst. subjecto.*

I. ¶ Ex. gr. si quis probet, *Commodatum non esse mutuum, quia non fit de meo tuum*, argumentum sumptum est à notatione prædicati : at si quis probet, *Logicam esse artem quæ dirigat rationem, quia dicitur ἀπὸ τῆς λόγου*, argumentum ductum est à notatione subjecti.

XI. *Argumenta artificialia vel sunt absoluta, vel comparata.*

XII. *Argumenta absoluta vel sunt cōsentanea, vel dissentanea*

XIII. *Argumenta consentanea dicuntur, quæ cum aliqua parte quæstionis consentiunt.*

XIV. *Eæque vel à nomine ducuntur, vel à re ipsa.*

XV. *Argumentorum, quæ à nomine ducuntur, duo sunt loci; notatio, & conjugata.*

XVI. *Argumentorum consentaneorum quæ ducuntur à re, sunt novem loci; definitio, genus, species, totum, pars, causa, causatum, subjectum, & adjunctum.*

I. § Ad definitionem referenda est differentia specifica, quæ cum specie reciprocatur : differentia generica revocatur ad genus ; ut & species collata cum suis individuis. Individua se habent ad species, ut species se habent ad genera : ideoque inductio individuorum pertinet ad locum speciei. Locis totius & partis, admodum angustus est : nam totum integrale solum, ejusque partes complectitur. Totum potentiale, ejusque partes, pertinent ad locum generis & speciei ; totum formale cum suis partibus, ad locum definitionis & generis ; totum essentiale cum suis partibus, ad locum causæ & causati. Proprietates, objecta, signa, sive antecedentia ea sint, sive consequentia, sive conjuncta, item circumstantiæ, pertinent ad locum adjunctorum.

XVII. *Argumenta dissentanea sumuntur ab oppositis. Horum quinque sunt loci; disparata, contraria, relata, privantia, & contradicentia.*

XVIII. *Argumentorum comparatorum loci sunt quinque ; majora, minora, paria, similia, & dissimilia.*

XIX. *Testimonia vel divina sunt, vel humana.*

XX. *Ex omnibus hisce locis non sunt sumenda argumenta ad quodlibet problema probandum, aut refutandum ; sed in tanta copia, rejectis levioribus graviora, & proposito problemati convenientiora, nunc ex his, nunc ex illis locis seligenda sunt.*

CAP.

CAP. XVII.

De canonibus ad locos consentaneos
pertinentibus.

THEOREMA I.

Singuli loci suos habent canones sive regulas; easque vel Absolutas vel comparatas: quarum illas prius has deinde recensebimus.

I. ¶ Canones ad unumquemque locum pertinentes promiscue proponemus, singulosque singulis exemplis illustrabimus: tum etiam, qui necessarii sint ac certi, qui verò probabiles, & quæ exceptiones in singulis observandæ sunt, subijciemus.

II. *Locus à notatione habet duos canones: Primus canon, Cui convenit etymologia nominis, ei convenit & nomen; &, Cui etymologia nominis non convenit, ei neque nomen convenit.*

I. ¶ Sic concludas, *servari fidem, quia fit quod dictum est.* Fides enim teste Cicerone, sic appellata videtur, quia *fit quod dictum est.* Item *non esse mutuum, quia non fit de meo tuum.*

III. *Secundus, Cui convenit nomen, ei etiam convenit etymologia nominis; non contrâ.*

I. § *Ut, Est σωφρων, ergò σωζει τλω φερόντων, hoc est, non patitur iudicium suum de rebus practicis voluptate aut dolore depravari. Ambo hi canones incerti sunt; minùs tamen fallunt in nominibus generum aut specierum, quàm in nominibus individuorum.*

IV. *Locus à conjugatis habet tres canones: Primus, Cui convenit unum conjugatorum, ei convenit & alterum; &, Cui unum non convenit, ei neque alterum convenit.*

I. ¶ Huc pertinet illud Mitionis apud Terentium, *Homo sum, humani nihil à me alienum puto.* Sic in jocos in Cæsarem dictis apud Suetonium, concluditur, *Bibulum non fuisse consulem, quia non consuluit Reip.* Verba sunt,

Non Bibulo quicquam nuper, sed Cæsare factum est:

Nam Bibulo fieri consule nil memini.

In hoc canone hæc cautio adhibenda est, *Nè conjugata solâ vocis, & non etiam naturæ affinitate juncta sint.* Nam in iis, quorum unum significat potentiam naturalem aut habitum,

bitum, alterum actionem, admodum fallax est illatio. Non enim sequitur, *Habet visum* ; ergò videt : Est ebrius ; ergò est cbriosus : Facit iusta ; ergò est iustus, & sic in aliis.

V. *Secundus, Conjugatorum sunt conjugata consequentia.*

I. ¶ Ut, si ità argumenteris, *Logicus ea facit, quæ artis regulis reguntur* ; ergò *Logica est ars*. Hic cavendum est, nè ex concretis, quæ per accidens prædicantur de se invicem, colligatur etiam abstracta de se invicem prædicari. Nam etsi aliquod dulce sit, quod album est, v.g. lac; non sequitur tamen, aliquam dulcedinem esse alborem.

VI. *Tertius, Conjugata contrariorum inter se contraria sunt.*

I, ¶ Ut, Si *sanitas & ægritudo sint contraria, etiam sanum esse, & ægrum esse, erunt contraria*. Canones à conjugatis, si hoc modo limitentur, rarò fallunt.

VII. *Locus à definitione habet duos canones: Primus, Cui convenit definitio, ei convenit & definitum ; &, Cui definitio non convenit, ei neque definitum convenit.*

I. § Ut, si probes, *Logicam esse artem, quia est habitus cum rectâ ratione effectivus* ; aut, non esse scientiam, quia non est certa rei necessaria cognitio per proximam causam.

VIII. *Secundus, Quod convenit definitioni, etiam convenit definito ; &, Quod definitioni non convenit, neque definito convenit.*

I. ¶ Ut, *Qui mediocritatem consuevit servare in omnibus rebus, is est felix* ; *Vir bonus consuevit mediocritatem servare in omnibus rebus ; improbus non item* : Ergò *vir bonus est felix ; improbus non est felix*. Hic cavendum est, nè quod de definitione dicitur, ut est definitio, de definito concludatur ; ut, fit in hoc syllogismo, *Animal rationale sunt duæ voces : Homo est animal rationale : Ergò homo est duæ voces*. In cæteris, canones à definitione sunt certissimi, modò sumantur definitiones reciproæ.

IX. *Locus à genere habet duos canones: Primus, Quod univèrsè de genere affirmatur, id etiam affirmatur de speciebus ; &, Quod univèrsè negatur de genere, id negatur etiam de speciebus.*

I. ¶ Sic probes, *Visum errare posse, quia omnis sensus errare*

non
est

tis
ex
li-
li-
li-

ia

-
-

ui
io

s
n

rare potest: & *Iustitiam* non esse à naturâ, quia nulla virtus à naturâ est. In hoc canone cavendum est, nè quod generi ex accidenti tribuitur, & non secundum essentiam, id aliâ acceptione de specie concludatur: veluti, si quis ita argumentetur, *Animal est genus, aut trissyllabum: Homo est animal: Ergo homo est genus, aut trissyllabum.*

X. *Secundus, Sublato genere, tollitur species; sive, Cui adimitur genus, ei & species adimitur.*

1. ¶ Ut si probes, *sensum non esse scientiam*, quia non est *habitus*. Solet hic canon sic proferri, *A genere ad speciem valet illatio negata*; non etiam affirmata: quia enim genus latius patet specie, non necesse est, ut posito genere etiam species ponatur. Canones à genere sunt certissimi.

XI. *Locus à specie habet tres canones: Primus, Positâ specie ponitur genus; sive, Cui tribuitur species, ei etiam tribuitur genus.*

1. ¶ Sic concludi potest, *Logicam esse habitum*, quia est *ars*. Hic canon sic quoque proponitur, *A specie ad genus valet illatio affirmata*; non etiam negata: non enim necesse est, si species alicui adimitur, ut ei etiam adimitur genus: neque enim sequitur, *Non est homo; ergo non est animal.*

XII. *Secundus, Sublatis omnibus speciebus, tollitur genus; sive, Cui adimuntur omnes species, ei & genus adimitur.*

1. ¶ Ut, *Amicitia non est fortitudo, non temperantia, non iustitia, non prudentia; ergo non est virtus*. Huiusmodi argumentatio est syllogismus ab enumeratione partium.

XIII. *Tertius, Quod convenit omnibus speciebus, id convenit etiam generi; & Quod nulli speciei convenit, id neque generi convenit.*

1. ¶ Hic canon est fundamentum inductionis; tum affirmatæ, tum negatæ; de qua egimus suo loco: inde exempla petantur. Ceterum omnes canones huius loci sunt fidelissimi.

XIV. *Locus à toto habet duos canones: Primus, Posito toto, ponuntur omnes partes principales.*

1. ¶ Sive, Cui tribuitur totum, ei etiam tribuuntur omnes partes principales: ut, *Sempronio legata sunt alimenta; ergo & vestes & victus & habitatio*. Dixi partes principales. Nam
posito

posito toto, ut etiam ponatur quælibet minutissimarum partium, quæ ad integritatem quidem rei, non ad essentiam pertinent, non est necesse.

XV. *Secundus, Quod convenit toti similari, convenit etiam singulis partibus; & Quod toti similari non convenit, nulli partium convenit.*

I. ¶ *Ut, Aquâ suâ naturâ est humida; ergò qualibet aqua gutta est humida: Cælum non est corruptibile, ergò neque stella. Hic caveatur, nè quod toti tribuitur, quâ totum est, de parte concludatur: non enim, quia aqua ubique terrarum est, etiam unaquæque gutta ubique esse debet. Canones hujus loci sunt certi.*

XVI. *Locus à partibus habet quatuor canones: Primus, Positis omnibus partibus atque unitis, ponitur totum,*

I. ¶ *Ut, Cæsar Belgium occupavit, Aquitaniam, & Celticam; ergò totam Gallicam occupavit. Dixi unitis: nam positis omnibus partibus domûs, iisquæ non unitis, domus non est.*

XVII. *Secundus, Sublatâ parte principali, tollitur totum.*

I. ¶ *Ut, Infantes destituuntur cognitione Christi; ergò etiam destituuntur fide. Dixi principali: quia sublatâ manu non interit homo, sed tantum efficitur, ut mutilus sit; at capite, aliâve parte necessariâ sublatâ, necesse est ut intereat.*

XVIII. *Tertius, Quod convenit omnibus partibus etiam toti convenit; & Quod nulli parti convenit, id etiam toti non convenit.*

I. ¶ *Ut, Lex, Prophetæ, Evangelia, scripta Apostolorum, sunt θεόπνευστα, id est, divinitus inspirata: ergò tota Scriptura est divinitus inspirata. Parietes columnæ, tigna, trabes, tectum, præ se non ferunt antiquitatem: ergò non videtur ædificium antiquum.*

XIX. *Quartus, Quod convenit parti similari, etiam convenit toti; & quod parti similari non convenit, id neque toti convenit.*

I. ¶ *Ut, Unaquæque aquæ gutta est humida; ergò aqua est humida: Stellæ non sunt corruptibiles; ergò neque cælum. Hoc in canone cavendum est, nè, quod parti similari convenit ob externam causam, & non ob propriæ naturæ conditionem*

nem, id de toto similari concludatur. Non enim sequitur, quia aquæ gutta qualibet est rotunda, totum elementum aquæ esse rotundum. Nam præterquam, quòd nullum elementum sit determinatæ figuræ, præter terram, etiam guttarum rotunditas non est à natura aquæ, sed à paucitate materiæ, quâ fit, ut aqua diffuere non possit. In cæteris, canones hujus loci sunt certi.

XX. *Locus à causis in genere habet unum canonem: Positâ causâ in actu, necesse est poni causatum; & vicissim.*

I. § Causa in actu dicitur, quæ causat, sive quæ munus atque causalitatem suam exercet. Atqui implicat contradictionem, si quis dicat, causam causare, & causatum non causari; fabros ædificare, & domum non ædificari; aut domum ædificari, & non esse qui ædificet.

XXI. *Locus à materiâ habet duos canones: Primus, Sublatâ materia, tollitur compositum & forma materialis.*

I. § Ut, si probes, *Ubi non sunt ligna, illuc non esse naves; aut, quia lapides non habent corpus organicum, nec animam habere.* Dixi *forma materialis*: forma enim immaterialis, qualis est anima humana, sublatâ materiâ non tollitur.

XXII. *Secundus, Qualis materia, tale compositum.*

I. § Ut, *Statua est ex carioso ligno: ergò ipsa est cariiosa.* Hic canon obtinet tantùm in rebus ab arte factis: in naturalibus est fallax.

XXIII. *Locus à formâ habet unum canonem: Positâ formâ, ponitur compositum; eâque sublatâ, tollitur.*

I. § Ut, *Pygmæi habent animam rationalem; ergò sunt homines: Stellæ non habent animam; ergò non vivunt.* Hic canon est firmissimus, modò prima pars intelligatur de formâ materiali. Nam positâ animâ rationali, hominem poni, non est necesse. Hoc tamen necesse est, ut homo sit, quicumque animam rationalem habet.

XXIV. *Locus ab efficiente habet duos canones: Primus, Qualis causa, talis effectus.*

I. § Ut, *Deus est bonus; ergò ejus opera sunt bona.* Hic canon fallax est, nisi caute limitetur. Primò enim fallit in causis per accidens. Neque enim sequitur, *filium esse bonum aut malum quia pater talis fuit.* Filius enim non producitur à patre,

parte, quatenus bonus aut malus est, sed quatenus homo est. Huc pertinet argutia Martialis, *Epigr. 33. lib. 7.*

*Quo possit fieri modo, Severe,
Ut vir pessimus omnium Charinus
Unam rem bene fecerit, requiris?
Dicam, sed cito: Quid Nerone pejus?
Quid thermis melius Neronianis?*

Charinus enim balneas, & Nero thermas, exstruxerant, non quatenus erant homines impuri & improbi, sed quatenus usi fuerant operâ peritissimorum artificum. Deinde fallit in causis æquivocis. Non enim sequitur, solem animatum esse, quamvis finem animet; aut cotem esse acutam, quamvis ferum acuat. Denique fallit in causis voluntariis, cum deditâ operâ aliquid efficiunt, quod suæ peritiæ non respondet; veluti cum pictor minus eleganter pingit, quam pro arte sua.

XXV. *Secundus, Quod est causa causæ, etiam est causa causati.*

1. ¶ *Ut, Virtus partim à natura est, partim ab institutione, partim à consuetudine: Virtus est causa felicitatis civilis: Ergo felicitas civilis partim à natura est, partim ab institutione partim à consuetudine. Hic canon solum locum habet in causis per se subordinatis. Nam in causis subordinatis per accidens, ut plurimam fallit. Non enim sequitur, Deus est causa voluntatis nostræ: Voluntas est causa peccatorum: Ergo Deus est causa peccatorum.*

2. Ad locum causæ efficientis etiam hi canones referri solent; *Positâ, aut sublatâ causâ proximâ, ponitur aut tollitur effectum: & sublatâ causâ remotâ, tollitur effectum. Verum eos ad doctrinam de demonstratione referendos judicavimus, quia pariunt scientiam.*

XXVI. *Locus à fine habet unum canonem: Posito fine, ponuntur media ad finem.*

1. ¶ Sic concludit Ovidius, *Hominem condendum fuisse erecto vultu, quia debuit contemplari cælestia, qui est finis erectæ figuræ. Verba poetæ sunt,*

*Omnia cum spectem animalia cætera terram,
Os homini sublime dedit, cælumque tueri
Fussit, & erectos ad sydera tollere vultus,*

est.

Media sæpe exprimuntur negatione earum rerum, quæ finem impediunt; ut, *Pupilla debet admittere omnes colores; ergò debet esse sine colore: Electi debent servari; ergò non debent peccare ad mortem.* Interdum fit, ut finis sit causa simpliciter proxima; & tam scientiam efficit, & ad demonstrationem pertinet. Sublato fine media tolli, non est necesse: Non sequitur enim, ut libris & præceptoribus destitutus fuerit, quicunque non est eruditus.

XXVII. *Locus à causato, habet quatuor canones: Primus, Posito composito, ponitur materia & forma; eoque sublato, tollitur forma materialis.*

I. ¶ *Ut, Plantæ sunt res viventes; ergò habent corpus & animam: Lapides non res viventes; ergò non habent animam.* Dixi, sublato composito, tolli solummodo formam materialem: nam, ut sublato composito materia tollatur, aut forma immaterialis, non est necesse. Non enim sequitur, ut ferrum non sit, si non sit gladius; aut, ut non sit anima hominis, si homo interiierit.

XXVIII. *Secundus, Posito effecto, ponitur causam efficientem esse, aut fuisse.*

I. ¶ *Ut, Est ædificium; ergò est, aut fuit architectus: Hic sunt vestigia; ergò hæc transferunt homines.* Hoc loco recenseri solet etiam hic canon, *Sublato effecto, tollitur causa proxima.* Sed præstat eum ad doctrinam de demonstratione referre. Quin & eum quem expressimus, eodem regulissemus, si de sola causa proxima intelligi potuisset. Jam verò, quoniam de qualibet causa accipi debet, quæ ad rei effectum necessaria est, hoc loco præteriri non potuit.

XXIX. *Tertius, Qualis effectus, talis causa.*

I. ¶ *Ut, Pictura est elegans; ergò à perito artifice depicta est.* Huic canoni eadem limitationes addendæ sunt, quas addidimus primo canoni loci à causâ efficiente,

XXX. *Quartus, Sublatis mediis, tollitur finis.*

I. § *Ut, Lapides non nutriuntur; ergò non vivunt: Multis hominibus non annuntiatur evangelium; ergò non omnes homines servabuntur.*

XXXI. *Locus à subjecto habet hunc canonem; Posito subiecto, ponitur proprietas; eoque sublato, tollitur.*

I. ¶ *Ut*

1. ¶ Ut, *Christus est Deus* ; ergò habet potestatem remittendi peccata. Scripta Patrum non sunt verbum Dei, ergò non sunt divinæ autoritatis. Hi canones sine limitatione certi & firmi sunt.

XXXII. Locus adjunctorum latè patet, sub eoque continentur proprietates, objecta, signa, & circumstantiæ.

XXXIII. Locus à proprietate habet duos canones: Primus, Cui proprietas tribuitur, ei subiectum tribuitur ; & , Cui non tribuitur proprietas, ei neque subiectum tribui potest.

1. § Ut, *Christus est omniscius* ; ergò est Deus : Angeli non implent locum ; ergò non sunt corpora.

XXXIV. Secundus, Quod dicitur de proprio, id dicitur etiam de subiecto ; & , Quod de proprio dici nequit, id etiam de subiecto dici nequit.

1. ¶ Talis est illa illatio ; Percontatorem fugito, quia garrulus idem est : hoc est, Garrulus est fugiendus ; ergò & percontator. Tale est illud Senecæ in Hippolyto ; Res est forma fugax : quis sapiens bono Confidat fragili ? hoc est, Sapiens non debet confidere rei fragili ac fugaci ; ergò nec formæ.

XXXV. Locus ab objecto habet hunc canonem ; Cui tribuitur objectum, ei tribuitur etiam subiectum ; & , cui objectum non tribuitur, ei neque subiectum tribui potest.

1. ¶ Ut, Doctrina de fallaciis Sophisticis dirigit mentem in cognitione rerum ; ergò est pars Logicæ : Logica non agit de rebus necessariis ; ergò non est scientia. Argumenta huius loci admodum firma sunt, si ducta sint ab objectis propriis : in cæteris tantum sunt probabilia ; veluti, si quis ita colligat. Loquitur de re militari, ergò est miles ; de re literariâ, ergò est studiosus : Non delectatur mundo muliebri, sed armis ; ergò non est puella.

XXXVI. Locus à signis habet hunc canonem, Posito signo antecedente, consequente, aut conjuncto, ponitur res signata ; eoque sublato, tollitur.

1. ¶ Ut, Aurora apparet, ergò sol orietur : Coguntur nubes ; ergò pluet. Mulier laborat picâ ; ergò concepit : Fugit ; ergò conscius est detectæ conjurationis. Pulsus est inæqualis ; ergò febricitat : Est hispidus ; ergò salax. Non conscribitur miles ; ergò non erit bellum : Non fuit Sempronii inimicus ;
ergò

ergò non occidit. Non agit pœnitentiam ; ergò non peccavit invitus : Non pallet ; ergò brevi non ægrotavit. Non est plenilunium ; ergò non est eclipsis : Non amat puerum ; ergò non est illius mater. Argumenta à signis firma sunt , cùm signa sunt necessaria & propria rebus signatis ; in cæteris, probabilia, & aptiora ad generandum suspicionem, quàm certam rei cognitionem. Oratoribus argumenta ejusmodi familiarissima sunt, in quæstionibus præsertim facti : Philosophi iis utuntur parcius.

XXXVII. *Locus à circumstantiis hunc habet canonem ; Positâ circumstantiâ rei , ponitur res ipsa ; & sublatâ, tollitur.*

I. § *Ut, Furatus est aliquid ex loco sacro ; ergò est sacrilegus. Ver venit ; ergò flores inveniuntur. Incedis cucullatus, ergò est monachus. Christus debuit nasci stante politiâ Mosaiçâ, idque Bethlehemi : Atqui politia Mosaiçica deleta est, unâ cum Bethleheмо: Ergò Christus non est nasciturus, sed jam natus. Non est pullatus ; ergò non luget. Argumenta hujus loci partim necessaria sunt, ac firma ; partim probabilia tantùm, atque infirma : Ideoque non ex canone, sed ex usu discernenda sunt.*

C A P. XVIII.

De canonibus ad locos dissentaneos, comparatos, & testimonia pertinentibus.

T H E O R E M A I.

L *ocus ab oppositis in genere habet duos canones: Primus De quo affirmatur unum oppositorum, de eo negatur alterum.*

I. § *Ut, Est equus ; ergò non est homo : æger ; ergò non sanus, &c. Hic servandæ sunt leges oppositionis quas retensimus lib. I. cap. 22.*

II. Secundus, Oppositorum prædicata sunt opposita.

I. § *Ut, Justus est, qui servat leges ; ergò injustus est, qui leges transgreditur. Hic cavendum est, nè de oppositis prædicetur differentia, aut affectio generica. Neque enim sequitur, Homo est corpus animatum ; ergò bestia est corpus inanime ;*

Non etiam hoc, *Albor est visibilis* ; ergò *nigror invisibilis* : quia *animatum esse*, est differentia hominis generica ; & *visibilem esse*, affectio coloris, non alboris. At hoc sequitur, *Albor disgregat* ; ergò *nigror congregat visum*.

III. Locus à contrariis habet tres canones : Primus, *Quod suscipit unum contrariorum*, id etiam suscipit alterum ; & , *Quod unum non suscipit*, id neque alterum suscipit.

I. ¶ *Ut, Amor est in appetitu concupiscente* ; ergò & *odium* : *Bestiis non convenit jus* ; ergò non afficiuntur injuriâ.

IV. Secundus, *Contrariorum sunt contrariæ causæ, effecta, & adjuncta*.

I. ¶ *Ut, Virtus est à bona*, ergò *vitium à prava consuetudine* : *illa beatos efficit* ; ergò *hoc miseros* : *illa est optanda* ; ergò *hoc fugiendum*. Hic duo vitanda sunt : Primò, nè accipiantur causæ aut effecta per accidens : Neque enim sequitur, *Vir bonus amat ac defendit suos* ; ergò *improbis odit ac deserit suos* : quia *amare suos*, non est virtutis, sed naturæ. Secundò, nè adhibeantur causæ, quarum effecta pendent à dispositionibus materiæ. Nam ob materiæ dissimilitudinem fit sæpe, ut eadem causa contrarios producat effectus ; aut causæ contrariæ, effectus similes : nam calor indurat lutum, & emollit ceram ; & minæ non rarò idem efficiunt in quibusdam, quod in aliis preces : nimirum, quia causa efficiens non agit secundum modum virtutis suæ, sed secundum modum subjectæ materiæ.

V. Tertius, *Contrariorum immediatorum necesse est alterum inesse subjecto capaci*, alterum non inesse.

Ut, Libertus non est servus ; ergò *est liber* : *Numerus non est par*, ergò *est impar*. Canones hujus loci, adhibitis limitationibus propositis, satis firmi sunt, præsertim tertius.

VI. Locus à relatis hunc habet canonem ; *Posito uno relatorum*, ponitur alterum ; eoque sublato, tollitur.

I. *Ut, Cui pater dominus est*, ille patris servus est. Huc pertinet illud Martialis.

A servo scis te genitum, blandèque fateris,

Cùm dicis dominum, Sossibiane, patrem.

Socii Romanorum non sunt subditi Romanis : ergò *Romani non sunt eorum magistratus*. Hic canon certissimus est.

VII. Locus à privantibus habet unum canonem ; *Privantium*

tium alterum necesse est inesse subjecto capaci, alterum non inesse.

I. ¶. Ut, *Est cæcus ; ergò non videt.* Ego, inquit Servator noster, *sum lux mundi ; qui me sequitur, non ambulat in tenebris.* Subjectum capax dicitur, tum ratione naturæ, tum ratione temporis à natura præstituti. Hic canon firmus est.

VIII. Locus à contradicentibus habet hunc canonem, Posito uno ex contradicentibus, removetur alterum ; & contrá.

I. ¶. Hic canon est fundamentum, quo nituntur omnium scientiarum principia : quem qui negat, eum fugit ratio.

IX. Locus à majori habet duos canones : Primus, Cui convenit majus, ei etiam minus convenit.

I. ¶. Ut, *Deus dedit vitam hominibus ; ergò dabit alimentum : dedit corpus ; ergò dabit amictum.*

X. Secundus, Quod non convenit majori, id neque minori convenit.

Ut, *Angeli non sunt puri coram Deo ; multò minùs homines : Capto ab hostibus non licet condere testamentum ; multò minùs perduelli.*

XI. Locus à minori habet duos etiam canones : Primus, Cui non convenit minus, ei neque majus convenit.

I. ¶. Ut, *Non licet irasci fratri suo temere ; multò minùs occidere.*

XII. Secundus, Quod convenit minori, convenit etiam majori.

I. ¶. Ut, *Impudicus fœminæ alienæ intuitus peccatum est ergò ipsum adulterium : Deus præbet victum & amictum bestiis ; quantò magis hominibus ?*

XIII. Locus à pari habet tres canones : Primus, Paribus paria conveniunt.

Ut, *Davidi licuit edere panes propositionis ad sedandam famem ; ergò licuit discipulis Christi spicas evellere die sabbathi ad famem similiter sedandam.*

XIV. Secundus, Cui unum parium convenit, ei & alterum convenit ; & Cui unum non convenit, ei neque alterum convenit.

I. ¶. Ut, *Christus habuit potestatem miraculosè sanandi paralyticum ; ergò habuit etiam potestatem remittendi peccata.*

Virum magnanimum non decet incessus concitatus ; ergò neque oratio concitata ac præceps.

XV. *Tertius, Quod convenit uni parium, id etiam convenit alteri ; & Quod uni non convenit, id neque alteri convenit.*

1. ¶ *Ut, Orpheus, Pollux, Theseus, Hercules, potuerunt inferos adire ; ergò hoc beneficium Æneæ non videtur denegandum, qui generis nobilitate illis non est inferior. Sic disputat Æneas apud Virgilium, cum ait,*

Si potuit manes accersere conjugis Orpheus,

Threiciâ fretus citharâ, fidibusque canoris :

Si fratrem Pollux alternâ morte redemit,

Itaque reditque viam toties : quid Thesea ? magnum

Quid memorem Alciden ? Et mi genus ab Fove summo.

Tyrus non sustinuit impetum Alexandri ; ergò neque Hierusalem sustinuisset, si Alexander eam oppugnâisset.

2. Omnes canones à comparatis magnam habent probabilitatem, & penè certi sunt, si argumentum cum partibus quæstionis aptè comparatur ; hoc est, si comparatur cum ipso subiecto aut prædicato quæstionis, non cum re aliqua, quæ subiecto aut prædicato determinando est addita : hoc enim si fit, inepta est illatio. Veluti, si quis sic argumentetur, *Luscus potest minus videre bovem ; ergò & aviculam :* idque ex hoc canone ; Cui majus convenit, ei etiam minus convenit. Causa erroris consistit in pravâ comparatione : nam etsi bos major sit aviculâ ; majoris tamen perspicaciæ est, minus aviculam, quàm bovem cernere.

3. Quidam hos locos sic instituunt, ut non considerent paritatem aut imparitatem rerum, (quod nos fecimus) sed probabilitatis : quod etiam fecit Aristoteles *lib. 2. Top. cap. 10.* Hi quatuor canones complectuntur omnes ratiocinationes a majori, à minori, & à pari. 1. Si quod magis videtur esse, non est, non erit etiam, quod minus videtur esse ; ut, *Angeli non sunt puri coram Deo ; multo minus homines. Non licet irasci fratri suo temere ; multo minus occidere.* Hic canon respondet duobus nostris negatis, alteri à majori, alteri à minori. 2. Si quod minus videtur esse, est, erit & illud quod magis videtur esse ; ut, *Deus dedit vitam ; ergò dabit alimentum.* Impudicus
femina

femina intuitus peccatum est ; ergò & adulterium. Hic canon respondet duobus nostris affirmatis, alteri à majori, alteri à minori. 3. Si unum eorum, quæ æquè videntur, est, erit & alterum ; ut, *Davidi licuit edere panes propositionis ; ergò licuit discipulis Christi vellere spicas die sabbathi ad sedandam famem.* Christus habuit potestatem edendi miracula suâ virtute ; ergò etiam habuit potestatem remittendi peccata. Orpheus, Pollux, Theseus, & Hercules, potuerunt inferos adire ; ergò & *Æneas*. 4. Si unum eorum, quæ æquè videntur esse, non est, neque alterum erit ; ut, *Virum magnanimum non decet incessus concitatus ; ergò neque concitata oratio.* Tyrus non sustinuit impetum Alexandri ; ergò neque Hierusalem sustinuisset. Hi duo canones respondent tribus nostris à paribus.

4. Ex quibus liquet, idem argumentum sæpe esse à minori & à majori simul, à minori scilicet probabilitate, & à majori re ; ut, *Deus dedit vitam, ergò dabit alimentum.* Minus enim probabile est, Deum vitam dare, quàm dare alimentum, & tamen illud reverà majus est. Etsi autem parum in eo situm sit, utram rationem in hisce locis ineamus, facilius tamen, & planior erit doctrina de majori & minori, si in hisce locis instituiamus comparationem quantitatis in rebus, (quod nos fecimus) quàm si instituiamus comparationem probabilitatis in propositionibus. Hæc enim comparatio convenientior est enthymematibus, quàm integris syllogismis.

XVI. Locus à simili habet hunc canonem, *Similibus similia conveniunt.*

1. § Intelligitur hoc loco non simplex, sed composita similitudo, sive analogia ; Ut, *Vascula angusti oris superfusam abunde humoris copiam respuunt, sensim instillatam admittunt : ergò tenella discipulorum ingenia præcepta disciplinarum paulatim proposita capiunt facilius, quàm confertim.* Argumenta ex loco similium petita magis illustrent, quàm probant, & ut ait Molinæus, afferunt magis dissentiendi pudorem, quàm assentiendi necessitatem.

XVII. Locus à dissimili habet unum canonem : *Dissimilibus similia convenire, non est necesse.*

1. ¶ Hic locus non valet ad probandum, aut ad refellendum, sed ad solvendas rationes à simili petitas. Si quis enim

probet, omnia inter homines debere esse communia, quia omnia sunt communia inter bestias; respondendum est, dissimilem esse rationem hominum & bestiarum: ac proinde necesse non esse, ut iis eadem aut similia convenient.

XVIII. *Locus à testimoniis habet decem canones: Primus, Testimonium divinum est firmissimum, atque ad hoc ἀπὸ τοῦ θεοῦ.*

1. ¶ Assensus, quem testimonium efficit, propriè vocatur fides, quæ tantò est firmitior, quantò major est dicentis auctoritas, sive ἀξιοκρατία. Testimonium divinum est, quod ab ipso Deo profertur; ut illud, *Hic est Filius meus dilectus: hunc audite*, & similia: vel etiam quod ab hominibus dictum aut scriptum est quos constat fuisse *θεοπνευστας*, quales fuerunt Prophetæ, & Apostoli. Hodie nullum testimonium ut divinum recipiendum est, præter illud quod in sacri codicis libris canonicis continetur.

XIX. *Secundus, Ad certitudinem testimonii divini proximè accedit testimonium sensus, tum externi, tum interni; quo etiam pertinet testimonium conscientia.*

1. ¶ Conscientiæ magna vis est, inquit Cicero pro Milone, idque non in judicio tantum, ut neque timeant, qui nihil commiserint, & pœnam semper ante oculos versari putent, qui peccarint; sed in tota vitâ, in omnibusque rebus. Naturæ enim nostræ insevit Deus vim quandam assentiendi universalissimis quibusdam, & notissimæ veritatis propositionibus, quibus nituntur artes, & scientiæ, tum theoreticæ, tum practicæ; quales sunt hæc enunciata, *Totum est majus sua parte: Deo debetur religio, parentibus honor, magistratui obedientia*, &c. Qui ejusmodi propositionibus non habet fidem, is certè conscientiam suam & propriæ naturæ vim ejurare videtur.

2. Non minor est vis externorum sensuum: quorum judicium qui certum esse negant, sublatis scientiis, omnique animi assensione ἀποτολμήσας, atque ἐποχλῶ induxerunt, ut Academici, & Sceptici.

XX. *Tertius, Nullum testimonium humanum per se ἀπὸ τοῦ θεοῦ est, aut necessariæ veritatis: sunt tamen alia aliis firmiora.*

1. ¶ Nullum testimonium humanum, quatenus humanum, hoc est, quatenus ab homine prolatum, ita certum est,

ut

ut de illo non liceat dubitare : tum quia supra humanam conditionem est, non posse errare ; tum quia homines facillimè abripiuntur affectibus, quorum impetu ut verum amplectuntur, quod sedato affectu non ignorant esse falsum.

XXI. *Quartus, Quod tacito omnium consensu nititur, præ cæteris verisimile est.*

1. ¶ *Ut, animam hominis esse immortalem.* In hoc tamen numero non sunt habendæ vulgi quædam inveteratæ opiniones ; veluti ; *Cygnos moribundos suavissimè canere : Ursas parere catulos informes, &c.* quas cordati homines respuunt.

XXII. *Quintus, dissidentibus hominum testimoniis, quod plures & sapientiores testantur, credibile est esse verum.*

XXIII. *Sextus, Artifici perito credendum est in sua arte.*

XXIV. *Septimus, Si de verbis sit quæstio, usitatissima sunt optima.*

XXV. *Octavus, In quæstionibus de jure, plurimum valent leges, plebiscita, senatûs-consulta, placita principum, edicta, responsa prudentum, acta publica, consuetudo sententiæ in simili causâ latæ.*

XXVI. *Nonus, In quæstionibus de factò, adhibentur testes, chirographa, confessio.*

XXVII. *Decimus, Testimonium negatum non probat.*

1. ¶ *Neque enim sequitur, Aristoteles aut Plato hoc non dixerunt ; ergò ità se non habet.* Sed si qua vis probandi in testimonio sit, hoc sequitur ; *Aristoteles, Plato, alii que sapientiæ consulti, hoc dixerunt ità se habere ; ergò ità se habet : aut, dixerunt ità se non habere ; ergò ità se non habet.* Nam etsi testimonium non debeat esse negatum, nihil tamen vetat, quò minus negata conclusio testimonio proberur. Testimonia sacrarum literarum etiam negata probant in rebus ad salutem factu aut creditu necessariis ; in cæteris non item : nimirum, quia omnia ad salutem necessaria, sacris literis perfectè continentur. Atque hæc de canonibus absolutis.

CAP. XIX.

De canonibus comparatis.

THEOREMA I.

Canones comparati, vel sunt certi, vel incerti loci.
 II. Canones certi loci, vel sunt generales, vel speciales:
 quorum illi comparisonem continent in quocunque; hi in certo
 tantum genere.

1. ¶ Ex. gr. hic canon, *Cujus effectum est magis tale, illud est magis tale*, est certi loci, quia exprimit locum effecti, ex quo argumentum sumtum est; & est generalis, quia potest omnibus rebus aptari, quæ in aliquo genere comparisonem admittunt. At hic, *Quod convenit præstantiori subiecto, illud ipsum est præstantius*, est certi quidem loci, quia indicat argumentum petitum esse ex loco subiecti; sed non est generalis, quia potest iis solum rebus aptari, quæ comparantur in bonitate. Hic verò *Quod est diuturnius est melius*, incerti loci est, & specialis; quia nec locum argumenti exprimit, neque omnibus rebus, quæ inter se comparantur, aptari potest.

III. Canones comparati certi loci, ex canonibus absolutis secundum locorum seriem formari possunt. Pauci enim loci sunt, quorum canones affirmati non admittunt comparisonem.

1. ¶ Aristoteles tradit canones comparatos lib. 3. Top. sed qui maximâ parte speciales sunt & incerti loci. Ex iis primum selegimus eos, qui ad certos locos revocari possunt: & qui generaliter efferri possunt, proponemus generaliter; qui non possunt generaliter efferri, proponemus specialiter. Quia in re sequemur eandem seriem locorum, quam sumus capite superiori secuti, & canones absolutos, prout fieri poterit, in comparatos convertemus. Negati non sunt ad comparisonem idonei: quia in negatione non sunt gradus. Post etiam adjiciemus præcipuos ex iis, qui ad locos certos non possunt revocari.

2. Notatio non admittit comparisonem: quia eadem etymologia aut pluribus non convenit, aut certè non convenit secundum magis & minus.

3. Canones comparati à conjugatis: 1. Cui unum conjugatum

gatum magis convenit, ei & alterum magis convenit; ut, Cæsar magis consuluit Reip. quàm Bibulus; ergò fuit magis consul. 2. Si unum conjugatum uno præstantius est, & alterum altero præstantius est; ut, si pietas sit præstantior eruditione, præstat pium esse, quàm eruditum.

4. A definitione: 1. Cui definitio magis convenit, ei magis quoque convenit definitum; ut, si definitio alboris sit, color disgregans visum, sequetur, id esse albius alio, quod visum magis disgregat. 2. Quod magis convenit definitioni, id magis convenit definito; ut, habitus revocans affectus animi & actiones nostras ad mediocritatem, magis confert ad felicitatem, quàm divitiæ; ergò & virtus, cujus ista est definitio.

1. A genere & specie: 1. Quod generi magis convenit, etiam magis convenit speciebus; & Quod magis convenit speciei, etiam magis convenit individuis: ut, si substantia immaterialis perspicacior est corporeâ, anima hominis separata perspicacior est, quàm est in corpore. 2. Quod continetur sub præstantiori genere aut specie, id ipsum præstantius est. Sic, quia vivens est nobilius non vivente, musca erit nobilior cælo.

6. A toto & parte: 1. Si totum homogeneous est magis tale toto, etiam pars est magis talis parte; & vicissim: ut, si aurum est gravius ære, etiam quælibet auri pars gravior erit qualibet parte æris, servatâ eâdem proportionem magnitudinis. 2. Quod absolutè tale est, aut aliquid efficit, ut tale sit, illius totum magis tale est, magisque efficit, ut aliquid tale sit, quàm pars: ut, si rhabarbarum vim habet purgandi bilem; drachma majorem vim habebit purgandi, quàm scrupulus, qui tertia pars drachmæ est. Sub hac generali maximâ multæ speciales continentur: ut, 1. Plura bona paucioribus anteponenda sunt. Sic virtus cum nobilitate præstantior est virtute solâ. 2. Quod honestum, jucundum & utile est, id melius est eo, quod honestum, jucundum, aut utile tantum est. 3. Quod bonum suo accessu auget, aut abscessu minuit, melius est eo, quod bonum accessu suo non auget aut abscessu non minuit. 4. Quod quid bonum accessu suo magis auget, aut abscessu magis minuit, eò melius est.

7. A materiâ & formâ: 1. Cujus materia est magis talis, illud ipsum est magis tale. Sic, quia aurum præstantius & durabilius

rabilius est lapide, aut saxo ; sequitur auream statuam præstantiorem & durabiliorem esse lapideâ. 2. *Quod habet nobiliorem formam, id ipsum nobilius est.* Sic, quia hominis forma est præstantior formâ bestię (illa enim immaterialis est & immortalis, hæc materialis & mortalis) sequitur hominem nobiliorem esse bestiis. Similj ratione suadere possis, muscam præstantiorem esse cœlo, quia illius forma est anima ; hujus forma quædam non vitalis.

8. A causa efficiente : 1. *Quod per se, simpliciter, ac naturâ suâ est tale, illud est magis tale, quàm id, quod per accidens, secundum quid, aut per participationem tale est.* Sic cibus est salubrior pharmacis quia ille per se salubris est, pharmaca per accidens : & lux est utilior tenebris ; quia illa omnibus utilis est, hæc furibus tantum, aut iis qui latere volunt. Deniq; sol est splendidior lunâ ; quia ille suâ naturâ splendet, hæc per participationem. 2. *Quod per se, ac naturâ suâ magis tale est, illud efficit magis ; & vicissim.* Sic ignis calefacit magis, quàm aqua calefacta, quia est calidior. Sic cognoscas ferrum esse gravius ligno, quia celerius descendit. Hic canon tantum adhiberi potest in causis per se : in causis enim per accidens sæpe fallit. Nam ferrum candens, etsi non sit calidius flammâ, urit tamen vehementius, densitate materiæ ustionem adjuvante, & calorem patienti fortius imprimente. 3. *Cui causâ magis convenit, ei magis convenit effectum ; & vicissim.* Sic probes senes esse prudentiores juvenibus, quia habent majorem experientiam rerum. 4. *Propter quod unumquodque est tale, illud est magis tale.* Sic quia aqua calet ab igne, colligi potest ignem magis calere. Hic canon sæpe fallit : ac primò, in causis per accidens, & æquivocis : Non enim sequitur, *Aliquis est ebrius ob vinum ; ergo vinum est magis ebrium : Cultor est acutus operâ cotis ; ergo cotis est acutior cultro.* Secundò fallit canon in effectis, quæ non recipiunt magis & minus : ut, si probes patrem esse magis hominem filio, quia filius est homo operâ patris. Tertiò fallit in iis, quæ non pendent ab una causa. Nam etsi discipulus doctrinam hausit à præceptore ; non tamen sequitur, præceptorem semper esse doctorem discipulo : potest enim fieri, ut discipulus præceptorem suum ingenio & industriâ superet. 5. *Quorum operatio, opus, effectum aut*
usus

usus melior est, ea ipsa meliora sunt; & quanto melior, tanto meliora. Sic mens præstantior est sensu, quia illius operatio præstantior est; & ars architectonica præstantior est iutoriâ, quia domus præstantior est calceo; & virtus divitiis, quia illius usus ad animum, harum, ad corpus pertinet.

9. A fine & mediis: 1. Cui magis convenit finis, ei magis conveniunt media; & vicissim. Sic probes aliquem habere plus ingenii, librorum, otii, industriæ, quia est doctior; aut esse doctiorem, quia habet plus ingenii, otii, industriæ, &c.

2. Finis præstantior est mediis; ut sanitas medicinâ. Huic canoni alter affinis est; Quod propter se expetitur, melius est eo quod expetitur propter illud, aut propter aliud, aut etiam eo, quod expetitur a se de se, hoc est, opinionis, aut ostentationis causâ. Sic probes eruditionem præstare bibliothecæ, amicos divitiis, valetudinem pulcritudini.

3. Quod proprius accedit ad finem, melius est. Sic ars imperatoria præstantior est equestri, quia proprius accedit ad victoriam. 4. Quod ad meliorem finem refertur, id melius est. Sic probat Aristoteles sapientiam præstare virtuti morali, quia ducit ad felicitatem speculativam: quam ait tantò præstantiorem esse felicitate practicâ, ad quam refertur virtus moralis, quantò æterna præstantiora sunt caducis, lib. 10. Eth. cap. 5.

10. A subjecto & adjuncto: 1. Quod est in nobiliori subjecto, id, si bonum sit, melius est; si malum, deterius eo quod est in subjecto ignobiliore. Sic virtus melior est sanitate, & vitia morbis deteriora sunt, quia animus nobilior est corpore.

2. A quo subjectum bonum nominatur, id melius est eo, à quo non nominatur bonum. Sic bonum honestum melius est utili, quia ab illo boni nominamur, ab hoc non item. 3. Eorum, quæ ambo subjectum bonum faciunt, id melius est, quod subjectum majori bonitate afficit. Sic virtutes Theologicæ, fides, spes, charitas, præstantiores sunt virtutibus civilibus. 4. Quod versatur circa præstantius objectum, id ipsum quoque præstantius est. Sic philosophia præstantior est medicinâ: quia illa circa animum, hæc circa corpus versatur. 5. Id melius est, ex quo maiora bona, aut minora mala sequuntur. Hâc ratione præfert Cicero lib. 1. Off. consilium Solonis, quo primum constituit Areopagitas, victoriæ Themistoclis ad Salamina; quia

quia hæc semel tantum profuit, illud semper proderit civitati.

11. A disparatis : Cum duorum alterum negamus nobis inesse, ut alterum nobis arrogemus, illud, quod videri volumus inesse nobis, judicamus esse præstantius. Sic, quia plerique se laboriosos esse negant, ut videantur esse ingeniosi, ingenio valere, melius esse judicant, quam laboriosum esse.

12. A contrariis. 1. Quod à suo contrario longius abscedit, illud est magis tale. Sic albius est, quod habet minus admixtum nigroris. 2. Cujus contrarium est deterius, illud ipsum est melius; & contrā : ut, si improbitas sit deterior morbo, probitas erit melior sanitate. 3. Cujus absentia, interitus, aut amissio deterior est, id ipsum melius est; & contrā : ut, si jactura bonæ existimationis sit majus malum jacturâ pecuniæ, bona existimatio erit majus bonum pecuniâ.

13. A majori, minori, & pari : 1. Quod est magis tale majori, etiam est magis tale minori. 2. Si minus est magis tale, etiam majus erit magis tale. Sic, cum sanitas sit majus bonum divitiis, si virtus sit præstantior sanitate, erit etiam præstantior divitiis. 3. Si unum parium est magis tale, etiam alterum erit magis tale. 4. Quod est magis tale uno parium, etiam est altero magis tale. Ex. gr. si duorum ponderum æqualium alterum tertio gravius fuerit, aut levius, etiam alterum erit ; aut si tertium altero gravius aut levius fuerit, erit etiam altero. Et sic in cæteris. 5. Si unum genus sit magis tale altero, quod in excellentiori generi est maxime tale, id magis tale erit eo, quod maxime tale est in genere minus excellenti : ut, si scientia sit præstantior arte, nobilissima scientia erit præstantior nobilissima arte. 6. Si prædicatum absolutum absoluto subjecto suâ naturâ conveniat, incrementum prædicati conveniet incremento subjecti : ut, si quod honestum est, bonum sit ; id quod honestius est, erit melius ; & quod honestissimum, optimum. Dixi suâ naturâ : Nam si prædicatum subjecto non convenit suâ naturâ, fallit canon : neque enim sequitur, Si exercitatio corporis est bona ; major erit melior ; & maxima, optima : quia exercitatio non est ex se, ac naturâ suâ bona, sed quatenus est moderata.

14. A simili & dissimili : Quod similis est ei, quod tale est aut magis tale, id ipsum quoque est magis tale ; & contrā. Sic

Ajax censetur fortior Ulyssè, quia similior est Achilli fortissimo Græcorum. Hic observandum est, ut similitudo instituat in proprio genere: Non enim, si quis Achilli similior est iracundiâ, idèò quoque fortior erit, sed tantum iracundior.

15. A testimoniis confirmantur problemata comparata eodem modo, quo absoluta. Ut enim Aristotelis testimonio probari potest, avaritiam esse malam; ità etiam probari potest, eam deteriore esse prodigalitate. Ità ut canonibus comparatis hoc in loco non sit opus, nisi quòd fortè ad discernendam testimoniorum auctoritatem hic canon notandus sit, *Quod Deus esse dicit, credibilius est, quàm quod homines; quod sapientes, quàm quod vulgus; quod plures, quàm quod pauciores; quod periti artifices, quàm quod imperiti; & quod quisque contra se, quàm quod pro se testatur.*

16. Atqui hi sunt canones comparati, qui certi loci designationem, vel apertè, vel latenter continent. In quibus omnibus eadem limitationes intelligi debent, quæ absolutis canonibus, quibus respondent, sunt additæ. Ex. gr. primus canon comparatus à conjugatis, respondet primo canoni absoluto ejusdem loci. Is sic se habet; *Cui convenit unum conjugatorum, ei convenit & alterum.* Huic canoni hæc est addita cautio, nè adhibeantur conjugata quæ solâ vocis, & non etiam naturæ affinitate juncta sunt. Hæc eadem cautio adhiberi debet in canone comparato, qui ità prolatus fuit; *Cui unum conjugatorum magis convenit, ei & alterum magis convenit.* Itaque sicuti non sequitur, *Hic est ebrius, ergò est ebriosus;* Ità quoque non sequitur, *Hic est magis ebrius, ergò est ebriosior.* Et sic in cæteris.

17. Restant ex canonibus comparatis ii, qui certi loci designationem non continent, quales quàm plurimi exstant lib. 3. Top. Nos ex iis præcipuos seligemus. 1. *Bona diuturniora & constantiora magis expetenda sunt;* ut, bona animi, bonis corporis. 2. *Unumquodque tum magis optandum est, cum opportunius, & magis usui est.* Ut, fortitudo in juventute, prudentia in senectute. 3. *Quod semper aut sæpe usui est, id melius est eo, quod raro;* ut, temperantia, fortitudine. 4. *Quæ seipsis contenta sunt, magis eligenda sunt, quàm ea*
quæ

quæ aliis egent ; ut, abundantia rerum, pecuniâ Nam qui pecuniâ abundat, rebus indiget : qui abundat rebus, non indiget pecuniâ. 5. Quod splendidius est, id est optabilius ; ut, gloria, divitiis. 6. Difficilia præstant facilioribus ; 7. Et propria, communibus. Per communia hic non intelliguntur publica, sed ea quæ multi habent : per propria, quæ soli habemus, aut cum paucis communia. Hæc enim maximè amamus. 8. Quæ communicari aliis non possunt, præstant in quæ communicari queunt ; ut, scientia, divitiis. 9. Non necessaria (τὰ ἐκ περιστάς) præferenda sunt necessariis. Sic optamus commodè vivere potius quàm vivere. Hunc canonem non evertit Cicero, cum in Topicis suis ait, *Necessaria non-necessariis præstare*. Nam per non-necessaria intelligit superflua. At Aristoteli non-necessaria sunt, quæ pertinent ad bene esse, (ut loquar cum Scholasticis) necessaria, quæ pertinent ad esse. 10. Quæ ab aliis præberi nequeunt, meliora sunt iis quæ ab aliis accipiuntur ; ut, virtus & eruditio, divitiis. 11. Quod quis sibi parare mavult, melius est eo quod mavult sibi ab aliis relinqui ; ut, amici, opibus. Amicos enim ipsi parare cupimus ; opes malimus nobis ab aliis relinqui.

18. Atqui hi sunt præcipui canones, quibus problemata comparata confirmanda sunt, qui vel ex canonibus absolutis, vel ex Aristotelis *Topicorum lib. 3.* erui potuerunt. In quibus omnibus, ac imprimis in iis qui comparisonem rerum continent in bonitate, hæc cautio adhibenda est, ut ea, quæ comparantur, in cæteris sint paria. Ex. gr. bonum diuturnius præferendum quidem est minùs diuturno ; sed tum demum, cum in cæteris sunt paria. Atque hæc de syllogismo dialectico.

CAP. XX.

De Demonstratione.

THEOREMA I.

Sequitur demonstratio, quæ definitur συλλογισμὸς ἐμπηρε-
νικός, hoc est, syllogismus scientiam pariens.

1. 5. Demonstratio (ἀπὸ δεξις Græcè) Geometris est delineatio diagrammatis, in quo propositionum suarum veritatem

tatem oculis spectandam exhibent. Ei opponitur *ἡ ἀληθὴς ἐπιστήμη*, hoc est, *descriptio*, sive delineatio falsa. Hæc vocabula (ut alia pleraque quæ in doctrinâ syllogismorum usurpantur) è Geometria translata sunt in Logicam: ibique demonstratio sumitur, interdum quidem pro qualibet probatione, certâ, & perspicuâ; at hoc loco usurpatur strictè, pro syllogismo scientifico: & *ἡ ἀληθὴς ἐπιστήμη*, pro syllogismo errorem pariente, scientiæ contrarium.

2. Demonstrationis genus est *syllogismus*: in quo cum dialectico syllogismo consentit. Differentia est à fine petita, qui est *scientia*. Vocabulum *scientiæ* vel latè sumitur, pro qualibet cognitione, sive assensu vero; vel strictè, pro assensu firmo & infallibili; vel denique strictissimè, pro assensu propositionum, quæ per causam aut effectum cognoscuntur. Cognitionis enim firma & infallibilis, vel à sensu est, veluti cum cognoscimus meridie lucere solem; vel ab intellectu, veluti cum agitur de propositionibus universalibus, ad quarum veritatem sensus non pertingit, ut qui in singularibus subsistit. Cognitionis propositionum universalium vel sine syllogismo generatur, vel per syllogismum. Sine syllogismo generatur cognitio, cum propositiones suâ luce conspicuas, pleno mentis assensu amplectimur, sine ulla probatione. Sic cognoscimus, *Totum esse majus suâ parte*, *Deum esse colendum*, & id genus cætera. Ejusmodi cognitionem appellat Aristoteles, *lib. 2. Post. cap. ult. vñ*, hoc est, *intelligentiam*, eamque distinguit à scientiâ, quam ait esse *ἐν λόγῳ*, hoc est, cum ratiocinatione conjunctam. Cum autem ratio ex variis locis peti possit, ea solum cognitio *scientiæ* nomine hîc venit, quæ gignitur à causa, aut ab effectû. Atque hæc est strictissima scientiæ acceptio, & huic loco propria, ut ex sequentibus liquebit.

- II. *Demonstratio alia est τῆ δὴν, sive cur sit; alia, τῆ ὄν, sive quòd sit.*

- III. *Demonstratio τῆ δὴν est, quæ non solum probat rem esse, aut non esse; sed etiam reddit causam, cur res sit, aut non sit.*

IV. *Demonstratio τῆ ὄν, quæ solum probat rem esse, aut non esse.*

1. ¶ Hæc divisio petita est à fine demonstrationis. Cum enim

enim demonstratio sit syllogisticus scientificus; omnino sequitur, ut, quotuplex est scientia, totuplex etiam sit demonstratio. Jam verò scientia alia est *τὴ διόν*, sive *cur sit*; alia, *τὴ ὄν*, sive *quòd sit*: ergò & demonstratio istoc modo dividenda est. *Vide cap. 13. lib. I. Post.*

2. Scientia *τὴ διόν* est cognitio dianoetica, quâ cognoscimus causam propter quam res est, esse illius rei causam, nec posse eam rem aliter se habere. *Arist. lib. I. Post. c. 2.* Scientiam *τὴ διόν* definit hisce verbis, *Ἐπιστήμη δὲ αἰτιῶν καὶ ἐκείνων ἀπὸ τῶν ὅταν τῇ τ' αἰτίαν αἰτιῶν καὶ γινώσκειν, ἢ ἢν τὸ πρῶτον αἰτιῶν, ὅτι ἐκείνη αἰτία ὅτι, καὶ καὶ ἐνδεχέσθαι τῇ τ' ἄλλως εἶναι.* Hoc est, *Scire* putamus unamquâque rem simpliciter, cum putamus causam, propter quam res est, cognoscere illius rei causam esse, nec posse eam rem aliter se habere. In hac Aristotelis definitione non est expressum genus; in nostro, genus scientiæ est *cognitio dianoetica*, hoc est, syllogistica. Hâc parte non solum cognitio sensualis à scientiâ distinguitur, sed etiam cognitio definitionum, & principiorum, quæ non est cognitio dianoetica, hoc est discursiva; sed noetica, hoc est, intellectiva. Essentia enim rerum, quæ definitione explicatur, & primorum principiorum veritas, sine discursu apprehenditur. Differentia, quâ scientiâ *τὴ διόν* tum ab opinione tum à scientiâ *τὴ ὄν* distinguitur, petita est partim à qualitate mediû quo scientia generatur, partim à conditione quæ in animo scientis esse debet. Medium quo scientia *τὴ διόν* generatur, debet esse *causa*, & quidem *propter quam res est*; hoc est, talis, quâ positâ res ponitur; & sublatâ, tollitur. Nam cognitio quæ per effectum, aut per adjunctum comparatur, non est scientia *τὴ διόν*, ut nec illa quæ comparatur per causam remotam, & non reciprocam. Qui scientiam *τὴ διόν* adipiscitur, ita animo affectus esse debet, non modò ut cognoscat rei causam, sed etiam, ut agnoscat eam esse causam rei quam quærit, utque credat rem illam non posse aliter se habere, hoc est, fieri non posse, ut positâ illâ causâ, res non ponatur; aut sublatâ, non tollatur. Ex quo efficitur, ut scientis animus sit *ἀνετὰ πῶτος, καὶ ἀνετὰ πέρας*, hoc est talis, qui mutari, aut ratione flecti non possit. Scientia *τὴ ὄν* à scientiâ *τὴ διόν* in eo differt, quòd non ex causâ proximâ propter quam res est, sed ex effectû proximo, aut ex causa remota tantum generetur.

3. Porro scientia & demonstratio sunt ἐν τῶν πρὸς ἐν λεγόμενον, id est, ex eorum numero quæ ad unum dicuntur. Quare fit, ut scientia & demonstratio τοῦ θύτης ferè ἀπλῶς & sine adjunctione dicantur scientia & demonstratio; scientia & demonstratio τοῦ οἴου, non item. Sunt enim scientia & demonstratio τοῦ θύτης, præcipuè species sui generis: atqui ea est generis æquivoci natura, ut præcipua species nomine generis ferè intelligatur. Ut autem accuratius cognoscas, quo nomine scientia & demonstratio τοῦ θύτης præstent scientiæ & demonstrationi τοῦ οἴου, res tota paulò plenius explicanda est. Quatuor sunt quæstiones scientiales, quæ de re aliqua institui possunt, ἢ ἐστὶ, ἢ οὐκ ἐστὶν, ὅτι ἐστὶν, ὅτι οὐκ ἐστὶν hoc est, *an res sit, quid sit, an insit, & cur insit*. Harum duæ priores, quia pertinent ad themata simplicia, dicuntur quæstiones simplices: reliquæ, quia pertinent ad themata complexa, nuncupantur quæstiones complexæ. Ex. gr. *An sint Pygmæi, & quid sint Pygmæi*, sunt quæstiones simplices: *An Pygmæi sint cholericæ, & cur sint cholericæ*, sunt quæstiones complexæ. Τὶ τὸ λεγόμενον ἐστὶν, hoc est, *quid sit id, quod dicitur*, sive, quid significet vocabulum quo res proposita nominatur non est quæstio Logica, sed præcognitio, in Logica cujuslibet thematis tractatione, necessaria. Frustrà enim queritur, *an sint*, aut, *quid sint Pygmæi*, vel etiam, *an Pygmæi sint cholericæ*, aut, *cur sint cholericæ*, si vocabulorum significatio non sit præcognita.

4. Substantiis simplices tantùm quæstiones conveniunt; accidentibus, etiam complexæ. Quæri enim potest, *An sit, & quid sit eclipsis*; item, *An eclipsis insit lunæ, & cur insit*, sive, *An luna eclipsin patiatur, & cur patiatur*. At de luna, aliisque substantiis, *an sit, & quid sit*, quæri potest; *an insit alicui, & cur insit* minimè. Substantiæ enim non sunt in subiecto. Quæstio *an sit*, non est in accidente separata à quæstione *an insit*. Nam querere, *An sit eclipsis*, nihil aliud est, quàm querere, *An luna patiatur eclipsin*. Sed nec quæstio *quid sit*, in eo separata est à quæstione *cur sit*. Eadem enim causa solvit utramque. Qui enim novit *cur luna patiatur eclipsin*, is novit etiam *quid sit eclipsis*.

5. Ex quibus liquet scientiam & demonstrationem τοῦ θύτης ad omnes quæstiones pertinere. Qui enim causam novit ali-

Q
cujus

cujus accidentis, v. g. eclipseos, is novit, *An sit*, & *quid sit* eclipsis: *An luna patiatur*, & *cur patiatur* eclipsin. Scientia & demonstratio τοῦ ὅτι pertinent tantum ad quæstionem εἴ ἐστὶ, & ὅτι δέξιν, hoc est, *an sit*, & *an insit*. Hinc jam patet, quo nomine scientia & demonstratio τοῦ δὴτι præstent scientiæ & demonstrationi τοῦ ὅτι nimirum, quia illæ versantur circa quæstionem τοῦ δὴτι, quâ solutâ, nihil restat, quod quæri possit: at hæ versantur circa quæstionem εἴ ἐστὶ, & ὅτι δέξιν, hoc est, *an res sit*, & *an insit*: quibus solutis, manet integra quæstio πὶ δέξιν, & δὴτι δέξιν, hoc est *quid sit*, & *cur sit*. Quibus adde demonstrationem τοῦ δὴτι esse finem ad quem altera species referatur.

6. Ex dictis liquet, demonstrationem τοῦ δὴτι sic non appellari, quia concludit τὸ δὴτι, sed quia ita solvit quæstionem τοῦ ὅτι, ut simul satisfaciatur quæstioni τοῦ δὴτι, cum demonstratio τοῦ ὅτι solam quæstionem τοῦ ὅτι solvat. Ex. gr. cum sic concludo; *Omne quantum est in loco: Atqui omne corpus est quantum: Ergo omne corpus est in loco*; conclusio non est enunciatio causalis, colligens τὸ δὴτι, hoc est, *cur corpus sit in loco*; sed simplex, colligens tantum τὸ ὅτι, hoc est, *corpus esse in loco*. Et tamen est demonstratio τοῦ δὴτι, quia causam continet, cur corpus in loco sit ita ut ex minore & conclusione contexi possit hujusmodi enunciatio causalis, *Omne corpus est in loco, quia est quantum*.

7. Averroes, & qui eum sequuntur, comminiscuntur tertiam quandam speciem demonstrationis, quam appellant *demonstrationem potissimam*: & aiunt demonstrationem τοῦ δὴτι esse, quâ τὸ δὴτι solum; potissimam, quâ τὸ ὅτι simul, & τὸ δὴτι innotescit. Hæc tertia demonstrationis species, neque Aristotelis autoritate qui illius nusquam comminuit, neque ratione confirmari potest. Nam quod demonstratio, quæ per causam proximam solvit quæstionem τοῦ δὴτι, interdum solam notitiam τοῦ δὴτι generet, interdum etiam notitiam τοῦ ὅτι, hoc non proficiscitur à diversitate demonstrationis, sed à nobis, quibus interdum τὸ ὅτι ante demonstrationem est perspectum, interdum non est perspectum: & tum innotescit τὸ δὴτι & τὸ ὅτι simul. Quin fieri potest, ut uni τὸ ὅτι sit notum, alteri ignotum: his, si demonstratio proponatur à causa proxima

Proxima petita, alteri erit demonstratio τοῦ δότι. alteri potissima. Plura vide hac de re apud. Zab. cap. 11. de Specieb. Dem.

CAP. XXI.

De Præcognitionibus.

THEOREMA I.

Omnis demonstratio δότι, omnisque demonstrativa scientia versatur circa tria. Hac tria sunt subiectum, affectio & causa, quæ demonstratur affectionem inesse subiecto.

II. Ex subiecto & affectione componitur questio demonstranda: ex causa cum affectione primum, deinde cum subiecto combinata, fiunt præmissæ, siue principia, quibus questio demonstratur.

I. §. Tria sunt, inquit Aristoteles lib. 1. Post. cap. 7. & 10. quæ in omni demonstratione spectantur, & circa quæ omnis demonstrativa scientia versatur: primum est conclusio quæ demonstratur, siue τὸ πᾶθος τὸ ἐκδοχὲν γένει τινὶ καὶ αὐτῷ, hoc est, affectio, quæ alicui generi, id est, subiecto per se inest: alterum sunt axiomata, ex quibus conficitur demonstratio, hoc est, principia & causæ: tertium est τὸ γένος τὸ ὑποκείμενον hoc est, subiectum, cuius affectiones & accidentia, quæ illi per se insunt, demonstratio declarat.

III. In hisce omnibus duo consideranda sunt: præcognitiones, quæ demonstrationem præcedunt, & conditiones, quæ in ipsa demonstratione observandæ sunt.

IV. Præcognitio prima est τοῦ ὅτι εἶναι, hoc est, an sit; alia, τοῦ τί λεγόμενον, hoc est, quid sit id quod dicitur, siue, quid significet vocabulum.

V. De tribus terminis, ex quibus demonstratio conflata est, præcognoscendum est, quid significet nomen; de subiecto, causa, & præmissis siue principiis, etiam an sint. Id verò de affectione ac conclusione demonstrandum est.

I. §. Omnis cognitio dianoetica, inquit Aristoteles lib. 1. Post. cap. 1. ἐν πρῶτῳ παρχέοντι γίνεται γνώσις, hoc est, ex præcedente cognitione gignitur. Quare necesse est, ut omnia, circa

quæ demonstratio & demonstrativa scientia versatur, ante demonstrationem aliquo modo præcognoscantur. De qua re vide *Arist. lib. 1. Post. cap. 7. & 11.* De tribus terminis, nominis significatio præcognoscenda est, quia alioqui de ignotis disputaretur. Quidam volunt etiam essentialem subjecti definitionem præcognoscendam esse. Verùm illud in integra aliqua scientia, puta Physica, aut Geometria, locum tantum habet. Ac cum de singulis demonstrationibus, deque ea scientia quæ ex singulis demonstrationibus gignitur, sermo est, essentialem definitionem subjecti præcognosci, non est necesse, nisi in iis demonstrationibus, in quibus medium est forma subjecti.

2. Τὸ ὅτι ὁτιν̄ hîc latè sumitur, complectiturque τὸ εἶ ὅτιν̄, *an res sit simpliciter*, &, τὸ ὅτι ὁτιν̄, *an res insit.* De subjecto demonstrationis, deque causa per quam affectio de subjecto demonstratur, præcognoscendum est τὸ εἶ ὅτιν̄, *an sit simpliciter.* Cum enim incertum est, an sit causa, argumentatio infirma est, & scientiam non efficit. Cum non constat, an sit subjectum, frivola est atque inepta. Frustra enim probes, *Pygmaos esse cholericos, quia sunt brevis staturæ*, si non constet, esse Pygmaos. De præmissis sive principiis demonstrationis præcognoscendum τὸ ὅτι ὁτιν̄, hoc est, *quod vera sint*, Superest ergo, ut de affectione demonstretur, τὸ εἶ ὅτιν̄, *an sit*, deque integra conclusione, quæ constat subjecto & affectione, τὸ ὅτι ὁτιν̄, *quod vera sit*, sive quod affectio subjecto insit.

3. Hæc eadem præcognoscenda sunt in integris scientiis. Sic in Physica præcognoscitur, quid sit, aut saltem, quid significet subjectum, puta, *corpus naturale*; quid significant affectiones, *trina dimensio, locus, tempus, quies, generatio, corruptio, &c.* tum quid significant affectionum causæ ac principia, *materia, forma, privatio, natura, qualitates primæ, antiperistasis, &c.* Præterea præcognoscitur, *esse corpus naturale, ejusque species; esse materiam, formam, &c.* Quod dictæ affectiones corpori naturali ejusque speciebus insint, id per earum causas & principia demonstratur. Cæterarum scientiarum eadem est ratio.

V I. Harum præcognitionum quæ evidentes sunt & omnibus obviæ, solâ mente sunt; quæ non sunt ita evidentes, quin ignorari

tari possint, in ipso scientiarum limine exprimuntur.

VII. Et si prolata statim à discipulo credantur, propriè dicuntur *ὑποθέσεις*, suppositiones; si discipulus de iis dubitet, vel etiam in contrariam opinionem propendeat, dicuntur *ἀντιμαρτυ*, postulata.

I. §. Quædam adhibentur in scientiis, quæ non possunt ignorari, ut axiomata: quædam ignorari quidem possunt, sed tamen simul ac à præceptore sunt proposita, à discipulo creduntur sine ulla probatione, ut definitiones: quædam non statim creduntur, adhibentur tamen precariò, ac veluti ex pacto; quia eorum probatio (si fortè probari possint) pertinet ad Metaphysicam. Sic præsupponitur in Physica, *esse animam*; cum tamen Dicæarchus quidam, teste Cicerone lib. 1. *Tusc.* voluerit, *nihil esse animam*, & hoc esse nomen totum inane.

CAP. XXII.

De quæstione demonstrabili, deque medio demonstrationis.

THEOREMA I.

Conditiones, quæ in demonstratione τῷ δὴν servandæ sunt, partim ad quæstionem pertinent, partim ad causam sive medium demonstrationis, partim ad præmissas sive principia.

II. Non omnis quæstio admittit demonstrationem τῷ δὴν, sed ea solùm, quæ vera est, & veritatis suæ certam atque immutabilem causam habet.

I. §. Primo debet esse vera; quia *ἐκ ἐστὸς τὸ μὴ ὄν ἐμίστασθαι*, hoc est, quod non est, sciri non potest. lib. 1. Post. cap. 2. Secundò, debet habere causam veritatis suæ certam atque immutabilem. Cum enim scientia sit cognitio rei per suam causam, scientia non erit certa, ac proinde neque scientia, si non nitatur immutabili causâ.

III. Itaque neque propositiones immediatæ, neque fortuita demonstrari possunt; sed tantùm accidentia propria.

I. §. Harum conditionum prior exstat lib. 1. Post. cap. 3. posterior, cod. lib. cap. 8. Cæterum propositiones immediatæ demonstrari nequeunt, sed sine demonstratione sciuntur, quia

non habent causam veritatis suæ. Hujusmodi sunt propositiones, in quibus definitio, aut partes definitionis de definito prædicantur. Hæ enim propositiones, *Homo est animal*, *Homo est ratione præditus*, constant prædicato quod ita arctè cum subjecto cohæret, ut nulla media causa interjecta sit illius connexionis, cum *esse animal*, & *esse ratione præditum*, sit ipsa hominis essentia. Itaque non magis demonstrari potest, *cur homo sit animal*, aut, *ratione præditus*, quàm, *cur homo sit homo*.

2. Fortuita quoque demonstrari nequeunt, quia non pendunt à certa, atque immutabili causa; unde neque certâ lege contingunt. Sola accidentia demonstrari possunt, & quidem propria. Nam substantiæ non habent causam, cur sint in illo subjecto de quo prædicantur; quia prædicantur semper ut genus, aut ut differentia. Et accidentia non propria, non habent certam atque definitam causam. Neque verò refert quicquam, utrum accidentia propria emanent ab essentia subjecti, an à causa externa; utrum perpetua sint, an sæpiusculè eveniant: hoc tamen requiritur, ut proprium accidens cum causa sua ita necessariò cohæreat, ut eâ positâ ponatur, & sublatâ tollatur. Ex. gr. etsi luna non semper deficiat, demonstrari tamen potest, lunam deficere; quia semper deficit, cum terra inter solem & lunam è diametro interposita est; & nunquam deficit, cum terra inter solem & lunam non est interposita. Hæc de quæstione demonstrabili.

IV. *Medium demonstrationis debet esse causa proxima prædicati; eâque vel efficiens, vel finis: & efficiens vel interna, vel externa.*

1. ¶ Cum causa proxima duobus modis dicatur, vel absolutè, vel in suo genere proxima; hoc loco intelligitur causa absolutè proxima, hoc est, talis, quâ positâ ponitur effectum, & sublatâ tollitur. Cum enim sint quatuor causarum genera, & in unoquoque genere aliqua causa proxima, ex quatuor causis proximis, una tantum est, quæ absolutè proxima est. Porro requiritur, ut hæc proxima causa sit causa prædicati: ut etiam sit causa subjecti, non est necesse: quia non quæritur, an sit subjectum (hoc enim præsupponitur) sed, an sit prædicatum, sive, an in sit subjecto.

2. Hæc causa proxima debet esse causa efficiens aut finalis.
Nam

Nam cūm prædicatum sit accidens, non habet materiam aut formam propriè dictam. Causa finalis adhibetur in iis, quæ fiunt ob aliud : qualia sunt media, & instrumenta naturalia ; item actiones, & habitus, siqui demonstrari possunt. In cæteris adhibetur causa efficiens. Interdum contingit, ut causa proxima efficiens sit etiam forma aut materia subiecti : & huiusmodi demonstrationes præstantissimæ quidem sunt, non tamen specie differunt ab aliis. Sed hæc facilius innotescunt idoneis exemplis.

1. *Omne rationale est capax scientiæ :*

Omnis homo est rationalis :

Ergò omnis homo est capax scientiæ.

In hac demonstratione medium rationale est causa efficiens interna prædicati, & forma subiecti.

2. *Omne terrestre mergitur in aqua :*

Hebenus est terrestris :

Ergò hebenus mergitur in aqua.

Hic medium est causa efficiens interna, & materia subiecti.

3. *Quicquid constat materiâ & formâ, habet trinam dimensionem :*

Omne corpus constat materiâ & formâ :

Ergò omne corpus habet trinam dimensionem.

Hic medium est causa efficiens interna prædicati, & forma simul atque materia subiecti.

4. *Quod trinâ dimensione præditum est, non admittit aliud corpus secum simul in eodem loco :*

Atqui omne corpus præditum est trinâ dimensione :

Ergò, &c.

Hic medium est causa efficiens interna prædicati, & proprietas subiecti.

5. *Quod à solis radiis, objectâ terrâ, illustrari nequit, id patitur ecleipsin luminis à sole accepti :*

Atqui luna à solis radiis, objectâ terrâ, nequit illustrari :

Ergò luna, &c.

Hic medium est causa efficiens externa prædicati.

6. *Qui factus est ad cælestium rerum contemplationem, debuit esse sublato vultu :*

Homo factus est ad cælestium rerum contemplationem ;

Ergò homo, &c.

Q 4

Hic

Hic medium est causa finalis prædicati.

3. Interdum fit, ut una eadēque quæstio demonstrari possit per causam efficientem simul ac finalem. Sic demonstraveris, *animal dormire*, vel *quia sensus communis à vaporibus sopitus, sensuumque externorum meatus obstructi sunt*; (atque hæc est demonstratio à causa efficiente) vel, *ut resocillantur spiritus, ac reparentur vires animalis*; & hæc est demonstratio à causa finali.

4. Porro demonstrationes τοῦ δότι non solum affirmatæ sunt, sed etiam negatæ. Nam sicuti demonstramus, *hominem esse capacem scientiæ, quia est præditus ratione*: ita quoque demonstrari potest, *bestiam non esse capacem scientiæ, quia ratione non est prædita*. Nam cum affirmatio est causa affirmationis, negatio est causa negationis; & vice versâ: ut dicitur *lib. 1. Post. cap. 13.*

5. Medium demonstrationis, ut hoc postremo loco adjiciam, non solum causa, sed etiam definitio prædicati dicitur. Cum enim causa proxima proprii accidentis præcipua pars definitionis sit, fit, ut ea synecdochicè dicatur definitio. Cum causa proxima prædicati, subiecti forma est, medium etiam dicitur definitio subiecti. Sed hoc neque necessarium, neque perpetuum est. Quomodo intelligendum sit, quod Aristoteles *lib. 2. Post. cap. 11.* dicit, *omnes causas medium demonstrationis esse posse*, omnium optimè interpretatur Zabarella *lib. de Med. Dem. & in Com. ad cap. 11. lib. 2. Post.*

CAP. XXIII.

De conditionibus principiorum demonstrationis τοῦ δότι.

THEOREMA I.

Conditiones principiorum sive propositionum demonstrationis τοῦ δότι, aliæ sunt absolutæ, aliæ relatæ.

II. Conditiones absolutæ dicuntur, quæ competunt propositionibus in se, atque absolutè consideratis; relatæ, quæ conveniunt illis ad conclusionem collatis.

III. Conditiones absolutæ sunt: primò, ut propositiones sint neces-

necessariò vera, ac reciproca : secundò, ut sint immediata, sive prima.

1. ¶ De conditionibus principiorum demonstrationis agit Aristoteles *lib. 1. Prior. cap. 2. & cap. 6.* Propositiones demonstrativæ debent esse vera, (falsum enim sciri non potest) & quidem *necessariò* : nam ex propositionibus non necessariis non potest colligi necessaria conclusio, nisi casu & per accidens. Quare cum conclusio demonstrationis debeat esse necessaria, idque propter propositiones præmissas, ipsæ quoque propositiones debent esse necessariae. Neque verò hoc satis est, sed debent esse necessariae in summo gradu, hoc est, reciproca ac *καθόλου πρῶτον*. Continent enim causam proximam prædicati, quæ talis est, ut cum effectu suo recipiatur.

2. Propositio dicitur duobus modis immediata : nempe vel ratione subiecti, vel ratione causæ. Propositio dicitur immediata ratione subiecti, in qua prædicatum dicitur de primo ac reciproco subiecto. Hoc sensu etiam conclusio debet esse immediata : omnis enim propositio *καθόλου πρῶτον* ac reciproca, hoc modo immediata est. Ratione causæ dicitur propositio immediata, quæ non habet causam veritatis suæ extra se, per quam demonstrari potest. Hoc sensu dicitur requiri, ut propositiones demonstrationis sint immediatæ ac primæ. Et certè, si propositiones non essent immediatæ, tolleretur scientia. Nam quicquid causam habet suæ veritatis, illud non scitur, nisi per causam illam demonstretur. Si igitur principia demonstrationis per alia principia demonstrari possent, ista pariter per alia, & sic porro, daretur progressus in infinitum, qui pugnat cum natura scientiæ. Cæterum cum dicimus, propositiones demonstrationis non posse demonstrari, id de demonstratione *τοῦ λόγου* intelligendum est. Sequenti enim capite docebimus, eas demonstratione *τοῦ ὄντος* innotescere posse.

IV. *Hæ duæ conditiones requiruntur in majore necessariò : minorem, dummodo vera sit, non necesse est necessariam, aut immediatam esse.*

1. ¶ Major propositio constat affectione & illius causâ proximâ, quæ non solum recipiuntur inter se, sed etiam *necessariò*

necessariò, ac immediatè cohærent : at minor conflata est ex affectionis causa & subiecto, quæ non necesse est tam arctè cohærere, ut propositionem necessariam, reciprocam, atque immediatam constituent ; cùm affectionis, non subiecti quæ-
ratur scientia.

2. Minor non est necessaria, nedum ut sit reciproca, ac *ἡ δὲ αὐτὴ πρῶτον*, cùm medium demonstrationis est causa efficiens externa prædicati. Ex. gr. *Quod radiis solis, objectâ terrâ, nequit illustrari, id patitur defectum luminis à sole accepti : Luna radiis solis, objectâ terrâ, nequit illustrari : Ergò, &c.* In hac demonstratione minor nullum habet gradum necessitatis, cùm non sit perpetua. In demonstrationibus à causa efficiente interna, aut à causa finali, minor semper quidem necessaria est, sed tamen non semper reciproca est : quia sæpe subiectum proximum, ac reciprocum non habet nomen. Ex. gr. *Omnis planta, cujus humor in pediculis foliorum congelatur, defrondescit : Humor vitis congelatur : Ergò, &c.* Hujus demonstrationis minor non est reciproca, quia non soli viti contingit ista humoris congelatio. Sed id propterea fit, quia non est proprium nomen, quo significentur omnes & solæ plantæ, quibus humoris congelatio, & fluxus foliorum accidit. Ob eandem causam fit, ut etiam conclusio non sit reciproca. *Vide lib. 1. Post. cap. 5. & lib. 2. cap. 16.*

3. Minor non est immediata, cùm causa proxima prædicati priorem causam habet, per quam demonstrari potest. In omnibus enim causis, quæ demonstrationem ingrediuntur, quædam series ac subordinatio est, ita ut posterior quæque sit effectum præcedentis. Quoties ergò effectum aliquod per ejusmodi causam demonstratur, quæ prioris causæ effectum est, minor necessariò debet esse mediata. Ac tum minor ista in priorem causam resolvenda est, & sic porrò, donec ad primam causam istius seriei perveniatur, quæ demonstrationem constituat ex utraque propositione immediata. Hæc demonstratio cæterarum omnium fundamentum est, quæ sunt ejusdem seriei. Itaque in docenda scientia, à prima demonstratione progrediendum est ad sequentes, ordine synthetico : & tum minor mediata, censetur quasi immediata, quia jam antè

antè demonstrata est. Propositio enim demonstrata non minus apta est ad pariendam scientiam, quàm propositio immediata atque indemonstrabilis. Si quis tamen incidit in demonstrationem, cujus minor est mediata, ei ordine analytico progrediendum erit, versùs demonstrationem primam ac fundamentalem: nec priùs erit scientiam affectus, quàm ad primam causam pervenerit: in hac enim acquiescit animus. Addamus exempla, ut res melius intelligatur: *Quod tria dimensione præditum est, non admittit aliud corpus secum simul in eodem loco: Omne corpus præditum est tria dimensione: Ergò, &c.* Hujus syllogismi minor demonstrari potest hoc modo; *Quod constat ex materia & forma est præditum tria dimensione: Omne corpus constat materiâ & formâ: Ergò omne corpus, &c.* Hujus demonstrationis minor æquè ac major immediata est, quia *constare materiâ & formâ* est definitio corporis.

4. Similis series est in demonstrationibus à causa finali, in qua subordinatus finis per ulteriorem demonstratur, donec ad ultimum finem in unoquoque genere perveniatur, in quo animus acquiescit. Ex. gr. *Animal habet pulmones, ut respiciat: respiciat ad cordis refrigerium: cor refrigeratur, ut servetur temperies caloris: temperies caloris servanda est, ut animalis vita conservetur.* Si hæ demonstrationes in forma proponantur, omnes, exceptâ ultimâ, habebunt minorem mediatam: ultima cæterarum fundamentum est.

5. Interdum fit, ut demonstrationes à causa efficiente resolvi nequeant in propositiones immediatas, nisi demonstrationes à causa finali commisceantur cum demonstrationibus ab efficiente causa. Ex. gr. *Homo est acutissimi tactus, quia est cutis tenerrima: Est cutis tenerrima, quia habet copiosos & elaboratos spiritus animales: Habet copiosos & elaboratos spiritus animales, quia habet cerebrum (spirituum animalium officinam) amplissimum.* Hæc tamen causæ efficientes. *Hominem habere perfectissimum & amplissimum cerebrum, demonstrandum est à fine, nimirum quia debuit ratiocinari: Hominem debere ratiocinari, demonstratur iterum à causa efficiente, nempe quia est animal rationale.* Hic jam quiescimus, quia minor est definitio hominis, at proinde immediata atq; indemonstrabilis.

V. *Conditiones principiorum ad conclusionem relatæ sunt tres : primò requiritur, ut sint causæ conclusionis ; secundò, ut sint priora ; tertio, ut sint notiora conclusione.*

VI. *Hæ conditiones requiruntur in utràque propositione.*

I §. *Ut se habet medium demonstrationis τοῦ διότι ad affectionem demonstrandam, ita se habent principia, sive præmissæ, ad conclusionem. Quare, sicuti medium est causa, cur affectio sit; ita principia causæ sunt, non solum cur conclusio cognoscatur, (hoc enim sensu principia in omni syllogismo causæ sunt) sed etiam cur vera sit. Et sicuti medium prius est affectione, non tempore, sed naturâ; ita quoque obtinent principia veritatem, non tempore, sed naturâ priorem veritate conclusionis. Denique sicuti medium notius est affectione, non quoad nos & cognitione confusâ, sed quoad naturam & cognitione distinctâ; ita quoque principia notiora sunt conclusioni. Quia enim conclusionem pleno mentis assensu amplectimur propter principia, ipsis principiis magis assentiri necesse est: quia, propter quod unumquodque est tale, illud magis est tale; ut docet Aristot. lib. 1. Post. cap. 2.*

VII. *Cum principia demonstrationis omnes hæc conditiones obtinent, sunt οἰκεία τῷ δεικνυμένῳ, hoc est, propria ei rei quæ demonstratur.*

VIII. *Principia dicuntur propria rei demonstratæ, cum neque heterogenea sunt sive aliena, neque communia.*

I §. *Hoc corollarium de proprietate principiorum ex conditionibus colligitur lib. 2. Post. cap. 2. & explicatur partim cap. 7. ubi docetur, principia non debere esse homogenea; partim cap. 9. ubi ostenditur, ea non posse esse communia. Cæterum heterogenea dicuntur principia, quæ ex alia scientia sunt petita: veluti si quis ad probandas quæstiones Physicæ, adhiberet principia Mathematica; aut ad probandos quæstiones Geometricas, principia Arithmetica. Atque οὐκ ἐστὶν ἕξ ἀλλὰ γένος μεταβάλλοντα δεῖξαι, hoc est, non licet ex alio genere in aliud transeuntem demonstrare, sive, non licet ex una scientia in aliam transire demonstranti: nimirum, quia medium tertio, hoc est, subjecto, & primum, hoc est, prædicatum, medio per se convenire debet, ut dicitur cap. 6. ejusdem libri: quod fieri non posset, si conclusio & principia non essent ejusdem generis,*

ris, sive subiecti, hoc est, si non essent ejusdem scientiæ. Una enim scientia dicitur, quæ est unius generis, sive subiecti, ut constat ex cap. 28. *eiusdem libri*.

2. Si tamen una scientia alteri subalternata est, ut Musica Arithmeticæ, aut Optica Geometriæ; quæstiones scientiæ inferioris demonstrandæ sunt per principia scientiæ superioris. Nec tamen hæc est *μεταβασις εις άλλο γένος*, quia scientia subalternata aliquo modo idem subiectum habet cum scientia superiori: ac proinde non censentur scientiæ diversæ. Dixi *aliquo modo*: quia scientia subalternata considerat subiectum scientiæ superioris cum aliqua qualitate sensibili, quæ tamen ad formalem rationem subiecti non pertinet. Hinc fit, ut affectiones quidem utriusque diversæ sint, at in ceteris consentiunt. Sic Arithmetica considerat numerum absoluté; Musica, quæ Arithmeticæ subalternata est, considerat numerum in sono. Similiter Geometria considerat magnitudinem absoluté; Optica, quæ illi subalternata est, considerat magnitudinem in colore, luce, aut umbra. *Vide cap. 7. libri citati*.

3. Principia communia sunt, quæ possunt pluribus scientiis accommodari. Huiusmodi principia non generant scientiam, quia continent medium, quod cum partibus quæstionis non cohæret per se, sed tantum per accidens. Atqui unumquodque tum demum verè scimus, cum illud scimus *κατ' ἐκείνο, καθ' ὃ ὑπάρχει*, hoc est, *catenus quatenus inest* subiecto, idque *ἐκ τῶ ἀρχῶν τῶ ἐκείνου, ἢ ἐκείνο*, hoc est, *ex principiis, quæ illius, quæ illud ipsum est, principia sunt*, ut loquitur Aristoteles cap. 9. *libri citati*. Id autem, quod ex rationibus communibus cognoscimus, ex accidenti tantum scimus. Non est autem putandum, principia scientiarum esse communia, quæ, cum sint scientiæ superioris, adhibentur scientiæ subalternatæ: quia scientia subalternata (ut modò dictum est) non censetur diversa à scientia subalternante.

IX. Principia dividuntur in axiomata & theses.

X. Axioma est principium, cuius veritas, cognitâ significatione vocabulorum, à nemine potest ignorari.

XI. Thesis est principium, cuius veritas non ex sola vocabulorum significatione cognita, sed ex sensuum iudicio, aut qualicunque declaratione innotescit.

XII. Estque

XII. *Estque vel definitio vel hypothesis.*

XIII. *Definitio est, quâ quid res sit ; hypothesis, quâ an sit, aut non sit enunciamus.*

1. ¶ Hæc principiorum divisio petita est ex lib. I. *Post. cap.* 2. & 10. Unde autem dictum sit axioma, dictum est lib. I. *cap.* 27. Thesis interdum sumitur pro omni propositione, quæ in utramque partem proponitur disputanda, ut lib. 8. *Top. cap.* 4 & 5 Interdum pro sententia paradoxa nobilis alicujus Philosophi, lib. I. *Top. cap.* I. In Rhetoricis sumitur thesis pro quæstione infinita : hoc loco, pro specie propositionis immediatæ.

2. Aristoteles *cap.* 10. *libri citati* definit axioma, ὁ ἀναγκαῖον εἶναι καὶ ἀποδεχόμενον hoc est, quod necesse est esse verum per se, & videri necesse est. Ait, quod necesse est esse verum, hoc est, quod est ἀναγκαῖον, sive quod non habet causam suæ veritatis, quâ demonstrari possit. Atque hoc est axiomatibus cum thesibus commune. Addit, & videri necesse est, hoc est, à nemine rationis compote negari potest seridò, atq; ex animo. Erit fortè, qui axioma neget potius, quàm fateatur se victum esse : sed non invenietur quispiam, qui, modò sit rationis compos, ea neget animo suo ac mente. Exempla axiomatum hæc sunt, *Nihil potest simul esse, & non esse : Totum est majus suâ parte : Quæ eidem æqualia sunt, ea inter se quoq; æqualia sunt : Si ab æqualibus auferantur æqualia, reliqua crunt æqualia*, Harum propositionum tanta est evidentia, ut cognitâ significatione vocabulorum quibus efferuntur, non possit eorum veritas ignorari. Qui enim novit quid significet totum, quid pars, quid majus esse, fieri non potest, ut is ignoret totum esse majus suâ parte.

3. Atque hac in re differunt axiomata à thesibus. Ad theses enim cognoscendas, præter cognitam significationem terminorum requiritur etiam sensuum judicium, & interdum aliqua præceptoris declaratio. Definitionum exempla ex unaquaq; disciplina peti possunt : Ex Physica ; *Corpus naturale est, quod constat materiâ & formâ : Principia sunt, quæ neq; ex aliis fiunt, neq; ex se invicem, & ex quibus fiunt omnia : Natura est principium & causa motus & quietis ejus in quo est, primo, per se, & non per accidens, &c.* Ex Geometria ; *Punctum est, cujus pars*

pars nulla est: Linea est longitudo latitudinis expers: Linea recta, quæ ex æquo sua interjacet puncta, &c. Hypotheses in Physica sunt; Esse corpus naturale, cælum, animam, &c. In Arithmetica; Dari unitatem: Non dari maximum numerum, &c. In Geometria; Dari lineam: A quolibet puncto ad quodlibet punctum duci posse rectam lineam, &c. Hæc omnia talia sunt, ut quamvis non indigeant demonstratione, non tamen ex sola terminorum significatione cognita, si nihil aliud accedat, intelligantur esse vera. Et si enim aliquis noverit, quid nomine corporis significetur; non propterea tamen sciet, omne corpus ex materia & forma constare: imò nè quidem, an sit corpus naturale, si sensuum non juvetur iudicio.

4. Hinc est, quod necesse sit, axiomata teneri ab eo, qui scientiam aliquam addiscere vult, antequam ad præceptorem accedat; theses teneri, non sit necesse. Hæ enim in limine scientiarum exprimi ferè solent. Et definitiones quidem semper exprimuntur: hypotheses, si sensuum iudicio notæ sint, exprimi non est necesse.

5. Et si autem tanta sit axiomatum evidentia, ut ignorari nequeant, non tamen putandum est, eorum notiones (*κοινὰς ἐνοίας* Græci vocant) nobis nascentibus insitas esse, (anima enim nascentis, teste Philosopho *lib. 3. de Anim. cap. 4.* est tabula, *ἡ ὑπὸ ἐν ὑπάρχῃ ἐντελεχεία ψυχῆς ἀμύμων*, id est, cui nihil actu inscriptum est) sed ex singularibus sensu cognitis colligi à naturali facultate: ut demonstratur *cap. ult. lib. 2. Post.*

6. Præterea notandum est axiomata ferè esse universaliora thesibus, & pluribus scientiis communia; cum theses propriæ sint unicuique scientiæ: ideoque axiomatum considerationem ad Metaphysicam spectare, & in solis demonstrationibus Metaphysicis adhiberi posse, ut partes; cæterarum scientiarum demonstrationibus fulciendis inservire, ut instrumenta quædam externâ: ac nè tum quidem accipi universaliter, sed quantum sufficit, hoc est, coarctata ad scientiæ propositæ subjectum. Quæ accuratè explicantur ab Aristotele *lib. 1. Post. cap. 10. & lib. 2. Metap. cap. 3.* Ex: gr. hoc axioma, *Quæ eidem æqualia sunt, ea inter se æqualia sunt*, commune est Arithmeticæ & Geometriæ; utrâque eo utitur, sed in proprio

subjecto

subjecto Geometra dicit, *Magnitudines, quæ eidem æquales sunt, inter se æquales sunt*: Arithmeticus, *Numeri, qui eidem æquales sunt, &c.*

XIV. Cum ad prædictas leges conformata est demonstratio, non solum probat affectionem inesse subjecto suo, sed etiam explicat, quid illa sit, ejusque perfectam definitionem continet.

1. ¶ Demonstratio τοῦ ὄντι δὲ τῶν ὅρων, hoc est, situ terminorum, aut casu differt à perfecta definitione affectionis demonstrandæ, ut ostendit Aristoteles lib. 2. Post. cap. 10. Affectionis enim perfecta definitio constat genere, subjecto, & causâ proximâ. Subjectum & causa semper exprimuntur in demonstratione: genus vel exprimitur (nam interdum pro nomine affectionis ponitur genus) vel saltem præcognoscitur. Nam ante demonstrationem, affectionis nomen, ejusque significatio debet esse præcognita. Continet ergò demonstratio ea omnia quæ ad definitionem perfectam necessaria sunt, sed inverso ordine. Demonstratio enim sic proponitur, *Terra interposita est inter solem & lunam: ergò luna patitur eclipsin, aut deliquium luminis à sole accepti.* Definitio proponitur hoc modo; *Eclipsis est deliquium luminis à sole accepti in luna propter terram inter solem & lunam interpositam.* Ex quo sequitur, demonstrationem non solum efficere scientiam ejus rei quæ demonstratur, sed etiam intelligentiam. Scientiam efficit, quatenus probat; intelligentiam, quatenus definitionem continet rei demonstratæ.

CAP. XXIV.

De Demonstratione τὸ ὄντι, deque Regressu.

THEOREMA I.

Demonstratio τὸ ὄντι alia est ab effectu, alia à causa remota.
II. Quarum illa colligit causam ex effectu sensibili, hæc colligit effectum ex causa remota.

1. ¶ Demonstratio (ut suprâ dictum est) est genus æquivocum, sive ex eorum numero quæ speciebus communicantur inæqualiter. Etenim demonstratio τὸ ὄντι in suo genere per -

perfecta est, & perfectam generat scientiam; demonstratio *τὴ δὲ* imperfectam: quippe oritur ex defectu quarundam conditionum, quas diximus ad demonstrationem *τὴ δὲ* necessariò requiri. Quinque conditiones suprà recensuimus quæ in principiis ac propositionibus demonstrationis *τὴ δὲ* necessariò requiruntur: ut sint necessariò veræ, immediatæ, causæ conclusionis, priores, & notiores. Ex his, quædam penitus inseparabiles sunt à demonstratione. Si enim propositiones non sint necessariò veræ, notiores conclusionem, & causæ cognoscendi conclusionem, demonstratio erit inutilis, & nomen demonstrationis nullo merebitur modo. Reliquæ conditiones si absint, non efficitur, ut demonstratio non sit demonstratio, sed ut sit demonstratio secundaria. Si enim principia sint immediata, & non sint tamen causæ illius rei quæ demonstratur, & priora conclusionem, efficitur demonstratio ab effectu. Si sint causæ rei demonstratæ, sive conclusionis, non tamen immediata, efficitur demonstratio à causa remota. Ex. gr. si quis solito seriùs expectatus, videt parietes cubilis sui à sole collustrari, illico colligit solem jamdudum supra horizontem esse: hæc est demonstratio *τὴ δὲ*, à signo. sive ab effectu sensibili. Talis etiam est hæc demonstratio, *Luna illuminatur per incrementa sphaerica; ergò est rotunda: Plantæ crescunt, & emittunt folia; ergò vivunt: Pulsus arteriarum in ægro est inæqualis; ergò laborat febre, &c.* Exemplum demonstrationis à causa remota; *Plantæ non habent animam sensitivam; ergò non respirant.* Anima enim sensitiva est causa remota respirationis; pulmones sunt causa proxima. Tale est illud Anacharsidis, qui interrogatus, cur in Scythia non essent tibicinæ, sicut in Græcia, respondit, *Quia ibi non sunt vites.* Nempe hoc volebat, tibicinas esse ex ebrietate: apud Scythas autem neminem sese inebriare, quia illic non est vinum; & non esse vinum, quia non sunt vites.

III. *Demonstratio ab effectu potest esse affirmata & negata: demonstratio à causa remota semper est negata, concluditurque in secunda figura in canestres.*

I. §. Hæc ab Aristotele præcipiuntur lib. I. Post. cap. 10. Ratio præcepti est, quòd effectus recipitur cum causa proxima; ideoque posito effectu, ponitur causa proxima, eoque

sublato, tollitur : At causâ remotâ sublatâ, tollitur quidem effectum ; at eâ positâ, non est necesse effectum poni : quia non reciprocantur. Itaque sicuti colligimus, *plantas vivere, quia crescunt & nutriuntur* ; itâ colligi potest, *lapides non vivere, quia neque crescunt neque nutriuntur* : Et sicuti ex inæquali & concitato pulsu arteriarum, colligitur febris ; itâ ex pulsu æquali & sedato colligitur *ἀποψυχία*, hoc est, *immunitas à febre*. Sed non sequitur, *omne animal respirare, quia habet animam sensitivam* ; etsi sequatur, *nullam plantam respirare, quia non habet animam sensitivam*.

2. Ob hanc causam non potest demonstratio à causa remota numerari inter demonstrationes τῆ δόξης, ut quidam volunt, quia non solvit quæstionem cur res sit, cum non afferat eam causam in qua possit animus acquiescere. Si enim *non habere animam sensitivam*, est proxima causa cur plantæ non respirent, *habere animam sensitivam*, esset causa proxima respirationis. Si enim negatio est causa negationis, ut suprâ diximus, affirmatio erit causa affirmationis. Jam *habere animam sensitivam*, non est causa proxima respirationis, quia non omne animal respirat.

3. Ex duabus hisce speciebus demonstrationis τῆ ὁρθῆς, ea quæ ab effectu est, non parùm nobilior est demonstratione à causa remota. Nam primò, magis necessarias habet propositiones, cum ex iisdem terminis connexatur ex quibus constat demonstratio τῆ δόξης. Secundò, generat scientiam non simpliciter, sed in suo genere perfectam. Nam causa aliâ ratione sciri non potest, quam eâ, quâ ex effectu demonstratur. Tertiò, formatur in prima figura, potestque esse affirmata. Demonstratio à causa remota, cum constet propositionibus minùs necessariis & non immediatis, neque scientiam generat in suo genere perfectam, in qua possit mens acquiescere, neque formari potest in prima figura. Utraque tamen tam perfecta est, ut sufficiat ad generandam scientiam, quâ cognoscimus rem esse aut non esse.

IV. Postquàm ex sensibili effectu, esse causam, deprehensum est, instituitur comparatio illius causæ cum effectu : & simul ac mens suâ sagacitate comperit, causam illam esse causam hujus effecti, fit regressus à causa ad effectum, per demonstrationem τῆ δόξης.

1. ¶ Interdum effectum esse, ignotum est; esse causam, notum: & tum statim adhibetur demonstratio τὴ δὲ ὅτι quemadmodum videre est in multis demonstrationibus Mathematicis. Interdum effectum in sensus incurrit, & causa ignota est: & tum primum ex effecto causa, deinde ex causa effectum demonstrandum est. Hæc demonstrandi ratio à Latinis Philosophis *regressus* appellatus est. Regressus ergò constat tribus partibus: prima est demonstratio τὴ ὅτι, colligens causam esse ex sensibili effecto: secunda est mentis quædam commentatio, quâ, comparando causam cum effecto, comparit eam esse causam propositi effecti. Nam ex sensibili effecto nihil aliud colligitur, quàm causam esse, quæ est confusa causæ cognitio. Ut autem ex causa colligi effectum possit demonstratione τὴ δὲ ὅτι, ipsa causa debet distinctè cognosci. Causa dicitur distinctè cognosci, cum cognoscitur eam esse causam hujus aut illius effecti. Siquis enim ex inæquali & concitato pulsu colligit aliquem laborare feбри, is nondum novit febrem, causam esse inæqualis & concitati pulsus. Non enim necesse est, ut, si duo perpetuò connexa sint, eorum alterum sit causa alterius; cum duo effecta ejusdem causæ possint esse perpetuò connexa, ut inæqualitas pulsus, & sitis, aut tale quid, in feбри. Cum jam mens compeit causam ex effecto demonstratam, esse causam illius effecti, formatur demonstratio τὴ δὲ ὅτι. atque hæc est tertia pars regressus.

2. Quòd autem causa ex effecto demonstrata, sit causa illius effecti, id nullâ aliâ ratione, quàm sensu, cognoscitur in rebus similibus, aut contrariis. Similium enim effectorum, similes; contrariorum, contrarias esse causas necesse est. Ex. gr. Siquis deprehendit in eclipsi lunæ terram inter solem & lunam interponi, & tamen ignoret interpositionem terræ causam esse eclipseos; is observet corpus opacum inter candelam & parietem constitutum, suo objectu umbram in pariete efficere; & facillè intelliget, terram efficere nè luna à sole illuminetur, cum inter utrumque interposita est.

3. Hæ tres partes naturâ semper distinctæ sunt, sed non semper tempore. Interdum enim fit, ut causa, cum primum invenitur, absque ullo temporis intervallo, distinctè cognoscatur, idque vel propter illius evidentiam, vel propter inge-

nii nostri perspicacitatem. Ex. gr. Si quis ex fumo colligat esse ignem, statim etiam intelligit, cur fumus sit : non quidem ex eadem illa demonstratione $\pi\epsilon\ \delta\eta\tau$, sed ex alia demonstratione $\pi\epsilon\ \delta\iota\delta\eta\tau$, quam mens format, aut nullo, aut tam exiguo tempore interposito, ut eodem momento fieri videatur.

4. Non est autem ut aliquis existimet, regressum esse circulum, quem Aristoteles solidè refellit *lib. 1. Post. cap. 3.* Magnum enim inter regressum & circulum discrimen est : Nam in circulo sunt tres partes ; in prima demonstratur proposita quæstio : in secunda demonstratur major ex conclusione loco majoris posita, & minore conversa : in tertia probatur minor ex conclusione loco minoris posita, & conversa majore. In regressu major non demonstratur, sed tantum minor, idque ex majore primæ demonstrationis conversa, & conclusione loco minoris positâ. Præterea in circulo omnis progressio est à causa ad effectum : at in regressu prius proceditur ab effectum ad causam, deinde à causa ad effectum. Denique in circulo idem est principium & finis. Quicquid enim in secundo & tertio syllogismo demonstratur id in primo erat distinctè cognitum. At in regressu prius proceditur ab effectum confusè cognito, ad causam confusè cognoscendam : deinde à causa distinctè cognita, ad effectum distinctè cognoscendum. In circulo ergo idem erit prius & posterius, notius & ignotius, & quidem eodem cognitionis genere : imò idem probabitur per seipsum. Si enim A. probetur per B, & B per C, & C per A ; certè A probatur per A. At in regressu hæc absurda non habent locum.

5. Regressus maximum habet usum in Physica, quæ magnam partem versatur circa sensibiles effectus, quorum ignotæ sunt causæ. Horum causæ primùm investigandæ sunt ex effectis : deinde ex inventarum causarum cognitione, derivanda est perfecta & distincta cognitio effectuum, quâ non solum cognoscimus effecta esse (hoc enim sensus judicant) sed etiam cur sint, & quid sint, quo ulterius mens nostra progredi non potest. Atque hæc de syllogismo vero.

CAP. XXV.

De Sophismate.

THEOREMA I.

Sequitur syllogismus ἀπατητικός, sive fallax, qui speciem veri syllogismi mentiens, errorem gignit, sive ignorantiam pravae dispositionis.

1. γ. Ignorantia, teste Aristotele lib. 1. Post. cap. 16. duplex est: altera κατ' ἀπόφασιν, hoc est, secundum negationem: altera κατ' διάθεσιν, hoc est, secundum dispositionem. Illa contingit animo, τῷ μὴ ἔχειν, hoc est, quia nullum habet; hæc, τῷ παύλως ἔχειν τι τὴν δόξαν, hoc est, quia pravam habet opinionem; ut docet Arist. cap. 12. lib. citari. Illa opponitur scientiæ, omnique veræ existimationi, ut privatio habitui; hæc ut contrarium contrario.

2. Præcepta de fallaci syllogismo in Logica sunt perquam necessaria, non ut iis instructi alios decipiamus, sed ut ab aliis non decipiamur. Quia enim ἐκ ἑστ' αὐτὸν ἀγνοῶντα τὸν δεσμὸν, hoc est, solvere non potest nodum qui cum ignorat, lib. 2. Met. cap. 12. non est censendus bonus Logicus, nisi is, qui fallere potest, sed non vult. Ὁ γὰρ σοφιστικός ἐκ ἐν τῇ διωδέμεναι, ἀλλ' ἐν τῇ περαιτέρω hoc est, Sophista non est, qui potest, sed qui vult fallere, lib. 1. Rhet. cap. 1. Atque istoc modo agit Medicus de veneno, Ethicus de vitiis, Jurisconsultus de injuria. Neque verò ad illud solum conducit hæc doctrina, ut non ab aliis, sed etiam, ut non decipiamur à nobis ipsis. Ὁ γὰρ ὅφ' ἐτέρων ῥαδίως παραλογίζεσθαι, καὶ τὸ μὴ αἰδανθῆναι, καὶ αὐτὸς ὅφ' αὐτῷ τὸ πᾶσι πολλοῖς hoc est, Qui enim ab aliis facile decipitur paralogismo, nec id animadvertit, ipse quoque hoc à semetipso pati saepe potest, cap. 1. Soph. elench.

3. At rectum (inquiunt, qui fallacis syllogismi doctrinam ad Logicam pertinere negant) & sui, & obliqui norma est; unumque oppositorum sufficit ἑαυτὸ τε κρίνειν καὶ τὸ ἀντιχειμῶν, hoc est, ad semetipsum & oppositum discernendum, lib. 1. An. cap. 1. Ex quo sequi putant, sufficere præcepta de vero syllogismo ad fucum fallacis syllogismi detegendum, &

hanc doctrinam in Logica superfluam esse. Sed non ita est. Nam rectum tum demum obliqui norma est, cum obliquum, ut obliquum est, recto opponitur : & unius oppositi cognitio tum demum sufficit ad utrumque discernendum, cum oppositum, ut oppositum est, cum opposito componitur. At cum obliquum induit speciem recti, aut cum oppositum induit speciem alterius oppositi ; non sufficit qualiscunque recti cognitio ad obliquum ab illo discernendum, nec cognitio unius oppositi, ad intelligendum discrimen utriusque. Jam syllogismus fallax non solum vitiosus est, sed ementitur etiam similitudinem boni syllogismi : ac proinde non sufficiunt præcepta hætenus de syllogismo tradita, ad technas & dolos sophistarum intelligendos. Quid quod satis non sit, vitium fallacis syllogismi agnovisse ? species præterea detrahenda est veri syllogismi, & apertè demonstrandum, ex qua fallaciarum theca fucus peritus est, quem Sophista vitioso syllogismo illeverat.

II. *Syllogismus fallax vel est sophisma, vel Pseudopodeictici.*

III. *Sophisma est, quod ementitur speciem syllogismi dialectici.*

IV. *Pseudopodeictici, quod ementitur speciem syllogismi apodictici.*

1. S. Quot modis dicitur unum oppositorum, tot modis dicitur & alterum. Quare, cum verus syllogismus sit duplex, etiam fallacem syllogismum necesse est esse duplicem. De pseudographemate nihil præcipiendum est hoc loco. Nam sicuti veritas admodum evidens est in propositionibus necessariis & immediatis: ita difficile est condiciones & speciem demonstrationis ita rectè mentiri, ut alicui imponi possit, qui in arte demonstrandi mediocriter versatus sit. Sophismatum fraus occultior est, & detectu difficilior. Quare de his pluribus agendum.

2. Nomen Sophistæ origine suâ honorificum fuit. Antiquitus enim quilibet artifex, teste Suidâ, sophista dicebatur, & speciatim Medicis, Jurisconsultis, Theologis, Musicis, Poetis, & imprimis Philosophis, illa appellatio tribuebatur ; quemadmodum illud prolixè probat vir Cl. Gerardus Vossius, cap. 1. de Nat. Rhet. Dicitur autem sophista σοφιστής,

σοφίζων,

σοφίζειν, hoc est, *sapientiam docere* : quia Philosophi plerique hoc agebant, non solum ut ipsi scirent, sed etiam ut alios sapientes efficerent. Postquam ii, qui pro sapientia magistris sese venditabant, coeperunt animum & professionem suam ad quaestum convertere, nomen Sophistæ quoque versum est in contumeliam : & sophista dictus est, qui vasis quibusdam quaestiunculis sapientem imitaretur, & verborum prestigiis aliis illuderet, atq; hanc artem discipulos suos lucri causâ doceret. Atque hoc paret ex Aristotele, qui sui temporis sophistas appellat *χρηματιστὰς ἀπὸ φαινομένης σοφίας, ἀλλ' ἐκ ἔσσης*, hoc est, *qui quaestum captant ex ea, quæ videtur esse sapientia, nec est tamen* ; & Sophisticam, *φαινομένην σοφίαν, ἔστιν ὃ μὴ*, hoc est, *quæ videtur esse sapientia, reverâ non est*. Vide cap. 1. *Soph. elench.* Sicut autem sophistæ non tam hoc agebant, ut sapientes essent, quàm ut sapientes esse viderentur ; ita quoque utebantur argumentationibus, quæ speciem præ se ferrent verorum syllogismorum, reverâ essent paralogismi.

3. Aristoteles inscribit hanc partem Logicæ *περὶ σοφιστικῶν ἐλέγχων*, hoc est, *de sophisticis elenchis*. Elenchus definitur, *συλλογισμὸς μετ' ἀντιθέσεως τῷ συμπέρασματι*, hoc est, *syllogismus cum contradictione conclusionis*, nempe ab alio assertæ & defensæ. Etenim duo munera sunt sapientiæ professoris : veritatem docere, & errorem præconceptum profligare sive redarguere. Atque hoc posterius Græcis est *ἐλέγχειν*. & argumentationes, quibus error redarguitur, dicuntur *ἐλέγχοι*. Jam verò, quia Sophistis propositum erat aliis contradicere, eorumque opiniones convellere, idque *ἀδξιν χάριν τῆς εἰς χρηματισμὸν*, hoc est, *ut sapientiæ opinionem de se apud alios concitarent, quæ sibi ad quaestum prodesset*, factum est, ut sophismata Elenchi sophistici dicerentur, hoc est, qui cum elenchi non sint, sed paralogismi, videntur tamen esse elenchi.

CAP. XXVI.

De Sophismatibus, sive fallaciis in voce.

THEOREMA I.

Sophismata vel sunt in voce, vel in rebus.

I. I. Sophismatum, quæ in voce consistunt, sunt sex loci; homonymia, amphibolia, compositio, divisio, prosodia sive accentus, & figura dictionis.

I. §. Hanc partitionem proponit Philosophus cap. 4. libr. cit. ibique explicat sophismata in vocibus sita; sequenti capite, quæ pertinent ad res ipsas. Nec mirum est in vocibus esse sitas fallacias. Omnes enim disputationes de rebus quidem fiunt; sed cum res ipsæ non possint in disputationibus adhiberi, adhibendæ sunt voces eo modo, quò calculi adhibentur in arte Logistica. Quare sicut ii, qui calculorum usum ignorant; facile circumveniuntur à peritis; ità quoque paralogismis facillimè capiuntur, qui usum vocabulorum ac significationem non satis accuratè callent, putantes rebus continuò convenire, quod vocibus convenit, aut contrà. Vide cap. I. operis citati.

III. Sophisma homonymiæ est, quod oritur ex unius dictionis ambiguitate.

IV. Hoc sophisma solvitur distinctione vocis ambiguae.

I. §. In syllogismo tres sunt termini: quapropter potest fallacia homonymiæ tripliciter contingere. Primò, cum medium ambiguum est; ut *Finis rei est illius bonum: Mors est finis vitæ: Ergò mors est bonum vitæ*. Hæc fallacia solvitur distinctione finis. Finis enim in maiore sumitur pro causâ; in minore, pro extremitate rei. Secundò committitur fallacia homonymiæ, cum subjectum est ambiguum; ut, *Quantitas non est substantia: Corpus est quantitas: Ergò corpus non est substantia*. Hæc fallacia solvitur distinctione corporis. In minore enim intelligitur corpus Mathematicum, in conclusione Physicum. Tertiò struitur sophisma homonymiæ, cum prædicatum est ambiguum; ut, *Quod est rotundum, caret principio & fine: Mundus est rotundus: Ergò caret principio & fine*.
Hoc

Hoc sophisma solvitur distinguendo *principium & finem*. Nam in maiore intelligitur principium & finis magnitudinis; in conclusione, principium & finis temporis. Tale erat sophisma, quo utebatur ille, qui cum triginta dierum pactæ essent cum hoste induciæ, noctu populabatur agros, quod dierum, non noctium essent pactæ induciæ. Vide *lib. 1. Cic. de Off.*

2. Huc videntur pertinere interrogationes captiosæ, *Desisti facere adulterium, an non? Habesne quod non perdidisti, an non habes?* Sive enim aias, sive neges, hærebis in captione, propter homonymiam. Si enim te dicas desisse adulterium facere, confiteris te aliquando adulterium fecisse: quia fecimus aliquando, quod facere desimus. Sin neges te desisse facere adulterium, inferet sophista, etiamnum te facere adulterium. Similiter, si affirmes te habere, quod non perdidisti, dicet sophista, te habere cornua, quæ non perdidisti: sin neges, dicet te non habere oculos, quos etiam non perdidisti. Quare dicendum est, verbum *non desinere* esse ambiguum. Nam cum *desinere* dicatur, qui fecit aliquid, & non amplius facit, verbum *non desisse* sumi potest, vel pro *non fecisse*, vel pro *etiamnum facere*. At proinde *non desisse facere adulterium* dici poterit, & qui nunquam adulterium fecit, & qui etiamnum facere pergit. Similiter, *non perdidisse* dici potest aliquis, & quod nunquam habuit; ut cornua; & quod etiamnum habet, ut oculos: quia *perdidisse* dicitur, qui aliquid habuit, & non amplius habet. Vide *A. Gell. lib. 17. Noct. Att. cap. 2.*

V. *Sophisma amphiboliæ* est, quod oritur ex ambiguo sensu orationis, cujus singulæ dictiones per se homonymiâ carent.

VI. Hoc sophisma solvitur distinctione orationis ambiguae.

1. ¶ Fallacia amphiboliæ struitur bifariam: primo, cum ipsa orationis syntaxis est ambigua; ut, *Quod quis videt, illud ipsum videt: Aliquis videt arborem: Ergo arbor ipsa videt.* Hæc fallacia solvitur distinctione ambiguae orationis, *illud ipsum videt.* Nam *illud ipsum* vel potest esse nominativus, & tum major erit falsa; vel accusativus, & tum vera quidem erit major, sed tamen ex illa non sequetur hæc conclusio *Ergo arbor ipsa videt*, quia syllogismus haberet quatuor terminos. Hujus generis etiam est hæc captio; *Qui sunt domi-*

ni sui, sunt sui juris: Servi sunt domini sui: Ergò servi sunt sui juris. Ambiguitas enim est in vocibus *domini sui*, quæ in majori sunt numeri pluralis; in minori, singularis. Similis ambiguitas est in hisce enunciatis, *Socrus oderunt nurus; Rumor est uxorem habere te; Aio te & acida Romanos vincere posse.*

2. Committitur etiam fallacia amphiboliæ, quando ipsum sermonis genus, sive phrasis, parit ambiguitatem & incertitudinem sententiæ; ut, *Qui librum in lucem mittit, vult eum ab omnibus legi: Qui librum in ignem conjicit, mittit librum in lucem.* Ergò, qui librum in ignem conjicit, vult eum ab omnibus legi. Hæc fallacia solvitur distinctione phrasis *mittere in lucem*; quæ in majori significat *edere*; in minori, *cremare*. Talis est eorum captio, qui mortuorum invocationem colligunt, ex eo quod Jacob patriarcha, in posteritatis suæ benedictione, cum de Josephi liberis loquitur, inter cætera, sic ait, *Gen. 48. 16. Et vocabitur nomen meum in istis pueris, & nomen patrum meorum Abrahami & Isaaci.* Nam vocari nomen Jacobi in filiis Josephi, ex sanctæ linguæ idiotismo, nihil aliud est quàm eos vocari de nomine Jacobi *Israelitas*.

VII. *Sophisma compositionis est, quod oritur ex conjunctione eorum quæ dividenda sunt.*

VIII. *Sophisma divisionis contrà est, quod oritur ex divisione eorum quæ conjungenda sunt.*

IX. Hæc sophismata solvuntur distinctione diversorum sensuum, quos habet oratio pro diversa partium compositione aut divisione.

1. Multa sunt divisim vera, quæ conjunctim falsa sunt; ut, *sedentem stare posse*: multa contrà sunt conjunctim vera, quæ divisim falsa sunt; ut, *Omnes peccatores pœnitentiam agentes, servabuntur.* Cum à divisim ad conjuncta instituitur argumentatio, committitur fallacia compositionis; cum à conjunctis ad divisa, fallacia divisionis. Utraque fallacia committi potest octo modis. Primò, in enunciationibus modalibus; ut, *Possibile est sedentem stare.* Si enim participium *sedentem* jungatur cum verbo *stare*, enuntiatio est falsa; si jungatur cum modo *possibile*, enuntiatio est vera. Sedit enim, etiam cum sedet, inest potentia sive facultas standi, sed non standi quamdiu sedet.

2. Secundò, in enunciationibus, quarum partes conjunctione aliquâ Grammaticâ conjunguntur aut separantur; ut, *Omne animal aut est rationale aut irrationale: Atqui non omne animal est rationale: Ergò omne animal est irrationale.* Hic fallaciæ causa est majoris divisio. Major enim est vera, si conjunctim accipiat, & ut simplex enuntiatio, cujus attributura, *rationale aut irrationale*, sumitur tanquam unum quid. At si accipiat, & ut enuntiatio composita, hoc modo, *Omne animal est rationale, aut omne animal est irrationale*, manifestò falsa est.

3. Tertiò, cum in majore nota quantitatis accepta collectivè, aut distributivè in genera singulorum, sic usurpatur, ac si sumeretur distributivè in singula generum; ut, *Omnes planetæ sunt septem: Sol & Lunæ sunt planetæ: Ergò Sol & Luna sunt septem.* Hæc fallacia consistit in voce *omnis*, quæ si collectivè sumatur, major quidem erit vera, sed minor falsa. Hæc enim debebat esse minor, *Sol & Luna sunt omnes planetæ.* Si vox *omnis* sumatur distributivè, major erit falsa. Aliud exemplum; *Omne animal fuit in arca Noachi: Multa animalia diluvio perierunt: Ergò multa animalia, quæ diluvio perierunt, fuerunt in arca Noachi.* Hæc quoque fallacia sita est in voce *omnis*, quæ si de singulis generum accipiat, major falsa est; si de generibus singulorum, minor falsa erit. Nulla enim genera animalium perierunt, ex iis, quæ *omnia* in arca Noachi fuisse dicuntur.

4. Quartò, cum dictio aliqua vel cum antecedentibus, vel cum consequentibus conjungi potest; ut illud Menandri: *Ἐγὼ σε ἔδουκα δούλον ὄντα ἐλεύθερον:* hoc est, *Ego te feci servum existentem liberum.* Hæc enim enuntiatio bifariam interpungi potest; nempe, *Ego te feci servum, existentem liberum*, hoc est, te redegi in servitutem, cum esse liber; vel, *Ego te feci servum existentem, liberum*, hoc est, te liberali asservi manu.

5. Quintò, cum citatur locus alicujus auctoris aliquâ parte dissimulatâ. Hæc fallaciâ usus fuit diabolus *Matth. 4.* cum Christum sollicitaret, ut se præcipitem de templi pinnis deiceret, adducto testimonio Davidis, hunc in modum, *Scriptum est, inquit, Angelus suis mandabit de te, & ipsi te attolent in manus,*

manus, nè fortè offendas ad lapidem pedem tuum. Atqui scriptum est, Angelis suis præcipiet de te, ut te conservent, ambulantem in omnibus viis tuis, hoc est, sequentem institutum vocationis tuæ: ambabus manibus sustineant te, nè offendas ad lapidem pedem tuum, Psal. 92.

6. Sextò, cum vox aliqua nunc divisim, nunc conjunctim ꝑccipitur; Ut, *Omnis incuria meritò vituperatur; Senatus est in curia: Ergò Senatus meritò vituperatur.* Hæc fallacia locum habet in sermone potius quàm in scripto.

7. Septimò, cum de toto colligitur, quod de partibus dicitur; aut de partibus, quod dicitur de toto; ut, *Duo & tria sunt par & impar: Quinque sunt duo & tria: Ergò quinque sunt par & impar.* Hæc est fallacia compositionis. *Quinque sunt unus numerus: Duo & tria sunt quinque: Ergò duo & tria sunt unus numerus.* Hæc est fallacia divisionis.

8. Octavò, cum junguntur, quæ seorsim prædicantur; aut cùm dividuntur, quæ prædicantur conjunctim; ut, *Hic canis est pater: Hic canis est tuus: Ergò est pater tuus.* Hæc est fallacia compositionis. Item, *Mycillus est bonus sutor; Ergò est bonus.* Hæc est fallacia divisionis. Potest etiam hæc fallacia revocari ad fallaciam à dicto simpliciter ad dictum secundum quid, aut contrá. Nihil enim vetat in eadem captione plures fallaciarum causas concurrere.

X. *Sophisma accentûs sive prosodiæ est, quod oritur ex scribendi pronunciandæve modo: sive, in quo pronunciantur eodem modo, quæ diversimodè scribuntur, aut pronunciantur diversimodè quæ scribuntur eodem modo.*

XI. *Hoc sophisma solvitur, cùm ostenditur, aut eodem modo pronunciari, quæ scribuntur diversimodè; aut pronunciari diversimodè, quæ scribuntur eodem modo.*

I. ¶ Vocabulum *prosodiæ sive accentûs*, hoc loco generatim usurpatur pro omni vocis varietate. Captiones hujus loci sunt duorum generum, ut ex proposita definitione perspicitur. Captiones primi generis sunt, in quibus scriptiois discrimen dissimulatur similitudine pronunciationis. Illud sit trifarium: vel enim pronunciantur eodem modo, quæ literis variant, vel quæ aspiratione differunt, vel quæ notis accentuum distinguuntur. Ex gr. *Omnis equus est bestia: Omnis justus*

justus est aquus : Ergò *omnis iustus est bestia*. Vel, *Quod incipit à se, non incipit à proximo*: *Charitas incipit à C* : Ergò *charitas non incipit à proximo*. Hæ captiones sunt in literis. Porro, *Omnis ara est in templo* : *Stabulum porcorum est bara*: Ergò *stabulum porcorum est in templo*. Hæc captio consistit in aspiratione. Denique, si quis confundat *amare* verbum, cum adverbio *amarè*, captio erit in notis accentuum. Hujusmodi captiones sunt in Græca lingua frequentissimæ, postquam ceperunt aspirationum & accentuum notæ vocibus adscribi; ut si quis confundat *ἀδω cano*, cum *ἀδω placeo*; *ἐκτος sextus*, cum *ἐκτος extra*; *Θεά Dea*, cum *Θέα spectaculum*, &c. Antequam notæ aspirationum aut accentuum in usu essent, pertinebant ejusmodi captiones ad secundum genus.

2. Captiones secundi generis committuntur duobus modis : Primò, cum, quæ ironicè scripta sunt, accipiuntur quasi seria ; aut contrà: veluti si quis servus ab irato hero laudari se putet, scribente, *Heus bone vir, curasti probè* ! Secundò, cum voces penultimâ longâ, accipiuntur ac si essent penultimâ brevi ; veluti si quis *leporem* confundat cum *lepore*. Hæc fallacia se porrigebat olim ad omnes voces solâ quantitate differentes (quales sunt *malum* cum sumitur pro fructu, & *malum* cum opponitur bono ; *populus* cum sumitur pro arbore, & *populus* cum sumitur pro hominum societate) quia veteres observabant discrimen quantitatis in cujuslibet syllabæ pronunciatione ; cum id hodie solùm in penultima syllaba observetur.

XII. *Sophisma πικρόν τὸ ὅμοιον τῆς λέξεως*, propter figuram dictionis est, in quo ex dictionum similitudine, colligitur eadem iis accidentia, aut etiam significationem convenire.

XIII. Hoc *sophisma* solvitur ostensâ diversitate accidentium, aut significationis, in vocabulis similibus.

I. S. Aristoteles ait *sophisma* à figura dictionis contingere, *ὅταν τὸ μὴ ταυτὸν ὡς αὐτὸς ἐρμὴν εὖται*, hoc est, quando, quis, quod idem non est, interpretatur eodem modo ; ejusq; duos facit modos : Prior est. cum propter similem terminationem, judicamus genus, aliâque vocabulorum accidentia Grammatica, esse eadem. Ut si quis colligat *Poeta* esse fœminini generis, quia *noxa* est fœminini generis ; aut *Glycerium* esse

neutrius generis, quia *delirium* est neutrius generis. Alter modus est, cum propter similem terminationem vocabulorum, judicamus res significatas esse ejusdem significationis aut categoriæ. Ut si quis diceret, *Urere, verberare, movere*, sunt actiones; ergo & *ardere, vapulare, quiescere*: aut *ingratitudo* est qualitas, ergo & *longitudo*.

2. Huc pertinent sophismata, in quibus vocabula perpetuam junguntur cum nominibus, pronominiis, aut adverbis relationis, *qualis, quantus, qui, quæ, quod, ubi, quando, quot, quoties*, &c. ut, *Quod emptum est in macello, id appositum tibi est in cæna: Carnes crudæ emptæ sunt in macello: Ergo carnes crudæ tibi appositæ sunt in cæna.* Hic fallacia in eo sita est, quod in minore assumatur qualitas cum substantia, cum quod ad solam rei substantiam referatur, non ad qualitatem. Item, *Quot digitos habet infans, totidem habet senex: Infans habet decem digitos exiguos: Ergo senex habet decem digitos exiguos.* Hic fallacia est, quia in minore assumitur quantitas continua cum discreta, cum quot referatur ad solam quantitatem discretam. Item, *Quod ego sum, tu non es: Ego sum homo: Ergo tu non es homo.* Hic fallacia est, quia in minore assumitur species, cum quod in majori denotet individuum. Et sic de cæteris.

C A P. XXVII.

De Sophismatibus sive fallaciis in rebus.

THEOREMA I.

Sophismatum quæ in rebus consistunt, sunt septem loci: accidens, dictum simpliciter & dictum secundum quid, ignorantia elenchi, consequens, petitio ejus quod in quæstione est, non causa pro causa, & multiplex interrogatio.

II. *Sophisma accidentis* est, cum colligitur subjecto convenire quicquid de prædicato dicitur.

III. *Hoc sophisma solvitur*, cum ostenditur, id quod de subjecto colligitur, per accidens de prædicato dici, aut ipsum prædicatum per accidens dici de subjecto.

I. Aristoteles ait sophismata sive paralogismos παραλογισμοί.

συμπεσνχός, ἔστι δ' αὖτ' οὐμός; ὁπῶν ἀξιοῦν τῷ πρᾶγματι,
 καὶ τῷ συμπεσνχόν ὑπάρχει. Hoc est, cum quidvis postula-
 tum fuerit æquè rei, atque accidenti inesse; hoc est, cum, quòd
 de prædicato dicitur, colligitur de subiecto. Ut hæc definitio
 intelligatur, notanda est regula Aristotelis, quæ exstat cap. 3.
 lib. Categ. Cum alterum alteri attribuitur tanquam subiecto,
 quacunque de attributo dicuntur, eadem dicuntur de subiecto.
 Hæc regula tum fallit, cum aliquid de attributo dicitur per
 accidens, aut cum ipsum attributum per accidens dicitur de
 subiecto suo: indèque struitur caprio accidentis. Id ergò fit
 duobus modis: prior modus est, cum aliquid de attributo di-
 citur per accidens: ut, *Homo est species: Socrates est homo: Er-
 gò Socrates est species.* Hæc fallacia in eo est sita, quòd esse
speciem de homine dicatur per accidens, cum *hominem* esse di-
 catur de Socrate per se. Alter modus est, cum ipsum attribu-
 tum de subiecto dicitur per accidens; ut, *Mus rodit caseum:*
Mus est syllaba: Ergò syllaba rodit caseum. Hic fallacia est,
 quia *rodere caseum* dicitur de mure per se; esse *syllabam*, per
 accidens ac ratione nominis. Utrobique oritur fallacia ex
 mutati vocabuli acceptione, sive genere suppositionis, ut
 Scholastici loquuntur. Nam *homo* in maiore sumitur acce-
 ptione simplici; in minore, acceptione concretâ: & *mus* su-
 mitur in maiore formaliter, sive pro re significata; in minore
 materialiter, sive pro ipsa voce.

IV. *Sophisma à dicto simpliciter* est, cum ex eo quod sim-
 pliciter verum est, colligitur aliquid verum esse secundum
 quid. *Contrà sophisma à dicto secundum quid* est, cum ex eo
 quod secundum quid verum est, colligitur aliquid simpliciter
 verum esse.

V. Hoc *sophisma solvitur* ostenso discrimine ejus, quod sim-
 pliciter, & quod secundum quid dicitur.

2. ¶ *Dictum simpliciter* vocatur, cujus prædicatum sub-
 jecto convenit quovis respectu, parte, tempore, ac loco, sine
 ulla limitatione. *Dictum secundum quid* appellatur, cujus
 prædicatum subiecto convenit certo respectu, parte, loco, aut
 tempore. Exempla sophisnatis à dicto simpliciter; *Dextra*
non est abscindenda; ergò dextra non est abscindenda, cum eam
invasit gangræna: Homo est mortalis; ergò etiam secundum
animam

*animam mortalis est: Deposuit est reddendum domino re-
poscenti; ergo si gladius apud te depositus est is etiam red-
dendus est domino furioso, si eum repositat. A dicto secun-
dum quid; Hominis anima est immortalis; ergo homo est im-
mortalis: Vinum febricitanti nocet; ergo vinum noxium est:
Mycillus est bonus sutor; ergo est bonus: Homerus est Poeta;
ergo est, &c.*

VI. *Sophisma ab ignoratione elenchi est, cum conclusio vi-
detur contradicere assertioni respondentis, sed non contradicit
propter conditionem aliquam contradictionis omissam.*

VII. *Hoc sophisma solvitur ostendendo, quamnam conditio
contradictionis desideretur,*

1. ¶ *Elenchum esse syllogismum cum contradictione,
cap. 25. diximus. De conditionibus contradictionis egimus
cap. 22. lib. 1. Et si autem omne sophisma peccet ignoracione
elenchi (nam omne sophisma videtur esse elenchus, cum non
sit) specialiter tamen ignoratio elenchi hoc loco dicitur, cum
conclusio alterius assertioni opponitur, omissa aliqua condi-
tione ad legitimam contradictionem requisita. Ex. gr. si quis
probaturus, Christum non esse Dominum Davidis, concluderet,
Christum esse Davidis filium, peccaret ignoracione elenchi,
Dominum enim & filium esse, sunt opposita, si tribuantur a-
licui eodem respectu: at Christo hæc attributa tribuuntur di-
verso respectu; Dominum Davidis esse, secundum divinam na-
turam; filium esse, secundum naturam humanam.*

VIII. *Sophisma ὅτι ἐκ τοῦ αὐτοῦ, sive consequentis, est,
cum aliqua enunciatio ex altera colligitur, ex qua non sequi-
tur.*

IX. *Hoc sophisma solvitur citatâ regulâ in quam ista illa-
tio peccat.*

1. ¶ *Quatuor sunt regulæ, quæ in illatione consequentis
ex antecedente sunt servandæ, quarum una si violetur, nulla
erit consecutio: & si quis ejusmodi illationem admittat,
erit captio sive fallacia consequentis. Prima regula, Univer-
salis affirmans non convertitur simpliciter. Si quis ergo quia
omnis adulatur blandus est, putet omnem blandum esse adulator-
em, decipitur captione consequentis. Secunda regula, Ex u-
niversali affirmante non colligitur universalis negans, nisi per
contra.*

contra positionem. Si quis ergò sic colligat, *Quicquid genitum est, habet principium; ergò quòd non est genitum, ut anima humana, mundus, &c. id non habet principium* committit fallaciam consequentis. Sic enim erat inferendum, *Ergò quòd non habet principium, non est genitum*, quæ est conversio per contrapositionem. Tertia regula, *Minor non debet esse negata in primâ figurâ; & quòd eòdem redit, Ex remotione antecedentis non potest colligi remotio consequentis*. Quarta regula, *Altera præmissarum debet esse negata in secundâ figurâ; & quòd eòdem redit, Non debet positio antecedentis colligi ex positione consequentis*. Ejusmodi ergò syllogismi sunt paralogismi, *Omnis homo est animal: Equus non est homo: Ergò equus non est animal*. Vel sic, *Si equus est homo, est animal: Sed non est homo: Ergò non est animal*. Item, *Omnis adulator est blandus, Crispus est blandus: Ergò Crispus est adulator*. Vel sic, *Si Crispus est adulator, debet esse blandus: Sed est blandus: Ergò est adulator*. Si quis ergò ejusmodi paralogismis decipitur aut à seipso, quòd sæpe contingit, aut ab aliis, est fallacia consequentis.

2. Verùm quia vitium falsæ consequentiæ in ejusmodi syllogismis apertum est, sophistæ solent illud occultare, vel alterius præmissæ suppressione; ut, *Crispus est blandus; ergò est adulator: Noctu obambulat; ergò est fur: vel ambagibus verborum; ut, Qui dicit te esse animal, dicit verum: Qui dicit te esse asinum, dicit te esse animal: Ergò qui dicit te esse asinum, dicit verum*. Hæc enim argumentatio perinde se habet, ac si sic strueretur, *Tu es animal: Asinus est animal: Ergò tu es asinus*. Quæ est argumentatio ex duabus affirmantibus in secundâ figurâ.

X. Sophisma *ἡ ἀπὸ τοῦ ἐν ἀρχῇ λαμβάνειν*, hoc est, quia sumitur quòd ab initio quæsitum fuit, dicitur, cùm aliquid probatur per seipsum, aut per aliud quòd æquè ignotum est.

XI. Hoc sophisma solvitur ostendendo medium non esse diversum à quæstione, aut saltem non esse quæstione notius.

1. ¶ Hoc sophisma vulgò dicitur petitio principii, cùm sit petitio ejus quòd in principio quæsitum fuit. Captiones hujus loci struuntur bifariam: primum, cùm idem probatur per seipsum: secundò, cum ignotum probatur per æquè igno-

tum. Idem per seipsum probari dicitur, cum subjectum aut prædicatum quæstionis, mutato nomine, adhibetur tanquam medium ad quæstionem probandam. Ut, si quis probet, *Animam humanam esse ex traduce, quia generatur ex semine parentum.* Dixi, subjectum aut prædicatum quæstionis adhiberi *mutato nomine.* Nam si nè nomen quidem mutaretur, argumentatio esset nugatoria, & merus *νοησιμὸς*. Non tamen quælibet argumentatio, in qua medium idem est cum subjecto aut prædicato quæstionis, ut sophisma rejicienda est, sed ea tantum, cujus medium non solum reipsa ac naturâ suâ quæstioni idem est, sed etiam quoad nos: qualis est illa, quam paulò antè proposuimus. At si medium suâ naturâ idem sit quæstioni, & non etiam quoad nos, sive quoad nostrum concipiendi modum, argumentatio rejicienda non est: nisi quis putet, omnia argumenta quæ petuntur ex locis essentialibus, generis, speciei, definitionis, totius, partis, efficere captiosam argumentationem.

2. Alter modus est, cum medium æquè ignotum est ac ipsa quæstio; veluti, si quis probet, *visionem fieri emissione, quia non fit receptione.* Sophisma hoc eò facit, partim ut sophista videatur argumentis abundare; partim ut mutatâ verborum formulâ, speciem probabilitatis suis conciliet enunciatis.

XII. *Sophisma non causæ pro causa est, in quo id quod causa non est, aut causa per accidens, pro causa vera, ac per se obtruditur.*

XIII. *Hoc sophisma solvitur designatione veræ causæ, à quâ effectus per se dependet.*

1. ¶ Caprio non causæ pro causa, vel in syllogismo ducente ad incommodum hæret, vel in syllogismo directo. In syllogismo ducente ad incommodum, cum falsitas illatæ conclusionis imputatur alicui ex præmissis, quæ illius causa non est; veluti, si quis probare volens, *animam humanam mortalem esse*, ita argumentetur, *Omne immortale est æternum: Anima humana est immortalis: Ergo etiam est æterna.* Atqui hæc conclusio falsa est: Falsitatis causa est in minore; quæ erat, *Anima humana est immortalis: Ergo anima humana est mortalis.* Hæc enim argumentatio est sophisma non-causæ pro causa. Ait enim hanc propositionem, *Anima est immortalis, esse causam*
falsæ

falsæ conclusionis; cum sit illa, *Omne immortale est æternum*. In syllogismis directis committitur hæc fallacia, cum causæ per accidens tribuitur, quod non convenit nisi causis per se; ut *Religio excitat bella civilia: Ex lectione sacræ Scripturæ sunt hæreses ortæ: Vinum inebriat, &c.* Ergo religio, lectio sacræ Scripturæ, vinum, non sunt in Reipub. ferenda.

XIV. *Sophisma plurium interrogationum* est, cum duæ pluresve interrogationes ita proponuntur, ut unus speciem præ se ferant.

XV. Hoc *sophisma* solvitur distinctione quæstionum, & responsionis ad singulas seorsum applicatione.

1. ¶ *Sophisma plurium interrogationum* struitur duobus modis: primò, cum duo subjecta, aut duo predicata, vel etiam plura, distinctis nominibus proponuntur; ut, *Estne mundus æternus & perfectus?* Hæc captiosa interrogatio est. Si enim affirmatè respondeas, aggredietur te sophista, ac si concessisses, *mundum esse æternum*: si respondeas negatè, hoc sic excipiet, ac si negares, *mundum esse perfectum*. Secundò struitur fallacia plurium interrogationum in unâ voce: ut, *Desistisne facere adulterium an non? Perdidistisne cornua an non?* Sed de his, quantum satis est, diximus in loco homonymiæ. Atque hætenus de syllogismo.

CAP. XXVIII.

De Methodo.

THEOREMA I.

*Supere*st ordo sive methodus. Methodus est apta dispositio rerum eodẽm pertinentium, ut quàm optimè, facillimèque intelligantur, & memoriæ quàm tenacissimè inhereant.

II. Quod ut fiat, præmittenda sunt, quæ faciunt ad cognitionem sequentium; aut saltem, quæ cæteris faciliùs intelliguntur.

1. ¶ Et si ordo latiùs patet, quàm methodus; cum tamen de disciplinis sermo est, hæc vocabula promiscuè, ac sine discrimine usurpari possunt. Zabarella & Piccolomineus, in his libris, in quibus inter sese acutè de methodi naturâ dispu-

tant, volunt ordinem nihil aliud esse quàm rerum tractanda-
rum nudam dispositionem; methodum esse illationem rei
+ ignotæ ex re cognitâ: ac proinde methodum efficere, ut, quæ
ignota sunt, innotescant; ordinem nullam cognitionem effi-
cere per se, sed tantùm ad id conducere, ut res ignotæ, me-
thodi alicujus beneficio faciliùs meliùsque cognoscantur. Sed
hoc discrimen neque à Philosophis semper servatur (non certè
ab Aristotele, qui passim methodi vocabulum sumit pro di-
spositione doctrinæ, sive pro ipsâ disciplinâ methodicè dispo-
sitâ) neque ratione niti videtur. Instrumenta enim Logica
suis officiis distinguuntur: quare, cùm ignotum ex notis in-
ferre, sit officium syllogismi, perperam illud methodo tribui-
tur, ut methodus est: nisi *methodi* nomine omnia instrumen-
ta Logica complecti velis.

2. Genus methodi *dispositionem* esse dicimus potiùs, quàm
habitum aut *habitum instrumentalem* cum Zabarellâ. Non e-
nim hic spectamus disponendi facultatem, sive peritiâ in ar-
tifice, sed ipsam dispositionem, quæ rebus ab artifice imposita
+ est. Si enim methodus definienda sit *habitus instrumentalis*,
etiam definitio, divisio, & syllogismus eodem genere debent
definiri; cùm eodem modo hæc omnia debeant in Logica
considerari.

3. Differentiam methodi petimus ab objecto, & fine. Ob-
jectum, sive materia in quâ methodus versatur, sunt quælibet
res eodem, hoc est, ad idem subjectum, aut ad eundem finem,
pertinentes. Ad idem subjectum, cùm res tractandæ sunt neces-
sariæ; ad eundem finem, cùm sunt contingentes, & in nostro
arbitrio sitæ.

4. Finis methodi est, ut *intellectui & memoria inserviat*
ad res propositas meliùs faciliùsque percipiendas, fideliusq; cu-
stodiendas. Hoc ut fiat, præmittenda sunt notiora ignotiori-
bus. Notiora dicuntur non ea solùm, quæ conducunt ad co-
gnitionem sequentium, sed etiam, quæ faciliùs cognoscuntur.
+ Aliquid dicitur ad alterius cognitionem conducere, vel quia
medium est, ex quo inferri potest quod ignotum est (sic dicun-
tur principia esse notiora iis, quæ ex principiis fiunt) vel quia
1 tale est, ut aliud sine eo cognosci nequeat (sic animal est no-
2 tius equo, & omnino genus sua specie) vel denique quia non
neces-

necessarium quidem est, sed utile tantum ad aliud cognoscendum: sic dicuntur animalia notiora stirpibus. Licet enim stirpes cognosci possint, animalis naturâ ignoratâ, facilius tamen cognoscuntur, si animalium cognitio præcessit.

III. *Methodus alia est naturalis, alia arbitraria.*

IV. *Methodus naturalis est, in quâ servatur ordo naturæ, & cognitionis nostræ distinctæ.*

1. §. Inter cætera, quæ in doctrina de methodo, sive ordine, controversa sunt, præcipuum est, an methodus didascalica (ea est quam nos naturalem vocamus) sumi debeat à naturâ rerum, an à nostra faciliiori ac meliori cognitione: sive, an in methodo didascalica præmittenda sint, quæ naturâ priora, an ea quæ nobis notiora sunt. Prius tuetur Piccolomineus, cap. 17. & 18. *Introd. & part. 5. Com. pol.* posterius Zabarella, lib. 1. de *Met. cap. 5. & seq. & lib. 1. Apol. cap. 3. & seq.* Ego utrumq; verum esse existimo, & methodum sumendum esse à naturâ, & à nostrâ faciliiori cognitione. Si enim nobis res est cum ejusmodi hominibus, quibus ratio rectè disposita est, methodus ità instituenda est, ut inserviat distinctæ rerum propositarum cognitioni facilius acquirendæ. Jam verò, quæ nobis notiora sunt quoad cognitionem distinctam eadem priora sunt natura. Cognitio enim distincta est, quæ rebus ipsi respondet, & ordini naturæ. Res enim ipsæ sunt mensura cognitionis nostræ, unaquæque res *ὡς ἐχεν τὸ εἶναι*, & τὸ ὄν, ὡς ἀληθεύει, hoc est, ità se habet ad veritatem, ut se habet ad esse suum; ut dicitur lib. 1, *Met. min. c. 2.* Ambo igitur, Piccolomineus & Zabarella, videntur errasse in eo, quod putarint, aliquid altero interdum notius esse nobis quoad cognitionem distinctam, quod non est naturâ prius; vel etiam, quod est posterius. Hæc hypothesis haud dubiè falsa est. Si tamen ea vera foret, hoc est, si aliquid altero prius esset suâ naturâ, quod nobis foret ignotius quoad cognitionem distinctam, aut aliquid notius nobis quoad cognitionem distinctam; quod foret naturâ posterius; methodus, ex Zabarellæ sententiâ instituenda foret secundum ordinem cognitionis nostræ, non, ut Piccolomineus censet, secundum ordinem naturæ.

V. *In methodo naturali omnes partes debent esse homogeneæ.*

1. ¶ Hæc lege non id solum sancitur, ut disciplinæ non commisceantur, utque in Mathematicis non tradantur Ethica, aut in Ethicis Mathematica; sed hoc quoque, ut unumquodque tradatur loco suo, sitque, quæ cum genere recipiatur, generi; quæ cum specie, speciei tribuantur; atque ita omnia sint, quoad fieri potest, reciproca.

2. Hæc lex exigenda quidem est in ipsis præceptis, quæ spectant ad disciplinarum essentiam; non verò in commentariis, quibus præcepta disciplinarum explicantur ac confirmantur. Sæpe enim faciendum est præceptoribus, ut physicam tractanti, aliquid ex Logicis repetat, aut tractanti Ethicam, ex Physicis. Quin Theologia, aliæque disciplinæ omnes, quàm multa necesse habent petere ex Philosophia ad suarum controversiarum explicationem, quæ tamen partem istarum disciplinarum non constituunt? Hæc si considerasset censor ille Aristotelis, æquius haud dubiè de tam eximii Philosophi scriptis ac methodo judicasset: in quibus præcepta non distinguit à præceptorum commentariis, quod vel imprimis facere debuerat.

VI. *Methodus naturalis semper debet progredi ab universalibus ad particulariora; in eoque progressu partes omnes aptis transitionum vinculis connectendæ sunt.*

1. ¶ *Ab universalibus*] nimirum, quia universalia non solum notiora sunt particularioribus quoad cognitionem distinctam, sed etiam faciunt ad distinctam cognitionem particularium acquirendam; quandoquidem in eorum definitione continentur. Progressus ab universalibus ad particularia fit per divisionem. Partes ejusdem divisionis apta transitione connectendæ sunt. Hæc connexio consistit in hac aut simili forma; *Atque hæc de hac re dicta sufficiant, sequitur ex ordine instituto, &c.* quæ formulæ legentis memoriam, incredibile dictu, quantum juvant.

VII. *Methodus naturalis, vel est totalis, vel partialis.*

VIII. *Methodus totalis est, quæ disponitur integra aliqua disciplina:*

IX. *Estque vel synthetica, vel analytica.*

X. *Methodus synthetica est, quæ progreditur à principiis simplicissimis ad ea, quæ ex istis principiis componuntur.*

XI. *Hæc*

XI. *Hâc methodo traduntur disciplinæ speculativæ.*

XII. *Methodus analytica est, quæ factò initio à fine, progreditur ad media proxima, & ab his ad alia remotiora, donec ventum est ad prima ac simplicissima.*

XIII. *Hâc methodo traduntur artes & disciplinæ practicæ.*

1. ¶ Disciplinæ speculativæ non habet finem à se diversum, sed ipsa rerum propositarum cognitio ipsis finis est. In ea enim acquiescit animus. At artes & disciplinæ practicæ non acquiescunt in cognitione rerum propositarum, sed finem habent ulteriorem, nempe opus aliquod, aut *œconomia* sive operationem cum cognitione consentientem. Unde sequitur, disciplinas theoreticas, quales sunt Physica, Metaphysica, & Mathematica, disponendas esse methodo syntheticâ, progrediente à primis rerum principiis, ad ea, quæ ex istis principiis conficiuntur. Sic in Physicis agitur primò de principiis rerum naturalium; deinde de iis, quæ ex principiis fiunt: idque primò in genere, deinde in specie, donec ad species infimas perventum est. At in artibus, quales sunt Grammatica, Rhetorica, Logica, Medicina; Architectonica; item in disciplinis practicis, ut in Ethica, Politica, Oeconomica, progrediendum est à fine ad media. Nam quod nobis primum est in rerum effectione, id ultimum est in destinatione sive intentione; & vice versâ. Quare cùm dictæ disciplinæ progrediantur à mediis ad finem in effectione (nam architectus primùm jact fundamenta, præparat trabes, tigna, columnas, &c. atque ex iis efficit domum) sequitur, ut in destinatione, finis primum locum teneat, & ex mediis, ea finem propiùs sequantur, quæ posteriùs efficiuntur. Nam disciplinæ non effectione, sed destinationis ordinem servare debent. Quia destinatio nihil aliud est, quàm ipsa practica rerum propositarum cognitio. Et certè finis in practicis ità se habet ad media, ut hypothesis sive principia se habent in Mathematicis ad conclusiones, quæ ex illis colliguntur; ut ait Aristoteles *lib. 7. Ethic. 8.*

2. In utrâque methodo servatur ordo naturæ: in syntheticâ, ordo naturæ generantis sive efficientis; in analyticâ, ordo naturæ intendentis sive destinantis. Errat ergò Piccolominius, *cap. 21. Introd. & part. 7. Com. polit.* qui, etsi fateatur

methodum syntheticam aptiorem esse disciplinis speculativis; analyticam, artibus & disciplinis practicis; contendit tamen omnes disciplinas utrâque methodo conscribi posse; & in decem gradibus Philosophiæ moralis, syntheticam servavit; sed instituto non admodum felici: Ut satis solidè ostensum est à Zabarellâ, *lib. 2. Apol. suæ cap. 4. & seq.*

3. Galenus tres species methodi enumerat; & duabus speciebus explicatis, tertiâ addit, nempe methodum definitivam. Sed nihil necesse est, imò verò fieri non potest, ut alia methodus servetur in disciplinis, præter syntheticam & analyticam. Definitio enim non tam est methodus, quàm methodi instrumentum aut pars. Omnis enim methodus initium sumit à definitione totius alicujus, & factâ divisione progreditur ad partes, aut ad species sub illo toto contentas. Plura vide adversus Galenum de definitivâ methodo disputata apud Zabarellam, *lib. 2. de Meth. cap. 4.*

XIV. *Methodus partialis est; quâ pars aliqua disciplinæ disponitur, aut aliquod thema seorsum tractatur.*

1. ¶ Methodi enim partialis usus aut consideratio duplex est: vel enim considerari potest, ut est pars totalis methodi, vel ut est methodus alicujus thematis seorsum ac per se considerati, sine relatione ad methodum aliquam totalem. De methodo partiali, quatenus est pars methodi totius, hoc unum præcipiendum est, (præter ea, quæ de methodo in genere diximus) sæpe evenire, ut in aliqua disciplinæ parte, quæ tota disponitur methodo syntheticâ, servetur ordo analyticus; aut contrâ, ut in partibus methodi analyticæ, servetur ordo syntheticus. Ex.gr. Physica disponitur ordine synthetico, si tota consideretur: attamen in ea parte, ubi agitur de corpore animato aptè servari potest ordo resolutivus, factò initio ab operationibus, quæ sunt corporis animati finis, indeque progrediendo ad causas & principia, quæ sunt animæ facultates, temperamentum partes corporis animalis organicæ, &c. Similiter, Medicina, Grammatica, Logica, si totæ spectentur, traduntur methodo analyticâ; cum tamen in partibus servetur ordo syntheticus. Nam Physiologia, quæ pars est Medicinæ, traditur ordine synthetico: & in Grammaticâ prius agitur de literis, ac syllabis, deinde de dictione, ac tandem de oratione ejusque

vis;
men
de-
sed
st à

ejusq; structura. Sic in Logicâ agitur prius de themate simplici, deinde de complexo: quod certè est *συνθετικόν*, hoc est, *componere*, sive progredi ordine compositivo. Quatenus tamen Medicina, Grammatica, & Logica inchoantur à notione finis, indeque progrediuntur ad media, dicuntur totæ disponi ordine analytico, ut rectè observavit Zab. *lib. 2. de Meth. cap. 20.*

pe-
iti-
ilia
ly-
no-
um
re-
vi-
ud

2. Themata, quæ seorsum tractari possunt, vel sunt simplicia, vel complexa: utrobique opus est methodo. Themata simplicia tractantur hâc methodo; Primò expendendum est nomen propositi thematis, in eoque investiganda etymologia, discutienda homonymia, atque explicanda vocabula synonyma, vel in eâdem, vel in aliis linguis, inter doctos usitatis, præsertim in Latinâ, Græcâ & Hebræâ, si aliquid scilicet conferunt ad propositi thematis explicationem. Post nominis examen, proponendum est thematis propositi genus proximum, & causæ; & si thema sit accidens, etiam subjectum & objectum: atque ex his contexenda est definitio. Definitioni subjicienda sunt adjuncta, (præcipuè quidem propria; sed tamen interdum etiam communia) effecta, similia, dissimilia, ac tandem opposita. Postremò addenda est thematis divisio vel in species, vel in partes integrantes, si id instituti ratio requirit: & species deinde, aut partes, eodem modo tractandæ sunt.

ex
el
e-
-
-
a
t
-
a
-
-

3. Sunt, qui primo loco tradunt definitionem, eamque deinde resolvunt. Et in hac resolutione primò expendunt nomen definiti thematis, eo, quo dictum est, modo: deinde explicant genus & differentiam, quibus definitio constat, & ex differentiâ eliciunt causas, subjectum & objectum, quantum scilicet ea necessaria sunt ad propositi thematis notitiam. addunt adjuncta, effecta, &c. Prior methodus similis est *synthetica*: posterior, *analytica*. In utraque apprimè observandum est, nè quid temerè adhibeatur ad explicationem speciei, quod pertinet ad explicandum genus.

4. Thema complexum tractatur hâc methodo; Primò status controversiæ rectè constituendus est, deinde propria sententia confirmanda rationibus & testimoniis; & singulis argumentis subjiciendæ sunt refutationes solutionum, & exceptionum, quibus adversarii solent argumenta nostra eludere. Deniq; adversarii quoq; argumenta proponenda sunt, & cum omni-

omnibus munimentis refellenda. Sed de tractione thematis simplicis & complexi plura dicenda sunt in doctrina de usu & praxi Logicæ. Atque hæc de methodo naturali sive didascalica.

XV. *Methodus arbitraria est, quæ, relicto ordine naturæ, accommodata est ad cognitionem confusam, sive ad captum vulgi, vel ad persuadendum, aut delectandum.*

1. ¶ Si nobis docendi sunt homines *ἡ δὲ διὰ τοῦτο τὴν διδασκαλίαν*, hoc est, *qui mentem habent bene dispositam*, utendum est haud dubiè methodo naturali. Sed si nobis res est cum vulgo, & cum hominibus qui sensum habent exercitatio- rem quàm intellectum, consulendum est illorum captui; & priori loco tradenda sunt, non quæ naturâ priora sunt, & simplici- ter, sive quoad cognitionem distinctam, notiora; sed quæ illis notiora sunt.

2. Eâ methodo utuntur Oratores & Poetæ, quibus præ- ter docendi institutum, propositum est, ut auditorem, lecto- rémve moveant, atque oblectent, eique persuadeant, quod à suâ opinione sæpe alienum est. Hos fines non faciliè assequun- tur, nisi quâdam crypsi auditorem lectorémve decipiant. Hæc crypsis consistit in omissione, additione, & inversione. Omit- tunt enim Oratores, quæcunque sibi nocitura sunt, aut tædi- um paritura auditoribus, etiamsi maximè ad causam videan- tur pertinere: qualia sunt inter cætera, partes argumentatio- num infirmæ, accuratæ definitiones, partitiones, transitiones, &c. Adhibent etiam digressiones, quæ etsi ad causæ contentio- nem non adeò pertineant, faciunt tamen ad auditorem refi- ciendum, & detinendum. Denique probationes miro artificio inver- tunt, nè ars ab auditore animadversa, suspecta sit, ejusque assensum impediat.

FINIS.

Series institutionum Logicarum per
tabulas disposita.

TABULA PRIMA.

Logice partes due sunt, cap. 1.	Prior Thomastica, quæ agit de Themate ; vel	Simplici, quod vel universale, vel singulare, cap. 2. In quo spectandæ	Categoriæ	In genere, cap. 3.	Substantia, cap. 4. Quantitas, cap. 5. Qualitas, cap. 6. Relatio, cap. 7.
				In specie	Actio, } cap. 8. Passio, } Ubi, } Quando, } cap. 9. Situs, } Habitus, }
		Complexo, tab. 6.	Simplices,	Prædicabilia	In genere, cap. 10.
				In specie	Genus, } c. 11. Species, } Differentia, c. 12. Proprium, } c. 13. Accidens, }
			Affectiones	Totum & pars, c. 14.	Constituens, five universale.
	Posterior Organica, tab. 8.			Per se	Constitutum } Definitum, si- ve formale. } Compositum, } five essentielle } Integratum } Homo- geneum. } Hetero- geneum }
					Per accidens.
					Causa & causatum, tab. 2.
					Subiectum & adjunctum, tab. 3.
				Coniunctæ, tab. 4.	
				Interpretatio, tab. 5.	

TABULA SECUNDA.


In genere, cap. 15.

Causa consideratur vel

In specie ; Et que vel

Materia; eâ que vel	I.	Prima,	cap. 16.
	II.	Secunda.	
	III.	Naturalium, Artificialium.	
Forma; eâque vel	I.	Generationis,	cap. 16.
	II.	Compositionis.	
	III.	Materialis,	
	IIII.	Immaterialis.	
Efficiens; eâque vel	I.	Substantialis,	cap. 17.
	II.	Accidentalis.	
	III.	Naturalis,	
	IIII.	Artificialis.	
	I.	Principalis,	
	II.	Disponens.	
	III.	Activa,	
	IIII.	Emanativa.	
Finis; is que vel	I.	Immanens,	cap. 18.
	II.	Transiens.	
	III.	Libera,	
	IIII.	Necessaria.	
	V.	Per se,	
	VI.	Per accidens.	
	VII.	Principalis,	
	VIII.	Minus prin- cipalis.	
	I.	Prima,	cap. 18.
	II.	Secunda.	
	III.	Universalis,	
	I.	Particularis.	cap. 18.
	II.	Proxima,	
	III.	Remota.	
	I.	Qui,	cap. 18.
	II.	Cujus.	
	III.	Principalis,	
	I.	Secundarius.	cap. 18.
	II.	Subordinatus,	
	I.	Ultimus.	cap. 18.
	II.		

TABULA TERTIA.



TABULA QUARTA.

Affectiones conjunctæ sunt	Convenientia, cap. 20.	Simplex,	Essentialis, sive Identitas,	Subordinatorum,	Coordinatorum	Numerica,
			Accidental			Specifica,
	Diversitas eaq; cap. 21.	I.	Analogica.	Interna,	Paritas,	Generica,
			Realis,	Externa.		
			Modalis,			
	Oppositio; sæque	II.	Rationis.	Subordinata,	Numerica,	
			Essentialis,	Coordinata,		Specifica,
	Ordo: in quo spectatur, cap. 23.	Prior Posterior	Accidentalis,	Interna,	Imparitas,	Generica.
				Externa.		Dissemblitudo.
			Disparata, Contraria, Relativa, Privativa, Contradictoria.	cap. 12.		
	Simul; cujus modi notissimi sunt, simul	I.	Tempore,	Causalitate,	Existendi consecutione.	
			Natura,			
	Simul; cujus modi notissimi sunt, simul	III.	Dispositione,	Tempore,	Natura.	
			Dignitate,			
			Cognitione.			

TABULA QUINTA.

In Interpretatione spectanda sunt	Species,	{	Simplex,	{	Nomen,	{	cap. 24.	
			Verbum,					
			Composita, sive oratio,					
	Affectiones,	{	I.	Etymologia,	{	cap. 25.		
				Conjugatio,				
				Synonymia,				
				Homonymia,			{	Ob Tropum,
				cap. 26.				
	I.	{	à casu,	{	Ob Tropum,			
			à consilio,			{	Ob inæqualitatem generis.	
Acceptio, sive suppositio.			TABU.					

TABULA SEXTA.

In Themate complexo, seu Enunciatione, Spectandæ	Species, quæ sunt	Primò	Simplex,	Copulativa,	cap. 27.
			Composita,	Hypothetica, Disjunctiva, Adversativa, Relativa,	
	Affectiones, tab. 7.		Secundò	Pura,	cap. 28.
				Modalis,	
				Contingens, Necessè, Impossibile, Possibile,	

TABULA SEPTIMA.

Affectiones thematis complexi vel sunt	Absolute, eaeque vel	Quantitas, cujus ratione dicitur enunciatio,	Universalis, Particularis, Singularis, Indefinita;			cap. 29.
	Qualitas, cujus ratione dicitur enunciatio	Primò	Affirmans,	utraque	Finita,	cap. 30.
			Negans,		Infinita,	
		Secundo	Vera,	Necessaria,	Universaliter prima,	cap. 31.
				Contingens,		
		Falsa,	cap. 31.			
	Relative	Conversio,	Simplex,			cap. 32.
			Per accidens,			
			Per contrapositionem.			
			Æquipollentia, Subalternatio,			
	Oppositio	Vera	Contrarietas, Contradictio,		cap. 33.	
		Apparens,	Subcontrarietas, Oppositio indefinita,			

TABULA OCTAVA.

Pars organica agit de instrumentis Logicis, quæ sunt

I. Definitio ; cujus spectanda sunt	Species	Definitio Nominis, cap. 1. lib. 1.		
		Definitio Rei	Perfecta ;	Leges.
			in quâ spectanda	Par- Genus. tes { Differentia } c.
			Imperfecta, cap. 3.	
			Modus cam. investigandi, cap. 4.	

II. Divisio ; cujus spectanda sunt	Species	Divisio Nominis,		
		Divisio Rei	Universalis,	cap. 5.
			Formalis,	
			Essentialis,	
			Integralis.	
			Per accidens.	
			Leges.	

III. Syllogismus ; qui consideratur vel ratione	Formæ ubi agitur	De genesi, in quâ spectanda	1. Definitio & partes syllogismi, cap. 6.	
			2. Figura & modi c. 7.	
			3. Axiomata, regula & proprietates, cap. 8.	
			4. Reductio, cap. 9.	
			De euporia, sive de ratione invenienti medii accommodata ad figuras & modos, cap. 10.	
			De speciebus Syllogismorum, tab. 9.	
			Materia, tab. 10.	

IV. Me- thodus; eâque vel	{	Naturalis	{	Tota-	{	Synthetica,	{	cap. 28.	
				lis		Analytica.			
				{	Partialis, eâq;	{			Simplicis,
					vel thematis				Complexi.
					Arbitraria.				

TABULA NONA.

Syllogismus quintupliciter dividitur in Species.

I.	{ Syllogismus strictè dictus, Inductio.	}	cap. 11.	
II.	{ Perfectus, Imperfectus, { Enthymema, Exemplum.			
III.	{ Simplex, Compositus,	{ Ex compositis enunciationi bus Ex pluribus syllogismis,	{ Hypotheti- cus, Disjuncti- vus. Relati us. Dilemma, Prosylla- gismus, Sorites.	{ cap. 12. cap. 13.
	IV.			
V.	{ Directus, Indirectus.	{ cap. 14.		

T

TABU-

TABULA DECIMA.

Syllogismus ratione materiae, vel ess	Verus; iſque vel	Dialecticus, in quo ſpectanda	Proble- mata Propoſitiones.	Realia Notionalia,	Absoluta, Comparata.	cap. 15.
			Inventio argumen- torum quò ſpectant	Locī, cap. 16. Canones Absoluti, pertinen- tes ad lo- cos	Conſentaneos, 17. Dissentaneos Comparatos } Teſtimonia } Comparati, cap. 19.	cap 18.
	Falsus	Demonſtratio	τὴν δὲ in qua ſpe- ctanda	Precognitiones, cap. 20. conditio- nes perti- nentes ad	Concluſionem, Medium, prin- cipia } Axiomata } Theſes, }	cap. 21. cap 22.
			τὴν ὅτι	Ab effectu, ubi de regressu, A Cauſa remota,		cap. 23.
Sophisma	In voce,	Pseudographema, cap. 25.		Homonymia, Amphibolia, Compoſitio, Diviſio, Accentus, Figura diſtinctionis, Accidens, Diſtum ſimpliciter & ſe- cundum quid, Ignoratio elenchi, Conſequens, Petitio quaſtionis, Non cauſa ut cauſa, Multiplex interrogatio,		cap. 26.
	In re,					cap. 27.

FINIS.

I

Institutionum Logicarum SYNOPSIS, *sive* Rudimenta Logica.

In quibus præcipuè definitiones, divisiones, & regulæ, ad
artem Logicam pertinentes, per quæstiones & respon-
siones, breviter & dilucidè proponuntur.

Capita respondent capitibus Institutionum Logicarum.

LIBER PRIMUS.

CAP. I.

Unde dicta est Logica?



Voce λογική, quæ inter cætera, tum *rationem*
tum *orationem* significat. Logica enim dirigit
intellectus nostri rationem, sive conceptus, eos-
que docet aptè *oratione* interpretari.

Quid est Logica?

Logica est ars conficiens instrumenta, iisque dirigens in-
tellectum in cognitione rerum.

Quot sunt partes Logicæ?

Dux: prior agit de thematibus, eorumque variis affectio-
nibus; posterior differit de ipsis instrumentis quibus themata
tractantur, sive quibus intellectus dirigitur, cum in thema-
tum, sive rerum cognitione quærenda versatur.

CAP. II.

Quid est Thema?

THema est, quicquid intellectui cognoscendum proponi
potest.

Quomodo dividitur Thema?

In simplex & complexum.

Quid est Thema simplex?

Quod sine notionum complexione, sive sine affirmatione

aut negatione, apprehenditur ; ut, *Socrates, disputat, et publica, hircoceruus.*

Quid complexum ?

Quod apprehenditur duabus, pluribusve notionibus, affirmatione aut negatione copulatis ; ut, *Socrates disputat : Nitgit, pluit, nititur, statuit.*

Quotuplex est thema simplex ?

Duplex ; universale, & singulare.

Quid est universale ?

Universale est, quod de pluribus suapte naturâ prædicari aptum est ; ut, *homo, equus, planta.*

Quid singulare ?

Quod de uno tantum suapte naturâ prædicari aptum est ; ut, *Alexander, Bucephalus, hæc pyrus.*

Quomodo vocantur singularia !

Individua.

Quare ?

Quia dividi non possunt in plura ejusdem nominis ac naturæ. Alexander enim dividi non potest in plures Alexandros, nec Bucephalus in plures Bucephalos : at homo dividi potest in plures homines ; puta, in Socratem & Platonem ; & equus in plures equos, puta, in Bucephalum, & Cyllarum, &c.

Quotuplicia sunt individua ?

Duplicia ; determinata & vaga.

Quot modis determinantur individua ?

Quatuor modis : 1, nomine proprio ; ut, *Plato, Socrates, Bucephalus, Melampus.* 2, nomine communi sive appellativo, quod per excellentiam sumitur pro proprio ; ut, *Philosophus* pro *Aristotele*, *Orator* pro *Cicerone.* 3, pronomine demonstrativo ; ut *hic, ille homo.* 4, periphrasi ; ut, *Apostolus gentium*, id est, *Paulus.*

Quid est individuum vagum ?

Quod effertur pronomine incertæ partis ; ut, *aliquis quidam homo.*

C A P. III.

Quæ sunt spectanda in themate simplici ?

Primò, categoriæ, & affectiones, quæ ex variâ rerum habitudine ad se invicem, & ex modo quo intellectus eas concipit, atque inter sese comparat, oriuntur : deinde, interpretatio, & affectiones, quas intellectus vocabulis affingit ex modo conceptus suos interpretandi.

Quid est categoria ?

Categoria est series rerum sub eodem summo genere gradatim dispositarum.

Quot sunt categoriæ ?

Decem : substantia, quantitas, qualitas, relatio, actio, passio, ubi, quando, situs, & habitus.

C A P. IV.

Quid est substantia ?

Substantia est res per se subsistens, & subsistans accidentibus ; ut, spiritus, corpus, cælum, ignis, aqua, lapis, arbor, equus, &c.

Quid est per se subsistere ?

Non esse in alio ut in subjecto. Hac enim ratione distinguitur substantia ab accidentibus, utpote quæ semper alicui subjecto inhærent : quorum adeò esse nihil aliud est quam inesse.

Quid est esse in subjecto ?

Esse in subjecto dicitur, quod cum in alio sit, non ut pars, non potest tamen existerè separatim ab eo in quo est.

Quotuplex est substantia ?

Duplex ; prima & secunda.

Quid est substantia prima ?

Substantia singularis ; ut, Alexander, Bucephalus.

Quid secunda ?

Substantia universalis ; ut, homo, equus.

Quomodo discernis primam substantiam à secundâ ?

Prima substantia non dicitur de subjecto, cum ipsa omnibus subjiçiat. Alexander enim de nullo dicitur, nisi de seipso. At substantia secunda, quamvis in subjecto non sit, dicitur tamen de subjecto, nempe de primis substantiis sibi subjectis. Homo enim dicitur de Alexandro, Socrate, Platone, &c. equus de Bucephalo, Cyllaro, &c.

Quot sunt nota substantiarum?

Sex.

Quæ est prima nota?

Non esse in subiecto : nimirum quia per se subsistit.

Quæ secunda?

Dici de aliis synonymas : hoc est, quoad nomen, & quoad definitionem. Hæc nota convenit secundis substantiis, non primis.

Quæ tertia?

Significare $\tau\omicron$ & π , hoc aliquid, id est, tale quid, quod digito demonstrari potest. Hæc nota convenit potissimum primis substantiis.

Quæ quarta?

Non habere contrarium. Substantia enim substantiæ non est contraria per se, sed per qualitates : ut, *aqua & ignis.*

Quæ quinta?

Non recipere magis & minus. Una enim eadémque substantia non fit magis aut minus substantia, quam erat antea. Nam puer crescens, non fit magis homo, aut magis substantia, quam erat primo natiuitatis suæ momento.

Quæ est sexta nota?

Unam eandémque numero substantiam suscipere contraria. Sic licet aqua frigida, mutatione sui, calida fiat, manet tamen una eadémque numero aqua.

C A P. V.

Quid est quantitas?

Quantitas est accidens, quod per se partem habet extra partem.

Quotuplex est quantitas?

Duplex : continua & discreta.

Quid est quantitas continua?

Cujus partes communi termino copulantur.

Quotuplex est?

Duplex : magnitudo & tempus.

Quid est magnitudo?

Magnitudo est quantitas permanens.

Quot sunt species magnitudinis?

Tres : linea, superficies, & corpus.

Quid

Quid est linea ?

Linea est magnitudo uno modo divisibilis : ut, *uncia, milli-*
are, stadium.

Quid est superficies ?

Superficies est magnitudo duobus modis divisibilis : ut,
jugerum.

Quid corpus ?

Corpus est magnitudo tribus modis divisibilis. Huc perti-
net omnis quantitas substantiæ corporeæ.

Qui sunt termini magnitudinis ?

Termini lineæ sunt puncta : superficiæ, lineæ ; corporis,
superficies.

Quid est tempus ?

Tempus est quantitas fluens : ut, *hora, dies, annus, olympias,*

Qui sunt termini temporis ?

Momenta, sive *τὰ νῦν*. His enim copulantur partes tem-
poris, sicut partes lineæ copulantur punctis.

Quid est quantitas discreta ?

Quantitas discreta est, cujus partes non copulantur com-
muni termino : ut, *duo, tria, decem.*

Quid de loco, oratione, ac motu statuendum ?

Locus definitur *superficies corporis ambientis* : atque haec-
tenus referri debet ad superficiem. Oratio & motus non sunt
species quantitatis, sed quanta per accidens.

Quot sunt notæ quantitatis ?

Tres.

Quæ est prima nota ?

Non habere contrarium.

Quæ secunda ?

Non recipere magis & minus. Quantitas quidem *major* fit,
sed non fit *magis* quantitas.

Quæ tertia ?

Res ab illa dici æquales aut inæquales.

C A P. VI.

Quid est qualitas ?

Qualitas est accidens, à quo subjectum quale duntaxat
denominatur.

Quot sunt species qualitatis?

Quatuor : 1^o, habitus & dispositio ; 2, potentia & impotentia naturalis ; 3, patibilis qualitas & passio ; 4, forma & figura.

Quid est habitus?

Habitus est qualitas adventitia ad operandum cum facilitate.

Quid dispositio?

Dispositio est habitus imperfectus.

Illustra rem exemplo.

Si quis in arte aliqua, scientia, aut virtute, putà Logica, Physica, aut iustitia, aliquantulum profecit, is dispositione affectus est : si quis artis, scientiæ, aut virtutis culmen attingit, is dicitur esse præditus habitu.

Quid est potentia naturalis?

Potentia naturalis est qualitas sensibus non obvia, quâ subiectum naturâ suâ aptum est ad agendum vel patiendum.

Quid impotentia?

Impotentia est diminuta potentia.

Adde exemplum.

ingenium, indoles, memoria, sensus, robur, &c. sunt potentiæ, sive facultates naturales : cum hæc dotes admodum imperfectæ sunt, veluti si quis obtuso sit ingenio, labili memoriâ, infirmâ valetudine, &c. dicuntur impotentia.

Quid est qualitas patibilis?

Patibilis qualitas est, quæ efficit passionem in sensu.

Quid passio?

Passio est patibilis qualitas, quæ subito fit & citò perit.

Da exemplum.

Lux, color, sonus, sapor, odor, calor, frigus, humiditas, siccitas, gravitas, levitas, &c. sunt qualitates patibiles, si aliquandiu permaneant in subiecto : at si citò evanescant, ut, pallor ex metu, rubor ex verecundiâ, dicuntur passionem.

Quid est figura?

Figura est qualitas orta ex terminatione magnitudinis ; ut, triangulum, circulus, sphaera, pyr amis, cylindrus.

Quid est forma?

Forma est figura cum colore ; ut, pulcritudo, deformitas.

Quomodo differt figura & forma à patibili qualitate?

Patibilis qualitas uno tantum ; figura & forma pluribus sensibus percipitur.

Quot

Quot sunt notæ qualitatis ?

Tres.

Quæ est prima nota ?

Habere contrarium. Nam calor frigori, & album nigro contrarium est.

Quæ secunda ?

Recipere magis & minus. Alius enim alio doctior, melior aut prudentior est.

Quæ tertia ?

Res ab illâ dici similes aut dissimiles.

C A P. VII.

Quid sunt relata ?

Relata sunt, quæ id ipsum, quod sunt, aliorum esse dicuntur, vel alio aliquo modo ad aliud referuntur.

Explica definitionem exemplis ?

Pater dicitur filii pater ; dominus, servi dominus ; *Majus*, minore majus ; *simile* simili simile. Hæc enim referuntur ad aliud *hoc quod sunt*, ideòque sunt relata. At *tenebræ* dicuntur quidem *lucis*, verum non dicuntur *lucis tenebræ*, sed *lucis privatio* ; & *Alexander* dicitur quidem *Philipi*, sed non dicitur *Alexander Philippi*, sed *filius*. Hæc ergò dicuntur quidem aliorum, sed non dicuntur aliorum *hoc quod sunt* ; ac proinde non sunt relata.

Quotuplicia sunt relata ?

Duplicia ; alia secundum dici, alia secundum esse.

Quæ vocas relata secundum dici ?

Quæ, cum sint res absolutæ, nomine tenus referuntur ad aliud ; ut, *scientia* & *scibile*, *sensus* & *sensibile*.

Quæ secundum esse ?

Quorum tota essentia consistit in respectu ad aliud ; ut, *pater* & *filius*, *maritus* & *uxor*.

An non aliter etiam dividuntur relata ?

Dividuntur etiam in relata realia, & relata rationis.

Quænam sunt realia ?

Quæ suâ naturâ referuntur ad aliud ; ut, *dominus* & *servus*, *magistratus* & *subditus*.

Quæ rationis ?

Quæ solâ mentis operâ referuntur ad aliud ; ut, *dextrum* & *sinistrum*.

AN

An hæc omnia pertinent ad hanc categoriam?

Non. Nam relata secundum dici, cum habeant essentiam absolutam, sunt aliarum categoriarum.

Quænam sunt in unaquaque relatione consideranda?

Subjectum, fundamentum, terminus, relatum, & correlatum.

Quid est subjectum?

Subjectum est, cui inhæret relatio.

Quid fundamentum?

Fundamentum est, quo mediante relatio inhæret subjecto.

Quid terminus?

Terminus est, cum quo subjectum in relatione comparatur.

Quid est relatum?

Relatum est subjectum cum relatione.

Quid correlatum?

Correlatum est terminus cum relatione opposita.

Illustra hæc omnia exemplis.

In relatione patris ad filium, subjectum est aliquis homo, putà, *Philippus*; fundamentum, *generasse*; terminus, alius homo, putà *Alexander generatus*; relatum, *pater*; correlatum, *filius*. Philippus enim propterea est pater Alexandri, quia Alexandrum generavit. Contrà, in relatione filii ad patrem, subjectum est *Alexander*; fundamentum, *generatum esse*; terminus, *Philippus qui generavit*; relatum, *filius*; correlatum, *pater*.

An relatum & correlatum semper differunt appellatione?

Non semper: sæpe enim idem nomen utriusque est; ut, *amicus, hospes, rivalis*, &c. Atque hæc vocantur relata æquiparantiæ. Cætera, quæ appellatione differunt, ut *dominus & servus, pater & filius*, dicuntur relata disquiparantiæ.

Quot sunt notæ relatorum?

Quinque.

Quæ est prima nota?

Habere contrarium. *Amicus* enim & *inimicus* simile & *dissimile*, contraria sunt.

Quæ secunda?

Recipere magis & minus. Aliud enim alio *similius* est aut *dissimilius* ei cum quo comparatur.

Quæ

Quæ tertia?

Reciprocari. Nam pater est filii pater, & filius vicissim est patris filius.

Quæ quarta?

Esse simul naturâ: nimirum, quatenus relati sunt. Et si enim, qui pater est, prius fuit quàm filius; non tamen prius pater fuit, quàm filium haberet.

Quæ quinta?

Esse simul cognitione. Unum enim relatum nequit sine altero cognosci.

C A P. VIII.

Quid est actio?

Actio est à qua dicimur agere.

Quid est agere?

Agere est aliquid efficere.

Quid est passio?

Passio est à qua dicimur pati.

Quid est pati?

Pati est recipere effectum agentis.

Da exempla.

Generare, augere, calefacere, movere, &c. sunt actiones: generari, augeri, calefieri, moveri, sunt passiones.

Quanam sunt in actionibus spectanda?

Agens, patiens, terminus à quo, & terminus ad quem.

Declara hæc omnia exemplis.

In calefactione, agens est ignis aut sol; patiens, is qui calefit; terminus à quo, frigus; terminus ad quem, calor, à quo calefactio nominata est. Similiter in generatione hominis, agens est pater; patiens, semen; terminus à quo, privatio humanæ formæ in semine, sive, non esse hominem; terminus ad quem, is qui generatur. Nam qui generatur, ex non homine fit homo.

Quot sunt notæ actionis & passionis?

Dux: habere contrarium, & recipere magis & minus. Nam calefactio frigefactioni contraria est; & alia magis, alia minus calefaciunt aut frigefaciunt, calefiunt aut frigefiunt.

CAP. IX.

Quid est ubi ?

Ubi est modus quo res finitæ alicubi esse dicuntur.

Quomodo differt ubi à loco ?

Locus solis corporibus tribuitur, ubi etiam spiritibus. Deinde, *loci* vocabula pertinent ad quæstionem quâ quæritur, *quanta* res sit ; at vocabula hujus categoriæ spectant ad quæstionem quâ quæritur, *ubi* aut *unde* res sit, quâ abiit ; ut, *domi*, *foris*, *ruri*, *in foro*, *in curia*, &c.

Quid est quando ?

Quando est modus quo res finitæ aliquando esse, fuisse, aut fore dicuntur.

Quomodo differt quando à tempore ?

Eodem ferè modo, quo *ubi* à *loco*. Nam *tempus* propriè tribuitur rebus Physicis, quæ in successione consistunt, & mutationibus obnoxie sunt. Quando tribuitur, etiam rebus permanentibus, & momentaneis. Deinde, *temporis* vocabula solvunt quæstiones quæ fiunt per *quamdiu*; vocabula hujus categoriæ solvunt quæstiones quæ fiunt per *quando*; ut, *hodie*, *cras*, *heri*, *æstate*, *vere*, *calendis*, *nonis*, *consule Manlio*, &c.

Quid est situs ?

Situs est ordo partium inter se ; ut, *sedere*, *stare*, *pronus*, *supinus* esse.

Quid est habitus ?

Habitus est modus, quo vestis, aut aliquid instar vestis, corpori circumpositum, appensum, aut alio aliquo modo adjunctum est ; ut, *vestitum*, *armatum*, *togatum*, *galeatum*, *hastatum*, *barbatum*, *tapetibus instratum* esse, &c.

CAP. X.

Atque hæc de *thematum simplicium* categoriis ;

quid porro sequitur ?

Affectiones, quas diximus ex variâ rerum in categoriis dispositarum collatione oriri.

Quotuplices sunt affectiones *thematum simplicium* ?

Duplices ; aliæ sunt simplices, aliæ conjunctæ.

Quas vocas simplices ?

Quæ singulis rebus seorsum conveniunt ; ut, prædicabilia, totum & pars, causa & causatum, subjectum & adjunctum.

Cur

Cur vocas has affectiones simplices ?

Quia, licet genus referatur ad speciem, totum ad partem, causa ad causatum, subjectum ad adjunctum, alterumque sine altero non consistat; unaquæque tamen res seorsum genus, totum, causa, aut subjectum dici potest.

Quid sunt prædicabilia ?

Prædicabilia sunt, quæ de pluribus verè, propriè, naturaliter, atque immediatè affirmantur.

Quot sunt prædicabilia ?

Quinque; genus, species, differentia, proprium, & accidens.

C A P. XI.

Quid est genus ?

Genus est, quod de pluribus specie differentibus prædicatur in quæstione, quâ quæritur quid res sit; ut, *Quid est homo, aut bestia ? Animal. Quid pyrus, aut pomus ? Arbor.*

Quid est species ?

Species est quæ collocatur sub genere, ità ut de ea genus prædicetur in quæstione, quâ quæritur quid sit.

Quotuplex est genus ?

Duplex; summum sive generalissimum, & medium sive subalternum.

Quotuplex est species ?

Item duplex; infima sive specialissima, & media sive subalterna.

Quid est genus summum ?

Quo non est aliud superius genus.

Quid est species infima ?

Quâ non est alia inferior species.

Quid est genus subalternum ?

Quod respectu inferioris, est genus, & respectu superioris, species.

Quid species subalterna ?

Quæ respectu superioris, est species, & respectu inferioris, genus.

Illustra rem exemplo.

In categoria substantiarum, substantia est summum genus; homo, infima species; quæ inter substantiam & hominem interjecta sunt, ut animal, vivens, corpus, sunt genera & species sub-

subalterna. Nam *animal* est *hominis* genus, & species *viventis*; *vivens* est genus *animalis*, & species *corporis*; *corpus* est genus *viventis*, & species *substantiæ*. Eodem modo res se habet in cæteris categoriis.

Quænam species constituit secundum prædicabile?

Infima: species enim subalterna prædicatur ut genus.

Quomodo definitur species specialissima?

Hoc modo; Species est, quæ de pluribus & numero differentibus prædicatur in quæstione, quâ quæritur quid sit res; ut, Quid est Socrates, Plato? Homo. Quid Bucephalus, Cyllarus? Equus. Quid Phylax, Melampus? Canis.

C A P. XII.

Quid est differentia?

Differentia est, quâ res à re differt.

Quotuplex est differentia?

Duplex; accidentalis & essentialis.

Quid est differentia accidentalis?

Quâ res differunt accidentibus: idque vel ab aliis; sic Europæus differt ab Afro, colore; vinum ab aceto, sapore: vel etiam à se invicem; sic doctus differt à seipso indocto, senex à seipso puero.

Quid est differentia essentialis?

Quæ addita generi speciem constituit, & ab oppositis speciebus essentialiter distinguit.

Quænam sunt munera differentię essentialis?

Dividere genera, & speciem cum genere constituere.

Da exemplum.

Facultas ratiocinandi dividit animal, & addita animali constituit hominem.

Quænam differentia constituit tertium prædicabile?

Differentia essentialis: differentię enim accidentales pertinent ad quartum & quintum prædicabile.

Quomodo definitur differentia essentialis?

Hoc modo; Differentia est, quæ de pluribus, vel numero, vel etiam specie differentibus essentialiter prædicatur in quæstione, quâ quæritur quavis sit res; ut, Quale animal est homo? Rationale. Qualis ars est Logica? Quæ instrumenta conficit, iisque dirigit intellectum in cognitione rerum.

CAP. XIII.

Quot modis dicitur proprium?

Quatuor modis. Proprium primo modo dicitur, quod convenit soli alicui speciei, sed non omnibus illius individuis; ut, *hominem esse statuarium*. Secundo modo, quod convenit omnibus individuis alicujus speciei, sed non solis; ut, *hominem esse bipedem*. Tertio modo, quod convenit soli alicui speciei, omnibusque illius individuis, sed non semper; ut, *hominem ridere, aut canescere*. Quarto modo, quod convenit soli alicui speciei omnibusque illius individuis, & semper: ut, *hominem risibilem esse*.

Quanam propria constituunt quantum prædicabile?

Propria quarti modi: reliqua pertinent ad quintum prædicabile.

Quid est proprium quarto modo?

Proprium est, quod non declarat quid res sit, & tamen soli inest, & cum eâ reciprocatur. Sic *risibilitas* recipocatur cum *homine* (omnis enim homo risibilis est, & quicumque risibilis est, etiam est homo) *facultas hinnendi*, cum *equo*; *latrandi*, cum *cane*, &c.

Quid est accidens?

Accidens est quod abest & adest sine subjecti interitu: hoc est, quod sine contradictione de subjecto suo affirmari & negari potest.

Quotuplex est accidens?

Duplex: separabile, & inseparabile.

Quid est accidens separabile?

Quod naturaliter à subjecto suo separari potest: ut, *stare, sedere, sanitas, eruditio*, &c.

Quid inseparabile?

Quod naturaliter nequit à subjecto suo separari: ut, *nigror in corvo*; *albor in cygno*.

Quomodo dici potest accidens inseparabile esse accidens, si non possit separari à subjecto suo?

Accidens inseparabile reverâ nequit à subjecto separari, & ideo dicitur inseparabile. Idem tamen separari potest à subjecto cogitatione, & hætenus dicitur accidens, in eoque à proprio distinguitur, quod nè cogitatione quidem potest à subjecto separari.

CAP.

CAP. XIV.

*Quid est totum ?***T**otum est, quod constat plurium convenienti unione.*Quotuplex est totum ?*

Duplex : aliud per se, aliud per accidens.

Quid vocas totum per se ?

Cui partes per se insunt.

Quid per accidens ?

Cui partes insunt per accidens.

Quanam partes dicuntur toti inesse per se, & quæ per accidens ?

Partes per se inesse dicuntur, cum aut ipsum totum partibus essentiale est, aut partes toti.

*Explica rem exemplo.**Animal est totum per se respectu hominis & bestiae, & respectu corporis & animæ : at homo est totum per accidens respectu servorum & liberorum, bonorum & malorum. Nam animal pertinet ad essentiam hominis & bestiae ; illiusque essentia ex corpore & anima constituitur. At liberum aut servum, bonum aut malum esse, non conveniunt homini ratione essentiae ; sed sunt accidentia, quæ ad essentiam extrinsecus accedunt.**Quotuplex est totum per se ?*

Quadruplex ; universale, formale, essentiale, & integrale.

*Quid est totum universale ?*Totum universale nihil aliud est, quàm genus respectu specierum, aut species respectu individuorum. Et quia species in genere, & individua in specie non actu, sed potentiâ continentur, factum est, ut totum universale sit appellatum *totum potentiale* ; cæteræ species totius dicuntur *totum actuale*.*Quid est totum formale ?*

Totum formale nihil aliud est, quàm species respectu generis & differentiae, quibus definitur.

Quid est totum essentiale ?

Quod constat materiâ & formâ.

Quid totum integrale ?

Quod partem habet extra partem.

*Declara harum specierum discrimen exemplo aliquo,**putâ, animalis.**Animal est totum universale respectu hominis & bestiae ; & totum*

totum formale, respectu corporis viventis, & sensus; (definitur enim corpus vivens sentiens) totum essentiale, respectu corporis & animæ; denique totum integrale, respectu capitis, ventris, artuum, &c.

Quomodo dividitur totum integrale?

In homogeneous & heterogeneous, sive simile & dissimile.

Quid est totum homogeneous?

Quod partes habet ejusdem nominis ac naturæ; ut, substantiæ inanimes, aqua, vinum, caro, lapis; item magnitudo, tempus, numerus, motus, &c.

Quid est totum heterogeneous?

Quod partes habet diversi nominis ac naturæ; ut substantiæ animatæ; item, exercitus, ecclesia, mundus, & id genus alia.

Quotuplex est totum per accidens?

Quadruplex: vel enim causa diversorum effectuum totum dicitur, vel effectum diversarum causarum, vel subjectum diversorum adjunctorum, vel adjunctum diversorum subjectorum. Sed hac de re plura in doctrina de divisione.

C A P. XV, & XVI.

Quid est causa?

Causa est cujus vi res est.

Quid est causatum?

Quod à causis constituitur.

Quot sunt causæ?

Quatuor: materia, forma, efficiens, & finis.

An ut causa, ita quoque causatum dividitur?

Non: una enim & eadem res est causatum omnium causarum: idque compositum dicitur respectu materiæ & formæ; effectum, respectu efficientis; & medium sive destinatum, respectu finis.

Quid est materia?

Materia est causa interna, ex qua res fit, aut constat. Ex. gr. semen est materia viventis, ex qua fit; corpus est materia, ex qua constat: illa solet appellari materia generationis; hæc materia compositionis.

An materia generationis & materia compositionis semper diversæ sunt?

Non semper. Nam scamnum fit & constat ex ligno; nubes, ex vapore; glacies, ex aqua.

Quid est forma?

Forma est causa interna, per quam res est id quod est. Sic anima est forma viventis; figura, forma statuarum, &c.

An res non est etiam per materiam?

Omnino: sed per materiam non est *id quod est*, hoc est, non est certa species. Quod enim res sit, hoc æquè materiæ debetur ac formæ: sed quod sit hoc potius quàm illud, id totum debetur formæ.

CAP. XVII.

Quid est causa efficiens.

Causa efficiens est causa externa, à qua res verà causalitate proficiscitur.

Cur dicis causalitate verà?

Ut causam efficientem à fine distinguerem. Nam res effecta etiam proficiscitur à fine; sed causalitate sive motione metaphoricà.

Quot modis dividitur causa efficiens?

Octo potissimum modis.

Quæ est prima divisio?

Causa efficiens alia est emanativa vulgò dicta, alia activa.

Quanam causa vocatur vulgò emanativa?

A qua res immediatè, ac sine ulla actione mediâ emanat. Sic ignis est causa caloris sui, omnisque forma est causa emanativa suarum proprietatum.

Quid est causa activa?

Quæ effectum producit agendo. Sic ignis est causa caloris in eo, qui calefit.

Quæ est secunda divisio?

Causa efficiens vel est immanens, vel transiens.

Quæ est causa immanens?

Quæ producit effectum in seipsa. Sed dicitur intellectus causa suorum conceptuum.

Quæ transiens?

Quæ producit effectum extra se. Sic architectus est causa domus; qui projicit, causa projecti lapidis.

Quæ

Quæ est tertio divisio?

Causa efficiens alia libera est, alia necessaria.

Quanam causæ dicuntur liberæ?

Quæ consultò causant. Sic, qui pro arbitratu suo ambulat, domum struit, bella gerit, aut aliud aliquid agit, dicitur causa libera istarum rerum, quas efficit.

Quanam dicuntur necessarie?

Quæ causant necessitate naturæ. Sic lapis descendens, ignis ascenderis, aut urens materiam idoneam, dicitur causa necessaria motûs, aut ustionis.

Quæ est quarta divisio?

Causa efficiens alia est per se, alia per accidens.

Quid est causa per se?

Quæ producit effectum naturæ suæ, aut consilio consentaneum.

Quid causa per accidens?

Quæ effectum producit præter consilium, aut naturæ suæ propensionem.

Explica rem exemplis?

Cùm piscator pisces capit, dicitur causa per se capturæ piscium; cùm extrahit aureum tripodem, dicitur causa per accidens: illud enim proposuerat; hoc evenit præter consilium. Similiter, cùm animal sibi simile generat, dicitur causa per se generati animalis; cùm generat monstrum, dicitur causa per accidens: quia hoc accidit præter propensionem naturalem animalis. Dicitur etiam alio modo causa per accidens: sed vide hac de re *Institutiones nostras*.

Quæ est quinta divisio?

Causa efficiens alia est principalis, alia minùs principalis.

Quam vocas principalem?

Quæ suâ virtute effectum producit.

Quam minùs principalem?

Quæ principali causæ inservit ad effectum producendum.

Quotuplex est causa minùs principalis.

Triplex; causa procathartica, causa proegumena, & instrumentum.

Quam vocas causam procatharticam?

Quæ causam principalem extrinsecus incitat ad agendum.

Quam proegumenam?

Quæ causam principalem intus disponit, vel etiam prorit ad agendum.

Quid est instrumentum?

Quod causæ principali in ipsa rei effectione subservit.

Declara hanc divisionem exemplo.

Causa principalis ædificii, est architectus, sive fabri; causa procatartica, merces, aut is, qui mercedem pollicetur; causa proegumena, lucri cupiditas; instrumenta, serra, securis, &c.

Quæ est sexta divisio?

Causa efficiens, vel est prima, vel secunda.

Quæ causa dicitur prima?

Quæ non pendet à causa priore. Estque vel absolutè prima; ut, *Deus*: vel prima in suo genere; ut, *cælum*, *anima*. Deus enim est prima causa omnium rerum: cælum est prima causa motuum ac mutationum naturalium; anima prima causa operationum vitalium, non absolutè, sed in genere causarum naturalium.

Quænam dicuntur causæ secundæ?

Quæ pendent ab aliqua priore causa, idque vel à causa absolutè primâ (sic omnes causæ creatæ *secundæ causæ* dicuntur) vel etiam à causa priore in suo genere: sic instrumentum dicitur *causa secunda* respectu causæ principalis.

Quæ est septima divisio?

Causa efficiens alia est universalis, alia particularis.

Quid est causa universalis?

Quæ eâdem efficientiâ cum aliis causis concurrat ad plura effecta; ut, *cælum*.

Quid particularis?

Quæ suâ efficientiâ tantum unum effectum producit: ut, natura cujusque rei naturalis.

Quæ denique est octava & ultima divisio?

Causa efficiens alia est proxima, alia remota.

Quænam dicitur proxima?

Quæ effectum producit immediatè, sive, quæ ipsa cum effecto conjungitur; vel ratione existentie suæ, vel ratione virtutis, vel ratione utriusque. Quarum, quæ suâ existentiam cum effecto conjungitur sine ulla virtute media, speciali appellatione *proxima* dicitur.

Quæ

Quæ remota ?

Quæ effectum producit mediâ causâ propinquiore ; sive, quæ neque existentiâ, neque virtute suâ cum effecto conjuncta est.

Da exempla.

Avus est causa remota *nepotis*, *pater* est causa proxima *filii*; sed appellatione generali : causæ emanativæ sunt causæ proximæ, appellatione speciali.

CAP. XVIII.

Quid est finis ?

Finis est causa, cujus gratiâ res est : hoc est, quæ sui amore incitat causam efficientem ad agendum, & ad consecutionem sui. Sic eruditio dicitur finis studiorum, quia studiosus eruditionis amore impellitur ad studendum. Hic impulsus vocatur *motio metaphorica*.

Quotuplex est finis ?

Duplex : subordinatus & ultimus.

Quid est finis subordinatus ?

Qui refertur ad finem ulteriorem.

Quid ultimus ?

Qui non refertur ad ulteriorem.

Quot modis dicitur finis ultimus ?

Duobus modis. Vel enim finis absolutè ultimus est, ut *felicitas* : vel in suo tantum genere : sic *cognitio veritatis* est ultimus finis *Logicæ*.

CAP. XIX.

Quid est subiectum ?

Subjectum est, cui aliquid præter essentiam adjungitur.

Quid est adjunctum ?

Quod alicui præter essentiam adjungitur.

Quot modis dividitur adjunctum ?

Tribus potissimum modis.

Quæ est prima divisio ?

Adjunctum aliud est proprium, aliud commune. Hæc divisio ex iis, quæ antè dicta sunt, satis intelligitur.

Quæ est secunda divisio ?

Adjuncta alia absoluta sunt, alia limitata.

Quænam sunt adjuncta absoluta?

Quæ subjecto simpliciter ac sine limitatione conveniunt ; ut, *hominem mortalem esse.*

Quæ limitata?

Quæ subjecto conveniunt secundum quid ; ut, *hominem immortalẽ esse.*

Quæ est tertia divisio?

Adjunctum aliud est internum, aliud externum.

Quid est adjunctum internum?

Quod subjecto inhæret.

Quid externum?

Quod extrinsecus tantum ad subjectum ordinatur.

Da exemplum.

Color, magnitudo, figura, indoles, mores, &c. sunt interna adjuncta hominis : *actiones, locus, tempus, vestes, &c.* sunt adjuncta externa.

Quotuplex est adjunctum externum?

Triplex : objectum, signum, aut circumstantia.

Quid est objectum?

Objectum est circa quod res operando versatur : sic objectum visus est *color* ; auditus, *sonus.*

Quid est signum?

Signum est, quod sensibus seipsum, & id, ejus signum est, intellectui offert, Sic *aurora* est signum orituri solis ; *vestigium*, pedis ; *hedera suspensa*, venalis vini.

Quid est circumstantia?

Circumstantia est, quod circa rem est, eive adjacet, aut appositum est. Huc pertinet locus, tempus, vestitus, armatura, &c.

C A P. XX.

Atque hætenus de affectionibus simplicibus : quas vocas affectiones conjunctas.

QUæ pluribus rebus conjunctim conveniunt. Quales sunt, convenientia, diversitas, oppositio, & ordo. Una enim res dici potest alterius genus, pars, causa, subjectum, &c, at uni rei seorsum, ut est una, non potest tribui convenientia, diversitas, oppositio, aut ordo.

Quid est convenientia?

Convenientia est, quæ plura, aut quasi plura, uniantur.

Quomodo

Quomodo dividitur convenientia?

In simplicem & analogicam.

Quid est convenientia simplex?

Convenientia unius cum alio in eodem tertio.

Quid analogia?

Analogia est rationum similitudo, five convenientia plurimum cum pluribus in eadem habitudine.

Da exemplum.

Homo & bestia conveniunt in communi natura *animalis*; *mel & fel* conveniunt *colore*. Hæc est convenientia simplex. At *auriga & gubernator*, *os & radix*, sunt analogæ: quia, ut *auriga* se habet ad *currum*, ita se habet *gubernator* ad *navim*; & ut *os* se habet ad *animal*, ita *radix* se habet ad *plantam*: utrobique est quædam similitudo habitudinis ad aliud.

Quotuplex est convenientia simplex?

Duplex: identitas, & convenientia accidentalis.

Quid est identitas?

Identitas est unitas essentiæ.

Quotuplex est?

Duplex; subordinata & coordinata.

Quam vocas subordinatam identitatem?

Quâ conveniunt superiora cum inferioribus: putà, genus cum speciebus, aut species cum individuis sibi subjectis; & vicissim. Sic conveniunt *animal & homo*, *homo & Socrates*, *habitus & ars*, *ars & Logica*, &c.

Quotuplex est identitas coordinata?

Triplex: numerica, specifica, & generica.

Quid est identitas numerica?

Quâ unumquodque individuum convenit cum seipso. Sic *Socrates senex* est idem numero *homo* qui fuerat *puer*.

Quid specifica?

Quâ plura individua conveniunt in eadem specie; ut, *Socrates & Plato* in natura humana.

Quid generica?

Quâ plures species earumque individua conveniunt sub eodem genere, vel proximo, vel remoto; ut, *homo & equus*, *Bucephalus & Alexander*, sub *animali*; *homo & equus*, *planta & lapis* sub *corpore*.

Quotuplex est convenientia accidentalis ?

Duplex ; interna (quæ iterum in paritatem & similitudinem dividitur) & externa.

Quid est paritas ?

Paritas est convenientia in quantitate. Paria dicuntur, quæ æquè magna sunt.

Quid est similitudo ?

Similitudo est convenientia in qualitate aut in passione. Similia dicuntur, quæ eâdem qualitate affecta jam sunt, aut etiamnum afficiuntur.

Quid est convenientia externa ?

Convenientia externa est convenientia in causis, effectis, subjectis, aut adjunctis externis ; hoc est, quæ non pertinent ad essentiam. Sic duo fratres germani conveniunt causâ efficiente ; pluvia & grando, materiâ ; artifices ejusdem professionis, effectis ; virtutes & vitia, subjecto ; ægritudo & amor, signo, nempe pallore.

C A P. XXI.

Quid est diversitas.

Diversitas est, quâ res à se invicem distinguuntur.

Quotuplex est diversitas ?

Duplex ; alia essentialis, alia accidentalis.

Quomodo dividitur diversitas essentialis ?

In subordinatam & coordinatam.

Quid est diversitas subordinata ?

Quâ superiora differunt ab inferioribus ; putà, genus à speciebus, & species ab individuis sibi subjectis ; & vicissim. Sic differt animal ad hominem & bestiâ ; homo, à Socrate & Platone

Quotuplex est diversitas coordinata ?

Triplex ; numerica, specifica, & generica.

Quid est diversitas numerica ?

Quâ distinguuntur individua ejusdem speciei ; ut, Socrates & Plato.

Quid specifica ?

Quâ distinguuntur species ejusdem generis, & earum individua ; ut, homo & equus, Alexander & Bucephalus.

Quid generica ?

Quâ distinguuntur genera, tum summa, tum subalterna, eorumque

eorumque species & individua; ut, *substantia* & *quantitas*, *corpus* & *spiritus*, *animal* & *planta*, *homo* & *pyrus*, *Socrates* & *hæc pyrus*.

Quotuplex est diversitas accidentalis?

Duplex; interna (quæ in imparitatem, & dissimilitudinem subdividitur) & externa.

Quid est imparitas?

Imparitas est diversitas in quantitate. Imparia sunt, quorum alterum altero majus est aut excellentius.

Quid est dissimilitudo?

Dissimilitudo est diversitas in qualitate, aut passione. Et dissimilia dicuntur quæ diversâ qualitate jam affecta sunt, aut etiamnum afficiuntur.

Quid est diversitas externa.

Diversitas externa est diversitas in causis, effectis, subjectis, aut adjunctis externis; hoc est, quæ non pertinent ad essentiam. Sic mures à sole geniti ex putredine differunt causâ efficiente & materiâ ab iis muribus qui ex semine generantur.

C A P. X X I I.

Quid est oppositio?

Oppositio est pugna rerum.

Quænam res dicuntur pugnare?

Quæ neque de se invicem, neque de eodem tertio, secundum idem, ad idem, eodem modo atque tempore, verè affirmari possunt.

Quot sunt species oppositorum?

Quinque: disparata, contraria, relativè opposita, privativè opposita, & contradicentia.

Quid sunt disparata?

Disparata sunt, quorum unum pluribus opponitur eodem modo; ut, *homo* & *equus*, *album* & *rubrum*. Etenim homo non equo solùm, sed & leoni, lupo, &c. & album non solùm rubro, sed & viridi, flavo, cæruleo, cæterisque mediis coloribus opponitur eodem modo, hoc est, eodem oppositionis genere.

Cur dicis eodem modo?

Quia servus & domino opponitur & libero: non tamen dominus & servus disparata sunt: quia servus opponitur domino relativè; libero, contrariè.

Quid

Quid sunt contraria ?

Contraria sunt duo absoluta, quæ sub eodem genere plurimum distant ; ut, *album & nigrum*, *calidum & frigidum*, *virtus & vitium*, *par & impar*.

Quomodo dividuntur contraria ?

In mediata & immediata.

Quæ vocas mediata ?

Quæ admittunt medium participationis ; ut, *calor & frigus*, *album & nigrum*.

Quæ immediata ?

Quæ non admittunt medium participationis ; ut, *par & impar*, *rectum & obliquum*.

Quid sunt relativè opposita ?

Quæ id ipsum, quod sunt, oppositorum esse dicuntur, vel alio quovis modo ad illa referuntur ; ut, *pater & filius*, *dominus & servus*.

Quid sunt privativè opposita ?

Privativè opposita sunt habitus & illius privatio.

Quid intelligitur hoc loco nomine habitus ?

Quodlibet accidens, quod à subjecto suo separari potest, putà, vel potentia naturalis, vel habitus in qualitate, vel patibilis qualitas, vel operatio, vel habitus in decima categoria.

Quid est privatio ?

Privatio est absentia habitus in subjecto, quod per naturam suam, & per tempus à natura definitum, aptum est habitum recipere.

Da exempla eorum quæ opponuntur privativè.

Visus & cæcitas, *scientia & ignorantia*, *lux & tenebræ*, *motus & quies*, *nudum & vestitum esse*, &c.

Quid sunt contradicentia ?

Contradicentia sunt ens & non-ens ; ut, *homo*, *non-homo* ; *album*, *non-album* ; *videre*, *non-videre*.

C A P. XXIII.

Quid est ordo ?

O Rdo est secundum quem aliquid altero prius aut posterius, vel etiam simul cum illo dicitur.

Quot modis dicitur prius & posterius ?

Quinque modis, tempore, naturâ, dispositione, dignitate, & cognitione.

Quid

Quid est prius tempore ?

Quod altero vetustius & antiquius dicitur. Sic Pythagoras dicitur prior Socrate ; & bellum Trojanum, bello Punico.

Quid prius naturâ ?

Quod prius est existendi consecutione, aut causalitate.

Quid vocas prius existendi consecutione ?

A quo non reciprocatur existendi consecutio. Sic animal prius est homine ; & numerus, binarius, ternario. Posito enim homine, ponitur animal ; at posito animali, non necesse est poni hominem : similiter, posito ternario numero, binarius quoque ponitur ; at posito binario, non necesse est poni ternarium.

Quid vocas prius causalitate ?

Quod reciprocatur secundum existendi consecutionem, & alterum quomodocunque causa est, cur alterum existat. Sic sol est prior suâ luce, non tempore, sed naturâ sive causalitate.

Quid est prius dispositione ?

Quod minùs abest ab initio. Sic exordium prius est cæteris partibus in oratione.

Quid prius dignitate ?

Quod præstantius est. Sic magistratus prior est subditis ; dominus, servis ; pater, liberis.

Quid prius cognitione ?

Quod notius est.

Quot modis dicitur aliquid altero notius ?

Duobus : vel quoad naturam, vel quoad nos.

Quanam dicuntur notiora secundum naturam ?

Quæ naturâ priora sunt ; ut, universalia singularibus, partes toto, causæ effectis, &c.

Quæ quoad nos ?

Quæ naturâ posteriora, sensibusque nostris viciniora sunt ; ut, singularia universalibus, totum suis partibus, effectum causis.

Quot modis dicitur simul ?

Totidem ferè modis, quot prius & posterius dicitur ; sed duo modi cæteris usitatiores sunt ; simul tempore, & simul naturâ.

Quanam

Quænam dicuntur simul tempore ?

Quæ eodem tempore existunt; ut, æquales, & *ὄγχοι*,
h. e. contemporanei.

Quæ simul naturâ ?

Simul naturâ dicuntur primò, quæ recipiuntur quidem secundum existendi consecutionem, sed ita, ut alterum non sit causa, cur alterum existat : ut, relatum & correlatum, puta *pater & filius*. Deinde, quæ in ejusdem generis divisione sibi invicem opponuntur : ut, *homo & bestia*.

C A P. XXIV.

Atque hætenus egimus de thematum simplicium categoriis, & affectionibus, quæ ex rerum in categoriis dispositarum collatione oriuntur : quid porro sequitur ?

Interpretatio thematum simplicium, & affectiones, quas intellectus noster vocabulis affingit, ex modo conceptus suos interpretandi.

Quid est interpretatio ?

Interpretatio est vox articulata, animi conceptus ex instituto significans.

Quotuplex est interpretatio ?

Duplex : dictio, quæ est interpretatio simplex, & oratio, quæ est interpretatio composita.

Quid est dictio sive interpretatio simplex ?

Cujus nulla pars significat separatim : ut, *homo, piscis, lapis*.

Quid est oratio, sive interpretatio composita ?

Cujus partes significant aliquid separatim : ut, *homo est animal : piscis non respirat*.

Quomodo dividitur dictio ?

In nomen & verbum.

Quid est nomen ?

Nomen est dictio, quæ sine tempore significat, & conjuncta verbo substantivo est, effert verum aut falsum : ut, *homo, animal*.

Quid est verbum ?

Verbum est dictio, quæ tempus adsignificat, & semper signum est eorum, quæ de altero dicuntur : ut, *disputat, currit*.

Quomodo dividitur nomen & verbum ?

Utrumque dividitur in finitum & in infinitum.

Quid

Quid est nomen aut verbum finitum ?

Quod habet significationem definitam ; ut, *homo, currit.*

Quid infinitum ?

Cujus significationem negandi nota non indefinitam facit ; ut, *non-homo, non currit.*

C A P. XXV.

Quænam sunt spectanda in dictionibus ?

Primò, etymologia & conjugatio ; deinde, homonymia & synonymia.

Quid est etymologia ?

Etymologia est ratio vocis in significando, ex origine declarata ; veluti, cum *mutuum* dicitur, quasi *de meo tuum*.

Quid sunt conjugati ?

Conjugata sunt, quæ vocis & significationis affinitate juncta, terminatione differunt ; ut, *justitia, justus, justè : sapientia, sapiens, sapienter, sapere.*

Quot partibus constat conjugatio ?

Tribus : voce primitivâ, paronymâ sive denominatâ, & casu.

Quid est vox primitiva ?

Vox primitiva est vox abstracta, quæ ab alia voce non est denominata.

Quid paronyma sive denominata ?

Vox paronyma est vox concreta, quæ à voce primitiva sic derivata est, ut ab ea terminatione solâ differat.

Quid casus ?

Casus hoc loco est adverbium à nomine aut verbo suæ conjugationis deductum : aliàs casus est quælibet vocis inflexio.

Adde exemplum.

Justitia, sapientia, sunt voces abstractæ sive primitivæ ; *justus, sapiens, sapere*, voces concretæ, sive paronymæ ; *justè sapienter*, casus.

C A P. XXVI.

Quid est vox synonyma sive univoca ?

Quæ res significat, quibus ratio essentiæ, sive definitionis communi nomini accommodata, est eadem.

Quid

Quid vox homonyma?

Quæ res significat, quibus ratio essentia, sive definitio communi nomini accommodata, est diversa.

Da exemplum.

Vox *animal*, cum animali vivo simul & picto tribuitur, est homonyma; quia non est una communis essentia aut definitio vivi & picti animalis: at cum homini & bestia tribuitur, est synonyma: quia una eademque essentia est & definitio animalis, quæ homini & bestia cum ipso communi nomine *animalis* communis est.

Quotuplex est vox homonyma?

Duplex: alia à casu, alia à consilio.

Quanam voces dicuntur homonymæ à casu?

Quæ diversis rebus significandis sine causa sunt impositæ; veluti, cum *jus* dicitur, tum quod sorberi potest, tum quod injuriæ opponitur.

Quanam à consilio?

Quæ diversis rebus significandis certâ ratione sunt impositæ.

Quotuplex est ratio homonymiæ?

Duplex: alia enim in rebus est, alia in nobis.

Quotuplex est ea, quæ in rebus esse dicitur?

Iterum duplex: tropus scilicet, & inæqualis attributio generis. Omnia enim vocabula tropica sunt ambigua; veluti, cum *anima* ponitur pro homine, *autor* pro libro, &c. Tum etiam vocabula generum, quæ suis speciebus communicantur inæqualiter; ut, *ens*, cum dicitur de substantia & accidente: *sanum esse*, de animali, de cibo, & de urina. Inter vocabula tropica maximè elucet metaphorica: in quibus spectatur similitudo rerum, vel simplex; veluti, cum homo vaser *vulpes* dicitur, aut homo impurus, *porcus*: vel analogica; veluti, cum minister ecclesiæ *pastor* vocatur.

Quando voces homonymæ dicuntur propter rationem in nobis sitam?

Cum nomen propinquæ aut charæ personæ indimus liberis nostris, ad conservandam illius memoriam; aut personæ piæ aut illustris, ob spem similitudinis, aut ad exemplum.

CAP. XXVII.

Atque hac de themate simplici : quid porro sequitur ?

Thema complexum, ejusque interpretatio, quæ enunciatio dicitur.

Quid est enunciatio ?

Enunciatio est oratio, in qua aliquid de aliquo verè aut falso pronunciatur ; ut, *Terra est rotunda : Mare non est altius terrâ.*

Cur non discernis thema complexum ab illius interpretatione, ut factum fuit in themate simplici ?

Quia eadem species, eademque affectiones in themate complexo, atque in illius interpretatione, sive enunciatione considerandæ sunt.

Quenam sunt spectanda in enunciatione ?

Species & affectiones.

Quenam sunt species enunciationis ?

Primò, simplex & composita : deinde, pura & modalis.

Quid est enuntiatio simplex ?

Quæ non potest in plures enunciationes resolvi : ut, *Canis latrat : Verrès est fur.*

Quæ sunt partes enunciationis simplicis ?

Subiectum & prædicatum.

Quid est subiectum ?

Cui aliquid in enunciatione simplici tribuitur.

Quid prædicatum ?

Quod alicui in enunciatione simplici tribuitur.

Quid ergò de copula verbali EST statuendum ?

Copula est censetur pars prædicati : ut in hac enunciatione. *Homo est animal*, subiectum est homo; prædicatum, est *animal*.

An copula EST semper in enunciatione exprimitur ?

Non : sæpe in verbo continetur; ut, *Socrates sapit*: hoc enim idem est, ac, *Socrates est sapiens*.

Quid est enuntiatio composita ?

Quæ constat ex pluribus enunciationibus inter se copulatis.

Quotuplex est ?

Quintuplex : copulativa, hypothetica, disjunctiva, adversativa, & relativa.

Quid

Quid est enuntiatio copulativa?

Cujus partes connectuntur conjunctione copulativâ, et, que, quoque, aut simili; ut, *Credidit Abraham Deo, & impunitum ei fuit ad justitiam.*

Quid est hypothetica?

Cujus partes connectuntur conjunctione conditionali si; ut, *Si Deus est, mundus regitur providentiâ.* In his prior pars dicitur antecedens; altera consequens.

Quid disjunctiva?

Cujus partes connectuntur conjunctione disjunctivâ, aut, vel, sive, seu, aut simili; ut, *Aut justificamur fide, aut operibus.*

Quid adversativa?

Cujus partes connectuntur conjunctionibus adversativis, quamvis tamen, non sed, aut similibus; ut, *Non formosus erat, sed erat facundus Ulysses.*

Quid relativa?

Cujus partes connectuntur mutuâ relatione; ut, *Qualis rex, talis grex: Quod non est compositum est immortale: Dum spiro, spero.*

CAP. XXVIII.

Atque hæc de primâ divisione: accedamus ad alteram.

Quid est enuntiatio pura?

IN qua non exprimitur, quomodo partes cohærent; ut, *Homo est animal: Homo non est lapis.*

Quid modalis?

In qua exprimitur, quomodo partes cohærent; ut, *Necesse est hominem esse animal, aut, non esse lapidem.*

Quot sunt modi?

Quatuor: necesse, impossibile, possibile, & contingens.

Quæ sunt partes enunciationis modalis?

Dictum & modus: ut, in hac enunciatione, *necesse est hominem esse animal*, dictum est, *hominem esse animal*; modus, *necesse*.

Quomodo disponendæ sunt hæ partes?

Ita ut dictum sit subiectum, & modus prædicatum.

CAP. XXIX.

Atque hac de speciebus, quoduplices sunt affectiones enunciationum ?

Duplices : absolutæ & relatæ.

Quænam sunt affectiones absolutæ ?

Quantitas & qualitas.

Quomodo dividitur enuntiatio ratione quantitatis ?

In universalem, particularem, indefinitam, & singularem.

Quid est enuntiatio universalis ?

In qua subjectum universale accipitur universaliter, hoc est, cum nota universalitatis, *omnis, nullus, aut simili* ; ut, *Omnis homo est animal. Nullus cometa est stella.*

Quid particularis ?

In qua subjectum universale accipitur particulariter ; hoc est, cum nota partis incertæ, *aliquis, quidam, aut simili* ; ut, *Aliquis homo est dives : Non cuius homini contingit adire Corinthum.*

Quid indefinita ?

Cujus subjectum universale nullâ quantitatis notâ definitur ; ut, *Matres amant liberos suos.*

Quid singularis ?

Cujus subjectum est singulare ; ut, *Milo occidit Clodium.*

CAP. XXX.

Quomodo dividitur enuntiatio ratione qualitatis ?

Primò, in affirmantem & negantem ; deinde, in veram & falsam.

Quid est enuntiatio affirmans ?

Quæ partes conjungit ; ut, *Omnis homo est animal : Si Deus est, mundus regitur propter levitatem : Necessè est Deum esse justum.*

Quid negans ?

Quæ partes dividit ; ut, *Terra non movetur : Non, si casus est in natura, providentia Dei tollitur : Non necesse est Socratem disputare.*

Quomodo dividitur enuntiatio tum affirmans tum negans ?

In finitam & infinitam.

Quam vacas finitam ?

Quæ constat subjecto & prædicato finitis ; ut, *Omne corpus est in loco.*

Quam infinitam?

Quæ constat subiecto, aut prædicato, aut etiam utroq; infinito; ut, *Non-ens excluditur à categoriis: Quidam homines sunt non mali: Quidam non adeò divites sunt minimè sordidi.*

In quo differt enuntiatio negans ab infinità affirmante?

In enunciatione negante ponitur negatio proximè ante copulam, aut ante verbum quod vim copulæ continet, aut ante notam quantitatis, vel etiam in nota quantitatis includitur; ut, *Quidam homines non sunt electi: Lapidēs non vivunt: Non omnis homo est impius: Nullæ bestię ratiocinantur.* Si duæ negationes concurrant, enuntiatio censetur affirmata; ut, *Nullus homo non peccat.* Si negatio alio loco ponatur, efficit enunciationem infinitam affirmantem; ut, *Quidam non-locuples potest esse dives: Omne animal non-rationale est bestia: Adam potuit non peccare.*

C A P. XXXI.

Hæc de affirmatione & negatione. Porro quid est enuntiatio vera?

QUæ conjungit ea, quæ reverà conjuncta sunt: aut dividit, quæ revera sunt divisa.

Quid falsa?

Quæ conjungit ea, quæ divisa sunt; aut dividit, quæ conjuncta sunt.

Quomodo dividitur enuntiatio vera?

In necessariam & contingentem.

Quam vocas necessariam?

Quæ non potest esse falsa; ut, *Homo est animal: aut, non est lapis.*

Quot sunt gradus necessitatis in enunciatione?

Tres: *καὶ παντός, καὶ αὐτὸ & καθόλου πρῶτον*, hoc est, de omni, per se, & universale primum.

Quæ dicitur enuntiatio de omni?

In qua prædicatum omni subiecto convenit, & semper; ut, *Corvus est niger: homo est bipes.*

Quæ dicitur per se?

Cujus subiectum & prædicatum essentiali nexu cohærent.

Quot sunt modi enunciationis per se?

Duo: vel enim prædicatum ponitur in definitione subiecti vel subiectum in definitione prædicati.

Quæ-

Quænam enunciationes pertinent ad primum modum?

In quibus vel genus prædicatur de specie; ut, *Homo est animal*: vel differentia; ut, *Homo est rationalis*: vel integra definitio; ut, *Homo est animal rationale*.

Quænam pertinent ad secundum modum?

In quibus proprietates prædicantur de subiecto suo; idque vel singulæ seorsum; ut, *Homo est risibilis*: vel duæ disjunctim; ut, *Numerus est par aut impar*.

Quænam enuntiatio dicitur universaliter prima?

In qua prædicatum subiecto convenit, quatenus ipsum est id quod est; sive, quæ constat terminis reciprocis: ut, *Homo est risibilis*.

Quomodo se habent hi gradus ad se invicem?

Posterior includit priorem, non vicissim. Enuntiatio enim per se, est etiam de omni, & enuntiatio universaliter prima, est etiam per se; sed non vice versâ.

Quid est enuntiatio contingens?

Quæ potest esse falsa; ut, *Socrates disputat*.

Quot sunt modi enunciationum contingentium?

Tres: quædam plerunque veræ sunt; ut, *Matres diligunt liberos suos*: quædam rarò; ut, *Homines nascuntur bicipites*: quædam ancipiti conditione nunc veræ sunt, nunc falsæ; ut, *Aleator vincit*.

Quotuplex est enuntiatio falsa?

Duplex: possibilis & impossibilis.

Quæ est enuntiatio possibilis?

Quæ potest esse vera; ut, si falsò dicas pluere.

Quæ impossibilis?

Quæ non potest esse vera: ut, *Homo est lapis*?

C A P. XXXII.

Quot sunt affectiones enunciationum compositæ?

Duæ sunt præcipuè considerandæ; conversio, & oppositio.

Quid est conversio?

Conversio est transpositio prædicati in locum subiecti, salvâ veritate enunciationis.

Quotuplex est conversio?

Triplex: conversio simplex, conversio per accidens, & conversio per contrapositionem.

Quid est conversio simplex ?

In qua servatur qualitas & quantitas enunciationis.

Ubi habet locum ?

In enunciatione universali negante, & particulari affirmante ; ut, *Nullus homo est lapis ; ergò nullus lapis est homo : Aliquod animal est album ; ergò aliquod album est animal.*

Quid est conversio per accidens ?

In qua, servatà qualitate, diminuitur quantitas.

Ubi habet locum ?

In universali affirmante : ut, *Omnis homo est animal ; ergò aliquod animal est homo.*

Quid est conversio per contrapositionem ?

In qua loco subjecti & prædicati, ponitur utriusque contradictio.

Ubi habet locum ?

In universali affirmante ; ut, *Omne mortale est genitum ; ergò, quod non est genitum, non est mortale.*

CAP. XXXIII.

Quid est oppositio ?

Oppositio est pugna enunciationum in affirmando & negando.

Quænam enunciationes dicuntur pugnare ?

Quæ idem, de eodem, secundum idem, ad idem, eodem modo, & eodem tempore, affirmant & negant.

Quotuplex est oppositio enunciationum ?

Duplex : contrarietas & contradictio.

Quid est contrarietas ?

Contrarietas est oppositio inter duas universales ; ut, *Omnis homo est justus : Nullus homo est justus.*

Quæ est regula contrariarum ?

Enunciationes contrariæ possunt simul esse falsæ, non simul veræ.

Quid est contradictio ?

Contradictio est oppositio inter universalem & particularem ; ut, *Omnis homo est justus. Non omnis homo est justus : Nullus homo est justus, Aliquis homo est justus. Vel inter duas singulares ; ut, Aristides fuit justus, Aristides non fuit justus.*

Quæ

Quæ est regula contradicentium?

Enunciationum contradicentium altera semper vera est, altera semper falsa.

An non aliæ species oppositionum vulgò tribuuntur enunciationibus?

Itá.

Quæ?

Subcontrarietas, & oppositio indefinita.

Quanam dicuntur enunciationes subcontrariæ?

Duæ particulares, quarum altera affirmat, altera negat; ut,

Aliquis homo est justus, Aliquis homo non est justus.

Quæ dicuntur indefinitè oppositæ?

Duæ enunciationes indefinitæ, quarum altera affirmat, altera negat; ut, *Homines sunt justi, Homines non sunt just.*

Quæ est regula veritatis in hisce enunciationibus?

Enunciationes subcontrariæ & indefinitè oppositæ possunt esse simul veræ, non simul falsæ.

Cur non recensuisti subcontrarietatem & oppositionem indefinitam inter species oppositionum?

Quia enunciationes subcontrariæ & indefinitæ non sunt reverâ oppositæ, sed videntur tantum. Possunt enim simul esse veræ.

¶ Synopsis Logicæ

LIBER SECUNDUS.

CAP. I.

Absoluta est prima pars Logicæ, quæ agit de thematibus, eorûmque variis affectionibus: veniamus ad partem alteram, in qua dixisti agi de instrumentis, quibus themata tractanda sunt. Quot sunt ergo ejusmodi instrumenta?



Quatuor; definitio, divisio, syllogismus, & methodus. Ex quibus definitio & divisio inserviunt tractandis thematibus simplicibus; syllogismus, complexis; methodus, utrisque.

Quæ est materia, ex qua hæc instrumenta conficiuntur?

Affectiones thematum simplicium. Ex his enim definitiones & divisiones formantur: hinc argumenta petuntur syllogismis; hæc denique debito ordine dispositæ, methodum constituunt.

Quid est definitio?

Definitio est oratio explicans quid sit id quod quæritur.

Quotuplex est definitio?

Duplex; alia nominis, alia rei.

Quid est definitio nominis?

Quæ nominis significationem explicat.

Quot modis explicatur nominis significatio?

Tribus modis: 1, notatione, sive etymologiâ; ut *Triangulum est, quod habet tres angulos*: 2, voce conjugatâ; ut, *Qualitas est à qua quales aliqui dicuntur*: 3, denique voce synonymâ notiore; ut *Bovinator est tergiversator*. Huc pertinent lexica.

CAP. II.

Quid est definitio rei?

Quæ explicat, quid res ipsa sit.

Quomodo dividitur?

In perfectam & imperfectam.

Quam

Quam vocas definitionem perfectam ?

Quæ rei essentiam attributis essentialibus explicat perfectè ;
ut, *Homo est animal rationale.*

Quot sunt leges perfectæ definitionis ?

Sex.

Enumera.

1. Definitio perfecta debet esse brevis.
2. Debet esse perspicua.
3. Debet cum definito reciprocari.
4. Debet esse affirmata.
5. Debet sine copulatione aut disjunctione partium proponi.

6. Debet constare ex attributis prioribus & notioribus naturâ ; atque adeò ex indemonstrabilibus.

Quibus partibus constat definitio perfecta ?

Genere & differentiâ.

*Ut de genere nihil dicam, unde petitur
differentia ?*

Differentia substantiarum petitur à forma : & cùm formæ sunt ignotæ, proprietas adhibetur loco formæ. Differentia accidentium sumitur à subjecto, objecto, causâ efficiente, aut finali.

Quomodo definiuntur accidentia propria ?

Genere, subjecto & causâ proximâ : eaque vel efficiente ; ut, *Eclipsis est defectus luminis in luna ob terram inter solem & lunam interpositam* : vel finali ; ut, *Appetitus est facultas naturalis in animali ad consequendum quod sibi bonum, & vitandum quod sibi malum videtur* : vel denique ntrâque ; ut, *Respiratio est attractio & expulsio aeris reciproca, à pulmonibus facta, ad cordis refrigerium.*

Quomodo definiuntur accidentia communia ?

Variis modis, ex quibus hi sunt præcipui. 1, Definiuntur genere & subjecto ; ut, *Simitas est curvitas nasi.* 2, Genere & objecto ; ut, *Physica est scientia corporis naturalis.* 3, Genere & fine ; ut, *Grammatica est ars bene loquendi.* 4, Genere, objecto, & fine ; ut, *Liberalitas est virtus servans mediocritatem in eroganda & accipienda pecunia.* 5, Genere & causâ efficiente ; ut, *Albor est color ortus ex prædominio perspicui.*

CAP. III, & IV.

Quid est definitio imperfecta?

Quæ rei essentiam non explicat attributis essentialibus, aut saltem non explicat perfectè : eaque proprio vocabulo *descriptio* dicitur.

Quando adhibetur imperfecta definitio?

1, Quando res ipsa non capit perfectam definitionem. 2, Quando nos rei essentiam non percipimus. 3, Quando defunt idonea vocabula, quæ in perfecta definitione requiruntur. 4, Quando aliorum captui definitio attemperanda est. 5, Denique, quando propositâ definitione alios delectare magis aut movere volumus, quàm docere.

Quæ res respuunt perfectam definitionem?

1, Res infinitæ; ut, *Deus*. 2, Quæ non habent veram essentiam: ut, *privationes*. 3, Quæ non habent unam essentiam: ut, *entia concreta & aggregata*. 4, Quæ non habent essentiam perfectam: ut, *partes, principia rerum, res in fieri*. 5, Summa genera. 6, Individua.

Quarum rerum essentiam non possumus assequi?

Quæ per se non incurrunt in sensus nostros: ut substantiæ cùm corporeæ, tum in corporeæ.

Quot modis formatur definitio imperfecta?

Septem modis potissimum.

Enumera hos modos.

1. Cùm accidens proprium definitur solâ causâ externâ: ut, *Eclipsis est interpositio terræ*.
2. Cùm definitur genere & subiecto: ut, *Eclipsis est defectus luminis in luna*.
3. Cùm res aliqua definitur genere & proprietate unâ aut pluribus: ut, *Canis est bestia latrans*.
4. Cùm res definitur enumeratione partium aut specierum: ut, *Logica est ars definiendi, dividendi, argumentandi, & ordinandi*.
5. Cùm res definitur remotione oppositi: ut, *Virtus est vitium fugere*.
6. Cùm relatum definitur correlato: ut, *Dominus est qui habet servum*.
7. Cùm res definitur coacervatione circumstantiarum; ut,

Homo

Homo est animal bipes implume, erecto vultu manibusque præditum.

C A P. V.

Quotuplex est divisio ?

Duplex : alia nominis, alia rei.

Quid est divisio nominis ?

Enumeratio significationum homonymi vocabuli, aut distinctio ambiguae sententiae : ut, si quis recenscat significationes *juris*, aut distinguat hanc orationem, *Aio te & Aetia Romanos vincere posse*. Hæc improprie *divisio* appellatur : rectius *distinctio* dicitur.

Quid est divisio rei, sive divisio proprie dicta ?

Divisio est explicatio totius per partes.

Quomodo distribuitur ?

Eodem modo quo totum. Ac primò, in divisionem totius per se, & in divisionem totius per accidens.

Quotuplex est divisio per se ?

Quadruplex : vel enim dividitur genus in species : ut, *Animal in hominem & bestiam* : vel definitum in partes definientes ; veluti, cum *homo*, sive humana essentia dividitur, sive resolvitur in *animal & rationale* : vel compositum in materiam & formam ; ut, *homo in corpus & animam rationalem* : vel denique integrum in sua membra ; ut, *Homo in caput, pectus, ventrem, artus, &c.*

Quotuplex est divisio per accidens ?

Item quadruplex : vel enim dividitur causa per effecta : ut, *Plantæ aliæ calefaciunt, aliæ frigefaciunt* : vel effectum per causas : ut, *Testimonia alia sunt divina, alia humana ; statuae aliæ sunt ex ære, aliæ ex marmore ; suppellex alia est ad ornatum, alia ad usum, &c.* vel subjectum per adjuncta : ut, *Homines alii sunt liberi, alii servi* : vel adjunctum per subjecta : ut, *Morbi alii corporis sunt, alii animi.*

Quot sunt leges bonæ divisionis ?

Septem potissimum.

Enumera omnes.

1. Partes debent in toto consentire.
2. Et inter se opponi.
3. Partes proximæ & immediatæ semper sumendæ sunt in
divisione, non remotæ.
4. Partes

4. Partes singulæ minus continere debent, quàm totum.
5. Universæ, neque plus neque minus.
6. Divisio debet constare partibus paucissimis, & si com-
modè fieri possit, duabus.
7. Modus dividendi adhibendus est, nè subdivisionum nu-
merus nimium excrescat.

CAP. VI.

Quid est syllogismus?

SYllogismus est oratio, in qua quibusdam positis, diversum
quid à positis, propter ea quæ posita sunt, necessariò se-
quitur.

Quod modis consideratur syllogismus?

Duobus modis: vel enim consideratur absolutè ac ratione
formæ, vel relatè ad conditiones materiæ ac varios ef-
fectus.

Prior consideratio quot habet partes?

Tres: vel enim agendum est de genesi sive ratione struen-
di syllogismum, vel de *eo vel æ* sive ratione inveniendi argu-
menti, vel de imperfectis speciebus syllogismi.

Quanam sunt in genesi spectanda?

Materia, tum remota, tum proxima; & forma.

Quæ est remota materia syllogismi?

Tres termini: minor, major, & medius.

Quis est minor terminus?

Subjectum quæstionis.

Quis est major?

Prædicatum quæstionis.

Quis medius?

Argumentum, quod ad probandam quæstionem extrinse-
cùs assumitur.

Quæ est materia proxima?

Tres propositiones: quarum prima vocatur major propo-
sitio, vel absolutè, propositio; secunda, minor propositio, vel
assumptio; tertia, conclusio.

Quibus terminis constat propositio major?

Majore & medio.

Quibus minor?

Minore & medio.

Quibus

Quibus conclusio ?

Minore & majore.

Quid est forma syllogismi ?

Est apta trium propositionum dispositio ad conclusionem ex præmissis colligendam.

In quo consistit forma syllogismi ?

In figura & modo.

Quid est figura ?

Figura est legitima dispositio medii cum partibus quæstionis

Quid est modus ?

Modus est legitima propositionum secundum quantitatem & qualitatem determinatio,

Quotuplices sunt modi ?

Duplices : alii universales, alii singulares.

Quos vocas universales ?

In quibus utraque vel altera propositionum præmissarum est universalis.

Quos singulares ?

In quibus utraque præmissarum est singularis.

C A P. VII.

Quot sunt figurae ?

T Res.

Quæ est prima figura ?

In qua argumentum majori termino subjicitur, & de minore prædicatur.

Quæ secunda ?

In qua argumentum de utroque termino prædicatur.

Quæ tertia ?

In qua argumentum utrique termino subjicitur.

Quot sunt modi universales in prima figura ?

Quatuor : *barbara, celarent, darii, ferio.*

Quot in secunda ?

Item quatuor : *cesare, camestres, festino, baroco.*

Quot in tertia ?

Sex : *darapti, felapton, disamis, datisi, bocardo, ferison.*

Quid sibi volunt vocales harum vocum ?

Indicant quantitatem & qualitatem propositionum, quibus præfiguntur : idque hoc modo ;

Asserit

*Afferit A, negat E ; verum generaliter ambo :
Afferit I, negat O ; sed particulariter ambo.*

*Da exempla in singulis modis : ac primum
primæ figuræ.*

Bar-
ba-
ra.

*Omne animal sentit :
Omnis homo est animal :
Ergo omnis homo sentit.*

Ce-
la-
rent.

*Nullum animal est lapis :
Omnis homo est animal :
Ergo nullus homo est lapis.*

Da-
ri-
i.

*Omnis color est visibilis :
Aliqua qualitas est color :
Ergo, aliqua qualitas est visibilis.*

Fe-
ri-
o.

*Nullum vitium est positum in medio :
Aliquis habitus est vitium :
Ergo aliquis habitus non est positus in medio.*

Da exempla secundæ figuræ.

Ce-
a-
re.

*Nullus dives est egenus :
Omnis avarus est egenus :
Ergo nullus avarus est dives.*

Cam-
es-
tres.

*Omne animal est mortale :
Nullus angelus est mortalis :
Ergo nullus angelus est animal.*

Fes-
ti-
no.

*Nullum animal est planta :
Quoddam vivens est planta :
Ergo quoddam vivens non est animal.*

Ba-
ro-
co.

*Omnis homo est animal :
Quoddam vivens non est animal :
Ergo quoddam vivens non est homo.*

Da exempla tertia figuræ.

Da-	<i>Omnis virtus est ardua :</i>
rap-	<i>Omnis virtus est honesta :</i>
ti.	<i>Ergò aliquod honestum est arduum.</i>
Fe-	<i>Nullus lapis vivit :</i>
lap-	<i>Omnis lapis descendit naturaliter :</i>
ton.	<i>Ergò aliquid, quod naturaliter descendit, non vivit.</i>
Dis-	<i>Aliquis homo furit :</i>
am-	<i>Omnis homo est animal rationale :</i>
is.	<i>Ergò aliquod animal rationale furit.</i>
Da-	<i>Omnis avarus eget :</i>
tis-	<i>Quidam avarus est locuples :</i>
i.	<i>Ergò quidam locuples eget.</i>
Bo-	<i>Aliquod corpus non est corruptibile :</i>
car-	<i>Omne corpus est compositum :</i>
do.	<i>Ergò aliquod compositum non est corruptibile.</i>
Fe-	<i>Nulla virtus adfert miseriam :</i>
ris-	<i>Quædam virtus est molesta :</i>
on.	<i>Ergò quoddam molestum non adfert miseriam.</i>

Da etiam exempla modorum singularium
in unaquaque figura.

In prima figura.

Messias debuit crucifigi :
Iesus est Messias :
Ergò Iesus debuit crucifigi.

In secunda figura.

Præceptor Alexandri fuit Stagirita :
Plato non fuit Stagirita :
Ergò Plato non fuit præceptor Alexandri.

In tertia figura.

Iudas fuit impius :
Iudas fuit Apostolus :
Ergò quidam Apostolus fuit impius.

CAP. VIII.

*Quibus fundamentis nititur necessitas consecutionis
in syllogismis universalibus.*

Syllogismi affirmantes nituntur regulâ de omni ; negantes,
regulâ de nullo.

Quæ est regula de omni ?

*Quicquid de aliquo universalis universaliter affirmatur, id
affirmatur etiam de iis quæ sub illo continentur. Ex. gr. de o-
mni homine affirmatur animal; sub homine continetur Petrus,
Paulus, &c. ergò de his quoque affirmatur animal.*

Quæ est regula de nullo ?

*Quicquid de aliquo omni negatur universaliter, id negatur
etiam de omnibus iis, quæ sub illo continentur. Ex. gr. lapis ne-
gatur de omni animali : sub animali continetur homo, equus,
leo, &c. ergò de his quoque negatur lapis.*

Quo fundamento nituntur syllogismi singulares ?

Regulâ proportionis.

Quid est regula proportionis ?

*Quæcunque in uno tertio singulari conveniunt, ea quoque in-
ter se conveniunt. Ex. gr. Davidi convenit fuisse Prophetam,
& fuisse homicidam : hinc sequitur; aliquem Prophetam fu-
isse homicidam ; aut, aliquem homicidam fuisse Prophetam.
Vel sic, Quorum duorum unum alicui tertio singulari convenit,
alterum non convenit, ea quoque inter se non conveniunt.
Ex. gr. Aristoteli convenit fuisse Philosophum, non convenit
fuisse Atheniensem: hinc sequitur, aliquem Philosophum non
fuisse Atheniensem ; ut, aliquem Atheniensem non fuisse Phi-
losophum.*

An omnes syllogismi dictis fundamentis conformes sunt ?

*Omnino. Qui enim ab hisce fundamentis dissentiunt, non
syllogismi, sed paralogismi sunt.*

*Unde cognoscis discrimen syllogismorum & para-
logismorum ?*

*Ex quibusdam legibus, quarum aliæ communes sunt om-
nibus figuris, aliæ singulis peculiares.*

Quanam sunt leges communes ?

I. In syllogismo non debent esse plures termini, nec pau-
ciores tribus.

II. Non

II. Non debet esse plus aut minus in conclusione, quàm fuit in præmissis.

III. Medium non debet ingredi conclusionem, neque totum, neque ex parte.

IV. Extrema ità collocanda sunt in conclusione, ut erant sita in præmissis.

V. Ex duabus negantibus nihil concluditur.

VI. Non etiam ex duabus particularibus: sed bene ex duabus singularibus.

VII. Conclusio sequitur partem debiliorem: hoc est, si altera præmissarum negata est, conclusio quoque debet esse negans; & si altera præmissarum est particularis, conclusio quoque est particularis.

Quæ sunt leges speciales?

I. Major primæ figuræ debet esse universalis, & minor affirmans.

II. Major secundæ figuræ debet esse universalis, & altera præmissarum negans.

III. Minor tertiæ figuræ debet esse affirmans, & conclusio particularis.

CAP. IX.

An Syllogismi omnium figurarum sunt aequè perfecti?

Minimè: syllogismi primæ figuræ cæteris perfectiores sunt.

Quas ob causas?

Primò, quia in ea concludi possunt omnia genera problematum, affirmantia, negantia, universalis & particularia: cum in secunda figura tantum negantia concludi possint; & in tertia, tantum particularia. Deinde, quia in prima figura apparet necessitas sequelæ syllogisticæ, & regula de omni & de nullo, quæ in ceteris figuris non ità liquidò conspiciuntur.

Cur ergò non semper adhibentur syllogismi primæ figuræ?

Quia, licet hi syllogismi cæteris meliores sint evidentiâ sequelæ, conditio tamen materiæ sæpe ratiocinantem trahit ad secundam aut ad tertiam figuram.

CAP. X.

*Satis dictum de genesi, sive de ratione struendi syllogismos: Quia in re consistit *ἐννοεῖα*, sive ratio inveniendi medii?*

UT medium idoneum eligatur ad conclusionem in qualibet figura & modo colligendam. Id verò quomodo fieri debeat, ex Institutionibus petendum est.

CAP. XI.

Pergamus ergò ad tertium membrum nostri instituti. Quot sunt species imperfecti syllogismi?

SEptem præcipue: inductio, enthymema, exemplum, syllogismus hypotheticus, syllogismus disjunctivus; dilemma, & sorites.

Quid est inductio?

Inductio est argumentatio, in qua ex individuis colligitur species, aut ex speciebus genus, aut ex partibus totum.

Illustra singulos modos singulis exemplis.

Ex individuis species colligitur hoc modo; *Abel, Enoch, Noach, Abraham, Isaac, Iacob, Ioseph, Moses, Gedeon, Samuel, David, aliiq; multi, non aliter placuerunt Deo, quàm per fidem: ergò sine fide impossibile est Deo placere.* Ex speciebus colligitur genus hoc modo; *Milites, mercatores, agricola, opifices, homines eruditi, non sunt suâ sorte contenti: ergò nullum genus hominum suâ sorte contentum est.* Ex partibus colligitur totum hoc modo; *Libri Moysis, Prophetarum, Evangelistarum & Apostolorum sunt divinæ autoritatis: ergò tota S. Scriptura est divinæ autoritatis.*

An in inductione omnia individua, species, aut partes enumerandæ sunt?

Aut enumerandæ sunt, aut utendum hac aut simili formulâ; Nec potest dari dissimile exemplum.

Quomodo evertitur inductio?

Cùm dissimile cæteris exemplum exhibetur; vulgò instantia dicitur.

Quid est enthymema?

Enthymema est syllogismus alterâ propositione truncatus; ut, *Avarus eget; ergò avarus non est dives: Qui non peccat, non est autor peccati; ergò Deus non est autor peccati.*

Unde

Unde dignoscitur utra duarum propositionum desit?

Ex conclusione, five consequente. Si enim in antecedente exprimitur subjectum consequentis, deest major, ut fit in primo exemplo: si in antecedente exprimitur prædicatum consequentis, deest minor, ut fit in altero exemplo.

Quomodo perficiuntur ejusmodi enthymemata?

Additâ propositione quæ desideratur.

Quid si neque subjectum neque prædicatum consequentis sit in antecedente?

Tunc deest major: eâque additâ fit syllogismus hypotheticus. Sit enthymema, *Virtus est optanda; ergo vitium est vitandum*: adjiciatur hæc major hypothetica, *Si virtus est optanda, tum vitium est vitandum*, & erit plenus syllogismus hypotheticus.

Quid est exemplum?

Exemplum est inductio imperfecta, in qua ex uno singulari colligitur universale, ut ex eo aliud singulare sequatur; ut, *Bellum Syllæ & Marii fuit Reipublicæ perniciosum; ergo bella civilia sunt Reipublicæ perniciosa; ac proinde etiam bellum Caesaris & Pompeii.*

CHAP. XII.

Quid est syllogismus hypotheticus?

Cujus major est hypothetica; ut, *Si Deus est, mundus regitur providentiâ: Atqui Deus est: Ergo mundus regitur providentiâ.*

Annon etiam minor potest esse hypothetica?

Ita: sed hoc fit, cum ipsa quæstio est hypothetica.

Unde dignoscitur, sintne syllogismi hypothetici boni, an vitiosi?

Ex hac regulâ: Ex syllogismis hypotheticis ii boni sunt, qui procedunt à positione antecedentis ad positionem consequentis, vel à remotione consequentis ad remotionem antecedentis; ut, *Si homo est animal, sentit: Atqui homo est animal: Ergo homo sentit.* Vel sic, *Si lapides vivunt, nutriuntur: Atqui lapides non nutriuntur: Ergo lapides non vivunt.* Qui procedunt à remotione antecedentis ad remotionem consequentis, vel à positione consequentis ad positionem antecedentis, vitiosi sunt; ut, *Si planta est animal, vivit: Atqui planta non est animal: Ergo planta non vivit.* Vel sic, *Si plan-*

ta est animal, planta vivit: atqui planta vivit: ergò planta est animal.

Quomodo revocantur syllogismi hypothetici ad categoricos?

Syllogismi hypothetici, in quibus idem est subiectum antecedentis & consequentis, fiunt categorici abjectâ conditione *Si*, & communi antecedentis & consequentis subiecto.

Quid si non subiectum, sed prædicatum antecedentis & consequentis idem sit?

Major hypothetica convertenda est in relativam. Ex. gr. sit syllogismus hypotheticus, *Si Abraham justificatus est ex fide, nos quoque ex fide justificabimur: Atqui Abraham, &c. fiatq;* hujus syllogismi major relativa, erit syllogismus categoricus, hoc modo, *Quo modo Abraham justificatus est, eodem modo nos justificabimur: Atqui Abraham, &c.*

Quid si neque subiectum neque prædicatum antecedentis & consequentis idem sit?

Syllogismus hypotheticus non poterit fieri categoricus: Ex. gr. hic syllogismus, *Si ex lege justitia, Christus frustra mortuus est: Sed ex lege justitia: Ergò, &c.* nullo modo fieri potest categoricus.

Quid est syllogismus disjunctivus?

Cujus major est propositio disjunctiva.

Quotuplex est?

Duplex: bimembris, vel plurium membrorum.

Quomodo formatur bimembris?

Vel à positione alterutrius membri proceditur ad everfionem alterius; vel ab everfione alterutrius ad positionem alterius; ut, *Aut dies est, aut nox; sed dies est, ergò non est nox: vel, sed nox est, ergò non est dies: vel, sed non est dies, ergò nox: vel, sed non est nox, ergò dies.*

Quomodo formatur syllogismus disjunctivus plurium membrorum?

Cæteris membris sublati, quod reliquum est, concluditur; ut, *Aut ver est, aut æstas, aut autumnus, aut hyems: Sed neque ver est, neque æstas, neque hyems: Ergò est autumnus.*

Quid si ambobus vel omnibus membris sublati, tollitur totum?

Est syllogismus ab enumeratione partium: ut, *Qui injuri-*
am

am facit, id facit aut furto aut adulterio, aut contumelia, aut alio aliquo modo: Atqui nemo suo furatur, nemo seipsum adulteratur, nemo seipsum afficit contumelia: Ergo nemo sibi facit injuriam.

CAP. XIII. & XIV.

Quid est dilemma?

Dilemma est argumentatio duorum membrorum, quorum utrumque adjunctum habet incommodum; ut, *Si ducis da e't uxor, aut pulcra ducenda est, aut deformis. Si ducis, erit solitudini; si deformem, erit fastidium.*

Quot modis est dilemma infirmum?

Duobus modis: nempe si membra non sunt immediatè opposita, aut si non satis gravi incommodo contingunt. Utroque modo infirmum est dilemma propositum. Nam inter pulcritudinem, & extremam deformitatem, medium aliquod interpositum est; & non necesse est aut pulcritudo solitudinem marito, aut deformitas fastidium pariat.

Quid est sorites?

Sorites est argumentatio constans multis propositionibus ità collocatis, ut prædicatum propositionis præcedentis fiat subjectum sequentis, indèque prædicatum ultimum de primo subjecto concludatur; ut, *Quos Deus præcognovit, eos prædestinavit; quos prædestinavit, vocavit; quos vocavit, justificavit; quos justificavit, glorificavit: hinc collige, Ergo quos præcognovit, glorificavit.*

CAP. XV.

Atque hætenus de syllogismo absolute ac ratione formæ considerato. Quomodo dividitur syllogismus ratione materiæ?

IN syllogismum dialecticum, apodicticum sive demonstrativum, & sophisticum sive fallacem,

Quid est syllogismus dialecticus?

Syllogismus dialecticus est syllogismus generans opinionem, aut alium quemlibet assensum præter scientiam.

Quænam spectanda sunt in syllogismo dialectico?

Quæstiones sive problemata, propositiones; & inventio argumentorum.

Quales debent esse quæstiones sive problemata dialectica ?

Nihil refert sive vera sint sive falsa, sive probabilia sive paradoxa, sive necessaria sive contingentia ; modò pietati, bonis moribus, aut sensui communi non adversentur. Neque enim disputandum est, *an Deus sit colendus, an parendum sit magistratui* ; quia illud pietati, hoc bonis moribus contrarium est : neque, *an nix sit alba*, quia illud cum sensu pugnat.

Quotuplicia sunt problemata ?

Duplicia : alia realia, alia notionalia.

Quæ vocas realia ?

In quibus attributum est vera res : ut, *An Logica sit ars ? An justificemur operibus ?*

Quæ notionalia ?

In quibus attributum est notio aliqua aut terminus artis ; ut, *An ars sit genus Logicæ ? An opera sint causa justificationis nostræ coram Deo ?*

Quomodo dividuntur problemata realia ?

In absoluta & comparata.

Quæ vocas absoluta ?

In quibus quæritur, an attributum subjecto conveniat, necne ; ut, *An gloria sit in bonis numeranda.*

Quæ comparata ?

In quibus, propositis duobus pluribûsve subjectis, quæritur utri magis, vel cui maximè conveniat attributum : vel in quibus, propositis duobus pluribûsve prædicatis, quæritur, utrum magis, vel quodnam maximè subjecto insit ; ut, *Sitne virtus an gloria magis in bonis numeranda ? Fueritne Alexander fortior an temperantior ?*

Quales debent esse propositiones dialecticæ ?

Propositiones dialecticæ debent esse certæ, aut saltem probabiles, non paradoxæ.

Quid est probabile ?

Quod videtur omnibus, vel plerisque, vel sapientibus ; atque iis vel omnibus, vel plerisque, vel nobilissimis ac celeberrimis.

Quid est paradoxum ?

Quod verum est præter opinionem vulgi.

CAP. XVI.

*Quænam requiruntur ad inventionem argumentorum
dialecticorum ?*

Locus & regula.

Quid est locus ?

Locus est sedes & nota quædam communis, cujus admonitu invenitur argumentum.

Quid est regula sive canon ?

Canon est propositio continens rationem consequentiæ syllogismi dialectici.

Quomodo dividuntur argumenta dialectica ?

In artificialia, & inartificialia, sive testimonia.

*Unde petuntur argumenta artificialia ad confirmanda
aut refellenda problemata notionalia ?*

Ex definitione aut proprietate notionis sive affectionis, de quâ in problemate quaeritur. Sic probes, *Aerem non esse genus venti : quia aer non prædicatur de vento in quaestione, quâ quaeritur quid sit.*

*Unde petuntur argumenta artificialia ad confirmanda aut
refellenda problemata realia ?*

Ex affectionibus subjecti aut prædicati. Ea enim sunt horum argumentorum loci.

*Quomodo dividuntur argumenta artificialia pro-
blematum realium ?*

In absoluta & comparata.

Quomodo dividuntur absoluta ?

In consentanea & dissentanea.

Quænam dicuntur argumenta consentanea ?

Quæ cum aliquâ parte quaestionis consentiunt.

Quotuplicia sunt ea ?

Duplicia : vel enim à nomine sumuntur, vel à re ipsa.

*Quot sunt loci argumentorum, quæ sumuntur
à nomine ?*

Duo : etymologia sive notatio, & conjugata.

*Quot sunt loci argumentorum, quæ sumuntur
à re ipsa ?*

Novem ; definitio, genus, species, totum, pars, causa, causatum, subjectum, & adjunctum.

Quot sunt loci argumentorum dissentaneorum?

Quinque : disparata , contraria, relativè opposita, privativè opposita, & contradicentia.

Quot sunt loci argumentorum comparatorum?

Quinque etiam : majus, minus, par, simile, & dissimile.

Quotuplicia sunt testimonia?

Duplicia : alia divina sunt, alia humana.

CAP. XVII, & XVIII.

Ostende aliquot exemplis, quomodo ex his locis argumenta peti debeant ad confirmanda aut refellenda problemata realia.

Cum sic argumentor ; Non est de meo tuum, ergò non est mutuum, argumentum petitum est ab etymologia : Homo sum, humani nihil à me alienum puto, à conjugatis : Logica est habitus cum recta ratione effectivus, ergò est ars, à definitione : Homo debuit contemplari cœlestia , ergò debuit creari erecto corpore, à fine : Fugit, ergò est in culpa, à signo : Fustus servat leges ; ergò injustus transgreditur leges, à contrariis : Deus dat vitam hominibus, ergò dabit victum , à majori. Canones ad unumquemque locum pertinentes peti debent ex Institutionibus plenioribus.

CAP. XIX.

Hæc sunt exempla problematum absolutorum : declara porro quomodo confirmentur aut refellantur problemata comparata.

Argumenta ad confirmanda aut refellenda problemata comparata petuntur ex iisdem locis, canonibus absolutis (quatenus illud fieri potest) in comparatos commutatis : Ex. gr. sicuti probari potest, Deum esse bonum, quia ejus opera sunt bona, ducto argumento ab effectis ; ita quoque concludi potest, Deum infinitis modis meliorem esse creaturis, quia illius opera infinitis modis meliora sunt quam opera creaturarum. Quia autem canones absoluti non semper possunt mutari in comparatos, necesse est singulis locis adjungi canones peculiare, quibus comparata problemata probanda sint : sed hi etiam ex Institutionibus petendi sunt.

CAP. XX.

Cum ergò satis dictum sit de syllogismo dialectico, pergamus ad demonstrationem.

Quid est demonstratio?

Demonstratio est syllogismus scientiam pariens.

Quomodo dividitur demonstratio?

In demonstrationem τὴ δὴν, sive cur res sit, & demonstrationem τὴ ὅτι, sive quòd res sit.

Quid est demonstratio cur res sit?

Quæ non solum probat rem esse aut non esse, sed etiam reddit causam, cur res sit, aut non sit.

Quid est demonstratio quòd res sit?

Quæ solum probat rem esse aut non esse.

Unde petita est differentia harum specierum?

A fine. Finis enim demonstrationis est scientia: atqui scientia dividitur in scientiam τὴ δὴν, sive cur res sit, & in scientiam τὴ ὅτι, sive quòd res est.

Quid est scientia cur res sit.

Est cognitio diánoetica, quâ cognoscimus causam propter quam res est, esse illius rei causam, nec posse eam rem aliter se habere.

In quo differt hæc scientia à scientia quòd res sit?

Scientia τὴ ὅτι, sive quòd res sit, non gignitur ex causa propter quam res est, hoc est, ex causa proxima; sed ex effectu, aut ex causa tantum remota.

CAP. XXI.

Quot sunt partes demonstrationis cur res sit.

TRes: subjectum, affectio demonstranda, & causa quæ est medium demonstrationis. Ex subjecto & affectione constat quæstio, ex causa cum subjecto & affectione seorsum combinata, fiunt præmissæ, sive principia demonstrationis.

Quænam sunt in his spectanda?

Præcognitiones & conditiones.

Quænam sunt præcognoscenda?

De tribus terminis, sive partibus demonstrationis, præcognoscendum est, quid significet nomen: de subjecto & causa, etiam an sint; de principiis, quòd vera sunt; de affectione demonstratur, quòd sit; deque conclusionem, quòd vera sit.

CAP. XXII.

Quotuplices conditiones spectandæ sunt in demonstratione ?

TRiplices : aliæ ad quæstionem pertinent, aliæ ad causam sive medium, aliæ denique ad præmissas sive principia.

An igitur non omnis quæstio admittit demonstrationem ?

Non omnis ; sed ea solum, quæ vera est , & veritatis suæ certam causam habet , veluti cum accidentia propria prædicantur de subiecto ; ut, *Homo est capax scientiæ : Luna patitur eclipsin : Humor oculi crystallinus debet esse coloris expers.*

Quænam igitur respuunt demonstrationem ?

Primò propositiones, in quibus definitio aut partes definitionis prædicantur de definito : ut, *Homo est animal, aut rationalis : virtus est habitus, &c.* Ejusmodi enim propositiones immediatæ sunt, nullamque causam habent suæ veritatis. Deinde, propositiones, in quibus accidentia fortuita & mutabilia, prædicantur de subiecto ; ut, *Homo ambulat, ægrotat, &c.* hæc enim certam causam non habent.

Quale debet esse medium demonstrationis ?

Causa proxima effectionis.

Quid vocas hoc loco causam proximam ?

Quâpositâ , effectum ponitur ; & quâ sublatâ, tollitur : atque adeò in quâ mens acquiescit.

Ex quo genere causarum petitur hæc causa proxima ?

Ex genere causæ efficientis aut finalis.

Quomodo dividitur causa efficiens proxima, quæ medium demonstrationis esse potest ?

In internam & externam.

Quam vocas causam efficientem internam ?

Quæ est in eodem subiecto, in quo est effectum.

Quam vocas externam ?

Quæ non est in eo subiecto, in quo est effectum.

Da exempla demonstrationis ; ac primò exemplum à causa efficiente interna.

Omne rationale est capax scientiæ :

Omnis homo est rationalis :

Ergò omnis homo est capax scientiæ.

*Da exemplum demonstrationis à causa efficiente
externâ.*

Quod à solis radiis, objectâ terrâ, nequit illustrari, id patitur eclipsin luminis à sole accepti :

Luna nequit à solis radiis, objectâ terrâ, illustrari :

Ergò luna patitur eclipsin, &c.

Da exemplum à causâ finali.

Quod debet colores omnes admittere, id debet esse expers coloris :

Humor oculi crystallinus debet omnes colores admittere :

Ergò humor oculi crystallinus debet esse expers coloris.

*An medium demonstrationis non debet esse causa
proxima subjecti ?*

*Fit quidem aliquando, ut causa efficiens proxima prædica-
tî, sit etiam forma subjecti ; verùm illud neque necessarium
est, neque perpetuum.*

CAP. XXIII.

*Quot sunt conditiones spectandæ in præmissis sive princi-
piis demonstrationis ?*

Quinque. Requiritur enim primò, ut sint necessariò vera,
& quidem necessitate summâ ac reciproca : deinde, ut
sint immediata atque prima : tertio, ut sint causa conclusio-
nis : quartò, ut sint notiora : quintò, ut sint priora con-
clusionem.

Quenam proprietas sequitur ex his conditionibus ?

*Ut principia sint δι' ἑαυτῶν ἀποδεικνύμενα, id est, propria ei rei
quæ demonstratur, hoc est, neque heterogenea, neque com-
munia.*

Quenam dicuntur principia heterogenea ?

*Quæ ex aliâ scientiâ petita sunt ; veluti, si quis ad proban-
das quæstiones Physicas adhibeat principia Mathematica.*

Quenam vocas communia ?

Quæ pluribus scientiis accommodari possunt.

Quomodo dividuntur principia ?

In axiomata & theses.

Quid est axioma ?

*Axioma est principium, cujus veritas, cognitâ significatione
voca-*

vocabulorum, à nemine potest ignorari ; ut , *Nihil potest simul esse & non esse : Totum est majus sua parte.*

Quid est thesis ?

Thesis est principium, cujus veritas non ex sola vocabulorum significatione cognita, sed ex sensuum judicio, aut qualicumque declaratione innotescit.

Quotuplex est thesis ?

Duplex : definitio & hypothesis.

Quid est definitio ?

Definitio est, quâ quid res sit enunciamus ; ut, *Corpus naturale est, quod constat materiâ & formâ : Natura est principium, & causa motûs & quietis, ejus, in quo est primo, per se, & non per accidens.*

Quid est hypothesis ?

Quâ, an res sit, aut non sit, enunciamus ; ut, *Esse animam, Deum, &c. A quolibet puncto ad quodlibet punctum duci posse rectam lineam.*

CAP. XXIV.

Quotuplex est demonstratio τὸ δῆλον, sive quod res sit ?

Duplex : alia enim est ab effectu, alia à causa remota.

Quam vocas demonstrationem ab effectu ?

Quæ ex effectu sensibili causam colligit ; veluti, si quis solito seriùs expectatus, videt parietes cubilis sui à sole collustrari, indèque colligit, solem jamdudum ortum esse.

Quam vocas demonstrationem à causa remota ?

Quæ ex causa remota colligit effectum non esse ; ut, *Plantæ non habet animam sensitivam ? ergo non respirant.*

Quid est discriminis inter has duas species demonstrationis ?

Demonstratio ab effectu potest esse affirmata & negata, quia effectum cum causâ proximâ recipitur ; eoque posito, causa proxima ponitur, & sublato tollitur : at demonstratio à causâ remotâ, debet semper esse negata. Cum enim causa remota latior sit effectu, fit quidem, ut eâ sublatâ effectum tollatur ; sed non ut eâ positâ effectum etiam ponatur. Rectè colligitur, *Plantas non respirare, quia non habent animam sensitivam : sed non sequitur, Omnia animalia respirare, quia habent animam sensitivam.*

CAP. XXV.

Atque hæc de syllogismo dialectico & apedictico. Quid est syllogismus sophisticus sive fallax?

Qui fictâ specie syllogismi dialectici errorem gignit.

CAP. XXVI.

Quotuplicia sunt sophismata?

Duplicia: alia sunt in voce, alia in re.

Quot sunt loci sophismatum eorum quæ in voce consistunt?

Sex: homonymia, amphibolia, compositio, divisio, prosodia sive accentus, & figura dictionis.

Quid est sophisma homonymiæ?

Quod oritur ex unius dictionis ambiguitate; ut, *Finis rei est illius perfectio: Mors est finis vitæ: Ergo mors est vitæ perfectio.*

Quomodo solvuntur hæc sophismata?

Distinctione vocis ambiguae. Ex. gr. in proposito sophismate vox *finis* in maiore significat causam finalem; in minore, extremum.

Quid est sophisma amphiboliæ?

Quod oritur ex ambiguo sensu orationis, cujus singulæ voces carent homonymiâ; ut, *Qui sunt domini sui, sunt sui juris: Servi sunt domini sui: Ergo servi sunt sui juris.*

Quomodo solvuntur hæc sophismata?

Distinctiones orationis ambiguae. Ex. gr. voces *domini sui* sunt pluralis numeri in maiore propositione prolati exempli; in minore, sunt singulares numeri.

Quid est sophisma compositionis?

Quod oritur ex conjunctione eorum quæ dividenda sunt; ut, *Duo & tria sunt par & impar: Quinque sunt duo & tria: Ergo quinque sunt par & impar.*

Quid est sophisma divisionis?

Quod oritur ex divisione eorum quæ coniungenda sunt; ut, *Planetae sunt septem: Sol & luna sunt planetae: Ergo sol & luna sunt septem.*

Quomodo solvuntur hæc sophismata?

Distinctione diversorum sensuum, quos habet oratio pro diversa

diversa partium compositione aut divisione. Ex. gr. in priori exemplo, *duo & tria* sumuntur divisim in maiore ; in minore, conjunctim. In altero exemplo sumitur vox *Planeta* collectivè in maiore propositione ; in minore, distributivè.

Quid est sophisma prosodia ?

In quo eodem modo pronunciantur, quæ scribuntur diversimodè ; aut pronunciantur diversimodè, quæ scribuntur eodem modo ; ut, *Omnis equus est bestia : Omnis justus est æquus ; Ergò omnis justus est bestia*. Similiter si quis confundat leporem cum lepore, amare cum amare, malum cum malum.

Quomodo solvuntur hæc sophismata ?

Cùm ostenditur, aut eodem modo pronunciari, quæ scribuntur diversimodè ; aut pronunciari diversimodè, quæ scribuntur eodem modo.

Quid est sophisma figuræ dictionis ?

In quo, ex dictionum similitudine, colligitur ea dem iis accidentia, aut etiam significationem convenire. Ut, si quis ita colligat, *poeta* esse foeminini generis, quia *nota* est foeminini generis : aut *ardere*, *vapulare*, esse actiones ; quia *docere*, *verberare*, sunt actiones.

Quomodo solvuntur hæc sophismata ?

Ostensâ diversitate accidentium aut significationis in vocibus similibus. Nam licet *poeta* & *nota* terminatione conveniant, non tamen sequitur, ut ejusdem generis sint : non sequitur etiam *verberare* & *vapulare* esse ambo significationis activæ, quamvis sint voces terminatione simillimæ vocibus activis.

CAP. XVII.

Quot sunt loci sophismatum eorum quæ in rebus sunt ?

Septem : accidens, dictum simpliciter & dictum secundum quid, ignoratio elenchi, consequens, petitio ejus quod in questione est, (vulgo, *petitio principii*) non causa pro causâ, & plures interrogationes.

Quid est sophisma accidentis ?

Cùm colligitur subjecto convenire, quicquid dicitur de prædicato ; ut, *Homo est species : Socrates est homo : Ergò Socrates est species*. *Mus rodit panem : Mus est syllaba : Ergò syllaba rodit panem*.

Quo.

Quomodo solvuntur hujusmodi sophismata ?

Cum ostenditur id, quod de subiecto colligitur, per accidens de prædicato dici, ut in priori exemplo fit; aut ipsum prædicatum per accidens dici de subiecto suo, ut fit in exemplo posteriori, Ex.gr. quamvis Socrates sit homo, & homo sit species; non tamen sequitur, ut Socrates sit species: quia *speciem esse*, dicitur de homine per accidens. Similiter, quamvis mus sit syllaba, & mus rodatur panem; non tamen sequitur, ut syllaba rodatur panem: quia *syllabam esse*, convenit muri per accidens, ac ratione nominis; non ratione essentiae.

Quid est sophisma à dicto simpliciter ?

Cum ex eo, quod verum est simpliciter, colligitur aliquid verum esse secundum quid; ut, *Dextra non est abscindenda; ergò nè tum quidem abscindenda est, cum eam invaserit gangrena: Homo est mortalis; ergò & animal hominis mortalis est.*

Quid est sophisma à dicto secundum quid ?

Cum ex eo, quod secundum quid verum est, colligitur aliquid simpliciter verum esse; ut, *Vinum nocet febricitanti; ergò vinum est noxium, ideoque fugiendum: Homerus est Poeta; ergò Homerus est.*

Quomodo solvuntur hæc sophismata ?

Ostenso discrimine ejus, quod simpliciter, & quod secundum quid dicitur.

Quid est sophisma ab ignoratione elenchi ?

Cum conclusio videtur contradicere assertioni respondentis, sed non contradicit, propter conditionem aliquam contradictionis omissam; ut, si quis probaturus, *Christum non esse Dominum Davidis*, concluderet, *Christum esse filium Davidis*, peccaret ignoratione elenchi; quia *Dominum & filium esse* non tribuuntur Christo secundum idem. Nam Dominus Davidis est secundum divinam; filius, secundum humanam naturam.

Quomodo solvuntur hæc sophismata ?

Ostendendo, quænam conditio contradictionis omissa sit.

Quid est fallacia consequentis ?

Cum aliqua enunciatio ex altera colligitur, ex qua non sequitur.

Quot modis contingit illud ?

Quatuor modis: primo, cum universalis affirmans conver-

titur

titur simpliciter ; ut si quis, quia *omnis adulator blandus est*, putet *omnem blandum esse adulatorem*. Secundò, cùm ex universalis affirmante colligitur universalis negans ; ut, *Quicquid genitum est, habet principium* ; ergò quod non est genitum, non habet principium. Tertiò, cùm minor est negans in prima figura, aut, quod eòdem redit, cùm ex remotione antecedentis colligitur remotio consequentis. Quartò, cùm utraque præmissarum affirmans est in secunda figura, aut, quod eòdem redit, cùm ex positione consequentis colligitur positio antecedentis.

Ejusmodi paralogismi non videntur esse sophismata, quia apertè peccant in regulas syllogisticas.

Ità est : sed sophistæ solent vitium formæ occultare, aut alterius præmissæ suppressione ; ut, *Crispus est blandus, ergò est adulator* : vel ambagibus verborum ; ut, *Qui dicit te esse animal, dicit verum* : Atqui qui dicit te esse asinum, dicit te esse animal : Ergò qui dicit te esse asinum, dicit verum. Hæc enim argumentatio perinde se habet, ac si sic ltrueretur ; *Tu es animal : Asinus est animal : Ergò tu es asinus* : quæ est argumentatio ex duabus affirmantibus in secunda figura.

Quomodo solvuntur hæc sophismata ?

Citatâ regulâ, in quam peccat illatio sophistica.

Quid est sophisma petitionis ejus quod ab initio in quæstione est ?

Cùm aliquid probatur per seipsum, aut per aliquid, quod æquè ignotum est ; ut, si quis probet, *Animam humanam esse ex traduce, quia generatur ex semine parentum* : aut, *Visionem fieri emissionem, quia non fit receptione*.

Quomodo solvuntur sophismata hujus loci ?

Ostendendo medium non esse diversum à quæstione, aut saltem non esse notius quæstione.

Quid est sophisma non causæ pro causa ?

In quo id, quod causa non est, aut causa per accidens, pro causa vera, ac per se, obtruditur ; ut, *Vinum inebriat* ; ergò *exterminandum est ex republica*.

Quomodo solvuntur sophismata hujus loci ?

Designatione veræ causæ, à qua effectus per se dependet. Ex gr. in sophismate prolato, neganda est consequentia ; quia vinum

num non est vera causa ebrietatis, sed hominum intemperantia vino abutentium.

Quid est sophisma plurium interrogationum?

Cum duæ pluresve interrogationes ita proponuntur, ut unius speciem præ se ferant; veluti si quis quærat, *Estne mundus perfectus & æternus?*

Quomodo solvuntur hujusmodi sophismata?

Distinctione questionum, & responsione ad singulas seorsum applicatâ. Ex. gr. ad interrogationem jam propositam, non debet responderi, *Ita*, aut *Non*; sed *mundum perfectum esse, non æternum.*

C A P. XXVIII.

Atque hæc de syllogismo. Quid est methodus?

Methodus est apta dispositio rerum eodem pertinentium, ut quàm optimè facillimèque intelligantur, & memoriæ quàm tenacissimè inhæreant.

Quidnam requiritur ad eam rem?

Ut præmittantur, quæ faciunt ad cognitionem sequentium, aut saltem, quæ cæteris faciliùs intelliguntur.

Quomodo dividitur methodus?

In naturalem & arbitrarium.

Quam vocas naturalem?

In quâ servatur ordo naturæ, & cognitionis nostræ distinctæ.

Quot sunt in naturali methodo observanda?

Duo potissimum.

Quænam?

Primò, ut omnes partes sint homogeneæ, hoc est, ut non commisceantur, quæ ad diversas disciplinas, aut ad diversas ejusdem disciplinæ partes pertinent. Secundò, ut progressus instituat ab universalibus ad particulariora, utque partes aptis transitionum vinculis connectantur.

Quomodo dividitur methodus naturalis?

In syntheticam & analyticam.

Quid est methodus synthetica?

Quæ progreditur à principiis simplicissimis ad ea quæ ex illis principiis componuntur.

Ubi habet hæc methodus locum ?

In disciplinis speculativis ; Physicâ, Mathematicâ, & Metaphysicâ.

Quid est methodus analyticâ ?

Quæ factò initio à fine, progreditur ad media proxima, & ab his ad remotiora, donec ventum est ad prima ac simplicissima.

Ubi habet hæc methodus locum ?

In artibus & disciplinis practicis : ut in Grammaticâ, Rhetoricâ, Logicâ, Medicinâ, Architectonicâ : item in Ethicâ, Politicâ, & Oeconomicâ.

Quid est methodus arbitraria ?

Quæ relicto ordine naturæ, accommodata est ad captum nostrum.

Ubi habet hæc methodus locum ?

In Oratoriâ & Poesi. Oratoribus enim & poetis propositum est, auditorem lectorémve movere. Ad eam rem opus est crypsi, quæ potissimum consistit in omissione, additione, & inversione. Omitti solent, quæ nocitura videntur dicenti, aut tædium paritura auditoribus, etiamsi ad causam videantur pertinere. Tum multa addenda sunt, quæ ad causam magnopere non faciunt, ut auditorem lectorémve reficiant, ac detineant. Omnia denique miro artificio invertenda sunt, nè ars ab auditore animadversa suspecta sit, & assensum impediat.

FINIS.

II.

Me-

&
cif.

he-
câ,

um

ofi-
est
&
aut
tur
no-
eti-
ars
t.